



155899

1

Mag. St. Dr.

G



*Liber  
Baranowski.*



Em. 334. 1668.



Abiör Baranowskiiego: 628

5

Em. 4. VIII. Nr. 334.

25. XVII. wojnowe.

F

155899  
I

x







XVII 41.

ANDREÆ MAXIMILIANI FREDRO  
CASTELLANI LEOPOLIENSIS  
MILITARIUM,  
SEU  
AXIOMATUM BELLII  
AD  
HARMONIAM TOGÆ ACCOMMODATORUM  
LIBRI DUO.

Accessere minutiora quædam, ejusdem  
Authoris scripta.





*Laus uni, in Sanctissima Trinitate DEO,*

Et uni

*Virgini DEI Matri Honor.*

UNIV. MAGELL.  
GRAGOVIANIS

ANDREÆ MAXIMILIANI FREDRO  
CASTELLANI LEOPOLIENSIS.  
MILITARIUM,

SEU

AXIOMATUM BELLI  
AD HARMONIAM TOGÆ ACCOMMODATORUM

LIBRIDUO.

*Elenchus Punctorum* LIBRI PRIMI

- I. De Potentia populi.
- II. De Ærario.
- III. Quid suscepto bello agendum.
- IV. De Itinere exercitus.
- V. De Castris & exercitio.
- VI. Quomodo evocandus hostis cunctabundus.
- VII. Quid ante prælium agendum.

*Elenchus Punctorum* LIBRI SECUNDI.

- I. De Acie & prælio, & fervore belli.
- II. Quid agendum post prælium, vel Victoriā, vel acceptam cladem. Post amissas, vel partas Provincias.
- III. De obsidionibus castrorum, civitatum, item defensionibus, & quæ circa versantur.
- IV. De Maritimo bello in genere.
- V. De Architectura Militari Mechanica.



ANDREÆ MAXIMILIANI FREDRO  
CASTELLANI LEOPOLIENSIS  
MILITARIUM,

Ad Harmoniam Togæ accommodatorum,

LIBER I.

*Proloquium.*



Orationes meæ, quas nuper publica lux aspexit, non insufficienter suggessisse visa, monito militari, quæ incipiendo, gerendo, & finiendo bello, opportuna; Sed cum, pro varia bellandi ratione, momenta rerum expenderem singula, en iterum, velut novas justæ militiæ regulas, longior rerum praxis, veriùs per modica suggessit, quàm ut ego scriberem studiosè. Idquæ non eam ob causam annotavi, ut hæc mea, ad forenses Lectorem deferrentur, sed ut mihi soli, meisque (si DEO placet) usui Reipublicæ succreturis filiis, legendo servirent. Vos ego carissimi filii, monitos velim, ut hæc mea, sanâ mente, atque ideò, recto sensu, accipiatis, nihil enim tam cautè, tamquæ rectè scribi potest, quod non retorquere in devium,

ma-



malignitas possit, nequè satis, optimus quisquè scriptorum provideat, aut caveat satis, eam animorum pestem, si præsertim incurrat in Lectores, qui non ut apes in floribus, sed araneæ sunt, sic illi, venena tantum exsugunt verborum. Quomodocunquè hæc mea, quisquè interpretatus fuerit, penes eundem sit. Ego testor Deum & conscientiam, me non accendere, novas belli faces, nec quemquam irritare, in arma impia; verum, (uti omnia soleo) ad gloriam DEI, hæc direxi, ut iustis armis, sit suus ordo, tum nè bellum, extrà harmoniam *togæ* fiat, à qua pleriquè bellatorum absunt, dum militiam colunt, *Togam* contemptui habent, Castris boni, *Statui* periculosi, pacatorum, ac præsertim *Civilium* ignari, eoquè, pro ferocia insolentes. Spero verò, defensionem S. Romanæ Ecclesiæ, hæc mea aliquando profutura, ad quam vos *Filii mei*, *Togâ* & *Bello*, pro posse tuendam, studiosè voco, aut non facturis, sanio rem mentem precor.

## PUNCTUM PRIMUM

DE

## POTENTIA POPULI.

POTENTIA RERUM PUBLICARUM  
VERSATUR

*Circa Authoritatem populi, Populositatem, Privatorum fortunam, Annonam, Arma, Armorum exercitium, & Aerarium publicum.*

PRIMA PARS

POTENTIÆ RERUM PUBLICARUM,  
Authoritas.

Uthoritas populi parit æstimationem genti; difficulter iis adversamur, quos æstimamus. Romani, postquam imposuere suis rebus opinionem, timebantur potius, quàm timebant, arbitri foederum reliquarum gentium, suarum rerum securi.

*Authoritatem genti parant.*

Uvat instaurari publica gymnasia, bonis magistris refferta, honestis artibus ut imbuant juventutem populi, Reipublicæ dignitati & commodo, parandis ingeniis, decorâ morum honestate imbuendis.

Publici Historiographi habendi, rectâ prudentiâ, acta gentis, bonaquè Civium nomina, posteritati transmissuri ad gloriam, ignavorum ad reprehensionem, indè bonis calcar ad meliora, malis ad pejora frenum, amore gloriæ, vel metu ignominiae. Posteriora super

B

hæc



hæc tempora populi, erudiuntur, ex antea actis præteritorum, quid in præsens mutari, quid corrigi debeat; quid antea successit in pejus, quid in melius. Nec sua tantum scire, sed externa nosse profuerit. Prout (nè loquar altiora) parandæ rebus in humanis experientia arcana; Occidentalibus populis usitatum, ut è diversis partibus orbis, rerum gestarum, diurna nova, passim impressa, per urbes, legenda, venum exponant, quod in nostra *Polonia*, summo in publicum fructu, hodie (miror cur *Cracoviæ*, & *Varsoviæ*, nec alibi passim) usurpari coeptum; Licet quidem raro vera scitu, populo ferant, *fabulam utique habere partem veri*. Quo vero in numero commodorum reponatur, cum nomina Provincia- rum, locorum, urbium, personarum, series deinde temporum & rerum, velut à præsentis & practica Historia, sensim mentibus imprimuntur. Exinde animus, ex obscuro ignorantia in lucem prodiens, seipsum noscit, dediscit ignaviam, incipit liberius spectare suum coelum, & subjectum orbem, immò, aliena mirari definit, dum sensim alta spirare contendit. Non cuilibet præterea vacat peregrinari, aut in Historiis antiquorum versatum esse, pro- fit saltem præsentem Historiam nosse, à condimento novæ curiositatis, non ea tantum, quæ circum se videri, aut manu è proximo palpari possunt, sed in ulteriora porrigendo mentem, velut in orbis speculam ascendere, resque gentium spectare, & de iis judicare, sibi quoque, quod sequendum, quod vitandum, statuere. Nec causam reperio, quare in Occidentalibus populis, urbanum vulgus, sapiat supra vulgi nostri ruditatem, quam, dum quæ in orbe fiunt, beneficio tabellariorum, huc illuc commean- tium, & novorum, passim per fora narrentur; hæc, eà commoditate sciendi sublata, extra pomeria sua, mens vulgi sese extendere vix possit, & sciat.

Vestitus gentis (dum modò comptus) item mores Patrii, si cum honesto conveniant, extra Patriam, constanter, pro auctoritate gentis retinendi, mutati, arguunt inconstantiam, aut exprobrant inhonestatem. Idè, exotica sine admiratione spectari, sua retineri, immò æstimari oportuerit, ut exteris impouatur, nobis nostra esse meliora. Nam verè, gentium ritus, non prout sibi per honestatem insunt, sed quantum populo imponitur, ut repudiet vel

vel sequatur, æstimantur. Hispani, nusquam in peregrinorum mores migrant, quod non superbiæ, sed attribueris prudentia, qui sua constanter retinent, dum sunt honesta, neque simias agunt, exoticorum incuriosi. Summè datum gravitati nostri Ossolinskii, ad Urbanum VIII. Pontificem legati: priscam enim Romanorum gravitatem, in urbem reduxisse visus, cum vestes Polonorum (togæ in morem) talares, cum morum masculam gravitatem, nihilquè molle, aut effeminatum, in Polonis Roma intueretur. Approbavit cultus honestatem Pontifex, cum intra colloquendum, prehensæ per laciniam, Ossolinskii veste, *Tali habitu olim gravitas vestiebatur Romana*; subjunxit.

Lingua gentis ubique retinenda. Romani, teste Valerio Maximo, Græcis Oratoribus (quorum idiomate cum familiaris uterentur) Latinâ linguâ, responsa dabant. Multo magis, legatos suos, Latinè apud exteros loqui volebant, *quod magis Latini sermonis honos, venerabilior apud omnes gentes haberetur*.

Valet ad auctoritatem, leges & decreta, suâ linguâ dictare. Historiarum libros, & varias artes, eadem linguâ in vulgus tradi, ac in majus pretium linguæ, nonnisi fieri à peritissimis. Tamen, parte ex altera, intuitu Latinarum artium, non improba- verim Polonorum morem, juris communis processum, tum Decreta, sermone Latio proferri, in necessitatem Polonæ publi, scholæ altioris, & studiorum.

Nobilitas gentis, non facile alienigenis concedenda, aut saltem, multâ virtute ematur. Augustus Cæsar, *Liviæ*, pro quodam Græculo, civitatis jus petenti; *Se potius tributa homini condonare, nolle tamen, civitati Romanæ vulgari honorem*; respondit.

Externorum honores, aut connubia, nè cives ambiant, immò rariùs peregrinentur, sua sibi sint omnia cariora.

Litigantibus exteris Principibus, arbitrum pacis, populum interponere, ad mutuam pacem adhortari, bona suadere, servit pro auctoritate.

Mechanicæ artes, & instrumenta, tum opifices, non ab externo petantur solo, sed in sua terra publico erudiantur sumptu. Nostra terra hæc aliis dum submittit, eò magis, in æstimationem vicinas gentes trahat, quò magis servit in necessitatem. Quæ ve-



rò in propria terra nasci, aut fieri non possunt, exoticis rebus, quoád possibile, non utendum, sed nativo terræ genio, & donis populum accommodari, in rem fuerit.

Procuret Respublica modos, provocando ingenio, tùm virtuti civium, quâ crescit facilè, & orbi sit non ignota.

Injuriae populi, externo Principi non sunt facilè condonandæ; nec communis populi tantum, sed personarum. Romani, pro sui populi autoritate, animosi, victis Græcorum civitatibus, excidium dùm condonassent, aliquam omnino deleverunt, Romanorum hospitem quondam ob injuriam.

Externo Duce & milite non utendum, nè virorum prudentium, aut bonorum militum inopem se Respublica prodat.

Non facilè permittendum, militem ad externos colligi, potiùs spontè submittenda auxilia, cum suo Duce, nè turmatim nostri exteris immisti, infausto successu belli in commune, sibi adscriptum ferant. Tùm quia faciliùs subsidia retrahuntur (si res suaserit) sub certo Duce missa.

Bellum nonnisi justis de causis suscipiendum, ac *sine flagitiis, licentiaquè militari gerendum.*

Fides etiam hosti servanda: *Si fidem frangere fas est, dare est nefas: aut servanda, aut non danda.*

Legati gentium cum autoritate habendi.

Ad omnem honestatem sit accommodatus publici collegii locus.

Legati ordinarii, (vulgò *Residentes*) apud Principes extraneos, rariùs habendi. Non modicam partem Majestatis, Turcarum Princeps sibi vendicat, gentium legatos, apud se ordinariò cum habet, sui verò delegati nuspam, aut rarò visuntur.

Multorum Principum foedera tenere, in clientelam populos, aut Principes recipere, Vicinis, fociis, & miseris opem ferre, justitiam omnem (præsertim foederum) amare, nulli ut vicino injuria inferatur, providere, parit genti autoritatem.

Legati ad externos ituri, prudentes, honestæquè gravitatis mitantur, ut pro gloria gentis, tùm pro loci honestate, laborare sciant. [*Qualem in Ordine locum, Polonorum legatus sibi asserere debeat, in Notationibus suggeffi.*]

Quod primùm dixi, nunc ultimum statuo, & maximum. Quolibet

bet triennio, Reipublicæ ab autoritate, ut fiat revisio publicæ scholæ, super methodo instruendi, & diligentia; Doctores, studiosos, libros advertendo. Multa, prudentiâ doctorum, & dexteritate docendi (si non remittatur) multa, probatorum Authorum lectione, præstari; Rhetor, Historicus, Philosophus, dein Mathematicus, Jurisperitus, seu legatur Theologus; vel prout togæ, sago, curiæ, Divinis, parantur ingenia. Adsit deinde studii honos, provocandæ ingeniorum æmulationi, proponantur laboris præmia, quibus sublatis, pereant studia, ut minùs decora, sed immò tristia, longa, onerosa. Tales per omnia habitura Respublica Cives, quales instruuntur juvenes. *Rempubicam in schola qui maturè non discunt (velut non inscientèr quidam) in Republica scholam, serò habere incipiunt, versutiam scientiæ loco assumunt, cavillationem doctrinæ.*

## A L T E R A P A R S POTENTIÆ RERUMPUBLICARUM, Populositas.

**I**usta Dominorum imperia, retinent populum, immò augment Provinciam, prout secùs gravia, eam diminuunt. Meritò observatum tulit Franciscus Guicciardinus, in Historia; Pisanos, Florentinorum Dominium pertæfos, sumptus, pericula, & extrema belli (non viris modò, sed mulieribus, pro muris & libertate, masculè pugnantibus) constantiùs pati maluisse, alterius dominio se committere cupidiore, quàm ut sub jugum Florentinorum redire, necesse haberent. Dubium, an non eadem causa, rebellium contra nos armorum, & obstinatoris belli *Kosacorum*, dum graviùs se habitos querulantur, nec spontè fidenterquè, sub dominium redeunt, ex memoria præteritæ (ut illi ajunt) servitutis.

Copia annonæ (proindè agricultura) artes Mechanicæ exquisitæ, bona educatio prolis, crebra Matrimonia, Coloniarum deductio,



ductio, adscriptio extranei populi, adjectio vicinorum, populosam reddunt Provinciam. Item victæ Civitates aut Populi, in unum si coeant corpus, (*non victorum, sed concivium nomine*) communicatione legum & indigenatus; Indè ex populositate, dives ærarium. Sic Romani, Sabinos, Volscos, Campanos, Hetruscos. Sic Poloni, socios populos, Russos, Lithuanos, aliosque, Patriis legibus, quasi civitate donarunt, ut tot diversi populi, quasi una gens simus, nec sciamus amplius, esse separatim. Secus olim *Athenienses*, & *Spartani*, victos populos, non ut concives, sed velut servos habebant, *Non igitur in magnam gentem, aut vastum imperium crevere.*

Tuta asyla, externorum exulibus aperiantur, ut Romulus, condendo Romam fecit. Aut immunitas certi temporis, à tributo offeratur ad te migrantibus ab externo.

Deductio Coloniarum, auget Provinciam. Insimul habitantes, premuntur infectione, paupertate, incommoditate, undè non crescit multiplicatio, ob rariora Matrimonia, quæ ab illis impedimentis obveniunt. Exindè veteribus Romanis, non modò propagando in majus Latinorum populo, verùm retinendis populis, à deductione coloniarum, ars erat potissima, dùm opportuniora loca, & novas sedes, infiderent. Sed maximè, victoriæ fervore (quò mollius utcunque res acciperetur, dùm atrociora ac cædes metuuntur) pulsatis studiosè oppidorum colonis, in paratas domos, scripti egentiores Romanorum, cum mitterentur, dictis à senatu Præfectis, deducendæ Coloniae; undè cultus Romanus, lingua, fides erga principem Rempublicam, in remotas gentes extendebatur, simulquè urbs Roma exonerabatur plebe inutili, tum otiosa. Nobis etiam Polonis, retinendæ ulterioris Russiæ, modus coloniarum, quid obsit? præsertim è fidelioribus Polonorum, Patricii, plebeiique ordinis, catholicæ fidei cultoribus, versus Boristhenem, novi coloni, passim in arces & oppida, si transmittantur.

Verùm Hispania (propter diutina bella, viris exhausta) pro sua populositate, maximum laborat, variis modis Matrimonia provocando. Edictum enim. *Octavodecimo ætatis anno, qui uxorem duxerit, quatuor primis annis, à tributo liber esto; immò à die* Matri-

Matrimonii, liberam administrationem rerum habeat, cum aliàs, post dictum annum uxoris, dispositio bonorum (adusquè XXII. ætatis annum) non plena sit. *Qui sex mares*, ex una conjuge sustulerit, sextus, toto vitæ tempore, à tributi onere liber habetor. *Pauperibus faminis* è publico dos assignatur. Interdictum poenâ fiscali, nè quis cum familia, è Regno migret. *Omnes alienigenæ* (modò Catholici & operarii) qui migraverint ab externo, totâ vitâ, ab onere liberi sunt.

Potius externi veniant, ad coëmenda nostra, quàm ut nostri vendant in externo sua, indè familiaritate commercii & populi, multi extraneorum retineri possunt apud nostros.

Duella penitus abroganda, potiore nam exhauriunt nobilitatem; Dolendum videre, juvenem audaculum, insolentiorè, nusquam qui vidit castra, ex schola gladiatoria prodeuntem, inter popinarias contentiones, & luctas enutritum, gynæcei pullum, comatum, oleatumquè militem, quæstionem fortitudinis ponere, provocando virum, filium castrorum, tot præliis victorem, immò vincere, non animi magnitudine, aut valore, verùm forte, & adscititiâ corporis inter choreas exerciti, lususque agilitate; non ingentâ, sed irritatâ, & mero quæsitâ audaciâ, nullo deniquè publico bono, & posthumæ memoriæ, verùm levioris dicti sinistrè accepti, aut amorum mulierculæ, victimam cadere, fundi inutiliter sanguinem, Deo & Patriæ debitum, ambitioso nomine, vocari magnanimitatem, insolentis parricidii barbariem.

Pelliciendis extraneis, multum valet, securitas viarum, & commoditas hospitiorum.

Jube ut quisquè miles, è peregrina Provincia, juvenem unicum, obsequii specie, ducat, qui sensim in mores tuorum formati, suorum obliti, velut tui futuri, militari officio, apti reddendi, pro parsimonia populi.

Traduc integras familias peregrinas, in tuam terram, quò populosior reddatur.

Commoditas sit commerciorum, quod retinet incolas, allicit externos.

Societas Provinciarum (vel maximè urbium) prodest populositati.



fitati. Quomodo verò provocetur? in altero puncto suggeritur, quod est de Ærario in universum.

Oppignorationes Civitatum vel Provinciarum (dùm oppignorata raro reemuntur) abeunt in jus hæreditatis. Sic Poloni acquirere partem Livoniæ, pro sexcentis argenteorum nummorum millibus: (Anno Christi 1559, bellantibus Cruciferis, contra Moschorum Ducem). Immo re ipsa, eodem anno, dulcore capti libertatis Polonæ, potestati Reipublicæ, se, suaquæ spontè subjecerunt.

Cessit Polonis, in adjectionem populi, Electio Regis Vladislai Jagellonis, Magni Ducis Lithuanix, quâ electione, Lithuania Poloniæ annexa est.

Quidam observatum habent, Imperium Turcarum, cùm sit suis limitibus in Europam, Asiam, Africamque protensum, vix majore populi numero gaudere, atque unicum, è potentioribus Regnis Christianorum Europæis; Fit, quòd multos montes, maria, inculta camporum, aut arenarum deserta, Turcarum Regiones occupant, seu veriùs, quia in longinqua bella abstrahuntur, coloni in militiam decimantur, nec ullâ parsimoniâ sanguinis, bellatur, undè negligi necesse agriculturam, præsertim cùm ob militum licentiam & Præfectorum Provincialium avaritiam, vulgus emungitur ruranum, oppidanumvè, ut alienæ avaritiæ lucro, raris fermè sit, res familiaris curæ, undè paupertas, & simul acciditur populi multiplicatio. Si verò tantos exercitus, promptè in aciem educant Principes Turcarum, non sit ab excessivo numero populi, verùm nolentes volentesquæ, ex pagis & oppidis, sine stipendio, dùm compelluntur in castra, partim militum, partim fossorum loco, tùm in ministeria jumentorum. Quod si ea populi Tyrannis, alicui Principum Christianorum, jure legis, aut conscientix liceret (dùm tantum mercenarii, & militare volentes educuntur, nec quidquam alienum capere fas, belli pro apparatu, nisi persolutum) adæquandam facilè potentiam, & numerum Turcarum, si non equitatu (tot greges equorum occidentalibus cùm desint), saltem instructiore peditatu.

Non vitiabit ex re quæstionem addere. Cùm ab homine unico, nostrum primo Parente, tantum genus humanum creverit, cur

non

non ex unoquoquè hominum, ea proportio generativa ducatur? cui capiendæ, nutriendæ, angustus sit orbis. Vel, cùm olim Roma, ex paucitate convenarum, ad usque VI. centena millia civium armatorum creverit, cur augescente imperio, & spontè infundentibus se in urbem populis, non ascenderit numerus ultra? aut secus, tot Coloniae, in diversa cùm deducerentur, cur? non decreverit infra. Fit, cùm propagando generi, virtus generativa & nutritiva, requiratur, licet generativa sufficiat, nutritivam non eandem semper esse, dùm multitudine cohabitantium, coangustatur populus, in domo, victu, in libertate: Pestis deinde, morbi ex contagione serpunt; tùm lites, tumultus, seditiones, civilia aut externa (pro ambitu) bella, crebræ contributiones, domesticæ fraudes, clandestinæ caedes, jurgia, corrupti ex diuturna potestate Magistratus, plerosque involvunt. Dein luxus, & prodigalitas ex æmulatione, (undè paupertas) inferiorum adhæc civium pressura, à potentioribus, facilè oriuntur, ut sit necesse, insensibiles objici crescendi metas. Jam verò, cùm dimitterentur coloniae in diversa, non *diminueretur* numerus, sed potius *purgabatur* populus, ut qui alias, in multitudine, defectibus constricti, steriluissent, sine cura posteritatis, suorum quicquæ natalitiorum ultimus, sibi aliisque impedimentum futurus, iidem effusi in latiora, novis latifundiis, & commoditatibus, ac super omnia, solutiori (extra multitudinis contagionem) libertate, cùm gauderent, erigebant animos in spes ulteriores. Acuebatur (sibi non alienæ avaritiæ fructuosa) industria, porrigebatur mens, in sequentem posteritatem, undè Matrimoniorum, & suscipiendæ prolis, major cura, quæ ex affluentia, parentibus solatio, non ex paupertate oneri. Etiam hortulanorum operâ, in majus foveri arbores, recisis à trunco enatis sentibus, & superfluis ramorum, qui adimunt arbori humidum, & suum crescere, aut ex angusto, in patentiorem fundum, dùm transferuntur, quò capiant copiosiore nutritivam, ex separato. Sic, nisi piscinis ex minoribus, pisces dividerentur in patentiores, majores minoribus, impedimentum futuri, per omnia coarctandi, multiplicationis ulterioris jacturâ. Item corvi, milvi, glires, lupi, eâ curâ hominum si foverentur, atquæ gallinæ, anseres, oves, aut pecora,

C

ra,




ra, (immo si urticae & fentes, velut olera aut segetes, studiosè fererentur). numerus eorum intenderetur in periculum. Jocosa hinc, nec rudis, quaestio solvi potest; Cum Matres luporum, septem novemvè, partu ab unico, producant catullos, oves autem singulae, pullos singulos, ad hæc tot agni & arietes, in escam hominum cum cedant, majorem tamen ovium haberi numerum, quam luporum. Nutritivam & conservativam ovium, augeri curâ hominis, æconomicam ad regulam, malè habentes fovendo, ab injuriis cæli protegendo, insectas purgando, selectissima pascua alimentis providendo, glires & lupi, majore defectu, minorequè numero habentur. Solâ curâ augeri numerum populi, opportunitates providendo, defectum & incommoda semovendo, quod demùm maximùm, superfluum multitudinem, commodiora in loca velut plantas aut frutices, separatis truncis inferendo.

*Vulgò Slobodii.* Sic Polonia, per deductionem *coloniarum*, ultra Boristhenis oras, latè produxit limites, & possedit inferiora Russiæ, quam *Ukrainam* vocamus vulgò.

## T E R T I A P A R S

### POTENTIÆ RERUM PUBLICARUM.

#### Opes privatae.

 Mpellatur lege, vel poena, vulgus otiosum, ad exercenda opificia: si excludantur, inertes Mechanicæ, à successione, bonisque Parentum, civitatis insuper jus amissuri; Item puellæ, dote priventur, lanificii, acupicturarum, cæterarumquè sui sexus operarum, ignaræ; Sic à necessitate succedendi, juvenus urbium, procurabit non otiosam artem, popinariam, fornices, & otia vitatura. Præsertim si lege caveris, sortem majorem bonorum, capturum, Parentum post obitum, super fratres reliquos, qui opificiam didicerit, quæ magis regno, & communi bono prodest, vel cujus major penuria habetur, eamquè exercuerit studiosè. Sed aie, in artes liberales? sed in mercaturam, animum intendit

tendit juvenis ille, utiquè his etiam (cultior aliqua mechanicarum, liberius tractata) non obfit; immò certiorè alimento, in feram ætatem, & in varios fortunæ casus, serviat, dum quandoquè, operosa manu, vivere prodest. Poena insuper dicatur Parentibus, per educationis incuriam, vel impensâ parci, opificia erudiri, dum intermittunt suam prolem, substituto Magistratu, examinerum nomine, per domos civium, semestri quolibet, adolescentum indolem, & habilitatem inspecturo, ad quam magis vel minus, hic aut ille, inclinât opificiam, vel in ea profecit, hoc illoquè genere operarum, mallei, acus, texturæ, penicilli, sculpturæ, tincturarum, tum per omnia manuum, prout ingenium humanum, varias in artes valet. Belgium fit documento, cum propter contractiores, vel depressores fundos, advectitia annonæ carè necesse constet (præsertim in ea urbium frequentia, & vix credibili populositate) affluentes tamen opes, & vivendi commoditates, ad exsuperantiam usquè habeant, ut vix mendicum videre nobis licuerit; Immo veteratores, fures, viarum incessores, rarius in Belgio, quam alibi dari, nemò cum videatur, qui non artem aliquam (dum sunt præterea *luxu omni procul*) exerceat. Ab recto ingenio & opera, commodaturus fortunam, quam aliàs per otium, (suo flagitio, & aliorum damno, tum injuriâ dives) habendam petat, alienos labores, leviter pensaturus, dum sibi nihil operanti, per scelera, gratuito venire totum vult, aut jam habet. Non tantum ratione privatae fortunæ, vel augendi ærarii commodo, sed (altius dicto si excurrere licet) communis pacis causâ, artes operandi in vulgus introducendæ, tum præsertim, necessitas non otiandi, Nobilium juventuti, per occupationes honestas, imponenda, quâ futuræ vitæ constet ratio: Ut videlicet absit otium, desit occasio, & necessitas flagitiorum, ex paupere inertia. Cum enim tria hominum genera, ferat quævis Respublica, vel civitas; *Magnorum, Mediocrum, & Parvorum, seu egentium*; Prout magni, si in superbiam labantur, pro fiducia opum, altiorisque nominis in populo, facile insolentescant, & turbent statum, sic non minus, imo magis sint periculosi parvi, vel obærat, dum necessitate pressi, facile transferruntur, in cujusvis ausus occasionem, modò habeant *Ducem*, &

Magnis  
deest super  
resolutio,  
adeest re-  
spectus.



Infirmis partes, edquē periculosius insurgant, quibus desperatio, spei causa  
 nisi deest est, præsertim cum viget ætas: Non habent obfides publicæ fidei  
 Dux, & fortunas; omnia secum portant, in quemvis ausum expediti, &  
 Author. velut accincti, sed eam fortunam putantes, quam parit occasio,  
 & gladius: Occasione verò discendi, lege, poena, præmio,  
 ad artem operarum, vel honestæ actionis provocati, promptum  
 vivendi modum, & otii vitandi materiam, habituri, ut quietè in  
 publicum vivant; Nequē enim eos superbia, & promptum  
 subsidium ex opibus, velut magnos, inflabunt ad insolentiam, nec  
 extrema inopia, impellet in ausum, velut ex necessitate despera-  
 tos, verum mediocris fortuna commodè in actione, & in obsequio  
 retinebit.

Nec satis opificia excitari, sed etiam retineri, ut singulo tri-  
 mestri, platearum à decurionibus, urbs circumeatur, an per in-  
 curiam, opificio decesserit, vel accesserit aliquid per diligentiam;  
 Ideò diligentiores mercatorum, ac opifices, honore loci, vel  
 prærogativæ, donentur, ad æmulationem negligentium. Juvæt  
 itidem, quæquē classis opificia, domum collegii habeat publicam,  
 quo septimanatim, opus aliquod domi factum, opificum inferant  
 singuli, publicè vendendum, hinc ex æmulatione, operis diligen-  
 tia, Exindè instrumenta opificia oppignorare, poena carceris ve-  
 titum esto.

Omnes usurarii, è civitate pellantur, ut absit spes acquirendi  
 nummos, præterquàm à labore.

Lege vetitum esto, domum super, aut fundos, debita contra-  
 here, sub amissione concessi, præterquàm valore tertiæ partis,  
 idquē, si aliquo casu, jactura fiat opificii; Aliàs non fiat oppigno-  
 ratio immobilium, ultra consensum populi.

Societates opificum, aut collegia, (vel classes) civitates intrò  
 inducantur, diligentius arti cuiquē procurandæ; falsitas insuper  
 opificii, severè ut puniatur.

Placuit nonnullibi videre, per Decuriones platearum menstruos,  
 visitari privatorum domos, ut omnis curæ (immò nitoris) admo-  
 nerentur, pro urbis honestate, & aëris puritate; negligentiores  
 verò, interpositâ mulctâ, dum punirentur. Quæ enim, minutâ  
 ac planè insensibili operâ, destructa reparantur, levitè intermis-  
 sa,

sa, sensim grandem inducunt ruinam, cui multo sumptu, vix suf-  
 ficias, repatando. Deindè, quæ singulis diebus, procul urbem ex-  
 tra, efferri possunt, ingentes excrescunt in acervos, neglecta pla-  
 tearum purgamenta, undè canales, fossæ, obstruuntur, cum  
 urbium dehonestamento, munitionis periculo, & aëris infectio-  
 ne. Imperabatur itidem, cura ignis civibus, evitando urbis in-  
 cendio.

Quæquē sibi platea, puteum fodiat, communi cohabitantium  
 usui, eduliorum, potulentorumquē causâ, sed maximè, ut obor-  
 tis fortè incendiis, subsidia reprimendis, prompta sint, aquâ pro-  
 stance in proximo, præsertim si penes quemquē puteum, prom-  
 tuariis aquis, apertum receptaculum (immò per singulas domos)  
 provideatur, nè tùm primum hydriatim petatur à longè, cum (si-  
 mul omnibus) igni subveniendo, opus est. Imponatur deindè  
 necessitas, vasa, seu hydrias coriaceas, tùm instrumenta, extin-  
 guendo igni, sibi quisquē maturè procuret, ut verò in foro, pu-  
 blici putei adsint, magistratus curæ futurum; sæcula operosè pro-  
 ducunt urbes, incendium unicâ horâ depascit.

Reipublicæ curæ sit, quæquē civitas, ut provideat plebi, ma-  
 gistros opificiorum, nè deficientibus magistris, ars deficiat, ut sunt,  
 præter communes operas, texturæ pannorum, holoseri corum,  
 tapetum, aulaeorum, acupicturæ, & quibus privati ditescere pos-  
 sunt, nequē Respublica opus habet, ab externo solo petendi.  
 Vidi benè ordinatis in civitatibus, digladiandi, equitandi, luden-  
 di etiam Magistros, publico sumptu haberi, tùm alios, æquè ad  
 curiositatem, ac necessitatem. Immò vidi, publicas quæsitissimo-  
 rum authorum bibliothecas, paratas lecturis (modò volentibus)  
 aperto semper ostio prostantes, ut prompta commoditate addis-  
 cendi, nobilium & plebeia juvenus, pro statu suo, haberet oc-  
 casionem non inertis vitæ.

Pertinet ad copiam artificum, ut Magistratus urbis, juventutis  
 delectu habito, pro indole cujusquē, necessitatem imponat ditio-  
 ribus, hac vel arte illa, filios imbuendi, pauperibus verò, è pu-  
 blico sumptus provideatur. Magistris opificiorum insuper impo-  
 nendum, singuli juvenes, singulos, absquē impensa erudiant,  
 quam sciunt artem, pro communi usu civitatis.



Pauperes masculi, qui opificiam didicerint, jussu Magistratus, divites desponsent puellas, aut aliquo modo juventur.

Excitandæ industriæ valet, ut certo tempore, monopolium inventi operis, exerceat quisquæ. Aut præmia proponantur, novorum operum inventoribus.

Capitatio in urbibus pernecessaria; si quolibet anno, conveniant in Prætorium *Tribus*, vicinus pro vicino, civis pro cive, tribulis pro tribuli, sponsor futurus virtutis, aut testis vitii, præsertim si cauponæ & fornicum, quàm officinæ, sit studiosior opifex, frequentior in potu & otio, quàm in labore; undè, circumspiculis urbibus, non illaudatus censoriæ mos, certis diebus, animadversionem habendo in cauponas, ipsasquæ officinas, observandæ operariæ publi, ad correptionem. Qui bis in septimana heluonatus fuerit, ut otiosus suorum decoctor, & opificiæ fraudator injurius, nummariâ mulctâ, aut poenâ carceris, vel ipsa tandem exclusione collegii (si effrenis) puniatur. Satiùs collegium numero malorum minui, quàm bonos, contagione vitii corrumpi. Veturabitur item, per cauponas urbis, fides crediti, ullo judicio vindicanda, non leve dilapidationis frenum, cèrtius autem lucrum vendentium, ex parato.

Binas domos in unam continuare, importuna sit, & dampnosa pompa ædificii, minuit enim incolas, dum unius amœnitatis commodo, cæteri coangustantur cives. Noxium immò civitati, nonnulli putant, & est profectò, duarum simul domorum, unicum haberi hæredem, sed unicâ retentâ, menses duos intrâ, vendat alteram hæres oportet, cum sit difficile, curâ æquali utrasquæ haberi, undè facilior desolatio in alteram, cum diminutione incolarum. Præstat verò, fixos cives haberi, quàm per conductionem, fundis alienis obtrusos, vagos, incurios, eoque communitatis bono elevando, minùs proficuos. Magis item profit civitati, & industriæ civium retinendæ, mercibus augendis, impendi superflua nummorum, quàm retinendis, aut emendis domibus, otiosè ditem aliquem, velle fieri, per locata.

Vetitum esto, nè hortorum, aut aquæ ductuum gratiâ, tum ampliandis fundis (quod impensivæ opulentiorum servit amœnitati) diruantur domus, premendis civium tenuioribus.

Non

Non displiceat mos urbium Belgii, ubi ædificaturus domum, delineationem necesse petit, & revisores, à Magistratu, partim nè excessivâ impensâ, abutantur cives, partim ut omni procul incommoditate vicinorum, simul cum ornamento publicæ plateæ, regulata sit domorum structura. Undè passim videre licet, integras plateas, continuam velut domum, aut palatium, ordine decoro fenestratas, & fastigiatas ad libellam.

Pauperi contra divitem, actio libera sit, nequæ periculosa, immò sine impensa processus, modò nè abutantur eâ juris clementiâ, in prorogationes litium importunas, & potentiorum vexas.

Nummarias collationes, Magistratus ac plebs, ex æquo ferat, cunctantiùs imponet plebi, immò parciùs in importuna profundet, sibi quoquæ ferenda, aut supplenda: Rara est secus parsimonia alieni.

Dùm vidua procedit ad secunda vota, revisio fiat defuncti mariti bonorum, dictis tutoribus à Magistratu, qui rerum pupillarium inventarium describant, in Curia deposituri, ut postquam pupilli adoleverint, sciant, quæ à tutoribus repetenda.

A tutore, res pupilli non vendatur, etiam consentiente pupillo, alioquin emptio, sit invalida.

Res mutuæ aut creditæ (ultrâ scitum Magistratus data) cedat dono accipienti, in pœnam dantis. Non alia re magis, depauperari cives, quàm creditò dantes, difficultate recuperandi. Immodè facillimè otium ingeritur, creditò accipientibus, qui sibi privatim providere negligunt, fallaciis dices, aliorum fortunas, creditò evocando, in suum usum.

Visitentur singulis annis, immò mensibus, stateræ, libræ, ulnæ, justo pretio rebus imponendo, nè caritate prematur populus.

Nemo coëmat victualia, in Monopolii lucrum, nè obviæ eat coëmendis, quæ advehuntur, sed res venalis in foro, omnibus exponatur.

Quisquæ civium, habeat sex mensium annonam, in casum caritatis & periculi. Damno improvidos, qui nisi ex hodierno vivunt: Quæ præsens cura paravit, abundè vorant, absument, futurorum dudum antè, per modicè colligenda, improvidi. Eoque le-

vi ca-



vi casu, inopes & impotentes. Alienam ad opem & curam, dum prospiciunt, aliis sunt oneri, Patriæ infructuosi.

Pro metu temerè litigantium, quisquè accusatorum (in causa juris dubii) deponat vadimonium, amissâ causâ, amittendum; Adjectâ in causidicos poenâ, quoniam non tutius, litigiosis obviam eatur jurgiis, quæ, non æquo, non jure, sed miras causidicorum per artes, in captionem & laqueos intorta, valescunt. Causam litigii non habent, sed faciunt.

Qui bis juraverit, tertio fides ei non detur, nisi in evidentissima causa, nam sæpius jurare, pejerandi initium est, præsertim dum nonnulli, vitio sæculi, aut laxioris conscientiæ, ut concessum patrociniū objectorum, & evadendi beneficium, perjurium (mendaciumvè) putant.

Ad justitiam, modestiamquè magistratuum pertinet, nè perpetui sint, verum stas temporibus substituantur, ultra enim, quod diuturnitate officii corrumpantur, dum ingeritur animo superbia, insolens actio, usus accepti, & invalescit amor. Verum magis, quia consuetudine personarum, contrahitur notitia, dein familiaritas, ut in has, aut illas, magis affectu propendamus, æquum iniquum statuituri, prout eorum est causa; qui magis animo ad hæserè nostro, gratiâ cogniti, aut secus, per offensam, odio habentur. Nonnullis propterea gentibus, moris olim erat, obligatis oculis, aut interjecto velo, judicem inter & litigantes, tribunalium insidere curias, aliis, sine personarum nominatione (verum sub fictis fortè nominibus) causas modò nudas, & sine pigmentis Oratoriæ, judice coram exponi, ut æquius, liberiùsquè, notitiâ omni procul, pauperis, divitis, noti aut ignoti, amici vel inimici, potentis vel invalidi, squalidi aut rectè compti (vel comptæ) causa decideretur, non pro affectu, metu, odio, spe, vel amore, sed pro ratione. Sic David, non in excusationes prorupit frivolas, non in rationationes molliendæ causæ, non in preces declinavit, sed velut remotam, nec ad se pertinentem causam, quia ignotam (sub imagine parabolæ, de violento raptore ovis viri pauperis) rectâ lance appendit, extrâ prorogationes juris beneficiorum importunas, promptè judicaturus. *Iratus indignatione adversus hominem illum nimis, dixit ad Nathan, vivit Dominus, quoniam*

*filius*

*filius mortis est vir, qui fecit hoc. Dixit autem Nathan ad David. Tu es ille vir, &c.* Sic ferè ignotarum causarum, vel personarum, æquifumus judices, nec adest causa, vel pretium, cur secus facianus. Non miror igitur, apud Florentinos, primitus olim, duos è peregrinis, (crediderim in annos singulos, alios atquè alios, nè populi contraherent notitiam) rectè administrandæ justitiæ, judices lectos fuisse.

Sumptus inutiles urbium recidantur, in tecta superflua, arcus triumphales, ludos scenicos, nè collationibus prematur populus. Immo, si muniri Civitatem oportuerit, non per nummarias collationes, sed operâ privatorum, muniatur. *Pauperes* nummos conferre non possunt, conferre operas manuum possunt, nequè premuntur. Stas igitur in septimana diebus, ditiores curribus, egeniores operâ & manu, quod in rem, præstaturi. Sic minutâ, & in dies adjectâ, multarum manuum operâ, multa perficientur, sensim ingentes fodientur canales, purgabitur civitas, viæ publicæ reparabuntur, muri ædificabuntur. Quod citius incolæ præstaturi, quàm ut suspicentur, in luxum Magistratus, imperari tributâ; Si verò nihil sit communi operâ reparandum, non inutile fuerit, usui tenuiorum civium, ædificio materiam comportari.

Singulis annis, civium quisquè, partem suæ plateæ restauret, nitidè habiturus, imò partem valli, aut muri curet. Designandi ex cohabitatoribus, Præfecti platearum, ordine mensuri, ad eam curam ut attendant.

Nemo quid in platea immutabit, inconsulto Magistratu.

Civitates & pagi, victui, tum fortunæ habitantium accommodatiores qui ad navigabiles fluvios siti, & fertilitate circumjacentis soli gaudent; Licet aliqui, ratione contendant, fertilitatem soli (dum coloni, simplici agrorum operæ sunt intenti) obesse, nonnunquam hominum industriæ, in altiores vivendi, tum negotiandi modos, & manufacturarum perfectiorem culturam. Necessitatem verò ex sterilitate, acuire in melius, evigilarequè habitatorum mentes, tum ingenia, per artem tentandi, quæ promptè non adsunt, vel beneficium soli denegavit. Prout praxis urbium Belgii, & aliarum, rem satis evincit.

Leges sumptuariæ fortunam retinent privatorum, recisi sumtus vestium,

*Vestigium di-*  
*visissimum.*  
*Opera pri-*  
*vatorum.*  
*Nam &*  
*inexhaus-*  
*tum est.*



vestium, conviviorum, pretiosi abbaci, Monilium, fimbriarum, acupicturarum; Patrio (ut plurimum) potu, cives utantur: Non serico, sed domi facto panno, & pellibus, quas nativa producit tellus, induantur. Sed tamen modum profusionis expedire, in arduo, humanioris sæculi eo provecto more, dum consuetudo luxuriandi, in naturam versa, ut naturæ velut bellum inferatur (exacerbando veriùs, quàm aliquid proficiendo) qui tristem parsimoniam invehere, qui profusioni modum, & cancellos ponere velit, ut desperandum sit de obtinendo, quin totum, mos pervincat, nisi aliquid liberaliori genio concedatur. Mihi cuncta in eo perpendenti, mediam viam, inter tristem parsimoniam, & effusam prodigalitem, tenere placuit. Ac primum; Abbacum argenteam, nec approbem planè, nec omninò improbaverim; sit Abacus, sed non auro fucata, aut operè luxurians; nè plus in opere sit pretii, quàm in metallo, purè sint argentea vasa, quæ casu privato, aut publico vendita, parvâ operis & auri (per tincturam superinducti) jacturâ, in monetam formentur. 2. Indumentum virorum, non dehonestat pannus, seu cultiori ornamento, seu ad gravitatem, veste utendum; præsertim verò senatores, fusco aut nigro colore, pro autoritate vestiantur: Sericum, propius foeminarum decor est. Romani olim, eò divitiarum provecti, ut potissimæ parti orbis imperarent, ac proinde illa ætas, quid extremum in luxu, facile vidisset, inter illa tamen luxuriæ blandimenta, receptum erat, *Nè vestis serica viros foedaret.* (Cornelius Tacitus lib. 2. Annalium) Immo ætate moderna, illis gentibus, quæ non postremas in cultu humaniori, partes sibi vendicant, honestiùs panno, quàm serico viros vestiri. 3. Uti vestis serica, viris non convenit, magis verò fibulas aureas, gemmis & adamantibus distinctas, quis sanæ mentis non improbet? quid enim foeminarum decori, & ornamentis relictum? Si adamas, & gemma, æquè in veste virorum, ac foeminarum mundo, coloribus ludant. Jure meritò legatus ille Polonus, coram Pontifice Romano gloriatus. *Nihil in moribus Polonis, nihil in habitu corporis molle, vel effœminatum, nihil acupictum, omnia masculæ gravitatis, frugalitatisquè exempla.* Addam, Quò magis recedit vestitus à sœmineo, propius accedit ad habitum virilem. 4. Mundum etiam mulie-

Georgius  
Ossolinskius, No-  
mine Vla-  
dislai V l.  
Romam  
legatus.

muliebre, intra terminos decentiæ veriùs, quàm fastuosæ pompæ, teneri opus, ut competenter foemina ornetur, non superflue splendescat, vanitatum irritamentis. Monilium decori, unum aliquod gemmæ genus sufficiat, sæpiùs verò, purè aurea sint, colli, auriumquè pensilia, quàm ut per lapidum, gemmarumquè colores, & pretia luxurient, summo patrimoniorum damno. 5. Vestis, sit matronarum serica, non luxuriantè aureo filio distincta, & micans, immò, à tertio matrimonii anno, Matronæ, nigrum colorem, decentè induant, propius gravitatem, quàm ut varietate colorum, leviusculè pingantur, annuli modò retento decore. 6. Urbani viri, foeminæquè, nullo serico aut argento, aurovè, tam solido, quàm filato, utantur. 7. Verùm quis mihi luxuriantium mensarum modum statuatur? Summæ dexteritatis virum, & de Republica sanctè meritum, judicabo. Ego quid sentiam? ingenuè fatear, me pleraquè de discursu, de re ipsa, nihil certi statuere posse, velut in morem, & veriùs in naturam universi populi, pugnaturo. Dicam tamen, si circumscriptam mensam Princeps habeat, si primores populi, ponant modum luxuriæ, non tam imperio aut legè, in eo profectum erit, quàm recto apud omnes exemplo: Quod, si absit, nulla lex sufficiat, aut ponat modum. Sic olim Romæ, præcipuus adstricti moris, Vespasianus fuit, antiquo ipse cultu, victuquè, obsequium inde in Principem, *Æmulandi amor, validior, quàm pœna ex legibus, aut metus.*

Luxus, exhaurit fortunam privatorum. Quoniam verò, non sine invidia Principis, parsimonia imperetur populo, illa tamen arte obtineatur, luxui pellendo: Si prohibeantur mercatores importare in regnum, quæ pecuniam eliciunt, & ambitiosorum accendunt prodigalitem. Nè quæsitæ gemmarum, moniliumvè, aurifabri, non Armæni, pretiosa equorum ornamenta vendant, nam illa, ad virile, aut foeminarum decus, nequè hæc ad militare, quidquam, conferunt robur. Item Scoti & alii, non exponant vendibile aurum, argentumquè filatum, aut quæ luxui, non usui serviunt, non Itali advehant pretiosum holosericum. Facile impediuntur incolæ, ab usu rerum, quæ non acquirentur, difficultè motura luxum, quæ non accendent oculos. Sic, (veluti



fluvios in fonte, aut origine facilius, quàm in cursu oppresseris) in suis initiis & radice opprimenda, undè provenit luxuria.

Aut alià assequare vià, maximam rebus impositurus caritatem, vel tributa, quæ prohibere vis in luxu; Aut per monopolia vendi sinas, monopolii lucrum, illaturus ærario, ut si aliquis prodigalis esse velit, saltem prodigalis sit ærario, non cauponæ, qui detrahit suo privato incurius, dilet saltem publicum. Sed tamen,

*Alia sunt* quæ ad necessitatem vivendi requiruntur, immunia sint ab onere, *usui homi-* aut saltem mediocriter habeantur, ut sunt *frumentum, panis, car-* *num ne-* nes, lacticia, ferrum, ligna, lintea, cannabes, pannus, coria; *cessaria.* pelles vulgares, sal, olera, & potus pro natura regionis. Rebus aliis si caritas imponatur & tributa, quæ luxui, non usui sunt, magis

*Alia nisi* jucunda, quàm necessaria, ferè extrà scrupulum, licitum esto *jucunda.* Principi. Ut sunt *vinum simplex & crematum, mulsum, aromata;* *sericum, panni exquisiti, monilia, aurum filatum, acupicturæ, la-* *picidia, luxuriosæ pelles, & dulciariorum illecebrosæ condituræ.*

Non gravatur rerum caritate populus, si domi parentur, quæ importantur ab externo, ut sunt panni lanei & sericei, lintea, tùm alia usui accommodatiora. Idèd, crudæ materiæ prohibeantur exportari è regno, lana, cannabes, ferrum, sed operatæ tantùm ut pannus, lintea, &c.

Monopolia prohibeantur, quæ impediunt commercia, & diminuunt lucri commoda, tùm fortunas.

Alliciantur extranei, ad exercenda mercimonia, libertate com-  
meandi, facilitate justitiæ in creditores, sine dilationibus. Sepa-  
ratum Tribunal sit mercatorium, tùm aliqua privilegia concedan-  
tur; Leves item sint exactiones, potiùs mercibus imponendo tri-  
buta, quæ exportantur, quàm quæ importantur aliundè, ne gra-  
vamine impositionum, avertamus. Deindè non varietur pretium pe-  
cuniæ, & bonitas, quo deterrentur mercatores, à commercio.

Difficilis & sumptuosa si obveniat negotiatio, quam non audeat privatus aggredi, proponatur præmium, qui prior tentarit, aut aperuerit negotiationem, præsertim maritimam. Cessit honori & utilitati *Hollandorum*, negotiatio ad Indias, *Orientelem, & Occi-* *dentalem.* Quoniam ultrà privati civis sumptus, erat ascensura, in-  
stauravère Status *Hollandiæ* societatem, (Anno Christi M DC II.)

in

in quam intulère pleriquè privatorum, summas pecuniarias, ut collatio excresseret, ad sex *millionum summam* negotiationi æqui-  
valentem, tùm superpositis Præfæctis, sumptus, jacturæ, atquè  
incommoda, in plures dividuntur, proportionè habitâ, prout  
aliquis majores, aut minores summas, intulit. Est verò Præfæcto-  
rum curæ, ut provideant apparatus, ducendæ negotiationi in  
universum, & mercibus vendendis, tùm lucro dividendo præ-  
sunt, publico ærario, non modicam partem lucri, participante.  
Posset item apud nos, negotiatio maritima institui (vocatis plerif-  
què civitatibus aut civibus, in societatem) per mare Balticum ad  
*Hollandos & Anglos*, per pontum Euxinum ad Turcas, quorum  
mercibus opus habemus.

Nonnulli, nè deterrent extraneos (gravitate teloneorum) à  
commercio, generalem pensionem, ab aliqua gente exigebant,  
in vim particularium exactionum.

Conducit parandis privatorum opibus, ut facilitas commercii  
provideatur, quæ in prompta vectura consistit, à commoditate  
viarum. Valebit igitur, ut in civitatibus, oppidisquè, *separati*  
*Magistratus* (seu Duumviri) *annuatim legantur*, procuraturi, pu-  
blicarum viarum, & pontium reparanda, uno aut plùs miliari cir-  
cùm. Diversoria hospitantibus commoda ut sint, procul à depa-  
ctationibus, securitas insuper sit itinerum, submotis latrociniis;  
cui rei, *tertiam publicorum proventuum partem*, Civitas quæquè con-  
feret. Insuper, *operas publicas* (vulgo *Szarnarki*) statis diebus,  
septimanatim impensura, quæ præ omnibus collationibus nummariis  
valent, adhibitâ mensurâ, in certitudinem operis, ut viritim,  
perticam (seu virgam) terræ, fodiat quisquè, aut pro se fodien-  
dam curet, reparationi viarum, munimentorumquè structuræ.  
Idem *Duumviri*, habebunt curam munimentorum civitatis, no-  
va sensim maturè in pace ut erigantur, seu collapsa ut reparentur.  
Item, ut nitor urbis & platearum servetur, eadem curâ, ritè  
providebitur.

Summatim rem claudo. Cùm quinque sint, nationibus ditandis  
universalialia. *Res æconomica, in pecuaria & agricultura; Materiæ*  
*crudæ; Dein operatæ; (manufacturam vulgus vocat) Reciproca*  
*commercia; & Vecturæ commoditas.* Adlaborare debet Princeps,

D 3

tùm



tum Respublica (cui Deus beneficio cæli & soli, tum industriosa œconomica, copiosam indulgit materiam) nè tria, præsertim postrema, populorum stabiliendæ fortunæ, instaurare intermitat, nam hæc proxima, immò potior; parandarum opum via. Dicam nè, an taceam? Verùm ingenuè fatendum, Poloniam, licèt sua œconomia, & dona terræ, varia genera crudarum materialium producant, sibi copiosissimè habenda, aut ex superfluo, exteris assatim submittenda. Omnem (videlicet) *speciem Cereris, boves, equos, lanam, oves, vineres tinctorios, ceram, picem, sebum, coria, salem, linum, cannabes, mel, lactitina, arbores, ferrum, plumbum, marmora, nitrum, materiam ærus flavi (Galmanum vulgò) immò & argentum, cæteraquè minutiora*, minùs tamen esse nummatum, quàm gentes sunt, quibus tria postrema, curæ. Belgarum populi, sunt documento, quibus, sola *manufactura* (dùm formam elegantissimam, acu, malleo, sculpturâ, instrumento, texturinâ, tincturâ, penicillo, ascia, & per omnia ingenio, advectis aliundè materiis superinducunt, ut opus sæpiùs superet materiam) tum *ingenium* & *opportunitas negotiandi*, à prompta vectura (*per operatos canales, & currus ordinarios, dein commoditate maris*) plùs, quàm aurifodinarum loco sunt, ut sumptibus belli; supra fidem erogandis sufficiant, urbium potentiâ & splendore, cuiquè in Europa genti, faciliè anteferendi. Sic ferè, à plerisquè populis, quadruplò carius, emimus Poloni transformata, quàm nostra cruda, illis vendimus. Quomodo verò collegia mercatorum, seu classes, tum opificiorum industria, ac demùm commoditas vecturæ inducatur, sparsim hîc, & alibi insinuavimus.


Induci vastitatem urbium animadversum, dùm per incuriam civium, destructa domorum non reparantur, aut fortè, multo ære oppressis, dùm ultra pretium domus, & fundi, debitorum excedit onus, ut sensim fundorum dominis, ad inopiam redactis, ruina & vastitas inducatur. Consultum idèd fuerit, edicto publico, certis anni temporibus, animadversionem fieri, super desolata. Si non sufficiens dominus reædificando, aut negligens, vel hærede mortuo, fundus dùm negligitur, verentibus singulis, nè si apprehenderint curam, onere debitorio involvantur, æstimentur fundus per commissarios, cum superstante ruina, emptione pu-

publicè propositâ. Qui pretium adinventum reposuerit in curia, immunem ab omni onere & processu, recipiat fundum, cum submissione reædificandi. Pretium verò depositum, inter creditores, proportionem habitâ dividetur. Satiùs utiquè, partem debiti exsolvi, quàm ut in perpetuum, desertâ prostante domo & fundo, creditori æquè ac civitati, nullum sit commodum ex vacuo, undè diminutio incolarum & tributî, in publicum sequatur.

Laxior sit immunitas urbium, ut procul omni impedimento, fidelius suæ fortunæ commodo, non alienæ depeculationi, oppidanorum quisquè laboret, secùs industria providendi supprimatur, & ingenuitas, si populus, Præfectorum per vexas, & emungendi mille artes, etiam crebra militum per stativa, duriusculè habeatur. Vide, quàm floreat apud nos urbes, quæ minùs adstricto, Præfecturarum jure (*Capitaneatus, vel Starostias* dicimus vulgò) premuntur, & ab onere stativorum immunes, Cracovia, Posnania, Leopoldis, Vilna, Varavia &c. Eadem foret cæteris urbibus, oppidisquè, conservandi sui cura, & industria, si abesset pressura & distractio, si afforet libertas.

## QUARTA PARS POTENTIÆ RERUM PUBLICARUM,

### Res frumentaria.

 Nona ut vigeat, Princeps advigilare debet. Nè statione militari, gravetur agricola, nè agrarium pecus rapiatur, & quæ, licentia militaris, expilandis colonis suadet. Cætera, utiquè dissimulari possunt, verùm annonæ, bono Principi, cura fit maxima. Prudens Dux belli, etiam in hostico, cavet nimiam inducere vastitatem, nè sibi desit, longius bellaturo, seu redituro, annona; Multò magis, in proprio solo, Principi cavendum, nè incolæ, gravioribus stativis, aut vagabundis per Provinciam, militum discursibus, præpediantur, præsertim, dùm menses serendi, aut colligendis messibus, adsumt, non in milites severius, verùm



in Præfectos animadvertendo, militis enim insolentia, intrà incuriam Præfectorum est magis, quàm ut ausu proprio insolescat, si adsit occasio, desit præsens ordo, prohibitio, & severitas; quod totum in Præfectis est, præsertim si intervertant stipendia, undè insolescendi necessitas. Prodest verò magis, non errare, nec accusari, quàm dùm erraveris, puniri: non quærît in milite colonus *pœnam, sed magis innocentiam, nec accusandi necessitatem*. Uti verò miles, depauperandis colonis agens licentiosè, cohibendus, sic ipsi bonorum Domini, per incuriam fundi, aut gravitatem in subditos, agriculturam minuentes (aut vastantes quoquo modo domum suam, & bona prodigendo insolentè) lege cohibendi, substituto censorio Magistratu per Provincias, qui curam in eam intentus sit, negligentiores excitando, malitiosos, inuncta multà cohibendo, vel deindè incorrigibilibus, *Curatoriam* è proximioribus agnatis, substituendo. Quid enim refert, utrumne aliquis per minorennitatem, aut inopiam sanæ mentis, non sit compos sui, an incuriâ rectoris prudentiæ, vel defectu virtutis, in abusum res vertat, non *magis suo privato dampnosus, quàm mutæ societati*, per relationem ad bonum commune, id est Rempublicam, quæ ratione supremi domini & ordinis servandi, in bona singulorum, potestatem habet. Rectè Plato (lib. 1. de legibus) *Quicunque vitam suam, non rectè moderatur, nec domum habet benè moratam, nec rem familiarem justè administrat, nec familiam coercet nec pacem cum vicinis colit, curatores (à quibus ut fatuus regatur) accipito, vel ex populo, tanquam erro, exterminator*. Si passim liceat pro arbitrio, sua pessundare, minuetur in usum communem annona, numerus colonorum, & populositas mutilabitur, tributa, promptaque subsidia belli, cessabunt; aliàs exhausto Publico, si privatum non inops sit, facile subvenitur Reipublicæ per singulos; Verè dictum, *ex privatis, publica constare*; vel è contra, secus omnia fieri. Rectum igitur sit populi institutum, ut quicumque per justa, honestaque mediorum, super patrimonii sibi tradita, auxerit bona & reditus, velut industrius rerum curator, capax sit honorum & munium Reipublicæ, super fratres reliquos. Qui secus, parvo studio conservationis, nè quidquam ex aggregato, vel meliorato, certos intrà annos adjecerit, alienæ modo curæ, uti

uti pupillus; otiosè fruitor, tanquam deses & incurius, certâ multâ, in publicum puniatur, dein partem amittat bonorum, magis industriofo è cognatis addicendorum, elevandæ industriæ, tum virtuti.

Sæpè evenit, ut incolæ, pretii magnitudine illecti, frumentum exteris vendendum ferant, suam terram annonâ pressuri. Providendum ergò, nè devectum in alias terras frumentum, paucis lucrosum fiat, omnibus damno.

Providere maturè debet Princeps, quomodo subveniat populo, inopiâ frumenti laboranti, Præfectis substitutis, frumento apud exteros, ope navium conquirendo; nam fame pressus populus, pronus in rebellionem. Nequè indecorum eo casu Principi, commercium instituere, frumentum apud finitimos petendo, incolis vendendum.

Vel maximè penuriâ levatur annonæ, si *crematum* (quod in nostro Septemtrione maximam partem frumenti absorbit, & potius luxui heluonum servit, quàm necessitati) cremari prohibeatur, altera pars annonæ succresceret, bono pani sufficiens. Dixerim etiam, cerevisiam, famis tempore, minore copiâ conficiendam: Præstat crudæ aquæ potu, contentum vivere, quàm inopiâ panis perire. Si justum calculum posuero, certò scio, propè mediam frumenti partem, cremato, & potu cerevisiæ, absorbere Poloniam; per rura & cauponas.

Deserta loca, à bonis agricolis, Princeps inhabitari curet, paludosa fossis operariis exsiccet, sylvestria eruncet & extricet, comoda arando redditurus. Immo præmiis provocet, colonorum industriam, parte sumptuum, in publicum, (cuique volenti) expositâ; Immunitatem insuper certorum annorum oblaturus, prout aliquis operosè, rem exequutus fuerit. Quidquid producit terra ferè luxui sunt, solum frumentum, servit pro necessitate; Terram ditissimam dixerim, non quæ aurum, sed quæ annonam producit, sine hac vivere nullus, sine illo omnes possunt.

Per urbes & vicos, in mendicos sit animadversio, robustiores ætate, paresquè labori, dùm fictam ægritudinem, in argumentum eludendæ stipis obtendunt, in morigerationis claustra, & *opariorum ergastula*, ut intrudantur: pro genio cujusquæ, textoriâ, picto-



piCTORIA, tūm per varia genera & materias, fabrili arte (immo pro sexu, suendo, nendo, texendo, acupiendo) & quod in rem sit, instruendi: Præripiunt enim, & inutiliter absumunt, verè impotentium stipem, sibi legnes, heluones, popinarii, in alios latrones, fures (aut quæ sunt ejus sectæ flagitiosorum genera) ab otio prodituri, nisi in eos seriò animadvertatur, undè non solum annonæ, sed incolarum industriæ, tūm modestiæ providebitur.

Annui pauperum curatores, certaquè domus provideatur, ab urbis magistratu, ut qui provectâ ætate, tūm vitio mutilæ sanitatis, verè impotentes, ob inopiam, sunt mendici, dein vagi pauperes, vel pretextu pietatis, advenæ peregrini, sistantur coram curatorum examine, de conditione, & ratione non insolentis mendicitatis, inquirendi, ut pauperum cathalogo inscribantur, tempus insuper morandi, præfigatur in urbe. Alias nemini per imposturam paupertatis, stipem petere, fas esto; sed immò in viciniore urbes, nomen & qualitas impostoris, scripto, ad pauperum curatores transmittatur, quatenus non recipiantur in oppida, sed velut falsarii vagabundi, carcere coërceantur. Quæ verò piorum per manus, juvanda pauperum inopiæ, annonæ, vel paratum æs, spontè confertur; aut quidquid elemosinæ sub nomine, per mendicos conquiratur, Xenodochialem in domum, ad curatores deferatur, undè verè impotentibus, pro posse provideatur. Alias, cum passim per oppida, juvenes, seniores, per imposturam mendicitatis, insolenter vagantur, sine ordine, sine examine, obviæ elemosinæ sese obtrudentes, verè inopes & morbo confecti, nullâ curâ habentur, immò per domorum quisquilias, miserè negliguntur, cum nemo de illis, pauperum collegii sub nomine, inquirat, undè, non solum catholicæ pietati, probum objiciatur, sed pestis, infectio aëris, publico malo, per contagionem sequuntur.

QUIN-

## Q U I N T A P A R S

### POTENTIÆ RERUM PUBLICARUM,

#### Arma.

**M**aximum est ærarium Reipublicæ Armamentarium; Vix non facilius viri, pecuniæ, annonæ, (præsertim nostro in Septentrione) parantur, arma nisi in tempore fieri possunt, nequè sumptui parcendum, quatenus implicantur armorum operariis armamentaria, ferrum, sulfur, nitrum, gladii, hastæ procurentur, & potiùs ante necessitatem quærantur, ut in necessitate sint parata, nequè occasio rei gerendæ effluat, *arma felix tenet, infelix parat.*

Provinciatim, urbatim, vicatimquè, arma subministrentur armamentario, nonnunquam loco tributi recipienda, tributa etenim, maximè, armorum causâ; Immo, non grave fuerit, si quisquè opificum, in annos singulos, offerat aliquid armamentario, fabri ferrarii secures, terebra, ferras, ligones, palas, (seu rutra) cathenas: fabri alii, hastas, cuspides, calcaria: Gladiorum fabri, gladios; pixidum fabri, certa sclopeta: Fabri lignarii, currus, annonæ vehendæ, tūm armis, vehicula item manualia, terræ necessaria congerendæ, undè multorum annorum pace, plurimum verò urbium & oppidorum curâ, graves exercitus armare possunt, collata in commune.

Opifices armorum, separata privilegia, & prærogativas habeant, quo incitetur operandi industria.

Civitates, variorum opifices armorum, de lege nutriant.

Equi militiæ apti, nè extra Regnum educantur, item nè arma finitimis vendantur, cavendum; Greges equarios qui aptè propagaverit, in honorem œconômicae, aliquid immunitatis ei permittatur. Immo, ea cura, quibusdam imponenda, Præfectis rei armentariæ substitutis, adjectâ insuper publicorum pascuorum commoditate.

E 2

Non



Non vendere solùm extraneo, verùm domi propria oppignorare arma, tùm aliena oppignoratò capere, sit infame & punibile.

Arma sint benè appropriata, non gravia, non nimis longa, ideoquè aptissima feriendo, excogitari debent, non apta corrigi; Multa armorum commoditate fieri.

Armamentaria, diversis in locis habenda, pro diversitate limitum, & periculi, ut cito subministrantur omnia castris è proximo, nè ab hoste aliquo casu circumveniatur armamentarii locus.

Procurat Princeps; necessitatem potioribus urbibus impositurus, certa in quantitate, annis singulis, ut operari provideant, nitrum, immò, pulverem nitratum, dein gladios, hastas integras & medias, fistulas majores & minores, per varia genera pixidum, cassides item, thoraces ferreos, ut adsit commoditas emendi, quantum libuerit, pro usu belli. Indignor sæpè, ut si aliquam cohortem, nè dicam legionem pedestrem, aut equestrem, derepente armare necessum, hinc pixides, illinc gladios, alibi hastas, magnà molestiâ petere opus habeas, tantâ penuriâ acquirendi, ut à bono incepto, nonnunquam desistendum sit, tantundem conqui-  
rendo, quàm emendo impensurus. Providebunt igitur civitates, publicas officinas, & operarios, non enim privatus quisquè, sufficiat impensæ.

Arma inter defensiva, (vel super) munimenta urbium, rectè quis posuerit. Necessitas igitur imponatur, oppidis, muniendi sua, divisis partibus munimenti, in singulas oppidi regiones, & aliqua parte tabuti omittà. Plus operis hic, quàm æris opus, invitat passim, spontèquè se ingerit (modò volentibus) loci opportunitas, adest terra, nihili emenda, adest laboriosa manus, ac tem-  
pus, si quod otio impenditur, detur operi; Multa successu annorum, & diutina pace parari. Partem unicam munimenti, hoc anno, atquè aliam sequenti, perficiendo: impositis à Republica commilitariis, ac revisoribus, architecturæ militaris gnaris, instaurando operi. Sic belli casibus, Provincia redderetur secura, adessent refugis, prompta receptacula; Nunc secus sit, periclitamur Poloni, barbarorum ferociæ, expositi, cum levius nobis perire, quàm providere, ac muniri.

Szarwar-  
k. vulgò.

## S E X T A P A R S

## POTENTIÆ RERUMPUBLICARUM,

## Armorum Exercitium.

**L**iberi bonarum familiarum, cum belli Ducibus in castra mittendi, quo discant militiæ, & assuescant labori; Duces tandem futuri.

Per vicos, civitates, & oppida, delectus singulis annis habendi, ut aptiores ferendis armis, exerceantur, non quod in castra semper ducendi sint, verùm sufficit, contra subita belli, velut tela in armamentario, ultimæ Reipublicæ necessitati, in promptu si habeantur, alibi præcariò non quærendi, nec primùm in armis erudiendi, dùm pugnandum. *Si tamen vulgus in rebellionem prorum, cautiùs habebis.*

Juvabit urbium paci, ac publicæ necessitati, incolas armis exerceri. Decuriatim ad portas urbium, ut excubent, nè licentiorum advenarum audaciæ, urbs exponatur, partim ut commodius, inter exercitatos cives, pedester miles, legi possit, dùm opus. Proponantur idè, statis anni temporibus, præmia, armis concurrento, tùm ad metam collimando, exercitationibus; Immò deligantur juvenes agilissimi, sibi exercitio, cæteris exemplo boni, alliciendis spectatoribus ad Martem.

Militariter exercitati, præcedant ordine, titulo, loco (immò eorum uxores, & liberi) iis, qui domi enutriti, in publicum nusquam fuere fructuosi.

Belli juxta ac pacis tempore, stipendiariæ cohortes habendæ, decrescit juventutis virtus, si castrorum, ac militis, tollatur nomen.

Ipse Princeps, armata spectacula, in oblectationis partem trahat, præsentque adsit, ut spectante Principe, quisquè strenuus videri velit, & agens animosè. Certè nationes, populi, æquè sunt bellicosi, strenui, etiam ignavi aut desides, prout sunt eorum



rum Principes; Non enim ridente coelo, tam benè, amœnitati accommodamur, aut nubibus obducto, tristes demittimus mentes, quàm hunc nostrum solem, occulto impetu naturæ, inittamur Principem, & sequimur, quod vertatur, aut quam partem virtutis adamaverit.

Omnes occasiones exercendi in armis populi, cedere illi videntur, quam leges nostrates suggerunt, videlicet *Lustrum publici*, cum Provinciæ incolarum, cum equis armisque (æmulationem mutuam inter) per capita provinciarum, annis singulis, viritim conscribentur; sed quater quinque retrò amplius annis, certo damno suo, eum morem neglexit Polonia, maximo publici boni damno. (*Vide Historiam meam de gestis Polonorum, sub Henrico Valesio.*)

Excitandæ militiæ valet, si certi honores sint in Republica, & bona, à nullo possidenda, quàm certo tempore, qui militavit. Rem præclaram suggerit *Polybius*, de delectu Romano. *Urbanum Magistratum, non ante, cuiquam capere fas, quàm decem stipendia militiæ, adimpleverit.* Egregium quoque illud, *Cornelii Taciti* (de moribus Germanorum) *Fortissimus quisquè, ferreum annulum, (ignominiosum id genti) velut vinculum gestat, donec se eade hostis abjovet.* Multa in eum modum ingloria, immò foeda imbellibus, secus gloriosa, utilitè bellicosis, prudenti quaque in Republica, provocandæ virtuti, ordinari possunt.

Quoniam hæc Polonorum usui maximè scribuntur, non abs re dicendum venit, Pedestrem militiam (cujus defectu, ad plenam victoriam multa nobis defuere, præsertim contra gentes, quæ statariâ pugna, legionatim ex arte, aut pro vallo & fossa, cunctando pugnant) necessariò in Polonos invehendam, dum peregrini emuntur nobis potiùs, quàm leguntur, haud per omnia fideles, præsertim si ejusdem nationis hostis adventat. Nec pro aliena patria, prompti sunt in pericula, libentiùs stipendia, & emuntiones colonorum implendis sacculis, quàm cicatrices, in gloriam Polonam numeraturi. Si verò sint aliqui suorum, proh scandalum, exterorum tamen habitum æmulantur, immò nationem mentiuntur, sub externæ militiæ nomine, militantes. Summo igitur commodo pedestris militiæ fiat, si vetito externi habitus more, Prætoria legio, ex solis Polonis, vestitu & linguâ, verè Polona,

Polona, legatur. Aut, si aliqui sunt exterorum, nostrum potiùs illi, quàm nos illorum morem & habitum, sequantur, ut ex ea, velut militari schola, pedestrium legionum Præfecti, Centuriones, & reliqui minores ordinum ductores, tum administri prodeant. Nequè gentibus exteris, quæ aliàs sua instituta, venditant orbi, pro rectis & optimis, fuere statim ab orbe primævo, omnia proba, & optima, sed cum tempore primùm, ab aliis populis (si quæ recta imitando fuere) sensim ad se transtulerunt. Sic ante CXXX circitèr annos, Galli, regnante Francisco primo, pedestrem militiam, ejusquè normam, in Galliam introduxerunt, cum ante, nisi peditatu Helvetico uterentur, (equo ipsi, prout nunc Poloni, merentes) dum nollent uti amplius, precariâ exterorum militiâ, tarda inceptu, periculosa bellatu. Licet verò nunc, Helveticas legiones, in castris Gallorum videas, non tamen sunt, velut corpus peditatus, sed velut pars, & subsidia, nec adest periculum, ob leves dilationes stipendiorum (quæ fortè injuriâ temporum, vel ob incommoda itinerum, præsertim in longinqua, ad punctum transmitti vix possunt) cursus bello captorum ut præcidatur, cum domesticus & indigena miles, non tam properè tumultuatur, dimissionemvè petit, quod ab Helvetiis aliquoties factum periculose, verùm pro sua Patria, & in gloriam vernaculæ gentis, lubentiùs incommoda belli fert, fidentiùs agit, perseverat, publico intentus bono, & faciliùs in obsequio continetur. Nostra, quidni? Polonorum fortuna, hoc bello Polono Europæo, eodem stetit? deficiente stipendio, & præcisæ ærarii venis, peregrinoquè Germanorum peditatu, ad Suecorum castra, maximâ parte dilapso, cum nobilis eques indigena, spe melioris in publicum fortunæ fretus, Patriam non desereret, infractus animo staret, hostem aggrediretur, lassaret, ac demùm confecto bello (quod miretur posteritas) partem notabilem stipendiorum, Patriæ condonaret, plus lucri à rectè facti conscientia, intrâ generositatem animi, quàm à divite ære, messurus.

Addendum Armorum, majorem esse potentiam, dum evocatione communi civium, quàm dum stipendiario milite bellatur; Sic olim Romanos, sic nostros Polonos, primitus potentèr bellasse, nunc à potentia bellandi, in tantum descivisse, in quantum, à pri-



à primævo bellandi more, recesserunt. Nec subindè mirère, Romanos, cum solâ includerentur Italiâ, plûs virorum sub armis habuisse, quàm dùm occupatâ Europâ, in ulteriora extendissent dominatum. Subactis enim Provinciis, & Regum gazis in urbem importatis, crevit primùm sine hoste propinquo, securitas, tum opulentia, & ex eo, amans otii luxuria, dein effundendæ per inania pecuniæ, invaluit libido. Hinc alieno labore & periculo, conductio milite bellare placuit; Ex eo, castrensis vir, gustato stipendio, injuriæ loco putabat, arma sequi non stipendiatus, aut per injuriam temporum, si defecit ærarium, deserebantur castra, ut minùs fructuosa, nec aderat promptè, gratuita Patriæ defensio, nisi miles, æris magna profusione, & per concessa (nocivo exemplo) donativa, pararetur. Miror Polybium, de primæva Romanorum potentia loquentem lib. II. Histor. *Ut autem ex ipsis rebus intelligatur, quantam Rempublicam Romanorum, ausus sit Annibal, aliquantid post aggredi, quantumquè illud imperium erat, operæ pretium fuerit, apparatus ad hoc bellum, & copiarum vim, quas jam tunc habebant, commemorare. Exière cum consulibus, legiones Romanæ quatuor, sunt autem in unaquaque legione Romana, peditum quinque millia & ducenti, equites trecenti. Sociorum auxilia, utriquè consuli aderant, quæ junctim numerum efficiebant, peditum tricenis mille, equitum bis mille. Aderant præterea (qui necessario tempore suppetias veniebant) Sabinorum & Etruscorum, equites quater mille, pedites ultra L. millia, hos in unum coactos, pro finibus Hetruriæ, hosti objecerunt, duce illis imposito Prætor. Convenerunt & ex Umbris, ac Sarfnatibus, qui Appenninos montes incolunt, ad viginti millia. Item è Venetiis, ac Cenomanis, millia paritèr XX, qui in Galliæ finibus sunt collocati, ut facta impressione in Bojorum ditionem, eos qui exierant, retrocedere coactos, à cæteris divellerent. Ac pro finibus quidem, variis locis dispositi exercitus hi erant. Romæ verò præsidè erant, propter incertos belli casus, velut subsidaria manus quædam, è civibus, triginta peditum millia, equites mille & quingenti. E sociis peditum ccllxxx, ccllxxx, ccllxxx, equitum clxxx, clxxx. In tabulis ætatis militaris (quæ ad senatum sunt allatæ) fuere descripti è Latinis, octuaginta peditum millia, equitum quinque. E Samnitibus, peditum millia septuaginta, & cum his equites septies mille. Ad hæc Japyges, & Messa-*

*Messapyges conjuncti, peditum quinquaginta millia detulère, equitum decem & sex. Lucani peditum ccllxxx, ccllxxx, ccllxxx, equitum clxxx, clxxx, lxxx. Marfi, Marnicini, Ferentani & Vestini, pedites vicies mille, equites quater mille. Duas hoc ampliùs legiones, in Sicilia & Tarenti, subsidio locaverant, in quibus fuere pedites quater milleni & ducenti, equites item ducenti. Jam verò è plebe Romana atquè Campana, dedere nomina militiæ, peditum ducenda & quinquaginta millia, equitum tria & viginti millia. Ita efficiebantur summa copiarum, quæ urbi præsidebant, ad peditum millia centum quinquaginta, equitum circitèr millia sex; Universus verò numerus optæ ad militiam (Nota verba) multitudinis, erat peditum millia septingenta, equitum septuaginta. Et ausus tamen est Hannibal, cum vix ipse viginti millia haberet, quos huic numero opposeret, Italiam invadere, verùm de his meliùs ex iis, quæ inferiùs dicentur poterit constare, &c. &c. Atquè hoc diluvium virorum, sola Italia effudit; Miraris? Evocatione communi armorum, tunc bellatum, vel (quod certè ex contextu suspicor) ex quoquo rure oppidovè, tertius quisquè (vel secundus) armis ferendis aptus, pro militari ætate, bello apparabatur, in plures menses, ære, commeatu, opportunitate armorum providus, per cohortes (datis ex publico Præfectis) dividendus, modò vocaretur accinctus, minimè gravis ærario, nec provincialibus, per hyberna aut vagabunda stativa molestus, verùm post castrenses labores, domum repetens quietus, utilis Reipublicæ, & casibus belli promptiùs educendus, quàm si per fornices, & fora, expositâ pecuniolâ, peteretur legendus. Poloni item, regnante Sigismundo Augusto, circitèr CXL millia, equitum armatorum, contra Cruciferos Livonienses eduxerant, cum in aliquas tantùm Provincias (dispensante lege, quæ divisus armis bellare vetat) evocatio armorum, nobilitati indicta fuisset, nullo oppidanorum, vel rusticorum secuto, qui evocatione communi non tenentur. Quantam potentiam, & apparatus, hodie nè utiquam promptè videas, desuetis ab armorum usu, & militarium equorum curâ, civibus, dùm soli stipendiarii, castra sequuntur. Nisi fortè census, seu lustrum annuale, tum communis evocatio, in usum revocetur, arte (proh dolor) Monarchitostatarum, suppressa. Periculosum igitur in Republica, togâ, seu*



sago, assuefieri populum, ut emantur obsequia, quæ Patriæ gratis debentur: cessat tunc generositas, atque animi vigor; debitum abit in onus, recta consuetudo, in injuriam: Nè dicam, abit promptitudo, in venundationem operis, ac demùm in ignaviam. Scythæ etiamnum, nullos conductitios habent, nec adest ærarium, sed prompti omnes in bella, eoque nostris (acie tenuis) plures, idem miles, qui pecuarius, qui opifex, qui curator familiæ, qui ruranus, qui civis, qui purpuratus, à solis enim militaribus, personæ, resque æstimantur. Castrorum & domus, mollium aut asperiorum, tempora non habent divisa, sed perinde putatur, pro Tauricani Principis, immò pro sua Patria bellando expeditissimi, nobis molesti, quibus (similiter quondam bellantes) fuimus terrori. Turcis item, (*Fanzarorum* peditatum si eximas) promptuarii sunt equites, sine stipendio, communi evocatione, tum pro mensura fundorum, proprio commeatu, *Timariorum* sub nomine militantes, dum evocantur. Verbo rem claudio, multi esse hanc evocationem, quæ ærarium, promptitudinem armorum, quæ casus adversos belli, & inexhausta subsidia spectes, præsertim si per binas, ternasve Provincias, seu *Palatinatus*, annuatim alii atque alii, in orbem militent, & recentes fessis substituantur, *sexto, septenove anno*, ad eosdem, ordine redeunte, totam enim molem virorum fatigare, immò periculo simul exponere, quis sanæ mentis suadeat? castris (velut alibi diximus) & agendo gravem, regendo impeditam.

Rerumpublicarum quibus, pax longa inest, proderit tamen præfidiarias cohortes, per municipia; tum præsertim, maritimam classim haberi, non solum servando exercitio militari, unde ingruentibus bellis, seminaria sint Ducum & militum: Sed maxime, ut honesta occupatio, procul à domo, inquietis capitibus obtrudatur, quibus nisi exoneretur Respublica, specie Præfecturarum & belli, periculosè involvant statum, cives otiosi. Velut Hetruriæ Duci, intra rationem status est, altissima licet in pace, classim instructam, ad insulam *Illuam* haberi, ut malefici, tum inquietiores, *humoris* (ut ajunt) peccaminosi, ad triremium operas, vel honestiorem custodiam, deputari possint. parsimoniâ humani sanguinis, sed commodiùs, labore mulctandi, aut occupatione

patione coercendi, præsertim juvenes obærat, & nullius operæ, quod stipendiorum occasione, honestè (militari sub statu) vivant, nec desperatione inopiæ, in varios ausus propellantur. Nobis etiam Polonis, nuper non obfuit, ad ripam Boristhenis, versus Scythiam, & camporum deserta, arcem *Kudakianam* exstrui, cum otiosa nobilium juvenus, stipendii, & armorum honestâ illecebrâ protracta, exercitium bellorum imbueret, dum inquam, crebrâ excursione contra barbaros, aliosque suspectos, accolarum Boristhenis excursiones, ad subita bellorum, labore ac periculo, induraretur.





## PUNCTUM SECUNDUM.

## De Ærario.

Id est,

DE SEPTIMA PARTE  
POTENTIÆ RERUMPUBLICARUM.

Ærarium constat collatione pecuniæ, quam, viâ variâ contribuendi, incolarum confert manus. Ne sibi igitur fraudi sit Princeps, bonam monetam domi fieri, tum ab externo importari curet, etiam depravatam, regno pellat, nam qualemcunque passus fuerit, talem in ærario deponet. Modi verò, boni retinendi nummi, aut adulterati vitandi, secundum communem praxim,

*Hi possunt esse.*

Urei vel argentei nummi majores, altius æstimentur, quam apud finitimos, Sic *Richellius Cardinalis* (magnus ille consiliarius Galliarum) auro puro & argento, collimitaneam exhaustit Hispaniam, cujusque Hispanici nummi, adaucto ingeniosè pretio, undè Hispani mercatores, spe lucri modici illecti, tota peculia auri & argenti, solo decennio, exportarunt in vicinam Galliam: Eo commento, ingeniosa Gallia, sibi stetit nummis dives, Hispanis injuriosa. Atque hoc illiciendæ extraneæ monetæ; verum promptius ut subveniat ærario, magis dextre fiat (nam aliàs simplex auctio monetæ, privatis, non ærario lucrum ferat) si argentei nummi majores (*taleros* vocamus vulgò) dum *florenis* tribus communiter æstimentur, in quinque nummos minores, *florenum* valituros, transformentur, ut publicum ærarium,

vulga-

vulgaribus taleris, pretio viliori conquisitis, & recusis, duas quintas, si non *materia*, saltem ratione *impositæ formæ*, lucri nomine acquirat, promptuariis expensis sufficiens; Immo, incorrupto talerorum pretio, præstabit, informe argentum conquirere, admisto ære recudendum, sic illatum, non exportabitur, uti minùs extra valiturum. Cautione tamen adhibitâ, contra falsariam exterorum monetam, nè eo prætextu, in decipulum inferatur. Aliàs te ipsum, eo recudendi argenti consilio, periculosè involves.

Si fieri non possit, ut ascendant nummus, saltem invigilandum ut par sit pretium, vicinorum monetæ, non idèò suberit metus exportandi auri, argentivè ad externos.

Imponenda necessitas Dantiscanis, pro nostra annona, monetam ut numerent, purè auream, argenteamquè, vel si externa sit, censuræ publicæ subjiciatur. Fit enim, ut priùs bona inferatur in decipulum, postea depravetur; velut eâ viâ, nummi Leone signati, aliique, huc irrepserunt, cui obviabitur, si tam Dantisci, quàm in civitatibus mercaturæ fuetis, substituatur censorius Magistratus, cujus scitu contractus, ipsaque fiat emptio, nè quid fiat in fraudem pecuniæ.

Qui nostras merces coëmunt, totum, dimidiumvè pretium, puro auro, crassioriquè argento, ut solvant, providendum, reliquum currenti monetâ numeraturi. Pro exoticis verò mercibus, quibus opus habemus, & in externa eliciunt pecuniam meliorem, non numeretur aurum, sed argentea moneta.

Ex purissimo argento, cudatur moneta, nequè *pondere* aut *forma*, sed *valore materia* æstimetur. Quid enim est; ingenti pondere & formâ, cudi taleros, si plùs habeant æris, quàm argenti; Sit licet idem nummus, familiaritate currens, quid si externi, eundem rejiciant, quid? Similem si ad nos inferant. Uti *Hollandi*, nummos majores, Leone signatos, sibi inacceptos, nobis damnosos ferunt.

Minutior moneta, nulli bono, præterquam absumendo argento, in multas formas dividitur. Satis sit, nostrum ad usum, unam alteramquè nummorum speciem accommodari, pauca in reliquum variatione. *Venetis*, minutior moneta, purè ærea cuditur, usui promptuario vulgi accommodata, bonum argentum, datur crassiori monetæ.

F 3

Di.



Dictum; Minutiorem monetam, æream cudi oportere, sed periculum adest, nè finitimi, purè æreos nummos, clanculò submittendo, (velut Regnum Sueciæ, per Liyonienſium commercia, nobis est damno) per commutationem hujus facis, argenteam monetam, immò argentum subtrahant. Nequè hoc sine remedio, vetito æræ monetæ usu, quàm diurno victui rebus mercandis; Utvè altiori emptioni, vel contractui, tribus pretii partibus, aureo puro, argenteoque numismate expositis, quarta pars, hâc æræ facie adnumeretur; Immò aureus nummus, minutiore monetâ commutandus, tres argentæ monetæ partes, quartam æream ferat. Quantum peccavit Respublica, quæ nummis æreis in immensum crescentibus, non posuit modum, vel posterior ætas, damno suo videbit.

Bona immobilia, certâ specie optimæ pecuniæ, vendantur, emantur; undè præstantioris monetæ, contractibus asservandæ, necessitatem adesse. Sint igitur jurati custodes librorum, scripto connotaturi contractum, justâ specie boni nummi exsolutum.

Quod dicitur de argento, existimandum de auro; ut sit purissimum, nequè aurifabrorum fraude intervertatur, poenâ Fisci dictâ delinquentibus.

Typis imprimatur, species nummi liciti, illiciti, nè abeat ignorantia, in excusationem erroris.

Aurifabri, argentum operatum, optimæ bonitatis, vendibile exponant, secus deprehensum, cedat fisco, & delatori.

Eleganti forma, cudatur moneta, indè fraus rescissionis patebit. Quod practicatur hodie in Gallia.

Non liceat incolis, exoticas merces auro puro solvere, sed argento, sic aurum, quod importatum, non exportabitur. Immò, si fieri possit, Hungarica vina, commutatione mercium (quibus opus habent) petantur, retinendæ domi pecuniæ.

Tributa, certâ specie boni nummi exigantur.

Moneta cudatur, æstimatione bonitatis, vicinorum monetæ, inferiorem si cuseris, tua quidem non exportabitur, sed mala importabitur.

Post rem Monetariam; Altero loco, inter modos ditandi ærarii, *commoditas commerciorum*, poni potest, ubi enim crebra exer-

centur commercia, multa sunt inductorum, evektorum, & transportatorum telonia.

Provideat Princeps, securitas ut sit viarum, & commoditas hospitiorum, tollat impedimenta fluviorum (in vicina rura, curam & opus purgandi alvei, proportionatâ mensurâ divisurus) navibus equorum operâ, contrario fluvio trahendis. Commoditas enim aquarum, immanè, quantæ moli, deportandarum mercium prodest. Fertur certò, canalem Brabantinum, qui Bruxellis, Antverpiam versùs ducitur, quinque centenis millibus aureorum constituisse. Nec inutili impensâ, præter enim fructum, quem illa telonia, importarunt ærario, (ut duplum expensorum pretium superarint) restat in reliquum, prompta commoditas mercimorum, diurnaquè ærarii subsidia.

Ubi montosa Provincia, fieri non patitur canales, imponendum civitatibus, mutuam ut habeant curruum & vecturarum communicationem, invitandis eâ commoditate incolis ad commean-

dum, undè crescit mutua populi amicitia, dein societas, postremò commercia instaurantur. Non in commoditate publicorum curruum, & vecturæ, sed in transmissione literarum, multum interest commercio. Juvat igitur, in quacunque bene ordinata Provincia, vel civitate, impensis publicis, haberi tabellarios (*Postiones*, aut cursores, vocamus vulgò) Prout apud nos invaluit nuper, latiusquè mos invalueret, civitatum & oppidorum inter incolas, ordine tabellariorum instituto, pro numero incolarum, biennio, vix ad eundem, ordine commean-

di redeunte. Plurimas commoditates in publicum, ab eo capit, qui sapit.

Societas populi in commercio, Est mihi *tertia* ditandi ærarii materies. Non solùm commoditate commerciorum, incolæ provocandi, sed prudens necessitas imponenda; Ab emptione immobilium, seu venditione, ut arceantur cives, societati qui recularint. Dicitur verò societas, non unius tantùm civis cum alio, sed integrarum civitatum, unius aut plurium regnorum, ad exemplum societatis *Hanseaticæ*. Atquè hujus speciem insinuabimus.

Retinetur aptè societas, communione civitatum, per delega-



tos in simul conveniendo, consultandoquè, *societatis Hanseaticæ* exemplo. Quæcunque civitas, ad comitia convenire, necesse illic habet, aut si venire omittat, pro unoquoque die absentia (serius quò venerit) viginti taleros persolutura; vel si omnino negligat, subit *Arestum*, vel excluditur à societate.

Ærarium sit publicum societatis, quo civitas quæquè, annuatim conferat aliquid, in commune.

Qui foederi inscribi volunt, inferant aliquid ærario.

Duæ viciniore civitates, eliberationem tertiæ (si aliquo malo prematur) procurabunt.

Nemò foederatorum, ultrà scitum aliarum civitatum, cum hoste paciscat.

Si peregrinus contra societatem fecerit, in bello contra serviens, arma vel consilium subministrans, in ulla foederatarum civitatum, locus ei sit, verùm carcerem & *Arestum* patiat.

Ex una civitate pulsus, in aliam ex foedere non recipiatur.

Certo tempore, alicui ex foederatis serviens, totale jus civitatis acquirat, aut aliquam summam lucretur, in comparando jure.

Quæquè civitas ex foedere, certum numerum vendibilium armorum, habebit, pro commoditate foederatorum. Maximum aliàs incommodum, si desint coëmendo, quæ usui necessaria, ut velut dono acceptum habeas, quod in necessitate, commodè emptum acquiris.

Aliquis foederatorum injuriatus, communitati injuriam deferat, ut ei patrocinium sit, ex foedere.

Nemò à foederatis, bello aut prædâ parta emat, sub poena mortis.

Aliò merces suas exportans, amittit jus civitatis.

In civitatibus emporeticis, quæquè foederata civitas, providebit sibi domum, rerum procuratorem habitura.

Quæ omnia, tuentur, servant, aut ditant societatem, non levi ærarii proventu.

Quod dicitur de civitatibus, intelligi potest, de foederatis Provinciis, aut personis.

Sunt item modi augendi ærarii, cum justo convenientes, quos promiscuè indicare, in rem fuerit, uti à scriptoribus, seu à diversa praxi, erui possunt.

In

In oppignorationem, præter purum argentum aurumvè, nihil deponatur, certam pensionem inferendo ærario, ab oppignorato.

Peregrinorum morientium pecunia, cedat fisco.

Utilius, ut exteri veniant ad coëmenda nostra, quàm ut nostri exeant, ad vendendum sua.

Infames; certo pretio restituendi, in necessitate pecuniæ.

Facetum erit, quod sequitur; adferam tamen: Lacedæmonii, necessitate pecuniæ pressi, scitum fecerunt; Totà urbe, tùm circumjacenti agro, Dominos, familiam, jumentaquè, usq; die jejundare debere, quantum quisquè insumpisset non jejunaturus, tantundem inferret ærario.

Intestatorum plebeiorum quarta pars, cedat fisco ex mobilibus.

Cùm successio immobilium, descendit ad foeminas, quinta pars successionis æstimatæ, cedat fisco; Non tam enim opes foeminarum profunt Reipublicæ, ac virorum.

Ab inscriptione advitalitatis *in solidum*, vigesima pars reddituum primi anni, in ærario deponatur, inscriptio aliàs sit invalida.

Foemina vendens, aut oppignorans, quinquagesimam æstimati, ærario inferat.

Justutoria; capiat Princeps, vel Respublica, ut quantum ab expensis pupillaribus, debitorioquè defuncti superest onere, reliquum proventuum, fisco inferatur.

Accipientes publicos agros, advitalitii nomine (*bona Regalia* nobis dicuntur) censura anni primi, inferant ærario, locatione usu fructuum, plus offerenti (ut ajunt) proposita.

Pauci exactores sint censuum, nè salariis distrahatur proventus.

Potius viri & arma, Provinciis imponantur, quàm tributa; pecuniæ, vitio exactorum amitti possunt, viri non item. Exemplo Turcicorum *Timariotarum*, seu agrariorum militum, qui pro mensura fundorum, militare tenentur. Prout nobis Polonis, sunt *se-* agrarii, *dites* per Palatinatus, *agrarii*. Atquè utinam, plura talium signa *nec Pro-* scriberentur, ærario non molesta, colonis (vagabundos per dis- *vinciæ,* *nec ærario* cursus, aut questuosa per hyberna) minimè formidanda; Pro- *molesti.* pria veste, annonâ, stipendio, armis, instructissima; castris in exhausta, seditionis non suspecta.

G

Defi.



Deficiente ærario, amor incolarum in Patriam provocandus. Quantum quisque amat Patriam, offerat Reipublicæ gratuito, aut saltem mutuo. Facile verò præstabitur, aliquibus clam substitutis, ac largitionem proposueris, aliquid publicè ut offerant (licet postea resumpturi) in æmulationem cæterorum; sic Henricus secundus Rex Galliarum, exercitu ab Hispanis ad Sanctum Quintium cæso, cum penuriâ pecuniæ, militi reficiendo laboraret, indictis trium statuum comitiis, petiit per Cancellarium, mille personas, civium ditiorum, ex omnibus Provinciis nominari, cuique impositâ necessitate, mille scutatos (taleros vocamus vulgò) sine fenore, in fidem Principis conferendi, interjecto tempore reddendos. Quâ ingenti summâ, per insensibilia promptè collata, subvenit ærarii necessitati, & bellum feliciter confecit. Præstat quandoquæ, collationibus, incolas Remque publicam gravari, quàm amitti.

Publicâ parsimoniâ, augetur ærarium, sumptus inutiles publicorum ædificiorum, aut splendorum legationum, si videntur; ut liberalitatis, sic opum, fons est parsimonia.

Quæ sine impensâ fieri possunt, præstentur: plebeiis concessa Nobilitate, propriis stipendiis, annos aliquot qui militaverint. Nobiles item, suo sumptu, castra qui secuti fuerint, titulo augeantur. Immo, civitatibus aliqua privilegia concedantur, quæ certum numerum militum submiserint, vel navem, si mari bellum geratur.

Redditur Provincia nummata, si quisque privatorum, habeat publicè carbonam, quod decimam proventuum, anno quolibet, publici notarii per manus, deponat, decennio totum simul resumpturus, eadem in annos sequentes, repetitione. Quod serviet parsimoniæ, ac usui privatorum, tam vadimonium publicum, uniuscujusque fidei, habebitur.

Divites censum, pauperes operam conferant, vallum fodiendo, vias publicas curando, canales & urbem purgando.

Potius aliquando, opera & comædatus, vel arma exigenda, nomine tributis, quàm pecunia.

Capitatione, augetur ærarium, ut populus menses in singulos, viritim offerat nummum, pro numero populi, ærario inferendum.

Æra-

Ærarium duplex instituatur, ordinarium alterum, diurnis expensis paratum, alterum sanctius, ex minimis proventibus, summâ Reipublicæ necessitate, aperiendum. Sanctius dico (justa moderataque ex collatione) non, quod absit dici possit, pauperum lachrymæ, emunctio, pressura, & spoliarium subditorum.

Partiti sumptus bellici, levant impensas ærarii, altera Provincia, si procuret annonam, arma altera (dein pulverem nitratum) altera certos pedites, equites altera, aut in ditiores civium, impensæ dividendæ.

Scriptæ membranæ, Principis manu, senatorumque connotatæ, (adjecto cuiusque pretio) vice pecuniæ, stipendii loco distribuuntur; mercatoribus necessitate licitandi impositâ. Ditescente publico ærario, redimendæ, aut loco tributis, retrò in ærarium inferantur.

Non indecorum Principi vel Reipublicæ, augendis belli proventibus; exercere certa nonnunquam mercimonia. Ut si negotiatio sit nimis expensiva, cui privati haud sufficiant, longinquitatis ob periculum, vel quando magni apparent proventus, solo Principi convenientes; Idque publici boni commodo; ut si frumentum coëmat *fiscus*, annonæ penuriâ, populo vendendum, non indecorum esto. Non quidem probaverim negotiationem, sed immò probro imputem Principi, si præsertim ad vilia lucrorum demittatur, prærepturus commoda, institutorum minimis, sequè præsens rebus immisceat, avaritiæ magis, quàm communis boniusui; Verum si honesta insit, per fidissimos Præfectorum, mercandi industria, immò *fisci* potius, quàm Principis, cur improbem illam? Multò utique turpius, magisque infame, populum tributis gravari, quàm per industriam, necessitati subveniri; Diviso præsertim in opulentiores mercatorum ære, pacto societatis, & lucri exinde proventuri, adjectâ partitione.

Non tantum Respublica, sed civitas quæque, habeat proventus privatos & ærarium, quo publicæ necessitati subveniatur. Ea verè dives est Respublica, quæ deficiente publico fisco, habet promptè domi, unde mutuum petat.

A collimitaneis populis, procuratur pecunia, si ad hostiles colonos mittas, viritim ut redimant; quietem agriculturæ, nè à tuis præpediantur, immò redimant libertatem & prædam.



Subactis in civitatibus vel Provinciis, tolles jus succedendi, super immobilia, extra directam progeniem masculorum; nam ad Principem devoluti agri, poterunt vendi *jure feudi*, undè pecunia, sumptibus belli sufficiens, coacervabitur.

Ex successione collateralium, & tutoria pupillorum, ab intestatorum item bonis, pars pecuniæ petenda.

Ab emptione immobilium, venditione, locatione, conductione, centesima æstimatorum, inferatur ærario.

In Hispania, quoties immobilia venduntur, decima pars emptionis, infertur fisco.

Quovis à contractu pecuniario, à *re lucrata in judicio*, centesima adjudicati, detur ærario.

Sed justissimè ab iis, qui vitato emptionis puræ contractu, pignoris modò nomine, opulentis inhiant fundis & proventibus, otiosè dites & avari, vigesima aut trigesima exigenda, saltem in poenam avaritiæ, & erga incautos hæredes corruptelæ.

In summa necessitate, nobilitatis tituli, mercatoribus vendendi.

Hispanorum ærarii, quæstuosum inventum, ut contractus & Privilegia, tum decreta lucrorum, signo Regio, impressa in papyro, scribantur, publicorum ministrorum curâ, carius vendenda; non levi ærarii proventu, nec magno eumentium damno, dum emendo lucrantur.

Stipendia, militibus nunquam augebis, nam ea commodissima exhauriendi ærarii via, dum perpetuum onus, portabis incautus. Sed potius certo donativo, præmiabis pro tempore, benè meritos, nè aliàs usurpata gratitudo, sensim abeat in debitum, ullo novæ recompensæ in post titulo, nec elevandæ merentium virtuti, vel dantis in æstimatoria renovandæ gratiæ. Immo, prudenti exsolutione militaris stipendii, parsimonia & auctio sit ærarii. Prout nonnulli, mensem militare fecerunt, quinque sexque hebdomadam, ut duo menses deperdantur, ærario minimè graves; Vel magis industriose alii, & minore militum in questum sensu. Primâ Dominicâ primi mensis, dein secundâ secundi, atque tertiâ tertii, menstruum stipendium solvi jubent, sic circuitu hebdomadarum factò, quintus mensis, subtrahitur stipendio, ærario annumerandus.

Faci-

Facilius contribuunt subditi, cum viderint, in publicam necessitatem, non Principis luxum, imperari tributa; vitet igitur Princeps, dilapidandi opinionem.

Monopolia rerum exoticarum, tute potest inducere Princeps, præsertim si luxui, non vitæ necessitati, sint accommodatæ.

Quoniam novâ possessione bonorum (gratuito quæ accedunt) naturale recreari animum, ut velut ex alieno, liberalius dividant homines, quàm ex ante possessis, quibus dudum inhabitavit animus; Non grave, quoquo jure succedentibus, antequam occuparint possessionem, ut inferant ærario, Vigesimali, decimamve bonorum æstimatorum, aliàs non adeatur successio, sive adscripta, directa, collateralis, sive sit advitalitia, antequam tabulis publicis, pensio inferatur. Si verò intra mensem pensionem inferre neglexerit aliquis, fraudem facturum ærario, proximior succedens capiat bona, idem præstaturus.

Sed Hispania, conquirendæ pecuniæ Magistra, invenis enim modos ingeniosè colligendæ, dum opus habet, à luxu vel maximum, dein à *chartis lusoriis*, aleis, dum emuntur. Apud nos item, ab iis, quæ heluonum, non ingenuorum sunt civium, justissimè tantundem tributi nomine exigi posset, quanti constat, quod emitur.

Rex Hispaniæ, concessione Pontificis, decimam reddituum, ex bonis Ecclesiasticis per Hispaniam quandoquæ recipit. Constat immò, quondam concessum Hispaniæ Regi, bello Turcico, dimidiam partem argenti sacri petere; Velut nobis Polonis, hodierno sub Pontifice, *Alexandro Septimo*, bello Suecico permissum. Cariores Deo animas, & sacra, quæ bello perduntur, quàm muta metallorum altaris ornamenta.

Civitates & oppida Hispanica, habent redditus publicos, è fundis propriis, & è multis delinquentium, undè partem tertiam, quotannis aufert Rex.

Quondam usurpatum apud Venetos legitur, in defectu pecuniæ, aliqua bona mobilia, taxæ ut subjicerent, duplici tamen æstimatione, quàm res constabat. Admissis vacuis, sub nihili nomine schedulis, pro numero schedularum, personæ convocabantur, ut præsentì senatu, extraherentur. Qui vacuas extrahe-

G 3

bant,



bant, perdebant vadium, qui lucri nomine inscriptam ceperat, certâ prius numeratâ summâ, (sed longè minori, quàm res constabat) totam rem lucrabatur, reliquorum insensibili damno.

Illum quoque acquirendæ pecuniæ modum, alicubi usitatum, non improbaverim. Cum quædam nobilium prærogativæ, ipsis nobilibus venduntur. Quod per juniorem ætatem, facere, aut capere non licet, certâ depositâ summâ, capere, tum facere liceat. Vel si quæ in eam formam.

Ærarium potius dividendum, quàm uno loco habendum, nè si ille locus, astu ab hoste capiatur, aut Provincia, vel civitas, rebellis fiat, periculum sit thesauri. Idem sentiendum de *Armamentario*.

Feneratores sint obstricti, Reipublicæ in necessitate, sine fenore, mutuam dare pecuniam, iusto pignore accepto.

Non aliundè certior ærarii proventus, quàm ex agrorum censu, bona publica ut sint, quorum usus fructuum, inferatur ærario. Nullum regnum commodius, quàm Polonia, sibi provideret, tanto in numero publicorum agrorum (*Starostiarum* vulgo) quibus abundat.

Nec ille Regum olim, pro suo fisco imprudenter. Ruricolæ cuique, necessitatem imposuit, ultra suetas in alimentum fementes, modium frumenti, Principis nomine, annuatim seminandum, unde ex accrescenti, Principis in horrea, duæ tertiæ inferrentur, augendi ærarii commodo: vel rectius sit; unaquæque in Provincia, publicum agrum haberi, quo semel in anno, ruricolarum proximior quisque, araturus venire teneatur, dum ferendi tempus adest, alterâ vice, cum falce affuturus, dum colligendis frugibus, maturitas vocat. Eâ planè insensibili, sed multarum simul manuum operâ, multum frugis parari, & prodesse ærario possit, sine dispendio privatorum. Verùm maximè conducat, ea publici agri commoditas, providendis victualibus fortalitorum, in casum obsidii, si quodquæ fortalitium, suum proprium agrum, in submæniano habeat, immò quæquæ legio aut cohors, unde collatis frugibus arcium penaria, citè provideantur annonâ, pecunia secus, per insolentiam Præfectorum, in vana expensarum profunditur, aut per avaritiam retinetur. Non quærere operosè cum impenâ, verùm paratam annonam asservare, cuique promptam.

Eadem

Eadem ab occasione, opportunè dicendum non omitam, non leve posse fieri, apud nos præsertim Polonos, ærarii augmentum, parsimoniâ expensæ, in præsidia, reparationemquæ munimentorum. Si quod ab ærario expenditur, aliundè provideatur. Videlicet, à qualibet Præfectura; duo, triavè rura, in provisionem castri, si avellantur. *Smolenscit, Camenecia, Kiiovia*, aliorumquæ, tam intra regnum, quàm à limite; Præfecto aut provifore designato, cui arma, munimenta, & quæ obsidionis casibus opportuna, sint curæ. Non perpetuum verò Præfectum velim, sed triennid, scitò provincialium legendum. Perpetuitate Magistratuum, corrumpi facile, superbire, immò inolescere homines, nec tam diligentes reddi, quàm si designatione renovatâ, sua quisquæ (alius atquæ alius) recentia studia, diligentiam cum industria, tum laborem, officio ferat, nè per inertiam transactum, cessisse ingloriè successorì videatur. Præsidia munimentorum, si non ex mercenariis legionibus substituentur, saltem urgentiori casu, agrarios pedites, armis, pulvere, globis, comineatu instructos, nobilitas Provinciæ, *jugeratim* submittere munimento teneatur. Insuper, singulos in annos, mensuram frumenti, de jugere quolibet, intra fortalitium inferat, proximior quisquæ, ut coacervatâ sensim annonâ, casibus obsidionum sufficiat. Dein ruratim, bini operarii, cum pala & rutro, trusilique vehiculo, semel in anno submittantur, reparationi munimentorum; Sic magno servandæ Provinciæ arcano, & parvâ ærarii tum privatorum impenâ, locus seipsum aptè nutriet, conservabitquæ. Aliàs occupatio regionis, munimentorumquæ, sit damno, si onus & conservatio, publico ærario incumbat, fructus loci, privati civis cedat commodo.

Si aliqua pecunia, ultra expensas superfit, poterit certo pacto annuæ pensionis, (velut Augusto Cæsari erat suetum) inter opulentiores mercatorum, usui commerciorum dividi, ut partim sibi, partim Reipublicæ, luerum procuretur.

Moris olim erat, quibusdam circumspectis gentium, rebus fisci & quæsturarum, homines juniores ut præficerent; Juvēntus enim, minùs avara, magis est verecunda, & talium innocens, immò patitur correctorem, dumquæ primæ ætatis virtutem simplicem (nondum per astutias imponendi, ac evadendi artibus

exer-



exercitam) negotio ferunt, non tam sunt fallendi modis secreti, aut circumspecti, quin deprehendantur in correctionem. Secus ætatis inveteratæ hominibus; necessitate, occasione, dein temporum, & personarum familiari notitiâ, sub pallio quæsitæ auctoritatis, malè agendi usus venit, ut etiam fallere seiant, sine sensu, præsertim dum tractu temporis, & officiorum, explicandis artibus, parandis ministris, tempus lucentur. Prout juniores etiam, lubrico ætatis, & occasionum, viscata per officia, facile corrumpuntur, nisi alii post alios, promptè substituantur. Dixerim igitur, moderni vitio sæculi, continuandis officiis, sæpè vocari experientiam agendi, cum sit, non illa fidelioris, aut exactioris erga Rempublicam servitii, verum etiam, coöpertioris in rem privatam astutiæ. Immo, loco prudentiæ, fallendi artificia, & insolentiam, diuturnitate officiorum comparari.

Thesaurus, non tam potenti Principi, civi (vel civitati) credendus, unde non possis repetere dum velis. Nequè loca tam debili asservetur, unde fortior quisquè dum velit, aut prior armatus, capiat.

Habeat (quod summum) Respublica libellum, quæ publicæ opes contineantur, portus, vectigalia, collationes, tributa, quantum civium & sociorum in armis, quot necessitates, largitiones, expensæ, nè sumptus censum superet. Quæ necessaria, impensis curentur, reliqua, ut minus profutura, & damnosa omittantur. Cui rei, perpetuum magistrum habeat Respublica providendo.

Ratio ærarii, commodissimè à *Quæstoribus* petitur, (velut quibusdam populis fuerat) dum publicæ pecuniæ, & expensorum, rationem reddere, prius coguntur, postea privatæ fortunæ, calculum ponunt, unde accepere, quæ noviter (velut somnio divites) ipsi habent. Causam quorum dederint, ea possideant securi, vel secus, velut suspecta, & subdolè parta, reddant ærario, quorum habitorem, sufficiens non datur ratio.

Studium thesaurisandi improbari politicorum, quibusdam; Nè occasione implendorum loculorum, avaritia sensim, animo Principis ingeratur, munificentia & liberalitas, inter infructuosa, parcitas vectigalis dum habetur, eoque pressura populi, abeat in censum.

censum. Juvenis adhæc successor, si capiat Principatum, pro fiducia Paterni ærarii, propè ut insolecat; sensim quæ inferuntur ærario, respectu jam paratorum, negligens, curam sui & industriam providendi, intermittat; vicinorum amicitias superbus spernat, suarum virium insolens, alienarum expensor incurius, aut iniquus. Undè occasione ditis gazæ, vel pro temeritate, bellicis & periculo involvatur, insufurrantibus præsertim, obviis luxuriæ ministris, satis opum sibi, majorum curâ partum, quomodo præsentibus fruatur magnificè, non ut tristem curam induat providendi; studium futurorum, inter inhonesta generosi Principis, falsò reponentes. Eò verò facilius, transfertur ille prodigendi in insolentiam, quorum non suo labore, vel curâ parator, etiam pensator ut sit negligens, crediderim; Alienus labor, cuiquè levis est, proprius certè gravis, proindèquè æstimatur. Sæpè idè, melius provisum ajunt, qui occasionem industriæ, vel necessitatem, quàm paratam gazam, in occasionem corruptelarum, & insolecendi, reliquit successor. Verum è contrario, rectius opponi potest; Nisi adsit præsens ærarium, per tributorum vectigaliumquè licita, pacis beneficio sensim coacervatum, quis modus repentinis? quæ cura providendi, periculosis? tardum sit tunc quærere arma, commeatum, nummos, (non enim ærarii nomine, solam pecuniam vocaverim) dum opus. Non cui-libet verò Principum inest, vel habetur fides concessi (*Creditum* vocamus vulgò) aut si adsit, non adest in promptu, tam opulentus creditor, quantum bellum & necessitas requirat. Futura igitur (utar communi dicto) *muturè provide*. Tanti quisquè est, quantum habet. Etiam sacræ paginæ monitu, remittimur ad formicarum sapientiam, matura ætate providentium, quæ hyeme opportuna, nè intempestivæ curæ poeniteat.

Opes Regnorum & potentia, non proindè major est, quod majoribus Provinciis regnatur, verum sufficit, proportionata ut sit Regni magnitudo, sufficiens, non exsuperans, modò recto habeatur ordine. Mirari licet *Carolus Quintus Cæsarem*, cujus imperii magnitudo, tot terris distendebatur, quantam vix in triumphante, & victrice Roma, suspexit orbis (præter enim imperium Romano Germanicum, Hispanis, Belgis, Neapolitanis, Siculis,



aliisque circa Italiam terris & Insulis, & quod omnem magnitudinem fidemque superet, Orbi Novo, id est *Americæ* imperabat, undè auro argentoque, tot sæculorum foetu, gravidi montes, opes suas largè effundebant) ob defectum tamen stipendiorum, exercitus ejus, seditionibus cum scinderetur, immò quod mirè, tot populis fulta potentia, sæpè defectu militum, cum laboraret; Fortè factum, quod unius hominis mens, tantæ moli ad punctum regendæ, seu obviando hinc illinc orientibus malis, partes in omnes non sufficeret, quàm dum propria quisque, curat Regna è proximo, magis per se, quàm per *vice Regum* emunctorias manus, quæ (præsertim à remoto) haud per omnia fidæ: Seu quod magnis imperiis eveniat, velut prægrandibus & obesis corporibus, quæ pondere gravantur, sibi ipsis molesta, & impeditiora, quàm ut in omnes casus & occasiones, se regendo & movendo, expedita sint, dum disgregatas vires habent, & quæ, *magnitudo sua, vulneribus objecit*, ut ferè ascensus magnitudinis, descensus potentia sit, tantòque debiliora eveniant imperia, quantò plus supra proportionatam magnitudinem, gravem sibi ipsis acquirunt molem. *Mediocria* contemnere cavent, & excitant curam sui, tum industriam, secus uti virium, sic opum, aut provinciarum (etiam ingenii) *magnitudo*, primò fiduciam ingerit, incuriam dein, ac post causat damna, & lapsum. Quod re ipsa in aliis, tum in Carolo videas, dum penes monstruosam imperii magnitudinem, vix sufficeret, unius Regni Gallia potentia. Vel si licet, ad *77. cinum* Regem Gallia Franciscum, victum prælio duxerit captivum, magis casu, & vigilantia *Davali Piscarii* (pro Carolo Ducis) factum, quàm potentia, nam tum maximè destituebatur stipendiis, Cæsarianus miles, cum Galli, viros, pecuniam, omnia bello necessaria, affatim haberent, edque inerat contemptus hostium, & negligentia sui. Quod verò, imperium olim Romanum, opes & potentiam, ex præparato haberet, pro magnitudine, sibi proportionata, factum, quia sub nomine Reipublicæ, promptius magnæ Provinciae & Regna reguntur, quàm sub regimine unius, cum non prout à sorte nascendi, bonus malusve Princeps; aut perspicax, populis obtruditur (idque magnæ moli regendæ, in omnes partes haud æqualitè providendo sufficiens)

Ad Fa.  
viam  
vulg.


ficiens) sed cum paris autoritatis cives, intra virtutem, fidem, & amorem, in gratiam Reipublicæ, fidelitè sibi commissa, velut sua curant, non ministri, sed magis civis (ac si dicere licet, *condomini aut comparis*) nomine, dum paritè regunt, quàm reguntur, nec pro domino, & in rem unius, sed pro Republica, & communi libertate; Undè erigitur, contenditque civium animus in altiora, liberiùs hoc aut illud appetens, & pro genio, spontè se rebus commodans; sub unius verò dominatu, secus, supprimitur generositas, nec spatiatur liberior mens, immò non adest, pro libitu exerendæ virtutis occasio, cum prout hic aut ille, ex placito Principis vocatur, obtruduntur Magistratibus & officiis, sæpè verò, pro sorte occulti favoris, quàm ex merito virtutis. In Republica deindè, melior pejorè, ex pari potestate, dum observat facile, & intra libertatis amorem, dum corrigit, rectius haberi omnia necesse. Prout res Romana documento, quæ libertate crevit, invalescente Cæsarium dominio, collapsa est, quod Aristocratia sudore paravit, Monarchia perdidit. Nunc quoque, titulo quocunque, Civitates liberas Italiae, Belgii, Germanorum, per omnia togæ, armorumque munera, structuris etiam publicis, opibus, mercimoniis, regendique modo, venustius haberi; dum seipsas regunt, quàm quæ, (reciso nomine libertatis) stricto jure dominationis premuntur, non suæ gloriæ aut commodo, tum benèplacito, sed pro dominantis libidine, totum impensuræ; spontanea minimè gravant, jussa semper molesta sunt. Verum, quò tandem? impetus scribendi me rapit.





## PUNCTUM TERTIUM.

## Quid suscepto bello agendum?

ausæ justitiam evulgabis scripto, antequam bellum suscipies, præsertim, (quoad justè ostendere potes) prætextum defendendæ religionis. Indè assequeris, ut rationibus tuis, tanquam justis, omnes assentiantur, & compatiantur, immò studiosius juvent.

Quod propè, Papam fautorem partium quæres, in majus argumentum causæ, tùm Cardinalem, aut Episcopum, eliges necesse, partium promotorem.

Societatem armorum ineas, cùm externis, & amicis, prædam, opportunitatem, vetera adversus hostes odia, futura (ni subvertantur) mala, ostentando; Vel si non parabis socios, saltem amicos quæres, è vicinis Principibus, nè ad hostem deflectant, nè pecuniâ aut consilio juvent. Parabis verò, & retinebis amicitiam, per occasionem legationis, donis, ~~omni~~quæque meliori modo, eorum animos pervadendo, à quorum consiliis Reges dependent, præsertim si tuum legatum, præsentem habeas, testem amicitiae, & censores, seu vadem, tùm ut eadem occasione, societas armorum suadeatur. Sed qui petit ab aliquo suppetias, præsertim rebus in desperatis, caveat, nè se demittat nimium, nec nimis sollicitè, alienam imploret opem, aliàs fortunam suam, prorsus desperatam faciet, nullus est, qui solâ motus misericordiâ, jacenti dexteram porrigat (nam hic affectus, omnium impotentissimè agit, nec tam diu durat, prout *spes, metus, gratia, odium, vel necessitas*) aut qui tueri velit eum, qui de seipso, rebusquæ, sperare desiit, nisi potiùs, involvi difficultate metuat, si negotio immisceatur. Pompeii causa, multùm in opinione Phtolomæi perdidit, cùm tantam, legatorum ejus submissionem, coram usurparet oculis, rectius ille alter. *Non ut profugus aut supplex, sed ex memoria prioris fortunæ, agendum studuit.* Hinc proximè, succensuerit quisquæ Antonio Justiniano Oratori Veneto (apud

Frau-

Franciscum Guicciardinum lib. VIII. Histor.) Qui post Camera-cense foedus, quo Principum contra Venetos conspiraverant arma, ac post *Giaradaddæ*, seu *Vailæ*, ut alii apellant) cladem, infra quàm oportuerat, submissa oratione, nomine illius Reipublicæ, Maximilianum I. Imperatorem, à societate armorum Gal-liæ Regis, avellere contenderat, sua illi dedendo, quo magis res Veneta, contemptum tulit, quàm ut aliquid proficeretur. Non oportuerat, tam properè, eò consternationis venire, cùm non semper desperata sint, quæ desperata creduntur, prout tempora posteriora, & melior fortuna Venetorum docuit, dùm sua gloriose recuperarunt postea, turpis verò consternationis memoria, in hanc usquæ ætatem manet, non levitè, Majestatem illius Reipublicæ vellicando. Quantò rectius olim Romani, desperatis casibus, eò magis suprà fortunam erectiores, ex memoria prioris fortunæ (vel à spe meliorum) constantèr agebant, non infra consuetam gravitatem, sese demittentes, cùm scirent, æquè prope-ram credulitatem, & timores esse nocivos, quàm nimiam sui confidentiam. Fortunam, miros habere eventus, ac sæpiùs, post desperata, meliorem succedere, cùm rector fatorum Deus, per contraria plerumquæ, in melius agit, in confusionem humanorum, hostem erigit, sed ut casu graviore ruat, poenam reper-turus; media sua in fortuna; concedit, ut concutiat nostra, nè tamen extremè frangat, prohibet. Dùm mutuam hostium discor-diam, aut potiorum capitum, mortem permittit, vel tædium belli (ex cupidine ad sua redeundi, præsertim ob defectum pecu-niæ & commeatus, tùm ob incommoda temporum, duræ hye-mis, aut intempesti coeli, undè virorum jumentorumquæ, ex infectione morbi, nec dubia strages) animis ingerit, exindè victo-riam prosequendi, animum aufert, & consilia, levi momento confundit, vel quia extrema nostri poena, in ordinatione fatorum nondum maturuit, sed intra bonitatem suam, paternè commina-tur Deus, dùm interim nos cupit corrigi, vel dùm victorum su-perbiam arguit; ut consultius sit, non illicò despondere animum, verùm apertâ vi, resistere cui non possis, saltem qualitercunquæ, tua ut defendas, in protractionem, ab expectatione meliorum, ex tempore & occasione; capturus consilium. Velut tunc quo-

H 3

quæ

*Diversè  
alii Pu-  
gnam  
Callani  
vocant.*



quē, Venetorum hostibus (qui spe devoraverant totum) accidit. Et olim Annibali, dū post attritas Romanorum res, *ad capiendam urbem, nec animum sibi, nec fortunam adesse aiebat*. Vincere sciens, victoriā uti nesciens. Multi secūs ceciderunt, ut altius asurgerent. Nec Romani, ad subigendam Carthaginem, habuissent spem & animum, in Africam, Majestatem imperii protensuri, si Annibal eos toties vexando, ultra mare transeundi, & victoriam prosequendi, occasionem non aperuisset, velut venatores, in ea loca decurrunt, non quā adire in præsens intentum habebant, sed quod fugiens fera, & occasio duxit. Et Polonorum constantia, virilis tū infracti animi, titulum mereatur, cū totā Europā, hac ætate in nos concitatā (trecentis ampliūs, hostium armatorum millibus, per diversas Poloniæ partes, simul bellantibus, Suecīs, Germanis, Moschis, Hungaris, Valachis, Moldavis, Tartaris, rebellibusquē Cosacis, & planē toto amisso Regno) maluerint desertā domo, castra sequi, alii uno alteroque Poloniæ in angulo, velut exules, adversam fortunam masculē pati, quā turpi hostium pactioni (Suecorum, de tradenda Prussia, Moschorum, de cedendo Lithuaniae Ducatu) assentiri, melioris fortunæ tandem non desperandi, ut redeunte per Dei gratiam propitiori fato, magis decori sit, & gloriæ, meminisse viriliter patiendo, infractos tulisse extrema, quā (absit foret) succubuisse molliter, immo pusillanimitē adversis. Constantē verō in adversis agendo, confunditur hostis, & aliquid occultarum virium, subesse credit, quem confidentem sibi, nec fractum animo, aut prorsus desperantem, sed erectum videt; utiquē victi magnanimitatem, etiam victori esse cordi & honori; pusillanimes, etsi casu vincant, ludibrio tamen, & contemptui (nē dicam indignationi) sunt victis, dū quisquē fortem, quā ignavum vincere, aut ab illo meti vinci mavult. Sed hæc ex occasione, & ferē ultra intentum dicti.

Suspicio aut diffidentia, inter hostiles finitimos faciendā, nē jungantur.

Transfer bellum in hosticum. Sic Romani Annibalem avertunt, invadendo Africam; Immo præstat, hostilis terræ commeatu, & ruinā belligerari, quā tuæ. Adde, quod Tacitus

sug-

suggerit. *Propinqua Cremonensium mœnia, quod plūs spei ad effugium, eò minorem ad resistendum animum, dabant*; Cujus rei aberit suspicio à tuis, si procul à domo remoti, hosti serviet in consternationem, in cujus terra & domo, bellum est.

Auxilia præpedias hostium, adventantibus ibis obviam tacitē; Parte alterā tuorum, in loco castrorum, ad speciem relictā, nē jungantur.

Imponendum hosti, unam partem illius peti, immo aliquos, non omnes, nē si omnibus metum incutis, universi consurgant.

Mediis ipsis nocendi tibi, contravenias.

Mercanda adversariorum, ejusquē sociorum fides, per corruptores & munera, immo eorum, à quorum consiliis, hostiles dependent Duces, ut dissuadeant, vel ad te transeant. Quod sit opportunissimē, in bellis civilibus, & seditionibus militaribus, tū Provinciarum.

Unus, non plures, pari potestate Duces, bello designandi, nisi diversis in locis, bellum geratur.

Fetiales mittendi ad hostes, pro pompa belli, antequam bellum incipias, quod major tuæ causæ paretur authoritas, tū ut exploratum habeas eā commoditate, quid in hostico agatur.

Servi aut subditi, ad defectionem contra Dominos, per submissarios incitandi. Exaggeranda servitus, auxilia, libertas, & protectio offerenda, *arma subministranda, quod maximum*.

Eorum, qui subsidia hosti ferunt, ditionem invades, per te, vel per socios; vel rumorem invasionis sparges, ad sua tuenda ut vertantur.

Limitanea Regni oppida, milite & commeatu firmabis, nē dū alios invadis, alii à tergo tua petant, præsertim si abducendus exercitus, in longinqua. Cujus rei causā, accommodatissimum fuerit, si quā plurimos in Regno habeas, qui ad omnem evocationem, sacramento teneantur, solis quibus militant menibus, stipendiandi. Aut quibus dignitatum & immunitatum præmia, loco stipendii, sunt.

Paulō superius dictum, de societatibus armorum parandis, pro potentia movendi belli. Non tamen, res bonē stabilitas credes, nisi à te ipso, plus virium speres, quā ab aliena potentia, quæ



quæ sæpè fallit. •Cautus in eo fuit Sigismundus I. Rex noster; cum enim à Pontifice Romano, ad societatem belli movendi contra Turcas (pro capite armorum Christianitatis statuendus) vocaretur, respondit; Consiliis pacis, contra potentiam Turcarum, Poloniam satis munitam haberi, à foedere, quod cum eo Principe interesset. Longâ præterea deliberatione, se opus habere, cum non æqua sibi, ex victoria Turcarum, restarent præmia; Provinciæ vastæ, nec satis cultæ, confines Poloniæ regno; Cæteris Principibus, florentissimas adjacere terras, ac proindè majora commoda emersura belli. Aut secùs, periclitantibus non esse par periculum. Poloniam in limite Barbarorum positam, in quam prima barbarorum furia (superveniente casu infelicium armorum) sese effundat, cum reliqui Principes, securi manerent, in remoto, alieno periculo tuti; Non sibi esse fortalitia, excipiendis incursibus adversis, limites Polonorum esse apertissimos, non arcibus, non urbibus, non saltibus defendi, sed in solis manibus præsidium fore. Deindè, in ita societate, si Principes alii (quibus remotis, non esset par, bellandi, nisi pro gloria nominis Christiani, necessitas) se deferant, aut promissa subsidia, si non ex pari conferant, quis arguat? cum sibi interim soli, amissi prælii periculum incumbet. Poterit aliquem Principum, domestica necessitas, tædium impensarum & belli, aut primum non ex optato cadens prælium, à societate armorum avertere; dum nullo suo periculo; irritatum bellum, pro libitu quisquè deserat remotus, sibi, nisi victori tuto redire licere, ut quod communibus armis incepturus esset bellum, propriis, finire cogeretur. Poterit deindè, (superadjecit responso) ut fata hominibus dominantur, mortuo Pontifice, alius ingenii mollioris eligi, item Imperator, cui pax, quàm bellum sapiat, qui non vivaciter bellum urgeat, parcus sumptuum & laboris, nec amator periculi, nec societatis, cujus non ipse author, suis interim Polonis, periculum finiendi belli, impar facultatibus, & viribus superfore. His & aliis de causis, excusatum se haberi velle. Cum deindè iteratò instaret Pontifex per alternantes nuncios, Respondit Sigismundus: Societatem & imperium belli, non se recusaturum, modò Principes in urgendum bellum confœderati, pecuniam ex præparato conferrent, quæ millibus LX. armatorum,

torum; equitum peditumquè, & rei tormentariæ curandæ, sexennio sufficeret (non enim se velle, ab aliena discretione pendere, & periculo irritati belli, temerè involvi) se quoquè pro parte sua, XX. aut plus Hastatorum equitum millia, è Polonis superadditurum. Quod cum in deliberationem Pontificis, Principumquè Christianorum venisset, simulquè gravè æs, L. millionum appareret, necesse conferendum, incepto desistere opus fuit. Interim Sigismundus, securus pristinæ cum Turcis pacis, feliciter Poloniam administravit. Nec propiori ætate, benè cessit Polonis, armorum societas, cum Austriaco Ferdinando II. Imperatore; Cum enim ab Hungaria, contra *Bethlem Gaborium*, auxiliis Turcarum tumentem, periclitaretur Ferdinandus, deque ipsa Vienna, ægrè retinenda conflictaretur, Sigismundus III. noster, auxilia Polonorum equitum, submisit, quorum ope, Imperatori parta ingens victoria; Sed Princeps Turcarum *Osmanus*, à Polonorum auxiliis, ereptam victoriam moleste ferens; avertendis nostrorum viribus, supra XC. equitum millia, contra Poloniam (primum Anno Christi MDCXX.) Duce *Skinder Passa* armavit, dein sequenti anno; ipse præsens CCC C millibus, equitum peditumquè stipatus, graviter incubuit. Interim Poloni, retaliari subsidia ab Imperatore sperantes, (pro ejus amicitia, fideliter retenta, sic vapularent) nulla obtinuerunt, à prætenso excusatione Bohemici belli. Sic Austriaci à remoto, pericula Polonorum & casus, sibi securi spectassent, nisi auxilio Divino, & virtute Polona, bellum feliciter confectum fuisset. Dein sequenti ætate, Anno MDCXXVI in Prussia; ejusdem Ferdinandi societas, haud feliciter nobis fuit socia. Cum enim ex pacto societatis armorum, *Arnhemium* cum aliquot millibus Germanorum, subsidio nostris contra Suecos misisset, magis pro alendo intra Poloniam bello, (quod alias Germaniæ imminabat) factum, quàm pro vera amicitia. Cum ex consilio belli petenda esset *Marieburga*, ad dejiciendum Suecicum præsidium, *Arnhemius* (utar verbis *Pauli Piafecii*, rerum Polonarum Historiographi) apud remotioris ripam, inutiliter hæsit; consumebarquè in dies, magnam vim pulveris nitrati, & pilarum, resonando in aëra, nullo damno Suecorum, & naves innumeras perdidit, quas contra omnem rationem, objiciebat istibus



tormentorum Suecicorum, sub eorum mænibus, Vislulam ponte jungere inaniter contendens &c. Ad extremum fuit deprehensum, quoddam arcanum, à Rege, cum Arnhemio Præfecto militari Polonico solo conscio (usquè & Principe Vladislao filio Regis excluso) tractatum, ab ipso Electori Brandeburgico, & per eum hosti, revelatum fuisse, eoque opportunitatem rei gerendæ effluxisse &c. &c. Nec paulò altiora, immò externa, in rem adferre omittam. Anno MDLXXI. inter Pium V. Pontificem, Philippum II. Hispanorum Regem, & Rempublicam Venetam, foedus coäluerat, contra *Selimum* Turcarum Principem: Quantæ molis illud, quamvè parvo fructu (si pro magnitudine apparatus metiaris) finitum, quanto dissensu gestum? pudet dicere. (Vide Thuanum lib. XLIX. & libro L. Historiar.) Cùm enim Veneti, obsideri à Turcis *Nicosiam*, dein *Famagustam* accepissent, dequè amittenda Insula Cypri, damno Christianitatis vererentur, de auxiliis arcendo ulteriori periculo prospectantes, Pontificem re & Nomine verè *Pium*, induxerunt, ut pro dignitate nominis Christiani, societatem armorum prehenderet ipse, Philippo II. Catholico Regi, eandem persuasurus. Prima orta mox contentio, de summo imperii loco; Pontifex pro dignitate sacræ purpuræ, Philippus pro potentia, & numero subditorum; certabant; sed paternè concedente Pontifice, naturalis frater Philippi, *Joannes Austrius*, Generalis belli Dux, ab Hispania designatus. Primam difficultatem, altera gravior excepit, quoniam Philippus, potissimas societati vires conferret, æquum itidem censebat, ut omisso oriente, contra *Tripolim*, *Tunetum* & *Juliam Casaream* ab Africa, (stabiliendis rebus Hispanis.) Turcæ prius impeterentur. Secus Veneti, si non à sua regione, sed aliena parte oppugnarentur Turcæ, cui bono sibi, nisi inani nomine societatis, & profusione impensarum, susceptum bellum serviret? Cui quæstioni componendæ, nisi Pontifex, misso promptè in Hispaniam Pompeio Columna, operam apposuisset, foedus tanto molimine sancitum, dissolvi debuerat. Sed Hispani, diffidere iterum Venetis; quasi haud sincerè ageretur, cùm in speciem (ajebant) quærerent foedus, cujus terrore, Turcarum Principem, in æquas conditiones pacis, ut adigerent. Prout de facto, secreti Venetorum internuntii, de stabilienda pace, ad Turcarum pur-

purpuratos commeabant. Sed promptè interveniente Pontifice, (interim tempus trahebatur, consumebatur commeatus, inani sumptuum impensa, occasio rei gerendæ, effluebat) Veneti, sincerè se ad nomen foederis applicuere. Dixisses firmam coäluisse societatem? non omnino, nam quasi ex composito, dissociantibus fatiis, novam iterum quæstionem & obices, opposuere Hispani. Quoniam non à parte Africæ, pro commodo Regnorum Hispaniæ, sed pro securitate Italiæ & Venetorum Statu, in orientem vertenda essent arma, æquum itidem, ut Veneti, ac præsertim Pontifex, majores conferrent bello vires; sed Pontifex exhaustum sacrum ærarium obtendebat, Patrimonium Divi Petri, nè centesima parte, correspondere opibus Hispaniæ. E contrario Philippus objiciebat, omnium facillimam pecuniæ expediendæ viam, adesse Pontifici, nullas paratiores aurifodinas toto terrarum orbe, & vectigalia opulentiora haberi, Pontificis calamo, cujus simplex ductus, immensam pecuniæ vim, momento pararet; Verùm hac etiam quæstione submota, novorum dissensuum en iterum, non meta, sed gradus, nam de promisso numero triremium (*tales siquidem societates, plerumquè fallaces, in speciem dùm promittuntur multa, fœderi persuadendo, revera postea pauca præstantur*) ex parte Hispanorum variavit. Tùm Veneti, sedulò rem trahi suspicati, ludificari indignè ferentes, de pace cum Turcis faciendâ, integris adhuc, necdum accisis rebus, animum ferid adjecerunt. Sed nè multa memorentur, dexteritate Pontificis, compositis partium animis, tandem firmata & publicata societas, numerus foederatarum navium, & bellatorum definitus, quæ copiæ, quotannis (nam sine definito tempore foedus sanciebatur) ante exitum Martii, in orientis mari convenirent, deindè Romæ, deputati partium, tempestivè ut adessent, consulturi, sequentem in annum, gerendi belli de ratione, Pontifex verò, omnium controversiarum, socios inter suborientium, communis disceptator & judex ut esset, ejusquè judicio ut staretur, quod est unicum duraturæ sine querela societatis glutinum. Educta subindè foederatorum classis, in altum mare, capit ex pacto foederis armorum imperium, Joannes Austrius; Interea, quod litus petendum, inter Duces socios, consilio variatum; Hinc alii



cunctari, moramnectere, pensare animo, si vincendum esset; præmio Venetorum factum iri, vinci contingeret, æquam cladem ad omnes pertingere, inæqualia victoriæ præmia, æqualem poenam fore adverforum. Secus Venerius Venetæ classis Dux, prout acceperat à Senatu plenissimum mandatum & facultatem (nam aliàs, certo status Veneti arcano, nisi cum limitata potestate, in summum prælium committendum, Duces in bella emittuntur, interpositâ pœnâ si transgrediantur) quovis loco & tempore, pro commoditate, ut licitum esset, prælio decernere Universali, urgebat bellum, instabat, aggrediendum hostem suabebat, multa in rem, ex præterita bellorum praxi allegando. Cùm tandem Austrius consensisset in pugnam, jamquæ movenda esset classis, hostilem oram versus, levissima occasione factum, ut tanti moliminis societas, vix non dissolveretur. Accidit enim, cùm Austrius, pro summo potestatis jure, quasdam cohortes Hispanas, per triremes Venetas, subsidii nomine divisisset, Hispanus quidam Subcenturio, licentiosè & contumeliosè; ad accipienda Venerii (Ducis Veneti) mandata, se ut gereret. Dissimulavit primum delictum, postea gravitè monuit Hispanum Venerius, sed ex licentia dicti, factiquæ nihil ille cùm remitteret, immò lictorem ad se coercendum missum, fortè obtruncaret; Venerius pro autoritate potestatis commotior, Subcenturionem cum aliquot Hispanis, è malo navis, momento suspendi fecit. Hinc (uti in confluxu diversarum gentium, & linguarum fieri amat) ortus dissensus inter nationes, Hispani in Italos, vicissim Itali in Hispanos, probra jacere, dissentire, armari, sed maximè offensus Austrius, super foederatos pacto societatis Imperator, facies præsertim animo subjicientibus Hispanis, resquæ non modò ad dissolvendum foedus, sed conferendas infestas manus, proximè venisset, nisi M. Antonii Columnæ, Pontificiæ classis prælidis interventu, certis conditionibus, reconciliatio composita fuisset. Sed tandem finem dicto ut faciam. Pugnatum cum hoste, ad Echinadas Insulas, aliàs ad Naupactum, ex opposito sinus Corinthiaci, felici quidem eventu, verùm ad nomen tantæ societatis, levio re fructu, cùm ob mutuum dissensum, victoriâ uti nescissent, nam Duces partium, de reducenda retrò classe, invère consilium, cùm ad reliqua, porta primum patefceret,

ceret, vincere modò, tùm victoriâ, quàm prædâ, vel occasione sterilis pacis, uti malentibus, recentiquè terrore in hostes; commodè usuris. Verùm satis fuit, depulisse periculum, & intra defensionem, non offensam subsistere, legendo in præsens, victæ classis spolia, Triremes, tormenta, mancipia, (quantulus ille? tanti partus & moliminis foetus) interquæ foederatos, juxta proportionem subsidiorum dividere. Hinc licet videre, foedera tarda inceptu, periculosa ductu, tarda, nè dicam periculosissima exitu, ut quisque Princeps, bello accinctus sibi dictum putet: *Nihil instabilius esse, quàm potentiam, non sua vi nixam.* Multòquæ validiorem esse, unius magnam potentiam, in se recollectam, nec ab alio dependentem, quàm multorum vires, quæ ut diversa consilia & motus habent, sic operationes diversas & repugnantes, immò confusas habeant necesse. Ea tamen foedera, & societates armorum, non dissuaserim, immò valdè profint, quæ nomine subsidiorum, in pecunia, & gregariis submittendis, sanciantur. (Prout in Notationibus Trogæ & belli, copiosè recensui) Deindè, si confederatos inter, adsit fides pacti & concordia, ac præsertim æqualis in omnes ex dissociatione metus, in necessitatem nexus & unionis (velut inter minores, adversus magnos facilè coalescit) vivacitè certè agere possunt, seu simul, seu per diversas partes agendo, dùm singuli, quod inter se divisè munus, satagentius curant, nam ex malè gesto, æquale periculum metuunt. Undè justè quis asseveraverit, terribiliores esse nexus & foedera parvorum, quàm magnorum, illa necessitate ac metu, in desperationem, hæc arbitraria voluntate coalescunt. Addam. Parvi promptius conspirant, dùm secum paucò apparatu conferunt, aut ex vicino conversantur; Majores, magis loco, ac voto, tùm animis disgregati, nec tam pro familiari agunt fiducia, adsunt novæ politiæ scrupuli, respectus, ex longo apparatu tarditas, immò fortè, minor inest necessitas.

Designandus (per tui absentiam) militiæ Dux, clausis sigillo literis, quarum resignatio, Senatui committatur, nonnisi irruentibus bellis exsequenda, sola bella Ducem ut aperiant. Ante indicari nolim, nè meditandis factionibus, tempus suppetat. Nunquam, plures literæ, cum nominibus Ducum relinquendæ,



superposito titulo, primæ, secundæ, tertiæ successionis, prout alterum altero, potiorum muneri credis, & optas, nè subsecuta morte unius, bellum Duce destituatur, & occasiones gerendæ rei effluant, antequam alius designetur Dux, à Principe in remotis hærente.

Tempestivè tunc hosti bellum inferitur, cum ejus procures, inter se dissident.

Antequam suspectæ Provinciæ, aut civitati, bellum inferas, inter cives, tum fodalitia (per æmulationem privilegiorum, aut quocunque modo meliore) dissidia excitabis, potentiæ distrahendæ. Patrocinium præsertim alterutri parti offerendo, quod in majus dissidium, fulciatur. Idèquè, noscenda tibi erunt, privatorum ingenia.

Duo bella, non sunt simul incipienda, unum inepturus, alterum reconciliabis.

Dùm intras hostilem terram, occupabis locorum aliquem munendum, receptui habendo, prædam dein, commeatum, ægros ut seponas. In tua terra eadè observaturus.

Devictis, aut tuis etiam Civitatibus, Pagis vel Provinciis, impones, ut aliæ falem, certos modios frumenti, carnes, boves, item pulverem nitratum, certa arma, machinas murales, statò tempore castris submittant.

Præmia publicè proponenda, aliquam artem compendio belli, aut machinam, vel instrumentum qui excogitarit.

Socios aut amicos belli, quoadusquè velis, tecum ut habeas, induc desperationem, cum tuo adversario reconciliationis. Bona adversarii publicabis, in potiores sociorum familias divides, amittenda, si te deserant; vel partieris amicos in subsidia, ut alii hoc, illi tempore illo, tecum militent. Nam ingeritur alacritas, ex divisione laboris, & æmulatio; Ex continuo labore, fit tædium. Vel statue, quod metuant desertores; Ponant pignus à desertore amittendum, pecuniam, civitatem, liberos obsides, famam, vel edictum mittes in vulgus, bona desertoris, militum stativis addicenda.

Provinciatim, urbatim, militent incolæ, pro majori æmulatione; Provinciarum nomina, cohortibus impositurus, in æmulationem virtutis.

Ex

Ex quoquo rure tum oppido, duo tresvè pedites educantur, sic major fiet exercitus, promptius colligendus, quam si publica per fora legatur. Prout memini me suasisse, exercitu nostro ad *Pilaviciam* profligato. Addam, præsertim ad nostram praxim Poloniam, ut jumenta & currus, vehendis post exercitum tormentis, & annonæ, civitates, tum oppida æstivatim castris submittant, majores urbes quaternos; minutiores binos, aut equos singulos, tum vectores. Quâ promptâ per minutissima collatione, oppidorumquè insensibili damno, summa commoditas castris afforet. Non enim tanta jumentorum copia, loco ab unico, effuso licet gravissimo ære (seu per extremam oppressionem incolarum) promptè simul petatur, quantum illa partitio, conferre è diversis partibus, locum in unicum, per insensibilia statim potest, dum edicta Ducum, in Provincias emittuntur.

Nulla ratione magis prolatantur imperia, quam juvando socios, & amicos; Satiùs hostem in vicinia grassantem, alienæ terræ periculo, opprimes, quam ut tuam terram ingrediatur, nam qui finitimos invadit, tibi hostiliter approximat.

Rex Persarum, avertendæ Turcarum venientium potentiæ, barbaro, sed tamen sibi non inutili instituto, devastat interjacentem terram, & commeatum asportari jubet, in longinquiora, ut hostis penuriâ annonæ, arceatur procul à finibus, sine ferro, morâ commode vincendus, dum bellum trahendi, facultatem ob inopiam non habet. Verùm rectiore quorundam Principum Italiæ instituto, & cultiorem ad morem, peracta messi & vindemiis, omnis privatorum annona, proximiores in urbes, ex agris comportari jubetur, pauculis eduliorum modò, in diurnos colonorum usus relictis.

Princeps in longinqua bella abiturus, nè summæ rei, domi relinquat, aliquem præpotentem & factiosum, qui per absentiam, trahat Principis Majestatem, potius plures præficiet, quam unum, distrahendæ authoritati & potentiæ. Aut relinquat filiorum aliquem, cum fidelissimis civium, utquè eum locum inhabitet, unde in omnia regimen; sed hoc in statu Monarchico.

Per mendicos, foeminas, peregrinos, multa praticari possunt in populo, in has enim personas, minor cadit suspicio.

Is



Is facile in societatem perducitur, cui nobiscum commune esse periculum persuadetur.

Expensas belli inutiles recides, necessariis ut sufficias.

Cave, nè viros militiâ claros offendas, immò ingenuos cives; à fortuna desertos, studiosius juvabis, nè ad extrema consilia impellantur.

Vicinorum calamitatibus & bellis, non sese temerè implicandum, nè tota clades in nos ruat.

Minus errant, qui in consiliis belli (immò per omnia privata, publica, pace, bello) expendendis, rerum humanarum vicissitudinem, quàm qui constantiam & optata, sibi pollicentur; sunt enim, qui magis impetu, quàm consilio, in res feruntur, non ex agendi prudentia, sed ex arrogantia consilium capientes, iusta videntur & possibilia, quæ cupiunt, & falsâ confidentiâ sui, rerum naturam, tùm difficultates, superare se posse existimant, idèquè falluntur; Non igitur in nobis, plus animi impotentia, quàm ratio possit.

Hostem arma in te parantem, prævenias bello, & alios Principes, in hostilitatem incitabis.

Si resistere non vales, societatem aut protectionem potentioris quære.

Multa sub prætextu legationis, practicari possunt, in aliquo populo.

*Jus Inve-* Qui multis foederibus implicantur, multum negotii sibi faces-  
*teratum* sunt, nobis præsertim Polonis, magis ex ratione status, artibus  
*Vicinæ* indifferentiæ, seu *Neutralitatis*, immò conservandæ vicinorum ami-  
*Amicitia* ciutiæ, Rempublicam habere, quàm *directus* (vel conditionatis)  
*scriptum* colligationibus, foederibusquè negotiosis, ut involvamur, dum facile  
*foedus, seu* candor Polonus, obliquis artibus exterorum petitur, nec idè  
*Armisti-* committi securum. Multa in eo dicenda venirent, sed arcana sta-  
*tium Vel* tus, intra reverentiam secreti maneant, quàm scire alios, tam  
*Pax.* nescire, aliqua nostra oportet. Sat dixerim, constare Poloniæ  
*Dein Col-* suas vires, ut promptè se defendere ipsam possit, nec habeat opus,  
*ligatio* ut in exterorum incrementa, aut diminutiones, curiosè inquirat,  
*longè dif-* pro alienis commodis, laboriosè sumptuosèquè dimicatura, (quod  
*ferunt.* necessariò colligationem, pactumque sequitur) *attentissimè rebus*  
*suis,*

*suis, modo ut provideatur.* Aliter evenit parvis Rebuspublicis & *Italorum*  
Principibus, qui aliorum vicinitatibus implicati, jurisdictionum *præsertim*  
perplexarum, prætensionumquè in Provincias (immò suscepta- *Principes*  
rum protectionum) juribus, ac æmulatione colliduntur, dum- *aliqui, &*  
què propria vi, subsistere vix possunt, in necessaria foederum *Respubli-*  
consilia impelluntur, vicinorum incrementa, suæ parvitati, juri- *cæ.*  
busquè, dum periculosa, vel prout suspecti ingenii, & osores  
quietis, vicinos habent, ut nisi unius potentis, substruantur col-  
ligatione, ab alterius potentia, circumveniantur, immò nisi alio-  
rum præpediant augmentum; sibi decrementum statuunt. Nostri  
status & virium, propitiantibus fati, alia, tùm altior sors est,  
quà dum non insolescimus, exterorum negotiis curiosè non im-  
plicamur, nec causas bellorum, turbasquè populorum, gratuitò  
quæritamus (immò, quoad fieri potest, cavemus, *nam etiam ar-*  
*tibus pacis magis, quàm belli, & conservando quàm acquirendo, res*  
*Polona subsistere potest*) sed nostra modo dum tuemur, Deus bellan-  
tibus adest. Quid rationibus opus? dum tot sæculorum, certa nos  
convincit praxis.

Societatis armorum, pacivè tractatus, tempore brevi circum-  
scripti, durabiliores sæpè, populos inter & Principes, quàm dum  
perpetuitatis titulo, in longum temporum jaciuntur. Sæpè fit, ut  
stabiliendis tractatibus, non tanta cautione, in omnes casus pro-  
videatur, quin præjudicio alterius partis, aliquid fiat, vel in post  
emersurum: Undè si nulla corrigendi, elabendivè adest honesta  
via, sibi illam quisquè, vel rumpenda fide, spontè facit, edquè  
citiùs (velut sub specie necessitatis, excusatiùs peccare pressis li-  
ceat) quàm ut majore præjudicio & damno, in vanum nomen fi-  
dei, perseveretur. Dum verò spes adest ex tempore, vel corri-  
gendi honestè, vel abrumpendi brevi, quæ nocuère, quis gra-  
tuitò perjurus & violator pacti esse præcupiat, remedium dum ha-  
bet in proximo, aut quem propinqua spes solatur, vel cur ipse?  
per ingloria mederi velit, quæ tandem mox tempus sanabit; Sæ-  
pè habere potuisse, habitorum vice reputatur, animis generosis,  
aut secùs, difficultas habendi, accendit desiderium, & pro in-  
juria videtur, ipsa non adipiscendi mora, vel impotentia.  
Exempla irritorum foederum, non alibi plura magis, viva-  
què



quæ legas, quàm apud Franciscum Guicciardinum, in *Historia*.

Ab aliis pressos, tum affectos injuriâ, tibi junges, patrocinium offeres, hi enim fideles sunt futuri.

Ut initia belli proveniunt, eadem fama in cætera.

Dixerim iterum, si per te ipsum potens es, contendentibus vicinis, neutralitatem teuebis, non enim pro potentia metues, ut horum victor sit, immò dum defatigantur bello, & sumptibus exhauriuntur, imperii tui augendi (modò justa ut adsit causa) commoditatem, contra utroque habebis. Aut si quies cordi, neminem læsisse, nemini justam quærelarum causam dedisse, tutum est, quietis fundamentum; Immo impotentium, ea melior conditio; nisi certus sis, uni victori parti, te prædam futurum, tum potius alteri jungeris, Viciniori tamen ac potentiori, & qui servat fidem, vicinioris enim, plus oberit hostilitas, quàm proderit amicitia longinquioris. Prout prudens Veneti Senatus consilium legas, apud Franciscum Guicciardinum (lib. VIII. & libro XV. Histor.) Quo expenditur, Regisne Galliæ, an Cæsaris partes sequi, in rem foret. Sed rem quoque Polonam, nè iterum omittam; Constat, pro hujus Reipublicæ potentia, & ratione status, neutralitatem semper in rem fuisse, alienorum incuriosi, nostra modò dum tueremur, non imparati. Societates exterorum, haud esse socias, immò suspectas, periculosas, expensivas, statumque involyentes, undè diuturni belli semina.

Ad agilitatem pertinet armorum, ut sint vires tuæ unitæ, non dependentes ab alio, (immo consilia.) Resolutus præterea sis facere serio, quod aggredieris.

Attendendum, Præfecti militum, nè defraudent stipendia, curabis idè, militi viritim solvi.

Inutile mutare sæpè Ducem belli, nam inceptæ res, mutato capite, tardiùs eunt, ordo, resolutio, & omnia alia, sequuntur cum alio, sic velut impetus benè coeptæ rei, sistitur.

Non præscribatur modus bellandi, Duci, sed potius è re capiat consilium.

Inchoaturus bellum, non tantum cogitare debes, quàm multos habeas milites, verum unius saltem anni stipendio, an sufficias;

cætera

cætera res aperiet; Immo undè accepta clade, nova subsidia haberi possint, maturè providendum.

Diutina quies, non conducit bellicoso populo, sed eum infirmat.

Amentia est, eos adoriri, quos nequè victor in officio retinere possis, & ad quos (aut à quibus) semel victus, regredi non possis.

Qui hostis multum nocet, idem amicus, plurimum prodesse potest, vel idè nè noceat. Aliis Deorum veteres immolabant, ut boni prodesse; aliis, modò nè mali, & irati nocerent.

Quos credis tibi nocituros, distrahe potentiam eorum, & fœdera.

Ubi conscribit hostis militem, vel undè arma petit, & auxilia, ea loca metu sunt opplenda.

Agris imponantur milites, more Turcicorum *Timariorum*.

Militaria officia majora, non diu per unum administrentur, quæ sita diu, nè obsit potentia.

Bellum gesturus in externa Provincia, morem nationis sequere, ut partim armis terreas, partim comitate, morumque similitudine (in veste & convictu) trahas. Idè, ejus gentis & linguæ, nobiliores exulum, seu ipsos civium, tacita largitione, adscisces pro amicis, quibus velut instrumento utaris, in cæteros pertrahendos, quod summi moniti loco habebis. Alexander Magnus, Persarum imperium subactus, dubium, plusne familiaritate morum, quàm armis profecit, Persicâ linguâ cum Persis locutus, Acinacem Persicum lateri accinxit, Uxorem Persam duxit, Cubicularii è Persarum ephebis lecti, & per omnia, cum indigenis indigena esse voluit. Nihil verò secus, afficit magis subigendos, quàm si victor, se suaque instituta, superbè, immò contumeliosè tractet, ut obstinatior in defensam reddantur. Habeo in promptu exempla domi, sed alibi passim, in Orbe talia, & apud Historicos videas.

Ars optima recuperandi ereptas ab hoste Provincias, velut Stephanus Bathoreus Rex noster, pro recuperanda Livonia, contra Moschos usus. Tetendit cum exercitu, non in Livoniam, verum in ulteriora Provinciarum, juri Moschorum subjectarum, obvia vastando vel occupando, ut Moschus, Provinciæ suæ periculo,



culo., arciumquè captarum jacturâ motus, declinando infelicis belli incommoda, debitam restituere cogeretur Polonis Livoniam. Sic Bathoreus, prudenti aversione belli, hostem afflixit, simulquè alienæ terræ vexas, integram sine injuria belli, edquè opibus florentem, recuperavit Livoniam.

Quos vicinos potentiores te credis, in amicos adscisces, sed procul ab obsequio, sic vitabis inimicitiam.

Immodò minutorum Sociorum, quæres amicitias, undè ex conjunctione, in magnos terror.

Pace aut induciis, plerumquè expugnantur, qui bello non possunt.

Pactorum simulatio, trahit tempus, undè prospiciendi sibi, & muniendi sui occasio.

Bello diutino, fatigare vicinos populos, non tutum, nè in tuum caput exerceantur.

Princeps ad bellum non eat, sed venturi speciem simulet, conquirit currus, equos, interim neccat moras. *Majora creduntur de absentibus.*

Non in tantum fide paci, ut dimittas arma; Creduli mollesquè, facile involvuntur, cauti ratiùs, aut nunquam.

Magna incepta, longanimitate potiùs, quàm impetu stabiliuntur. Eminùs priùs, quàm cominùs incipienda.

Feudatariis & confinitimis, novorum structuras fortalitorum, præpedies. Licèt in præsens amici sunt, poterunt esse aliquando inimici.

Fortalitia, non tam longè ponantur, à submittendis subsidiis, quàm ut illis possit dari succursus, periclitantibus. Ut si in campis desertis ponantur, ferè frustranea sunt. Optima verò, quæ proximè maritimos portus, aut Navigabiles fluvios, exstruuntur, quatenùs navigiorum beneficio, secum non interruptim, ex facili conferant armis, & consiliis, commeatum acquirant, nec faciliè ab hoste cingantur.

Debilioris potentia Princeps, per potentioris armis invadendus, si peculium haud dives habet, reprimendo bello, malit carissimis gemmarum, cæterorumquè mobilium decoribus, immodò parte Provinciæ (pignoris seu Venditionis nomine) privari, quidvis

vis tentaturus, modò scribendo militi, æs sufficiens, promptè conquirit, primæ saltim hostium furia, ex pari, animosè restitutus. Sed inutilem conatum aie, dùm in longum erogandis sumptibus, paritèr non sufficias; juvat tamen, dimidium facti, ex benè coepto habere. Fore universa hostis suspicatur, prout tibi cesserint prima, præsertim si in insperatam potentiam impingat, ut ed faciliùs consterneretur, de successu desperans, qui se primo impetu infra spem elusum videt, quò magis dico, debilitatem tuam, veniens spreverat, facilia sibi pollicitus, spequè devorans totum. Exindè, quamcunquè posthac injeceris paciscendi occasionem, libens eam arripiet, lætus utiquè honesto prætextu, periculosè coepta ut deserat. Levissimis momentis refrigerescere ardorem hostium, & vim confundi: Ni hoc obtineas (in obstinatioris hostem fortè incurrens) saltem tempus lucraberis, amicorum Principum viribus contrahendis, promptiùs in subsidium venturis, qui te non desperantem, sed resistentem ingenuè, & erectum vident, *in caducum* (secùs) *parietem*, *nemo valens inclinat*. Insuper, reliqua mali remedia, tempus adferet, modò primum impetum, quoquo modo eludas, ad protrahendum, occasionibus oblatis, uti non nesciùs. Qui verò è contrario, primo belli ingressu, parci erogando, statimquè (pusillanimes aut confusi) demittunt manus, dant spontè occasionem, & animum hosti, in majus insurgendi, suspectas sibi res, bellicquè successum faciunt, nec vicinorum animos parant, verùm alienant per ignaviam, tandem per stillicidia, soli perituri; In admirationem fortioris, quisquè promptiùs rapitur, & in amicitiam, spontè juvaturus. Dicam verbo, aut sic vinceris, aut vinces, si vincaris, utiquè (de perdendis erogando, haud parcus) honestiùs putabis, animosè cadere, ut victori, virtus tua sit admirationi & honori. Si vincas, nemò te in posterum laceffere audebit, qui sic animosum videt, prius verò sumptuum effusio, longa, certiorquè pace in posterum, cum foenore sarcietur. Vel (nè illud quoquè omittam) si non audeas hostem venientem, apertis artibus & armis excipere, circuitu saltem facto, regionem illius invades (quod *Diversionem* aptissimè Galli vocant) ut hostis qui te oppressum ivit, ad sua tuenda vertatur.



Placitum nonnullis, crebris fortalitiis, parvitatem virium, & Provinciæ pensari; Si Provincia montosa, palustris, aut saltuosa, tum crebris portubus maritimis, fluviiisque, intercipiendo hostium transitui (reciproce fortalitiis inter se communicationi) abundat, velut sunt partes Italiæ & Belgii, præsertim verò, si cum cura, neque neglectum, fortalitia habeantur, sufficienti milite, com meatu providenda, utcunque crebrius extrui patiar; Verum, si Provincia campis aperta, ingressu facilis, paucopeditatu gaudet, tum si haud dives proventu, nec est sufficiens diurnis præfidiariorum impensis, haberi quidem, sed rariora fortalitia, oportuerit, idque intra impedita & saltus, nè facile cingantur, sed promptius loci beneficio, defendi ut possint. Quæ verò superflua, quibus retinendis non sufficias, ea dirui curabis, nam ab hoste occupata, sedem armorum, contra te facient, & occasionem retinendi tua, subministrabunt. Verum copiosius, hac de re alibi (*lib. 2. Militarium Puncto 11.*)

Multa fortalitia, distrahunt vires castrorum, in præfidia, nec plura sunt habenda, quam sine dispendio castrorum, providere iis sufficienter ut possis. Potior cujusque Principis & Provinciæ virium ratio, castris & campo ut potens sit, posterior verò, fortalitiis, urbibusque ut provideatur, vel necesse, utrisque simul.

Tormenta uniformiter fundantur, ut globorum varietate non sit opus. Immo fistulæ manuales, eandem ob causam, uniformes sint.

Tormenta bellica ingentis magnitudinis, castris qui procurat, in pompam sæpius, quam in necessitatem, ac ferè damno suo facit, nam præter ingens transportandi pondus, & impedimentum, etiam unica explosione tantum pulveris absumunt, quantum viginti peditibus, aliquot horarum prælio sufficiat, magis arcendo hosti. Minores machinæ sunt utilissimæ, transportando, explodendo, & minus pulveris absumunt. Verum tamen, ad obsidendas civitates, & demoliendas urbium munitiones, majoribus machinis opus, puta maximæ magnitudinis, mediæ, quartæ, sine quibus, parum aut nihil proficias. (Maximum verò tormentum unica explosione, 48. libras pulveris emittit, decrescens per partes ad infra, mediam, quartam partem) idèque pro natura hostium, & belli, armorum apparatus castris providebis.

Non-

Nonnunquam ad explorandas vires alicujus, societatem quæres, ut omnia sub prætextu amicitie explores.

Probatissimum, ut qui alicujus potentie resistere non posset, imparatus vel deficiens, per subordinatos amicorum Principum, injecta spe pacis, aut admissio armistitio, emolliret virtutem, & arma hostium, suas interim vires firmaret, occasione armorum data, superior evasurus. Verè dictum. Invincibiles armis, pace & amicitie specie vincentur. Sunt enim populi, quibus capitalior non esse potest hostis, quam prosperi rerum eventus, multaquæ vis, aut opes; cum per fiduciam remissius agunt, aut longâ fortunâ emolliti, lascivunt, luxuriantur; secus, magistros prudentiæ non habent meliores, quam casus adversos, dum meditatione belli & periculorum, usum ferendi laboris discunt & indurantur, atque uniuntur metu; Velut boves, instante lupo, capita & cornua jungunt, abeunte, disgregantur incauti, discurrunt, spariantur, faciles in prædam, ex occulto insidiantibus. His artibus, sæpè usus Turca, aliique. Nescio, an in partem stratagematis, non abeat armistitium, inter Hollandos, Hispanosque, nuper pactum. Cum enim Hollandi, potentes essent bello, pace vincibiles ut redderentur. Cavebis itaque à pactionibus, præsertim si ex insperato, nimisque submissæ conditiones offeruntur, æquè enim impossibiles servando, quam si nimis iniquæ ponerentur, captionem eam putabis, non pactionem. *Pompejum, imagine pacis, Lepidum specie amicitie, fefellit Augustus.* Semper igitur instando, desperatione armatur hostis, cujus fortissimum telum necessitatis, contra te futurum, ni desistas.

Quod memini me suasisse bello contra Suecos, hic ponendum duxi. Magnum momentum allaturum, vincendo hosti, si certa peditum cohors, selectiorum fistulatum, scriberetur, quales in Polonia dantur, aded certi ictuum, ut non minimas aves modò jaculo petant & habeant, verum medium per annulum, repetitis ictibus, globum jacere certo possint. Qualium unica cohors, plus proficeret conficiendo hosti, quam milleni pedites non præstarent. Observatum enim, bello *Cosaciano* durante obsidione nostrorum ad *Zbarasium* (Anno Christi 1649) ut unicus solus, ejus jaculatorie artis peritus (vel si personam scire placet, *Muchowieckius* nomi-



nomine, Laicus ex ordine Jesuitarum, qui pro socio, euidam Patri, in castris aderat) CCIV. Cosacos, ictu sclopeti longioris (contra Schismaticos enim & Scythas pugnatum) necaret, idque obvios aspernatus, Verum ictibus non vulgariter pensatis, prout Cosacus, Tartarusvè, stolidâ audaciâ, proximius munimenta proveheretur, vel militari officio conspicuus, ante signa apparebat, ad ictum necemque destinabat, adeo certus jaculandi, ut non integrum hominem modo, sed quidquid membrorum exereretur, ictu tangeret, ex occulto feriendo. Cum vero decem primos interemisset, ejusque jaculandi fama, per exercitum crebresceret, aderant curiosi, in quemque ictum intenti, caesorum capita calculantes. Immo, passim per alios, idem fieri posse, experientia docuit, ut extra miraculi famam, res apud nos habeatur.

Contra Germanos, Moschovitas & Turcas, hastati equites optimi, ideoque ab his bellum apparandum, *hastarum insuper superfluarum copia, non uni praelio suffectura*, prudentissimo Ducis consilio, maturè provideatur, ingens aliàs error sit. Contra Scythas, qui vagis incurfibus, aut disjectas per catervas, nostris circumfunduntur, hastatus & gravis nimium eques, ferè supervacaneus est, nisi admisceas equitum ferentarios. Pedites, tutandæ aciei & castris, tum firmandis vel occupandis saltibus, cuique bello, semperque opportuni.

Civilia bella, pecuniâ constant, qui majora stipendia numerat, ejus in partes miles, & civis (pro potentia) transibunt, tamen armorum justitia, est inter potiora.

Si mutua vicinorum populorum societas, periculum adferat statui, cum prudenti sagacitate eam diffues, hunc & alium in partes pertrahendo, amica legatione crebrius compellendo, *saltem ut dissidentiam parias*.

Cum subditis, nequaquam diu bellum gerendum, immo contentionis quodvis negotium, majoribus contra minores, *non temerè suscipiendum*, longius enim dum invalescit, magis agere contra docet, desuetudinem ab obsequio contemptumque autoritatis inducit, desperatos tum obstinatos reddit. Potius quocunque meliori modo, citissime pacifces, vel si minore fiat periculo, eris inju-

injuriae velut nesciens, ac dissimulans, nè desperabundi, exuant reverentiam superioris, tum legum (pro conscientia recentioris subjectionis, hucusque quoquo modo animis suspensi) & à desuetudine obsequii, intra oblivionem autoritatis, obdurentur. Aut si fortè, morâ, seditio roborata, procedes velut periti bellatorum, cum induratis moenibus, dum machinis aperte non possunt, cuniculis oppugnationem aggrediuntur, sic tu (per subornatos) praestabis, seditiosos dividendo, capita inter se primorum, & partem æmulam alteri opponendo, abstrahendo, suadendo, molliendo, promissis, honore, pretio. Nonnunquam etiam (in meliores fortè dum incurris) modicè, intraque autoritatem minitendo. (*velut in notationibus Togæ & Belli, Puncto IV. Suggeri*) Non contemnes præterea, seditiosorum paucitatem, incautiùs acturus; Qui enim insolenti ausu, & (acceptam fortè ob injuriam, ut putant) necessariò, armis accinguntur, prout recedere periculosum, temerariumque ducunt, sic urgendo, non desistendo, rem expedire, & in peracto, quàm in coepto deprehendi, securius putant. Paucitas reddit cautiore, metus vigilantes, defectus ingeniosos, desperatio fortes, formido expeditos providendo & agiles, necessitas parandis exterorum societatibus providos, impotentia incitandis reliquorum animis satagentes, & simul titulo alienæ protectionis, ad munia belli exequenda, vel cum periculo alacres, ut facilius uniti contineantur, quibus disjungi periculosum. Consilia, leges, & formam occultioris status, sibi in parte statuunt, armamentaria, ærarium provident, & pignus societatis ponunt. Quodsi dato casu, modicum succedat armis, in reliquum, auguria elatis vocibus animisque buccinabunt, causæ justitiam adstruentes, quasi coelum rebus arrideat, & pro sua parte fortuna spontè armetur, eò magis autoritatem tuam spreturi, quò magis ante aestimabant, aut reverebantur intentatam. Quidam enim altiùs, inesse credant minores, majoribus, antequam quid valeant, aut quantum non possint, experiantur. Hinc aliqui tuarum partium inquietiores, seu quos hodierna Politia, *Malcontentorum* nomine intitulavit, dum quali quali reverentia tui, & legum tenerentur, penduli hucusque, hanc an illam partem sequerentur, primò admirantur, novam seditionis fortunam, mox



capta occasione, uti securam adorant, & sequuntur, suas quæquæ occultas offensas promunt, novas bellandi causas, partibus, novaquæ consilia tum vires, allaturi. Velut in Gallia, sub Henrico III. factum, ut rebellibus sectariis, vericatholici (quod mirè, è proximioribus Regis agnatis) jungerentur, illi pro religione, hi pro violatis juribus, vel prout occultior in Regem suggestit offensa, aut suaserit, ex nova occasione, in turbido piscandi ambitio, diversæ causæ, unam constantes formidolosam in publicum potentiam. Addam. Qui defensionis titulum bello sumunt, aut studiose, captandis vulgi animis, tum pigmentandæ causæ, adstruunt, fortiores esse licet paucos, quàm qui oppugnant, quasi dicas: *Oppugnatos, validiores fieri, super oppugnantes*, illos in unicam defensionis partem, urget necessitas, non enim cessare liberum (quod ab invadentis modò pendet voluntate) immò non defendi periculosissimum, hi prout partem utramquæ habent, pro arbitrio liberam, parcant, redeant, urgeant, aut persequantur, idèquæ minùs periculosa, præponunt bello. Pacem, id est, sapiùs electuri, undè remissiùs agunt. Dicam clariùs, oppugnat, in arma defensiva, voluntas omninò necessaria, offendentibus nisi arbitraria inest, quæ minùs in animos, permovendo potest. Si igitur, haud certus es virium & pervincendi, nec planè resolutus, verùm hærens actione, ac pendulus, aut respectibus circumfessus, curabis necesse, quoàdusquæ seditiosi tenentur, metu, apertioris seditionis & periculi, nè detur necessitas armorum, nève experiantur suam, tuamquæ fortunam, prudentiam agendi, tum vires, quibus in speciem clementiæ (non infra tamen auctoritatem, nè extortum videatur) tituloquæ pacis publicæ, partem aliquam postulatorum, *gratiosa fronte* si concesseris, multum obligationis debebunt, securiùs putantes, *modicum* sine periculo, (gratuitò velut) promptè obtinere, quàm cum periculo & impena, habere *serò totum*. Justè succensitum sit, perspicaciæ Senatus Romani, cum Cæsaris ambitum, non per auctoritatem legis, civilem in modum, intraquæ gravitatem aut dissimulationem, erroris admonendo, sed nimis rigidè, declaratione armorum aperta, compescere studeat, velut criminis convictum, tolerandus potius cum esset, quàm tollendus. Dùm verò ille,

Quod impedire non potes, vel le videaris.

desperatione veniæ, necessitate bellandi arrepta, in peracto, quàm in coepto deprehendi, securiùs putat, circumspexit de viribus, facilequæ invenit, desperatione & extremis valens, tum audentior, nihil majus timendum jam ratus, edquæ Senatus auctoritatem spernens, Rempublicam pessumdedit, *ex Concive* (occasione armorum) factus *Imperator*. Imitetur Princeps, tum quæquæ Respublica, peritos aquarum coactores, qui rapiditati fluvii crescentis, claustra & obstacula non opponunt, sed promptè scienterquæ demunt, nè altius (totam molem subruturus) intumescat, sed opposituri, dùm insolentia tempestatis, & aquæ desævierit, solitis ripis coërcita. Prout seditiosi, dùm necessitate incitati, se in ausum seridè accinxerint, sprete semel superioritatis auctoritate, parte non erunt contenti, nisi extorqueant totum; Superba namquæ, ac planè intolerabilis, subjecti in dominantes insurgens vis, & crescens fortuna, quæ modicum par esse coeperit, spretis præsentibus, mox superior esse cupit, præsertim si altiores spiritus, & fomenta belli, pro magnis opibus, & longa pace, vulgus sumat ad insolentiam, ut bonos Dominos contra, facile dicto, facto, insurgat, illisquæ obmurmuret, ut idè *mediocris inopia*, tum *rigor* (obiter dicere non intermittam) habendo in *Pace* populo, profuit nonnunquam magis, quàm vulgi nimia affluentia, vel mollities rectoris, nam insolentiæ, proterviaquæ in populo, causæ sunt. Delicatissimos (iterum dico) animos, ex bona fortuna, facile vulgus sumit, edquæ levi contactu & occasione, recalcitrare amat, ut etiam, *periculo quisquæ suo*, & *damno lætetur*, modò exsequatur meditata, nova experiatur, ex aperta cupidine mutationis, cum odium præsentium, aut obstinata malitia invalescit. Tantò verò curatiùs, ad vexam superioris (velut non frustra) facturi, si adverterint, eum teneriùs indolere, & contra infidelitatem subditorum, apertè, parumquæ cautè conqueri, quod necesse obtegendum. Secus contractior nonnihil fortuna, tum mediocris rigor, obedientiæ modestiam, cum virtute suggerit, acuit ingenium, iners otium procul arcet, ejusquæ loco, ingerit solertem curam, & providentiam sui. Delicata plebs, similis equis nondum domitis, quos nisi labore, tum lassitudine eicuraveris, ephippium nec obedientiam admittunt, immò bona ipsa, seu paveris,



feu potaveris, nocent, nec securè pilum mulseris, nisi curatores contra, recalcitrent.

Capita seditionum amovenda, promisso honore, præmio, per diversa partium distrahendo; velut alibi satis dictum. Verùm cum omnia sopiendæ seditioni feceris, te ipsum prius, tuosque administratos introspecte, curaturus, nè sint populo graves; sed ex iustitia, tum virtute, ad normam rationis, totum agant, parùm proficitur armis, si injuriæ sequantur, deerit seditio, cum deerit causa, & quæ in nobis sæpè est, in alios transferre amamus. Rari tam ingenuæ virtutis, qui seipsum ex vero culpæ malint, quàm alios. Dùm enim naturaliter amamus nos, & nostra magis, quàm aliorum, etiam exonerare nos ipsos causâ, sed culpæ naturaliter malumus alios.

Sicut offensæ privatae, sic dissidia publica, non magis animosè, quàm cautè habebuntur, ac proinde hostilitatis declaratio, ed cautius in aliquem decernenda. Sæpè hunc aut illum, acerbius vexando, (quem fortè contempsimus,) facimus potius, ut se, suaque circumspiciat diligenter, virtutem, viresque noscat, ignorans fortè aut negligens, nisi lacefferetur. Sæpè (dico) curæ, tum fortitudinis, immò melioris consilii admonemus, velut studiosè in nostrum caput adversarium exercendo, & monstrando, quæ sibi ineffe nescivit, ut fiat in posterum, qualis non fuit, nec fuisset, nisi provocatus. Alium necessitas, alium desperatio, alium valentior reddit occasio, & perficit usus, tum vexatio. Cautè igitur, sicut privata dissidia, sic bellum publicum aggrediaris; Immo magis adhuc (non incongruum addere) rebus in togatis, ex obtentu libertatis, cautè superiorem vexabis, aut vim experiri contra cupies, auctoritatem potius ex lege, quàm robur per insolentiam, vel arma, objectando. Optimum remedium, servandis rebus, ex tempore (rerumque transitu) quaesiturus, incertus præsertim, infraacti tibi valoris, & ex eo indubii successus. Utique, periculum majus, ex dissimulatione, non vereberis.

Concionatores rei à te susceptæ, sint fautores, ut populum oratione trahant, in idem sentiendum, quod multum in animis potest.

Arma militum, mutanda in melius, multa præstantur armorum commoditate. Non verò offensiva tantum providebuntur, velut

sunt

sunt hastæ, gladii, pixides sulfureæ; sed maxime defensiva, ut sunt scuta, galeæ, thoraces, & manicæ ferreæ. Sic bene tectus miles, occasione vitandi periculi, fit audentior, immò vices duorum implet, non uni prælio suffecturus, securus vitæ & salutis, quàm si alias offensivis munitus, facile ictibus expositus, prima occasione occumbat. Quas à numero militum assequi non potes vires, ab armorum commoditate compensaturus. Pro brevibus igitur sclopetis, longis bombarbis utantur pedites (immò equites) quæ defendendo sunt accommodatissimæ, dùm à longè feriunt. Non sine furcula præterea, jaculetur pedes, quod certiores sint ictus, nequè saccis utatur, deferendo pulveri, sed pensilibus ligneis<sup>b</sup> urnulis explosionibus aptis, onerando, pro parsimonia pulveris nitrati, & pro certitudine onerandi. Deinde sclopetariorum ordinibus, tertia pars peditum hastatorum, necesse inseratur, pro excipiendis (immo aggrediendis) equitibus, si aperto campo veniant. Sic Helvetii ad Novariam in Italia, pedites ipsi, solâ fiduciâ hastarum pedestrium, equites cataphractos, ferentariosque non veriti, Gallorum numerosiorem exercitum, medio campo aggressi, vicerunt, castris exuerunt. Tum aliquot post annos, intra eandem Italiam, Regem Franciscum, eadem audaciâ ultrò adorsi, vicissent planè, nisi Alvisius Veneto cum exercitu, ex foedere armorum, opportunè media in pugna, Gallis auxilio venisset. (Vide Pauli Jovii Histor. lib. XI. §. XV.) Pedester enim miles, in aperto pugnans, solo pilo, equiti par esse potest, uti eques, nisi hastâ armatus (præsertim longiori, ad normam Polonæ militiæ) peditem hastatum spernit; Ut illi, qui pedestrem militiam, equestri præferre multa ratione contendunt, necesse adjiciant, utrum equitem hastatum, vel sine hasta, pediti hastato opponant, immò prout hic falcatum gladium, aptum cædendo, aut rectum punctum ferientem, ad normam militiæ Romanæ (idque scutatus) fert, nam hoc genere armorum, par certè, aut inferior est, prout armatur hasta longiori, vel eam negligit. Non invenustè observat Tacitus, (Histor. lib. I.) Roxolanorum seu Sarmatarum equitibus, dum prælongos contos gerunt, Ubi perturmas advenire, vix ulla obiterit acies. Tamen ordo pedestris militiæ, præstat equestri, ut verè is bellare sciat, cui pedestris militia,

<sup>a</sup>Widelca  
vulgò.

<sup>b</sup>Ladunki  
vulgò vel  
Bando-  
liery.



curæ. Sed hæc obiter. Equites præterea levioris armaturæ, utantur hastis mediis (seu abbreviatis, quinque cubitorum seu ulnarum cum media in longitudinem), quæ faciliores sunt gestatu, nam poterunt esse pensiles ab humero. Fortior item erit, frons cujusque turmae, venientis contra hostem, beneficio hastarum protrudendo, quàm si cum gladiis, aut cum sclopetis veniant, quorum incerti sunt ictus, aut plerumque frustranei, præsertim si contra lorica tum hostem pugnetur; hasta enim, etsi non vulnerat tectum ferro, protrudendo tamen, deturbat equitem in terram, neque à brevitate hastæ, impeditus eques, quin faciliè in hanc illamve partem decurrat, globatim; aut per singulos pugnando, quod cum hasta integra non datur, quoniam ista, propè Novem Ulnarum est in longitudinem, ut semper rectis ordinibus, procedendum sit, fronte, statariâ pugnâ feriendo, neque ferit in latera. Verùm tamen omnino hasta integra, necessaria, contra pedites Germanos, qui longis farissis, aut pilis utuntur, contra missiles Turcarum hastas, immò contra quamvis hostium aciem, primo impetu rumpendam. Non leve sentit damnum Polonia, quoniam eum hastarum usum intermisit, ut tantò sit bellando inferior, quantò longius, ab hastarum usu, & more ferendi abscessit.

Scuta sunt necessaria pediti, ex norma veteris militiæ Romanæ, immò equiti, qui dum unica manu gladium, aut breve sclopetum versat, minus impeditus est, quin sinistram, scuto munitam obijciat ictibus, cominus præsertim cum ventum est. Pro gladiis item qui Poloni acinacis ad morem falcati (seu arcuati) nunc habentur, rectis gladiis, militem pedestrem accingi præstaret, in acutum mucronem decrefcentibus, ut non cæsim modò, acie tenus, sed punctim etiam, extremus gladii mucro, non ineptus sit feriendo. Quo ictu pediti ac equiti, confertis præsertim in ardorem pugnae militibus, sternere hostem, promptius est. Cæsis ictibus, in angusto faciliè obstant levia, ramus, lora, vestis, aut quæque intricata, fallendo vel declinando impetum; Punctim si ferias, certam comminaris mortem, præsertim cum in barbaros bella sunt, contra quos, inane levitatis nomen, ut nisi periculum inferas, certum ipse patiaris.

Propter diutina bella, exhaustis armorum officinis, cum deessent

sunt nobis, tegendo militi, armaturæ ferreæ, Lorica id est, dein cassis, galearæ, undè nullo tegmine ferreo, munitus eques, ac ferè seminudus, sterneretur ictibus hostium, eminùs, cominus, vè petitus. Memini me suasisse, ut loco loricae, thoraces lintheos, quater decuplicatos, quali quali ferrea lamina intertextos, edquè minus ictu penetrabiles, locò verò galeæ, similis operis tegendo capiti caputia; sibi quisque eques, iturus in castra procuraret, à Præfectis turmarum, scrupulosè revidenda. Opportunè hinc commemorare, dictum nostri Konięcpolskii, exercituum Ducis. Cum quendam militum, defensivis armis, non satis, pro more hastati equitis indutum, sine lorica id est, in acie conspexisset, atque ille, severius increpitus, falsa animositate cum respondisset, sibi maximam injuriam fore non alteri, si occumberet in prælio. Immo (inquit Konięcpolskius) Si prodigus vitæ, te tibi non servas, servate Patriæ, futuris præliis mihi què Duci, qui vos omnes inoffensos, ac immortales cuperem. Sigravat ferri tegmen, tamen vitam securiorem reddit, animumquè: Malim te lentè vincere, quàm citò perire, aut inermem confundi. Non gravant sua cornua, sed ornant cervum, & armatura militem. Dehinc continuè armandum, excedere prælio iussit.

Consilia bellica, quæ lenta sunt, valent, qui sua conservare, & retinere cupit, propera & citata, necessaria omnino acquirentibus, quæ sunt (si tutè videbitur) propè desperationem. Una salus victis, nullam sperare salutem; Plerumquè, desperatio, spei causa est. Sed perspicacitate utendum.

Ut quàm otius legatur miles, futuro bello opportunus, parata spolia, & præda, proponantur militibus. Nec requires superflua militum & equorum ornamenta, quibus Polono in more, ferè prodigales sumus.

Veteranos milites, ex præfidiis arcium, in castra educes, novitiis, in locum eorum subititatis. Prælia, nisi veterano milite, aptè conficiantur.

Magna bella, velut munimentorum magnorum obsidionem, commodius Eminùs, cautè id est, & à longè præmeditato, per artem operarum, vel cunctationis, incipere & experiri præstat. Parva & levia, prompta aggressione, Cominùs, periculi & impen-



farum ages compendio; Nè recollecto spiritu, tractu temporis, etiam invalidis, ingeratur robur & consilia, meditatione belli, sed maximè, ex necessitate. Tandem, etiam bellis in magnis, nisi cominus agas animosè, intentum non assequaris, sed immò contemneris.

Errant, qui affectu & impetu (ac sunt laceffiti) in arma ducuntur, prudentiores omnino, offensas qui dissimulant, & arma in tempus differunt, quasi injuriæ nescii, nè si hostilitatem præferrerant impares, opprimantur. Rectè ille: *Apud impotentes, plus querimoniarum, quàm virium, plus minarum, quàm periculi.* Parandæ sunt primò vires, ut parem te sentias vincendo, interea modestis literis, aut missa legatione (medius inter dissimulantem) causam injuriæ perquires, & mediatores reconciliandi quæres, antequam de viribus, tibi provideas; si verò paratus es in arma, dum lacefferis, vanum erit, dissimulationis nomen.

Invictus esse poteris, si nullo certamini te committas, quod in te non sit vincendo.

Qui sine pedite, & tormentis, ad bellum abit, levem prædam, non capturam Provinciæ cogitat. Eques, unico servitio, (campo id est) pedes ubique & per omnia valet, in asperis, in saltibus; pro vallo & contra vallum, defendendo, expugnando, acquirendo, retinendo; Trahendo bello, minùs ex commeatu, minùs ex impensa requirit, fuso exercitu, faciliùs substituitur alter, ac denique ipso campo, *pilis circumseptus*, equitem spernit, & velut ambulatorium fortalitium est. Qui cum equite contra venit, nullus adest metus, per munitiones, per abrupta, & per avia; Qui cum pedite, etiam intra vallum cavetur. *Equitis* vis, aliena velut (equorum id est) sustentatur, aut perit, languente virtute: *Pedes*, constat virtute sua, semperquè bello accinctus. Dicam adhuc; Eques cum pro velocitate, scit se posse fugere; dum velit, fugit; eadem quæ insequendo prodest velocitas, etiam (si levia obstant) fugæ illicium est, & causa. *Pedes*, cui tardior pedum & currendi promptitudo, dum fugere non potest, stat, hastas, vallum, lacertos, phalangem, Duces prospectat, nam & necessitatem habet; Præsertim dum instando, quàm fugiendo periclitari, minùs periculosum; eoque impossibilitas fugiendi, transit in necessita-

tem

tem persistendi, immò in ipsam vincendi virtutem. Tamen eques hastatus, facit compendia belli, & parat promptè victoriam.

Illi Duces regendæ militiæ quærendi, quorum ea vita, in qua nihil præteritum excusandum habeant, qui per minima pedestris & equestris militiæ servitiâ, tum officia, primùm versati; Probè dum sciunt (ipsi agendo experti) quomodo eques aut pedes, sufficiat labori, qua parte superior, alter alteri esse potest, qua cessurus, quomodo viritum? quomodo per singulos ordines? tum per integras cohortes, turmasvè, arma & ordo, sunt usui; ut velut medici, ad perfectionem artis, non corporis tantùm integri compagem & naturam, sed nervorum & musculorum radices, ductus, nexus, vim, nosse necessum putant. Sic perfectus militiæ Dux, per omnia rei militaris momenta, versatus esse debet, non aciem tantùm, & cohortes, sed ordines & milites, per capita pensando, immò arma & equos, vestem quoquè, cibum & pabulum, somnum & vigiliam, veluti Parens de filiis prospecturus. Placuit nonnullibi videre, magnorum Principum filios, legionariis peditibus intermixtos, omnia gregariorum munia (per usum armorum, & minutiores vigiliâs) nulla personarum discretionem, adimplesse, & nutui, certè non illustrium Præfectorum, obedivisse, cum altissimis belli muniis, pararentur. Verè dictum. *Dominavère rectè, qui antè servivère*, cum scirent, sibi obedientibus non abuti, qui sibi rectè imperatum, meminère. Illud quoquè, summis armorum in Magistratibus, populari præsertim in statu, advertendum, nè conferantur illis, qui togatarum artium rudes, & civilis vitæ, stativè in experti, mediis in castris enutriti, solam armorum meditationem induère. Tales, nisi bella meditantur, bella loquuntur & suadent, contentiosis artibus clari, per quæta (ut putant) sibi otiosi, pro ferocia ingenii, facile insolescunt, publicæ paci, & concivibus graves. Si verò populus fessus bello, & sciscendis tributis, ad commoda pacis tandem inclinât, ipsi togatæ rudes experientiæ, velut materiam suæ gloriæ præreptam putantes, nè sint ignoti & sine quæstu, res & quietem turbant, necessitatem armorum (ex prætextu defendendi sua) obtrudunt, pericula objectant, vel obtendunt, per unius victoriam belli; gradum majoris alterius, non commoda pacis cogi-

M

tantes.



tantes. Hinc si bellum diutius invaleſcat, à meditatione armorum, & deſuetudine quietis, ac togæ, multorum civium transferuntur paſſim, in turbarum uſum, & belli amorem, ingenia, prioribus quæ associantur. Adeſt ſubindè, bellica licentia, privata ultio, impunitas, quæſtuosa hyberna, tum rapinæ placent. Dein extorta à Republica præmia, & augendarum compendia fortuna- rum, in promptu habentur, idemquæ filiis (ut neceſſarium) quis- quæ ſuadet. Super hæc, rigor legis, in licentioſos vel inquietos, media in pace exerceri ſolitus, gratia belli, aut meritorum diſpen- ſatur; vel quia, ultoria promptè tenentes arma, dum pro ferocia velint, palam arguere, aut extorquentibus, quidpiam negare, periculoſum. Pax idè ut infructuosa, virtutis præſertim & re- gulatæ vitæ rigida exactrix, moribus caſtrorum & ingenio adver- ſa, odio habetur, ſiniſquæ idem licentiæ, ac præmiorum (belli- coſis) qui belli putatur; ut facile penes potentiam ſuadendi, & authoritatem; non modò neceſſitatem armorum, imponant po- pulo, ſed ipſius æqualitatis (nè dicam libertatis) ſint hoſtes, ad mutationem ſtatus. Prout enim imperium belli, cæcà niſi obe- dientia, commodè conſtare putant, ita huic aſſuefacti, etiam fa- cile, in Monarchica in populum juſſa, inclinant, libertatis ſup- plantandæ (regnare per abſolutum volentibus) aptiſſima inſtru- menta. Dum verò populus, rationem actorum, ſibi reddi cupit, bella importuna, & inutiles impenſas vetat, commoda pacis rigi- dè expoſcit, licentiam militarem arguit & coërcet, illi ſeditionem inertis populi, & ratiocinationes inbellium importunas, vocant, ſimulquæ illudunt. Nec facile ſceduntur populi querelis, ex ca- lamitate belli, immò talia, levi tranſeunt auditu, quia mentis fe- rociam, prædâ, cædibus, & ſanguine imbutam, truces ferunt, civilibus, & pacatis, idè ſcedi, molle putant, immò in gratiam expediendi promptè belli (pro ſuo ingenio, non pro utilitate pu- blica, res metientes) totum ferendum imponunt, vel quia, mi- litum gratiam inoffenſam, retinere placet. Sic Annibal, pro fe- rocia militaris ingenii, Carthagini occiduum induxit, qui alias, uno alteroquæ contra Romanos, feliciter conſecto prælio, pro commodo pacis (antequam laſſatam expertus fortunam) glorio- ſum focdus, Patriæ parare potuiſſet, ſequi modò ſi voluiſſet con- ſilium,

ſilium, pacatoris civium Carthaginienſium *Hannonis*, qui ex uſu togæ, non pro impetu vanæ gloriæ, bellum in Romanos geri ſuaſit. Sic *Marius* & *Sylla*, caſtrorum filii, bellis quidem clari, ſed feroces, idèquæ populo Romano graves. Aliter proſus *Quin- tius Cincinnatus*, *Camillus*, *Fabius Maximus*, *Marcellus*; & alii Romanorum tales, dum non ex caſtrenſibus, verum ex togatis & pacatoribus, ad imperium armorum lecti, fortunam belli, ex conſervatione ſtatus, uſuquæ togæ adminiſtrantes, in alto rem Romanam collocavère. Prudentiſſimo igitur Romanorum inſti- tuto factum, ut iidem eſſent bellorum Duces, qui conſules, prius legi oportuit ingenii togati Conſulem, quàm militaris Ducem; ut ferocia ſagatarum artium, togatis artibus, peritiâquæ ſtatus, at- temperaretur, totum adminiſtrando ex populi commodo, togæ- quæ regula. Sic Dictatores Romani, dum ſunt civilium & pacata- rum artium viri, promptè expedito bello, in gratiam Patriæ ac li- bertatis, ſpontè abdicabant ſe officio. Totum ſecus Rebuspu- blicis Græcorum contigit: Cum enim non utraſquæ artes, ſed ſo- las militares poſthabitis civilibus, ſuis in Ducibus, conſpicias vo- lunt, eoſdem pro ferocia, tulère inſolentes, populo graves, mox Tyrannos, & Reipublicæ ſubverſores. Etiam Romanam in ur- bem, non prius inveſta ſervitus, & abſoluta Cæſarum juſſa, quàm pro longitudine belli, dum militaria paſſim & inertia togæ, præpotuère viris pacatis ingenia, ut ſagum facile aggredere- tur, mox inverteret popularem togam, militarem in ſtatum, Reipubli- cæ transportando Majeltatem. Auſtæ verſutulorum per artes, in immenſum legiones, prioribus cum non ſufficeret ærarium ſolven- do; ut cum miles, jure ſtipendia poſcit, nec habet, juſto velut, togatos contra, tumultuaretur prætextu, inſoleſceret, in partes vocatus tranſiret, non ubi æquum, nec pro Republica, ſed un- dè præmia, ſpes, & licentia, exſpectabantur, immò offereban- tur ſtudioſè, vel ambitioſè: Sic *internis* conſecta magis, quàm *externis*, viribus & periculo, cecidit Reſpublica. Sic (dicam immò) dum vexa fortunarum & crumenæ (quod unicum imperi- um vulgus penſat) objicitur, populo ſtudioſè, in materiam fer- monis, & in quæſtionem, ea cogitatione diſtractum, ſolidiora ſtatus ac libertatis, non advertendo, amiſſam tunc advertit totam,



& ingemuit decipi, dùm invalescente Principum potentia, nullus ad corrigendum esset regressus, pauci modo perspicaciorum, bona libertatis, in cassum serò differebant. Intuere nostram Poloniam, quantum hodiè, pro longitudine belli, decrevit à priori vigore & Majestate libertas; Immo vide, quantum fuerint olim Reipublicæ utiles, qui togatis, pacisque artibus, civilibus id est, prius clari, ad militaria imperia lecti. Quàm inquam pulchrè, ad commoda togæ, populiquè, gesta belli referebant, *Tarnowskius*, *Zamoyskius*, *Zolkienlsuus*, & nè multos commemorem *Chotkievicius*, ante victoriam temperati, post victoriam non insolentes, arma ut præsidia pacis, non ut belli irritamenta administrantes, pro defensione & commodis, non in vexam populi, immò ejusdem querelas ac redargutiones, intra civilem modum, ac modestiam tulerè. Dùm inquam, artibus togæ, mirà harmonià temperatis, magnos in publicum parerent effectus. Verùm inquires, quomodo inter togatos, non in castris, belli Dux quæretur? Utiquè non penitus excluderim, scientiam belli, à scientia togæ, & civilium. Verùm prius hæc spectanda suaserim, nam etiam artes togatæ, longiori usu curiæ, ac mediatione Reipublicæ non distracta, pernoscantur. Utiquè, viro in togato, militaris faciliè se prodat virtus, si in gerendi belli materia, prompta vivacitate, ex usu togæ & populi, suggerat consilia; Dein, si aliqua occasione armorum, spontè ac dextrè, castris se commodavit; Facilis utiquè viro prudenti, ad armorum reliqua transitus, etiamsi totam ætatem, modestiæ civili assuefactus in castris non egerit, cùm sit non rarò, ut militia quorundam temporum, sit magis onerosa conscientiæ, quàm proficua gloriæ. Sæpè, quos pro usu quotidiano castrorum, viros militares, nomine magnifico intitulamus, quæstuosa magis quàm gloriosa, sub nomine militiae, sequuntur & probant. Quotiescunque igitur nobis, ex merè castrensibus, inertes togæ, Duces lecti, aut parùm in publicum profuere, vel sæpius, pro ferocia militaris ingenii, non concivibus modò, sed ipsi libertati, fuere graves ac metuendi, boni communis & status ignari, nec idèd res accommodare, sed irritare scientes. Non barbarum, idèd, in barbara Turcarum gente, cùm idem, qui res status curat, etiam armorum potestatem, commissam habet à Prin-

Prin-

Principe *Vesirius*; idem summus minister status, & belli: Turbulentorum sciens, pacis non ignarus.

Non transmittendum sine interpretatione arcani. Quare olim Romæ, Dictator à populo dictus, ipse sibi pro arbitrio, Vicarium belli, Magistri equitum sub nomine, dicebat, non ut scito populi legeretur. Factum sine dubio, ut cui deberet ille honoris beneficium, eidem præstare teneretur obsequium, nè discordiâ imperiorum, tùm varietate, res bellica turbaretur. Velut *Minutius* magister equitum, Fabio Maximo Dictatori, æquatus potestate, res turbaverat æmulatione, ac temeritate, ni moderatione ac providentia Fabii, consultum fuisset in melius (*Livius lib. XXII. Hist.*) Interest igitur, Duces belli ut sint concordēs, pro amicitia, genio, studiis, artibus belli æqualibus; Nam ex paritate, dissociari animos, & res confundi necesse; Nevè collega in æmulationem, sed in societatem laboris, adsciscatur. Rectè majorum nostrorum instituto provisum, ut minor belli Dux, subesset majori; Immo, cessaret jubendi autoritas minoris, si major Dux, in castris adest. Sed hodiè, mirum! nescio quæ nova politia, distrabere coepit, per occulta, Ducum concordiam, edquè distraxit Polonas vires, fortunam, Provinciasquè in id calamitatis, periculo involuit, confinia coarctavit.

Instituendæ militari disciplinæ valet, ut equestrium turmarum Præfecti, adscitis in consilium commilitonibus, certis casibus, habeant potestatem de vita decernendi, super prioris ordinis equites, serum aliàs, armorum Duci, de quibusvis referre, dùm ab hybernis, ille procul abest, interim per dilationes poenæ, flagitia quandoquè intenduntur, cùm non promptè, summus metus adest, capitalitèr delinquenti; Sic verò vivitur, ut rarò discretioni aut pudori obeditum sit, sed omnes promptè regit metus. Videmus Senatorum filios, dùm bonis artibus & virtuti student, subijci Pædagogorum plagis, qui aliàs obscuro loco nati, modò sua constet regentibus autoritas, nec assidere simul, sed coram stare, verbo & gestu, reverentèr Pædagogos haberi volumus, nè post inductam familiaritatem, exuatur primùm reverentia, dein posthabeatur superioritatis metus, ut ab eo, nec moneri velint, aut corrigi, injuriæ loco habeant.

M 3

Re-



Requiritur item, singulis equitum turmis, quinqueni sexenive minoris potestatis officiales, (ultra Præfectum & Vicarium) ut substituantur, unicus dum non sufficit omnia curando, in itinere, in castris, in acie, instando, cedendo, tum si idem occumbat, turma ductore destituta, quid? nisi turbetur, cedatve prælio. Rectum institutum Lacedæmoniorum, substituendis belli Officialibus, suggerit Thucydides (*Libro V. Histor.*) Cum Rex exercitum ducit, omnia ab illo reguntur, & ipse quidem Tribunus militum, indicat ea, quæ sunt facienda, illi vero, Centurionibus, & Centuriones, dimidiæ centuriæ Præfectis, rursus isti Decanis, Decani vero suæ Decuriæ; Ut imperia (si quid Reges fieri velint) eodem ordine progrediantur, citòque per omnem exercitum permeent. Nam propemadum totus Lacedæmoniorum exercitus, exceptis paucis, sunt Duces Ducum, & alii alii imperant, & rerum gerendarum cura, ad multos pertinet. Sicut igitur quisque bellatorum prudens, unica in turma plures administratos, quam unum requirat, sic improbarit, cum unus idemque Præfectus, aliquot simul præest turmis, & cohortibus, ut idem hastatis, idemque ferentariis equitibus præsit, atque idem pedites regat, non ut ardentè se bello commodet, pluribus intentus, verum ut quæstui bellum habeat, vexando colonos per diversa, defraudando stipendia, summam rei militaris jacturam. Si enim unicus solus, uni cohorti, sine vicariis manibus, haud sufficiat regendo, quomodo sufficiet simul pluribus? ut dissolvi sit necesse, militarem disciplinam, negligentior, immò inexercitior miles ut reddatur. Utinam hæc in castris nostrorum, invalescente rectioris militiae abusu, correctius habeantur.

Loquar clariùs (Non enim imprudens recentium bellatorum probavit) Eò magis præstare cohortem cohorti, aut turmam turmae, quò plures haberet administratos, seu (ut vulgus ait) *Officiales*; Neque solum de cohorte turmave, sed integra de legione sentiendum, ut habeat summum Præfectum & Vicarium, dein minores vigilium, annonæ, stationum, armorum Præfectos, tum Centuriones, cum suis administris. Fortiores igitur viri mille, qui sub duarum legionum nomine consignent, quam qui sub regimine unius, cadente uno Præfecto, alter superest, aut si meticulosus alter, alter poterit esse cordatior, æmulatio dein ad virtutem,

&amp;

& consilium belli, melius à duobus. In unico solo, & cor unum, & fors in mortem, unica est, ut unius capitis periculo, fortuna tot simul virorum vertatur. Non irridendum cujusdam belli Ducis effatum. *Eo melius pugnaturum militem, si quisque in acie, suum post se haberet rectorem, vel Prædagogum.* Suecorum ductores, militiae robur quærunt, ut quam plurimos *Officiales* cohortibus substituant. Atque ab ea ratione recordor, me alicubi de Polona militia loquentem, consilii per modum insinuassee, conducturum non leviter equestribus turmis, si ultra Præfectum & Vicarium, haberent quatuor alios, minoris potestatis administratos, qui velut aliquæ Præfectorum manus, ordinandis, ducendis, restaurandis ordinibus adhiberentur, ut cum Præfecti à fronte curant omnia, hi per latera, tum à tergo circumfundantur, commissum numerum militum (partiri enim turmam, quaternas ternasve in partes non obfit) per subsidia, ducturi, ut confusos in ordinem reponant, immò cedentibus, gladium intendant, prælium restaurent, curent vigilias, *rationem male gestæ rei, reddituri*, quartus, quintusve primorum vices supplendo, si occumbant in prælio. Si vero pauci sint *Officiales*, Præfectus cum Vicario, haud partes in omnes sufficient. Quod modernis bellis deprehensum, ut optimus aliàs noster equitatus, à Suecico longè inferiori, & ignobiliori, sed benè per subsidia ordinato, aliquoties propelleretur, cum ob defectum administratorum, facilius nostri confunderentur in pugna, & difficilius, ab unico solo Præfecto, confusi reponerentur in ordinem, aut cedentes animarentur, seu retraherentur in prælium.

Quem necessitas suspectæ vicinorum hostilitatis, magnis exercitiis habendis adstringit, ærarium verò solvendo non adest, arte *reservationis* aut subsidiorum, utendum. Septies quinque peditum millia, necesse cum habenda tibi, decem solvendis millibus, qui vix sufficiat. Substitutis expertæ virtutis Centurionum veteranis, aliisque ordinum ductoribus, per municipia & pagos, totam Provinciâ, millium triginta quinque peditum scribendorum, delectum imperabis. Ex his quinque millia, quibus incerta domus, aut mansio, nomine Prætorianarum legionum, ad retinendum perpetui exercitus nomen & robur, (immò retinendæ disciplinæ)

sub



sub signis semper habeto, reliquam multitudinem; subsidiorum nomine, sexenas in partes partieris, ut quolibet bimestri, alia quinque, primis per suas domos sparsim digredientibus (relictis tamen per urbium armamentaria, signis & armis, nè fortè data occasione, tumultuentur armati, & insolescant uniti, præsertim si suspectum vulgus in revolutionem; Centuriones etiam in castris, penes te manebunt, ut absit illicitorum Dux, & author) & tertio bimestri totidem; revoluto anno ad eoldem, circulo velut, ordine redeunte. Sic millia decem, menstruo stipendio cum providebuntur, revera, peditum millia triginta quinque, subitis belli casibus, promptissimè aderunt. Facilius utique, casu belli superveniente, tantæ multitudini, breve in tempus stipendio sufficies, quàm ut perpetuum onus, portes incautus. Immo promptius sit, minorequè insperati belli periculo, sufficientes vires habebuntur, hosti reprimendo, quàm si repentè colligendus sit miles, tyro, & verna, aciei, ordinum, ignarus, periculi inexpertus, eoque, novo aspectu hostis, confusus ac tremens, tum primùm armis exercendus, dum super caput imminet invasor, superbè insultans, tuorum deprædator. Pericula verò bellorum, & labor, non arte aut præcepto, sed magis, consuetudine castrorum tolerantur, & nisi cum tempore, usus venit.

Placuit aliquibus bellatorum, ut ab eo commodam invadendi occasionem, in hostium populos, aut urbes usurparent, cum inter se, earum cives, diffident animis, & studiis colliderentur. Sed fefellit opinio, cum enim utramque partem, simul oppressum irent, potius à necessitate incussi metus, in suum caput conciliandi, & arma inter se jungendi, occasionem partibus dabant, quàm ut aliquid proficerent invadendo. Consultius sit, dissidentem inter se Provinciam suspectam, aut urbem, pacis, quàm belli artibus aggredi, alteri parti patrocinando, consilium, arma, pecuniam, submittendo, ut mutuo conficiantur, non difficulter tandem, *legitimis occupantibus* cessuri.

Res ab utrinque multarum rationum est. *An expediat hosti inferre bellum foris, aut expectare illum domi.* Nè hinc aut illinc, disquiram diu, potius illis assenserim, qui conditionaliter rem habere volunt, videlicet. Si populosam habeas Provinciam, com-

meatu

meatu abundantem, incolas armis exercitos, fideles, factionibus non distractos, ut potius majore in rem tuam commodo, hostem expectare domi opus habeas; Facilius tibi subsidiorum copia è proximo, commeatus, locorum gnara commoditas, quæ difficilius hosti obveniunt, immò facilius intercludi possunt. Deinde, sæpè fit, in externam Provinciam, haud numerosum exercitum educere qui potest (cui præsertim sunt populi, diuturni belli & moræ impatientes, aut peculium, diu sustentando externo bello, haud dives dum adest, ut post majore periculo irritati belli, rem turpius deferere opus habeat) ille, si domi bellum geratur, tripulum numerum armare posset: Cum incolarum alii, pro commoditate proximi loci, alii necessitate periculi, juvenis, senior, civis, rusticus, solutus, adstrictus, leviori stipendio, immò gratuito tuendæ Patriæ amore, ad arma provolant, in externa bella, non cuique progredi libet. Helvetii, cum extra Provinciam, xxv. virorum millia educant, duplum aut plùs, domi armare possunt, eoque fortius, quò magis commoditate suæ Patriæ, & gnaris montibus, in bella utuntur. Poloni etiam, ut fatear, in externa bella, non facile potentes, sed intra Poloniam bellando, magnos confecere hostes, & multos simul repressere populos. Jam parte altera, rem librando, si peregrino milite utaris, & solis nummis, res tua constet, nec tibi populi usitati bello, sed negotiationi accommodati, seditionis suspecti, præstat tunc inferre bellum, & hostem quærere ad extra, nè tibi commerciorum cursus adimatur, undè fons pecuniæ intercidi possit, quæ si desit stipendiis, deficiat externus miles, tumultuetur, ad hostem transeat. Exemplo res Romana contra Annibalem, dum enim Romani, domesticis viribus bellarent, tum populosam haberent, submittendis auxiliis urbem, juvenes armis exercitos, toties periclitati, nec tamen bello succubere, ut Annibal citius vincendo, quàm illi succumberent bellando; Secus Carthaginenses, cum peregrino, & adscitio milite, tum auxiliis uterentur, potentes in Italia fuere diu, sed postquam domum rediit bellum, transeunte in Africam Scipione, unius periculo pugnae, confusionem passi, ac de summa rerum, periclitati sunt. In summa dicendum venit: *In externa Provincia bellant, non nisi victori, tutè redire licere.* In propria terra,

N

errata



errata praeliorum facilius corrigantur, fidentiùs te ad tuos recipias, facile colligas dissipatos, subsidia & conimeatùm, è proximo, haud gravatè acquiras, quæ in externo perichitanti, non tam facile dantur, dùm metu mägis armorum, quàm debita vel innata fide, in tempus faventes, incolarum aliqui tenebantur, inclinante fortuna, omnes contra insurgunt. Cur enim peregrinum & advenam, quàm suos plùs ament? præsertim cùm redit ad suos fortuna; verbo dicendum. In externo vincenti, victoriæ luera, gradatim, & quasi rependo veniunt, secùs unius prælii casus, nihil medium relinquit, inter summa, aut præcipitia, luera fiunt per partes, amissio per totum, semper vincere oportet, vix tamen satis est, semel perdere, satis est ad ruinam. Suecus tùm Moschus, intra Poloniam injusti victores, suo casu, exemplum huic adstruant necesse veritati. Illud quoquè in considerationem venire debet, qualis illa gens, contra quam bellandum. Prout enim moribus, vestitu, religione, lingua, genio, dispar est, aut quò propiùs ad nostra accedit, eo faciliùs, aut secùs difficulter, eam occupare, partamvè retinere tibi statues. Faciliores idè sunt, intra Italiam, Gallicorum armorum, quàm Germanorum progressus, & belli luera fideliora, quò illi propiùs, quàm isti, ad similitudinem genii, tùm linguæ Italæ accedunt; Hispanis deindè, adhuc supra Gallos, faventiores sunt parandæ Italiæ conatus, nam Hispanica gravitas, & Melancholia, genius item, studia, tùm lingua, mägis conveniunt cum Italis, Gallorum verò insolentia in subjectos, contemptus erga gentes alias, tùm inconstantia, intra Italiam exprobratur. Idèd Neapolitanum regnum post Arragonios, (*Vide Francisci Guicciardini Historiam*) Ducatum Mediolanensem, tùm superiori retrò tempore, Siciliam, Galli non retinuère diu, cùm Hispanorum dominium, minùs ægrè ferant, ut rectè quispiam, Italiam; sepulchrum Gallorum vocet. Sed in alias gentes, ut quoquè ratio vadat; Suecorum arma intra Germaniam, efficacius agunt, & occupata tenent, dùm lingua Germana, habitus, genius gentis, religio passim non Catholica, cognata sunt Suecis, quàm dùm contra Poloniam itur, nam obstinatiùs à Polonis, & majore odio, in Suecos sibi per omnia dispare pugnatur, ut difficulter sibi disparium, recipiant superioritatem.

ritatem. Germanorum verò, & Suecorum inter se, suspensi sunt ictus, nec tam internecinum bellum. Prout moderno bello Polono Europæo, Suecorum ore, in confessio habetur, plures Suecos, quinquennio, intra Poloniam cecidisse, quàm triginta annis, intra Germaniam bellando. Insuper, minùs sanguinolenta nobis arma, & majores progressus Polonorum, in quosvis alios confinitimos, quàm contra Germanos (immo fideliora Provinciarum luera) quò mägis, lingua, vestitus, tùm Septemtrionale cœlum, differt ab Occiduo, vel Meridionali. Sed tandem, ut quæstioni finis apponatur, considerandum eunti bellatori in externam Provinciam, utrùm pro Republica populari, vel pro Monarchia, bellum geras; undè facile pro authoritate Monarchica, subsidia (licet in remotiora) à tergo submitti dùm velis, statim habeas, quod in statu populari, haud promptè habendum speres, cum populus, non tam facile à remoto, belli successus prosperos, adversòvè pensat, & nisi plerumquè facit, dùm sub oculis metus domi, ac proindè juvandi necessitas, vel nolentibus adest. Genus deindè belli pensandum, defensivum nè, an offensivum geras? Conservare nè tua? an acquirere aliena petas. Dùm acquirere contendis, frustra domi torpeas, omnia audenti parata, si vires, si consilium, si *iusta causa*, si commeatus, & insuper adest *occafio*. Rari potentià solà, Provinciam subjugarunt, verum promptiùs, qui defectum virium, virtutis, concordia, & qua parte, (hostem inter) advertendo, *pro tempore* dextrè usi sunt, in ejusdem ruinam; Vitiis hostium suppleturi, quæ sibi ad perfectionem defuère. Super hæc, natura externi belli, in trutinam vocanda, utrum in viciniora, an in terrarum longinqua, procul à domo eundum; longinquitas enim, aliam, quàm speramus, aut animo præconcipimus, rerum faciem adfert, propter commeatus, reiquè nummaria, immò apparatus armorum (præsertim in pulvere & globis, dùm consumuntur) defectum, fatalem discordiam suorum, incommoditates, tùm incognita locorum, Montium item, Sylvarum & Fluviorum propter impervios saltus, ferociam populorum, mutationem aëris, aquarum peregrinas cruditates, edquè morbos, hominum pestes & jumentorum, inopinatas pluvii, tùm gelidi coeli tempestates, item æstus, in-



interrupta à tergo, & planè desperata subsidia, caput belli jaculam, virium distractionem in locorum praesidia, vincenda aequè ac victa, habendo suspecta, dum nec victoria parta, ex malè affecto populo (ob diversitatem linguæ, morum & religionis, nec dum rectè coalitos affectus per omnia) satis fida, clades verò, semper est, in longinquo periculiosior. Quod magis adhuc (nec enim omittendum) mirè, serpentium pericula, dein muscarum, aut culicum stupenda vexa, praesertim in camporum desertis, peregrè tendentibus ferenda, velut quibusdam bellatorum, in barbaros moturis arma, minùs laboriosè ac periculosè contigit. Verbo dicam. Necesse considerandum, non magis quæ ituro, permansurovè, sed quæ redituro profunt. Quorum defectuum remedia, supra humanum consilium posita, ut ferè miraculis, velut pullus fortunæ, bellare praesumat, qui jactantè in bella longinqua properus, sine reciproca populorum fidelium, tum fortaliorum (lineam communicationis, novi bellatores vocant) ex uno in aliud communicatione, per interrupta terrarum, procul à domo bellare studet. Homines novi; & advenæ, semper sunt populis suspecti, praesertim quos armis impetitur eunt; Est verò pro comperto, ut malos mores eorum, faciliùs feramus, boni alterius comparatione fortè pensaturi, cum quibus familiaris dūdum sumus assuefacti, nec idèd facile ab iis divellimur. Nisi fortè mutationis studium, tædio praesentium, apertè invalescat. Hominum secùs incognitorum, tum advenarum, ipsa novitas, immò virtutes suspectæ, & *pro fide in tempus habentur*, etiamsi modestè victoriâ utantur, illud pro injuria reputatur, & inimicum videtur, quia vicerunt. Honesta etiam, novæ superioritatis confessio, suspectissima est, ipsa mutationis novitate, dum ligari putamus, semper pejus aliquid, contra, imaginaturi, quos semel pertinuimus, aut ex incognito reveremur, antequam temporum lenta familiaritate, metus & suspicio deponatur, amor invalescat, occultæ inclinationes animorum pernoscantur, ex agnita probè virtute, & gratiâ morum; Immò, antiquorum dominorum, seu libertatis, rituumquè (quibus dudum assuefacti) memoria, sensim antequam definat, in quæ, momento haud transfertur animus. Cujus incommoda belli, non faciliùs, quam à praxi hi-

storica,

storica, (expeditionis Hierosolimitanæ) videas, apud Paulum Æmiliū libro IV. & V. *Historiarum Galliae*.

Abfit deindè, ipsum Principem, in externa bella, ire suadeam, quocunquè prætectu, sed commodiùs, per peritissimos ministrorum, bellum geret, ipse à tergo, de subsidiis commodiùs prospecturus, *nec relicturus locum, undè in omnia regimen*, exemptus à casibus belli, procul à labore ipse, sed fructum messurus in quieto; secùs quid reliquum ad ruinam, aut quod aliud subsidium speretur? si Princeps cadat in externo; periculovè involvatur, nisi ut domi reliqua confundantur, cum terror à remoto, major venit, omnia velut turbine commisturus. Francisci primi Gallorum Regis intra Italiam ad *Ticinum*, unius praelii adversa sors, & captivatio, quanta intulerit incommoda, & pepererit multos in annos quæstiones Regno Galliae, *Pauli Jovii, & Francisci Guicciardini Historias lege*: Cum Cæsar Carolus, è sede Majestatis non recedens, bellicquè pericula securus à remoto spectans, sed per administratos Franciscum vincens, titulo victoris uteretur, edquè altiùs, ad opinionem hominum, velut majora, & expeditiùs facturus ipse, si praesens adfuisset, *vim fortunamquè Principatus, absens modo à longè ostentans, minoribus periculis non immixtus, & majoribus non defuturus*.

Hinc rationem excutere placet. Quare miles (seu quivis alius) dum in externam venit Provinciam, animosior, tum acceptior plerumquè, quàm forsau est domi? Duplici fit causâ, eorum primò, ad quos ventum est; Dum enim naturalitèr, novorum homines sunt cupidiores, major in ignotas personas, fertur admiratio; Obvia nondum cognitæ amicitiae irritamenta, in praesens dantur, nulla verò trahitur (hinc, illinc) ex antecesso offensa, vel actorum, natalitiorumvè exprobratur censura, ut homines advenæ, aliàs obscuro loco nati multum aestimentur per ignorantiam, ac vicissim ipsi, ignotos, effusiore prosequantur amicitia, edquè justè mereantur aestimari. Deindè fit, parte ex altera, cum faciliora domi subsidia sperantur, quidvis agentibus, aut in adversis, faciliùs se offert, non in ignoto effugium, tum *spes*, non in se solo tantum, *sed in aliquo reponitur*, facile remittit animus inter suos, nec se colligit, aliàs in externo, ipsa necessitate armatur.



Rem planè cognatam, suggerit Tacitus: *Propinqua Cremonensium mania, quò plus spei ad effugium, eò minus ad resistendum animi dubant.* Placèt adhuc causa, quia domi, per respectus personarum, aut per fiduciam, immò per notitiam, disgregatur (eòquè præpeditur) virtus, extra verò, nullius opis conscia, seipsam recolligit, & fortius agit. Quò magis exteri, ignotas personas mirantur, eò magis accendunt animum ad altiora, naturale autem hominis animio, ignotioribus velle innotescere. Inter nostros cum versamur, multa (remissius agendo) dissimulamur, multa in aliud tempus rejicimus, non enim sic tempore stringimur. Insuper, inter notos, cum virtutes nostræ notæ, etiam aliqui defectus, ac ipsa vitia (vel cognatorum nostrorum, pro quibus non rarò erubescere necessum) non ignota, si laudantur illæ, hæc itidem obijciuntur in reprehensionem, ut sæpè confundamur. Immo inter ignotos, antea vita (sæpè dico) ignota est, illud modo in oculos incurrit, quod in præsens laude dignum habetur; Vetus dictum. *Omne ignotum esse pro magnifico;* eòquè sacra pagina collimat: *Nemo Propheta acceptus in Patria sua;* Et Genesis Cap. XII. *Dixit autem Dominus ad Abraham, Egredere de terra tua, & de cognatione tua, & de domo Patris tui, & benedicam tibi, & Magnificabo nomen tuum.*

Pedites sunt maximè bello opportuni, ideoquè ab his bellum apparandum, si rectè rebus provisum velis. Verùm in armandis peditibus, natura sclopetorum, noscenda Duci. Fistulæ quæ accenduntur elychnio, seu decocto fune, accommodatissimæ apertis defensionibus, & promptuariæ pugnæ, ac proinde (si dicere licet) *præliorum furia*, non aliæ magis serviunt. Lentis verò congressibus (ubi non quàm crebro, sed quàm certiore ictu exploditur, pensandum) fistulæ accommodatiores, quæ silice provocant ignem, ideoquè defendendis munimentis, aut oppugnandis, maximè usui, dum commodius, per minutissima foramina exeruntur, exquisitiùs collimantur; nec inani terrore explosæ, feriunt, nequè sunt impedimento, inter fossas & arbuta, sensim per occulta adrepentibus, incertitudinem ictus, diutius intentis, ut ab eo, certà experientiâ sit probatum, illas fistulas, apertis congressibus, has defendendo & oppugnando vallo, esse maximè utiles. Adde. Tractu obsidionis, & continuo ignis usu, facilem

cilem elychniorum fieri defectum, silicis promptiorem copiam haberi, etiam immò, diuturniorem.

Haud tuta sui defensio, nisi offendere pares; Offensive agendo, simul tua defendis, simul hostem arces; Nuda sui defensio, propius metum est, non obviat hosti, sed illum exspectat, non infert ictum, sed excipit ipsa, cujus energiam explicat rectissimè proverbium Polonum. *Nienszyrko sie skladac, trzeba czasem przyciag.* Sic obsessis, dum sua munimenta securitati sunt, etiam excursio in hostem prodest. Sic, per acies, aperto campo bellapti, non declinare solum adversam potentiam, aut in securo castris subsistere juvat, sed insperatum hostem à tergo, tum à lateribus carpere, & per insidias militares aggredi, in rem valet; Nec intra sua exspectando, verùm procurrendo in hosticum, damna & terrorem inferre proderit.

Quamdiu eques non militabat sine hasta, Germanorum bella, lusus nobis erant, quamdiu non sine scuto, Scytharum irride-<sup>a</sup> batur arcus, & assultandi velocitas, nunc, dum levius pugna-<sup>vulg.</sup> mus, leviores metimus bellorum fructus; lege majorum gesta, & fateare, immò defectum armorum, ante bellum corrige, si vis in bello vincere. Nec omiserim, nobile Poloni militis dictum. Cum Vladislaus Jagiello Rex, bello contra Ordinem Theutonicum (*Cruciferos* vulgò) visis in acie multis supra opinionem Germanorum signis, fortè de suorum Polonorum paucitate dubitaret, Regem affatus. *Rex; hostes non vereare, vel si cælum super ruat, dubitasne hastarum nostrarum cuspidibus, appensum & sustentum iri.* Hæc animando Regi, generosè magis & opportunè, pro conscientia virtutis, quàm superbè protulit, nam *DEI. Matrisque Virginis nomine invocato*, hostem multitudine tumentem, (propè enim centum millia equitum, peditumquè, in aciem eduxerant) fortiter aggressi, prælio profligarunt & bello.

Huc pertinet, nec ideo addere omittam, reprimendis Tartarorum incurribus (qui prædonum more nostra invadunt) *quærendos* potius in sua *Taurica* & sedibus, quàm ab illis defensivè, continuo metu, majorequè periculo, ut caveatur domi, *faciendus potius, quàm habendus metus est.* Dum verò in apertis ipsi manent, vagorum magis, quàm habitatorum nomine, nullas arces, aut urbes mu-  
nitas



nitas incolentes, facilius aggrediari debellandos, facta conjunctione armorum, cum Moschorum gente opportunissima situ, societate periculi, exequendi mediis, ac necessitate, huic facili expugnandæ barbarorum. Munitis ergo castris per campestria procedendo, opportuniore regionis loca, virium propter communicationem insidendo præfidiis Boristhene subministrando commeatum, Hypanovè (vulgò *Boh*) fluviis, saltus deinde, fontiumque scaturigines (qui rariùs in camporum desertis, versus Scythiam visuntur) levibus fortalitiis muniendo: Aciem hastato pedite, & tormentis firmando, nisi pro sua commoditate, non pro hostium arbitrio prælium committendo, cavendo prius, quàm audendo. Demùm, penes iustitiam armorum, opemque DEI, frenum imponetur, barbaræ indomitæque genti, & reprimetur invadeudi ausus, tum insolentia. Sic Moschi olim, Tartarorum incurfibus, periculosè obnoxii, diuque per *defensivum*, haud securi, versis maturo consilio, in *offensivum* bellum armis, non solum arcuere insolentis Scythicæ gentis invasionem, verùm aliquot provincias, *Astrachanensem*, *Casanensem*, aliasque, sibi fecerunt tributarias. Insuper si vis offensiva, & aggressio non placeat, deductis in ea loca Polonorum coloniis, aliquod militare collegium & societatem, instituere præstaret, cum donatione terræ & agrorum, sub titulo *Marianorum Equitum* contra infideles. Suffecturum verò, nonnulli putant, ritæ defensionis, si ripæ & insulæ, circa inferiora Boristhenis, quæ ex Thaurica Scythiis transitus est, continuis fortalitiis, coloniis, & milite muni-  
rentur.

Bellum & militia, quæstui nunc passim habetur, in artem ampliandæ fortunæ, ac unicum pinguiter vivendi medium, versa, cum antè haberetur, ut exercitium virtutis, materies gloriæ, & adipiscendæ pacis, tum requietis medium. Pax idè, armis & impensa, promptius quærebatur & habebatur, nunc artes pacis, obtenduntur in speciem, ut trahendo bello sufficiamus, dum turbæ in quæstu, quiescere damno habetur. Verbo dicam; Malè agitur cum Republica, nec diu subsistere potest, ubi fructus pacis, in solam commoditatem bellandi, artes belli, vertuntur in artes acquirendi, dum togati (occasione tributorum subsidio belli)  
per

per quæsturas ærarii, tum commissionum ministeria, viri militares, per stativa, & erroneos per Provinciam expilandis colonis discursus, sibi quisque trahit partem; Sic Respublica, velut per licita spolia, & concessum habendi medium (nè dicam latrocinium) membratim distrahitur, & tandem nexu dissoluto, exsanguis ruit, singuli aliquid ex ea, per illicita carpere, dum quærunt, omnes totam, sequè necesse perdunt. Quam internam depravatorum civium causam, plus obesse parandæ paci, & restituendæ in melius Reipublicæ, quàm externo quæ paratur ab hoste. Nec prius eo malo, trahendi non gerendi belli, laborare cœpit Polonia, quàm externam militiam passim numerosam, legionum sub nomine, dum induximus; Ordo militiæ pedestris, mihi placeat, sed non gregarius, & Præfecti externi, non habitus, non invertendis legionariorum stipendiis, & (mille Præfectorum per artes) expilandæ Provinciæ, exterorum modus. Sic enim, ars bellandi, versa in artem corradendi. Quoàdusque, Polona militia prævalebat, dum ingenuo equite (hastato præsertim) bellabatur, & Optimates, nondum gustato lucri odore, præesse hastatorum turmis cum honore, quàm legionariis cum quæstu malebant, promptiori consilio & viribus, expediebantur bella, quærebatur pax & habebatur, Nobilis pubes Polona, exercitii loco, habebat bellum & castra, non ut vivendi (multòque minus ditescendi) exinde quæreretur modum. Post emerita stipendia, fructum gloriæ, non loculos, domum reportatura, immò sua potiùs, honestæ armorum æmulationi, & decori impensura, quàm ut rapere aliena præsumeret. Tamen in externa, diutinavè bella, miles ferè accommodatior, cui rara domus, & ars vivendi, cui solis in armis est; Non enim tædio belli, faciliè revocatur, armis intentus, aut penatium distrahitur memoriâ.

Maguæ Respublicæ & Imperia, in errorem impingunt, dum pro magnitudine, tum fiduciâ potentiæ, non prospiciunt maturè, verùm spernunt pericula minutiora, quæ neglecta, in grandius excrescunt malum. Nemini magnitudo sua (nihil aut negligentius agenti) suffecit in securitatem, immò magnæ calamitatis, sæpè causa fuit & initium, magna ex felicitate securitas, ut per eamet



conficerentur, quæ contempsere incauti. Minores aliàs, quibus ex parvitate, cum deest potentia, suppleat ingenio, vigilantia, colligationibus foederum, occasione, inventis militaribus, velocitate, praeventionem, diversione, activitate, exercitio, nonnunquam audenti desperatione, ut causa potentiae sit, ipsa impotentia, vel necessitas, eoquæ potentioribus formidabiles fiant. Nihil igitur, tutò spernitur, quod spreveris, valentiùs negligentia faciet. Ex eodem fonte, obiter (ut aliàs recta soleo) dicere si licet. Libertatem Rerumpublicarum, zelosiùs, immò cautiùs, à populis manu teneri, quoàdusquæ in parvis est, nec summo subsistit gradu, immatura. Inquam, dum pro imperfecta, nec sibi adhuc fidenti, curiosiùs laborant populi, advertunt operosè, obviant, modicas inclinationes cavent, faciliùs casuram metuentes, quo imperfectior illa: Nam ferè metus vel parvitas, causat providentiam, remquæ compensat cautione, vel diligentia. Prout praesumptio securitatis, fiduciam parit, & opportunorum contemptum, edquæ mater est negligentiae, tum lapsus. Vel si forte sint Cives, in tempus animis, studiisquæ non cohaerentes, ad est promptè causa ex impotentia, necessariae unionis & diligentiae, velut tot exempla, tulit olim vetus Græcia, Roma, Polonia. Dum verò in summo steterit libertas, quasi nihil desit in majus stabilendæ, pleraquæ proficua intermittunt populi, periculosa contempnunt, edquæ per inania securi, & levi rerum imagine elusi, emersura libertatis damna, non praevident, nec advertunt; Ut eveniat, velut bene valentibus & sanis, quibus, conservatio sanitatis, & vitatio emersuri corrupti, sæpè neglectui est, sæpè medicorum cautio, in noxios cibos irrisui, secus ægrotis, depulsio morbi; prout praesenti in sensu, etiam est in ardentiore cura convalescendi, sic ferè, praesentis mala servitutis, propulsanda, facile persuaseris, conservationem secus libertatis, tum affuturi mala damni, pauci ingennorum capiunt, & in cassum, coram ignavis disceptant, iis praesertim, quos longa pax, ad inertiam, & otii dulcedo, dein luxus, emolliverunt, ut malint per ignaviam, non credere periculo venienti, meliorumquæ civium cautelis, spem tum fiduciam sibi adstruentes affectatè, quam ut necesse habeant, subire laborem, aut impensam, obviando, dum crediderint.

derint. Undè facile inclinabitur libertas; Ut ferè difficiliùs sit, eripere imperfectam, aut praepedire crescentem, quam illi insidiari, ad imumquæ detrahare, cum ex integro adoleverit, edquæ incautam, & sui negligentem; Quasi ad summam libertatem (nihil agentibus) sufficiat, habere legem, & vocari liberum, cum lex, non sit libertas, sed nisi normam, & initium libertatis habet. Aetas Rerumpublicarum, ætatis hominum est in similitudinem; errores juvenum, in meliùs promptè flexeris, aut vegetis ingenii, tum corporis valore pensaveris, senes inveteratae malitiae, dum nisi graviùs errant, difficile assurgunt, sibi & aliis graves, tardi ac morosi, undè facile contempnuntur, praesertim dum vis ac ætas, in occiduo: Sic ferè sit, dum consenuit civitatis vigor. Roma, probandæ rei, sufficiat in exemplum. Pulsis enim Tarquiniis, studiosiùs pro libertate habenda, quoàdusquæ erat in crescenti, tum pro retinenda, cautiùs laboravit (ut Brutus Consul primus, filios suos, studio Tarquiniarum revocandorum captos, in gratiam Patriae, addiderit morti) quam non fecit post Cæsarem, dum libertas maturuerat, nihilquæ ad augendam, sed multum ad conservandam desideraretur, dum inquam, summo gradu subsistens, sibi nimiam fideret, incauta. Prout è converso, faciliùs erat Augusto, Tiberio, cæterisque Julii successoribus, supplantatâ Republicâ continuare Tyrannidem, quam Tarquiniis recuperare amissam, nam post Tarquinius, populus nondum satur libertatis, sed veriùs experiendæ ulteriori, novo dulcore irritatus, tunc primum in voto crescendæ steterat, habendamquæ tum retinendam praecuperet: Aut factum fortè, ob causam, quia Materiae Republicæ (populus id est) nondum erat sub Tarquiniis corrupta, vivente verò Cæsare, forma libertatis & legum, cum esset perfectissima, sed recipiendam ad formam, erat materia corrupta (ob magnificam libertatem, opes exsuperantes, insolentiam, fractos luxu & otii dulcedine, vel emollitos animos, nec idè generosi ausus capaces, dein propter ambitiosam æmulationem, mutuos dissensus, avaritiam, ob idquæ Tyrannorum in obsequia promptitudinem, dum praesertim aderat erga impromptos, praesens ex delatoribus metus, ac deniquæ privatae rei propter studium, rei verò publicæ, velut alienæ incuriam) erat inquam materia



corruptissima; nec idem semel everfa libertas, revixit. Auxit præterea, cursum captæ Tyrannidis, domus Cæsarum, & successionis occultum fatum, dum post Julium, successor Augustus, Princeps non omnino improbandus, *Populum annonâ, militem donis, cunctos dulcedine otii pellexit*, dum tales reliquos Principes, fortè speraret Roma, facile præsentium turbarum odio, unius Principis ductu, quietè regi, quàm inter collisiones potentium, & bellorum, civilium pericula, sub nomine Reipublicæ, vivere in post maluit. Quodsi immediatè post Julium, tristitia & dissimulatione suspectus Tiberius, dein Caligula, tum Claudius, ac Nero, velut per gradus ascendentes, apertiores Tyranni, in exacerbationem populi movendam successissent, dubiò procul, antequam desuetudo libertatis invaluit, jugum maturè depulisset Roma, assertura pristinam libertatem. Sed fata, mutatura sortem, velut è condicito, longo Augusti imperio, paravit Cæsarum domui auctoritatem & clientelas, dum quantò quis in placita Principum servitio promptior, opibus & honoribus extolleretur, & super hæc adèrant, spes novæ plurium; demde scutiores cordationum, morte absumpti, aut proscriptione cum cecidissent, juniores post libertatem sub Cæsaribus nati, & novo Statui, tum rebus assuefacti, pristinarum immemores, *tuta & præsentia, quàm vetera & periculosa mallent*, facile in mutationem concesserunt, nec proinde de restituenda libertate, ultra cogitatum, prævalescentibus corruptis civibus, supra meliores. Aliter longè factum sub Tarquiniiis, aut post Tarquinius (nec enim repetiisse obsit) dum quivis civium, agens primitiâ, nec corrupta virtute, intra modicam sortem, intraquè non ambitiosam æqualitatem, compositos spiritus, & animos facile gerebat, *forte sua non ægrè contentus*, altioris fortunæ vel ignarus, vel *minus cupidus*. Non erat probro modicus ager, infrequens servorum & rarior turba, mensa tum potio, per obvia domestica parabilis, nec à longè quæsita vestis, aut tapes, deerat vivendi superbia, & mollis luxus, vel transmarina morum lascivia, sed leves impensas, modicum aptè sustentabat patrimonium, eoquè præjudicio libertatis, non petebatur per obliqua spes crescendi. Non adoleverat novitio in populo, *ambitio, tum avaritia*, nemò alterum voto præcurrere parabat,

nemò

nemò supplere per obliqua, per virtutem quæ deerant, studebat, non emebantur aliena studia, nec sua vendebantur, publici boni, non privati, invaluerat cura, privatum serviebat publico, edquè publicum, dominabatur facile privato. Non reputabatur pro injuria, dum non acquirerentur bona majora; sed ducebatur fortunæ loco, si antiqua modica, sibi non eriperentur, verum conservarentur diu. Nesciebatur amplius, nisi *virtus, ager, gladius & libertas*. Undè respectus privati, secundo loco ponebatur; sed procurabatur inter prima, publicum bonum & securitas. Intue-re nostram Poloniam, considera Provincias & Palatinatus, ubi ditiores elatiore sive habentur cives, eosdemmet videbis insolescere ingeniis, *sortis præsentis impatientes*, ambitiosos, bonos *politicos potius*, quàm *cives*, aut *viros bonos*. Dein expensivos, luxui accommodatos, quæstuosos, majoris fortunæ (ut superbis suppetat impensis) appetentes, per licita, per illicita, *per quæsturas, per aucupandam aulae Regum gratiam*, per dispensationem, (immo per jacturam) libertatis; tantum illis deest, quantum cupiunt, cupiunt verò, honorum & opum immensum, sine modo, sine mensura, & quia tardum videtur, per legitima, cumquè virtute honesta, properant per avia, ruunt per illicita, Generositatem mentis, in altiora, nonnulli tunc falsò vocant, vel obtendunt, cum ambitio, cum avaritia, cum ardor mentis iniquus, aut ferocia invalescit; Undè disgregati cives animis & studiis, non uniti, nec coherentes, ex æmulatione primum diffidentiâ laborant, mox factionibus, odiisque mutuis proscinduntur, *faciles occupantibus, & publicorum incuriosi*; Secus ubi mediocres nobilitatis opes (modò, nè plenè ad inopiam, & vexam generosæ mentis, sint accisæ) magis de non perdendo modico, timetur, cui conservando, nisi publica securitas prodest, hæc verò, valere non potest, quàm sub nomine publicæ libertatis, idèquè illa, majore zelo procuratur, dum quæquè momenta imminentis ruinæ pensantur, præcaventur, præsertim cum adest, ingeniorum rectitudo, tum modestia. Addam, Vulgus, seu civium minores, propius sunt impetum & ferociam, quæ stabiliendis rebus, contra astutos & validos, sola nonnunquam potest; modò adsit Dux & occasio, facile sunt expediti, nec mollioribus Politicorum respectibus cir-

O 3

cum-



cumceffi. Manu sæpè agere præcupiunt, quia suaviorum, aut ignari, aut nullam spem habent, idedquè non faciliè eluduntur. Deindè, necessitate & similitudine uniuntur familiaris, faciliores regendo, cùm disgregatis, nulla subsistendi adest ratio, pro parvitate; vel declinandi modus. Utinam (faxit DEUS) Polonorum libertas, cauta sibi sit, nequè momenta rerum negligat, nimium magnitudini confusa, & negligentèr secuta, undè per insensibilia involvatur. Sed ut quid misceam togata, cum militaribus? Res belli continuaturus, *ad Quartum Punctum Militarium venio.*



P U N-

## PUNCTUM QUARTUM.

## De itinere Exercitus.

**S** Altum transiturus, mittes partem copiarum, explorando, præoccupandoquè itineri, utroquè latere, quo ingrederis, aut quò egrediendum tibi est.

Celeritas, valet pro potentia.

Aliò iturus, aliò iter simulabis, contrariam famam missurus, immò primum iter, à recto deflectes, in illusionem.

Naves portatoriæ ex ligno, vel corio, in promptu habebuntur, ad pontes fabricandos.

Pauca impedimenta sint, potiùs equis deportanda, dùm potes, quàm curribus, pro agilitate.

Stricto vallium aut Sylvarum in transitu, igne impeditur hostis, nè veniat, vel nè te sequatur.

Septum currule (aliàs *carrago*) optimum in receptu, vel progressu, per campestria.

Lentè in speciem procedes cum exercitu, ut hostis contemnat tarditatem, immò famam & causas necessariæ tarditatis, sparges, obtento ab morbo, vel aliqua difficultate, quò magis imponas, dein addes velocitatem; ut inopinatò aggrediaris hostem.

Alibi ignes excitabis, alibi castra pones, in elusionem, idquè cùm propè hostem accedis.

Præmittes paucos equites, tumultum nocturnum, aut ignes, hostium in conspectu, ad terrorem tui adventus excitaturos, ut moreris hostem adventantem.

Cum Præfecto metandorum castrorum, mensuratores præmittendi, locum castris anticipaturi. Quos sequantur, aliquot centeni fossorum, per sua munia divisi, loco castris regulatè adinvento, operas S. R. T. N. ad quatuor portas excitaturi (*vide figuram ponendorum castrorum, puncto V.*) vel prout Præfecto videbitur, sub quorum præsidio, superpositis peditibus & tormentis, reliqua circumvallatio, expediatur, & miles per tabernacula, pabulatūquè, securiùs discurrat.

Com-



Complanatores viarum, cum securibus, ligonibus, præcedant exercitum.

Per vada, saltus, dum transitur, uniuscujusque turmæ stabit Præfectus, donec sui transeant, immò ipse Dux.

Fortiores vigilias, posteriores suaferim, quàm anteriores; non tam enim terret periculum, quod ab adverso venit, quàm quod à tergo.

Nè grave militi sit, muniendorum onus castrorum, (non enim sine vallo & munitione, prudentem apud Ducem, ipsa pernoctatio transmittenda, servandæ disciplinæ militari, & cautioni.) Singulas equitum peditumque cohortes, per partes divides, ut altera pars, una die, altera sequenti, tertia itidem, castris muniendis succedat, atque sic deinceps. Quo servato ordine, vitabit miles lassitudinem, & alacrius insistet, ex ordine debito operi, per intervalla quieturus. Habebis verò plures fossorum Præfectos, qui munitioni præsent, cuique partem castrorum commissurus muniendam, & in post curandam, unus enim non sufficiat operi.

Itinerando per hosticum, aciem extra non exeat miles, ne cadat in insidias.

Per loca incognita, duc exercitum, obvios colonos intercepturus, nè fama adventus, hosti pateat.

Triplici agmine duc exercitum, pro tutiori commeatu, & expeditiori via, uno duobusve miliaribus ab invicem distanti. Peditatus & gravis armatura, medio ducantur agmine, Equites sint à lateribus, necessitate superveniente, quò commodius in medium contrahantur. Constare verò debet cuique lateri, quo loco agmen medium pransurum aut pernoctaturum; Ipse Dux, cum medio procedet agmine, ut facilius imperium sit in latera. Taliter veniens exercitus, majorem secum ducit terrorem, & faciliorem habet annonam. Tamen, cum propius hostem ventum, tutius ut conjuncto agmine procedatur.

Per Civitates transiture, aut in illis moraturus, præmittes, cellas vinarias qui occupabunt, vasa dissecturi, nè inebrientur tui. Vel custodias portis superpones.

Prius miles egrediatur è castris, quàm currus, ut stante acie instructa, currus exeant. Cum verò ad stationem nocturnam ventum,

tum, currus primò ingradientur, postea miles. Suaferim idè dari prius aciei signum, quàm currum.

Lixæ anteriorum currum, ac stationem fecerint, opportunas fossas defensionis castrorum excitabunt, quod ductoribus impedimentorum injungetur.

Non longa, nequè lata nimis procedes acie, ut ultimi primis, & utraqùè alæ, sibi è proximo succurrant.

Impedimenta, media in acie sint, suaferim verò præcedant per tutiora.

Sylvas transiture, præmittes speculatores, cum operariis, dilatandis viis, succidendis arboribus. Deindè excitato munimento, præsidia superpones, Sylvæ ingressu, egressuque, tum in medio, si longo transeundum tractu: Si verò certus metus, ab hoste insidianti, reciproca præsidia peditum, ad unius bombardæ jactum, superpones, nequè ingredieris saltum, antequam transitus & latera, præsidiiis muniatur. Tutius tibi, aliquot diebus immorari operi, quàm ut festinando pericliteris. Ea verò præsidia, Sylvæ ab ingressu inchoabuntur, consequenter ulterius (unum post aliud) promovenda, donec usque egressus muniatur.

Primi transeuntes, ultimos post saltum expectabunt, ut acies formetur.

Equites, suspectas Sylvas transiture, equis in medium acceptis, pedites ipsi procedant, latera cum longioribus sclopetis, in defensionem cincturi.

Aliquo munito loco, impedimenta minùs necessaria, relinquantur.

Si fieri potest, unius diei comestionem, viris & equis, secum ferat miles, magno bellandi arcano.

Impedimenta, præter alios minores, Generalem Præfectum, aptum regendo habebunt.

Non longo agmine ibunt impedimenta, & currus, sed potiùs denso.

Movente se exercitu, egredientur cohortes maturè, antèriùs posteriusque, à dextro cornu & sinistro, seriatim, utroque viæ latere disponendæ (*vide tabulam universalis aciei: Lib. 2. Puncto 1.*) ambulatoriis vigiliis hostem observaturæ, nec remotius ut procedant, quàm sub aspectu castrorum, haberi ut possint. Dum verò



ad nocturnam stationem ventum, non cedant loco, antequam novæ cohortes, ea in loca submittantur; Cui rei, ultra Generalem vigiliam Præfectum, quatuor minores habendi, qui anteriores, qui posteriores, dextri lateris, qui sinistri vigiles, die nocteque observabunt, immò quatuor habendi diurni, nocturni alii, quò magis operi sufficiant indefessi.

Non satis, vigilibus exercitum muniri, & castra, sed equites velitatores, omnes in partes, uno milliari circum, dimittendi, qui per valles & arbuta, observabunt insidias, Præfectis vigiliam denuntiaturi, tùm hi castris, ac ipsi Duci.

Cùm ad stationem venerit agmen, Dux ipse, tota priùs castra obequitet, omnes partes visurus, an quid fieri possit in melius. Tùm ipse postremò, castra ingreditur.

Ruricolæ in hostili terra, si benigniùs habeantur, produnt omnia sua, vias compendiosas monstraturi; Idem, injuria illis non inferatur, sed permittes, terram liberiùs ut colant, undè tibi sufficiat annona, bellaturo, seu redituro. Immo sparges in vulgus, non agricolarum internecionem peti, sed Dominorum injusta dominia, quò magis tibi vulgus adhæreat; Arma suppeditabis volentibus, & in partem belli adscisces, si præsertim spem prædæ, ex facili objicias.

Transiturus penes munitionem hostilem, Præfectum cum turmis constitues, qui excursiones in tuos prohibeat.

Strictas & periculosas valles transiturus, superiora montium, præfidiis pedestribus, præoccupabis.

Potius in campo, quàm ad vicos pernoctandum.

Glacies fragilis, asscribis tùm sepibus supersternenda, vel (stramine subjecto) aquâ superfundetur, quò faciliùs concreseat & congelet, transitui parando.

Aliquot turmæ, à lateribus aciei procedant, ad repentinum tumultum paratæ.

Aliò ingrediariis terram hostilem, atque aliò egrediariis, pro commeatus expeditiori commoditate.

Impedimenta, anteriores vigilias non præcedant, neque posteriores sequantur.

In modum dispositæ aciei, subsistant castra ad pernoctandum, nemo.

nemoribus, vallibus, paludibus, pedites objiciantur, campo equites opponantur, intermissis non rarò peditibus hastatis, ad excipiendum primum impetum.

Præter excubitores, fortes equitum vigiliæ cogendæ extra castra, unius atque alterius legionis robore, ut interim milites, ex itinere lassì, tutò sua in castris disponant, neque repentino tumultu turbentur.

Saltum transiturus (nè impediariis) alio itinere profectionem simulabis, interim addes, proximè saltum, velocitatem.

Alteram ripam hostis dùm tenet, vadum impediturus, pones ex adverso castra, specie stationis, dein fossas, tabernacula, molitur miles; Aut tu ipse Dux, ægritudinem simulabis, velut necessariam causam, eo loco subsistendi. Interim superiori, aut inferiori alveo, transitum clam moliri curabis, alteramque ripam, munies præfidiis, sequuturus ipse; Sic Alexander Magnus, fecit in Indiis, Hidaspem fluvium transiturus, cujus transitu à Porro Rege prohibebatur. Vide Curtium lib. VIII.


Si littora fluvii sunt alta transeundo, altera ex adverso ripa, in declive fodiatur.

Propè fluvios, duc exercitum, ea parte, qua currit fluvius, tutior ut sis, neque cingaris numero ab hoste, neque interrumpas lineam communicationis, retinendæ, seu acquirendæ Provinciæ, aptissimam, dùm faciliùs, intrat redit, confert secum exercitus, pars parti succurrit, commeatus item & impedimenta, immò milites, promptiùs submittuntur, ope fluvii per naves, dùm præsertim (in hostico si res geratur) utramque ripam, redigis sub potestatem, undè simul dividis Provinciam, & hostium subsidia, nè conferant, quod consilium, magni arcani loco habebis. Sic noster Joannes Tarnouskius, (teste Paulo Jovio) Ferdinando I. Imperatori, in Hungariam contra Turcas ituro, suavit, ut conficturus, seu castra metaturus, ripam Danubii propè subsisteret, nec unquam abscederet, specie fugæ licet eliceretur, nisi ab hostili numero equitatu, cingi vellet opprimendus, aut per infessionem viarum, usu commeatus, tùm libertate campi privandus. Cujus beneficio consilii, exercitus Ferdinandi, si non victor, tamen integer reductus, aliquoties antè, periculum cùm adiisset.



Medium castrorum, fortibus excubiis equitum, peditumque munies, repentino tumultui vitando.

Carrago, in hanc, illamve partem, facile vertitur, si non tota sui mole, sed quisque currus suo loco, omnesque simul torqueantur, aut vertantur, quo acies vertenda, *velut vides in sub-*



*jecta figura.* Ordines sunt duo currum *a. a. a.* tendentes suis equis & temonibus, versus *B. D.* anteriorem partem, quos vertere opus habeo ad partem posteriorem in *E. F.* Quisque currus torqueatur, suo loco, velut per puncta denotatum vides, tunc omnes suis temonibus obvertentur, ad *E. F.* partem posteriorem. Et sic per omnia, seu ad sinistram, seu dextram, carrago vertenda, mo-

do

do periti pedestrium Praefectorum, regendis curribus, *ante, post,* adhibeantur, tunc ipsi vectores exerceantur mature, obvertendae carragini. Super hac, separati viri, penes quemque currum habebuntur, posteriorem partem qui tollant, reposituri in partem, ut commodius, anteriores rotæ cum temone, quod velis vertantur.

Mane, non educes exercitum, antequam nebula subsideat.

Præcavebis de insidiis itineris, etsi re vera futuras nescias, sic cautiores tuos reddes, nè discurrant, nè fluxis ordinibus, incautiùs incedant, periclitaturi.

Dùm viæ signum datur, non sparsim exhibunt legiones, verùm ad signum Prætorium, convenient, ut acies formetur.

Tertiâ ante occasum horâ, in loco pernoctationis subsistes, ut habeat miles tempus, pabuli quærendi, tabernacula erigendi, equos potandi, erroneos in itinere quærendi.

Subsistente exercitu, non pro libitu pabulatores discurrant, certo sub præsidio, non sparsim pabulaturi, nè fortè ab insidiatoribus interceptantur. Immo, tutum fuerit, veteranorum aliquem, pabulationi præficere, ordini servando. Nec alia ratione, immodestia calonum in prædas, cohiberi poterit, quàm si discurre pro libitu non liceat.

Apparatus bellicus, non cum impedimentis, sed medias inter legiones pedestres, vehatur.

Quamque peditum legionem, in itinere, seu in acie, cutrus sequantur, cum pulvere nitrato, globis, securibus, ligonibus, & rutris, nè dùm opus derepentè, hæc quærantur. Immo, ex iisdem curribus, carraginem formabis in necessitate.

Itinerante exercitu, modò in primis, modò in prostremis, sæpe in mediò, Dux adsit, ut ordinum ductores, vereantur negligentiae notari, præsentia ab Duce.

Potius circum urbem, quàm per urbem, ducatur exercitus, portas idè præsidiis occupabis, nè milites occultentur, domos invasuri.

Cùm metatore castrorum, Generalis Magister vigilum præcedat exercitum: Dùm ille locum castris designat, hic interim loca vigiliis ponendis apta, perlustrabit, valles, vicos, paludes observaturus & arbuta.



Seu pransurus, seu pernoctaturus, in formam aciei castra ponas, quem quisquē locum in pugnando, etiam quiescendo occupabit; Sed hoc in peditibus; In equite aliter, penes quamquē stationem, sit locus vacuus, aut intercapedo, quam oborto tumultu, in formam aciei, turmatim subsistens, occupabit.

Post saltum potius, quam ante saltum quiesce.

Propè Sylvas & aquas, locum castris deliges, pro commoditate; In cornibus verò castrorum, currus dispones, interclusis peditibus sclopetariis, & tormentis in defensam.

Cum magno strepitu, atquē famā, procedes cum exercitu, interim tacitō, submittendæ cohortes, ad circumveniendum hostem.

Pons, commodè fabricatur, super vacua dolia, tūm super sublicas, vel super fasces, aptissimè verò, super *corbes* lapidibus



fartos; (ut facilius mergantur, hæreantquē fundo) Quos sepibus colli-

colligatis, tūm stramine, & cespite, supersternes, in defectu asserum, pro traducendis curribus.

Perfectus pons fiet, si cuiquē cohorti, palum procurandum figendumquē imperaveris. Immo, ab utraquē fluvii ripa, *pontem ex adverso fabricari* imperabis, ut in medio, opus citò cohæreat.

Impones necessitatem, penes quemquē currum, unam, duosvè fasces, miles ut vehat, insensibili pondere, plurima in rem commoditate, reparandis viis, obstruendis paludibus. Nonnunquam, miles quisquē, fascem secum ferat, si prævideas, ea die paludosum saltum tibi transeundum. Immo, futes, plicatilesquē pontes, frustulatim singulos per asseres, trabesvè, inter impedimenta divides vecturus. Habeat item, quisque lixa penes suum currum, securim, terebrum, ligonem, palam, rutrum. Item saccum (vel peram) decem pugillorum terræ capacem, ut cūm reparanda via, alii virgulta & frondes scindant, alii terram fodiant, alii effossam deferant saccis, qui loco vehiculorum (tumultuario præsertim operi) commodè serviunt.

Pontis super fluvium constituendi, optima ratio, quam Julius Cæsar, in suis commentariis (de bello Gallico, lib. IV.) insinuat, praxi ad Rhenum adhibita, cujus figura, Iconicè expressa, apud Justum Lipsium, libro de *Militia Romana*. Tum alium modum videbis, apud eundem Cæsarem, de *bello Hispanico*. Magis adhuc mirere pontem Farnesianum, ad obsidionem Antverpiæ, urbis Brabantinorum; Cujus fabricam curiosè recenset Famianus Strada, lib. VI. Decade 2. Historiarum.

Itinerando, quemquē locum Dux armorum consideret, quasi inibi instructurus aciem, quò peditem, quò equitem vertat (si eo loco, ex inopinato pugnare cogatur) sic obtinebit, ut nunquam imparatus offendatur, vel ut diu speculando, praxim bellandi acquirat.


Præfectus impedimentorum, gestatorio super hastam utatur signo, dignoscendus à longè à calonibus. Sæpè verò in medio, sæpè in postremis adsit, ordinem observaturus. Consultum item, ut idem Præfectus, super lixas, supremæ sit potestatis, puniendo, accidit enim, ut rixentur lixæ, turbent carraginem, ut obvia



obvia raptant, undè tardum supremo Duci referre, nisi adsit præsens potestas: Immo necesse aliquandò, ut in itinere obvium & irruentem hostem, arceri opus sit: Juvabit idè, qui adsint impedimentis, sint obediendo, quod imperatum fuerit.

Præsidia impedimentorum, mistim sint cum pedestribus, equestris, cum sclopetis longioribus, ut superveniente hoste, præsto huc illuc accurrant. Quaterna verò præsidia imponentur, ante, post, & bina in medio (si extendatur impedimentorum agmen) uti habes in tabula. Anteriori & posteriori præsidio, applicare poteris machinas minores, vulgò Tormenta.

Si densantur impedimenta, præsidia præponantur, ante, post, & à lateribus. Immo tria dividuntur in agmina, Præfecto cuique agmini præposito. Omnibus verò præsit Præfectus Generalis. Fieri verò potest pro itineris compendio, ut terno itinere, ducen-



dum sit agmen impedimentorum; Quod facilius præstabitur, sub certis Præfectis, si quisque suum agmen ducat, separatos complanatores viarum provisorius, binos lixas ex quaque cohorte, cum securi & rutro.

Quisque lixarum pixidem sarissamvè habeat, carraginem defensus. turpe inutileque inermi turbâ, castra, & annonam gravari.

Propè

Propè Sylvas transiturus, impone Sylvis valida præsidia ex sclopetariis, nè insidias indè habeas, aut si poteris, longè Sylvas circuibis.

Potius uno miliari, à rectò desleces, ut angustias locorum circumire possis, quàm ut agminis interrumpas ordinem, plus enim adferet moræ, si una legio, post aliam ducatur, quàm uno miliari, circum si obequites. Si verò aliter fieri non possit, nisi tibi per angusta transeundum sit, primi transeuntes, plano post saltum loco, expectent ultimos, ut in aciem integram formentur.

Tormenta, quæ præsidio castrorum relinquuntur, etiam penes impedimenta ducantur. Prout verò, quaterna præsidia, etiam tormenta in quatuor partes dividuntur.

Exercitu itinerante, vel quando in velitationem itur, curabis ejus loci colonos, secum haberi, qui doceant commoditates, & viarum compendia, nè saltuum in periculosa incidas. Non verò in proprio solo, eadem negliges. Maxima enim pars viarum commoditatis, tibi ignota, quæ suorum locorum acolis, planè familiaris est.

Quæque peditum, equitumque signa, duos ordine alios lixas, coram Præfectis operariorum, quotidie sistant, cum securibus, ligonibus; Immo, submittant currus, sublevis, asseribus, fascibus (lutulento saltui reparando) vehendis. Hi reparatores viarum, exercitum præcedant, armatorum sub præsidio, Non verò in itinere, sed unico loco subsistentibus castris, iisdem operariis uteris, reparandis circum castra viis, & pontibus, commoditati subvehendorum victualium.

Si multitudo currum exercitum sequatur, undè impedimentum celeritatis habeas, aliquot currus assignabis, pro qualibet cohorte, cavendis quatuordecim dierum cibariis, reliquam multitudinem, lentè sequi imperabis, adjunctis præsidiis, pro itineris securitate. Interim velocius progredieris ipse, notitiam qualibet die, de curribus habiturus, utrum te sequi, an subsistere aliquo tutiore loco debeant, providendo.

Quoniam moris erat Romanis, ut non arma solùm, sed palum figendum, & aliquot dierum cibaria, miles portaret, idè, nè miles sub sarcinis impediretur ad pugnam (si confligendum esset dere-

Q

pentè)



pentè) ex quaque legione, trecentos expeditos, cum solis armis paratos; esse jusserat Cæsar.

Metellus in Numidia, Thalam Jugurthæ urbem obsessam petens, cum per arida loca itinerandum sibi prævideret; Jumenta sarcinis levare (nisi frumento decem dierum relicto) utres modò ex coriis jumentorum confectos, & vasa aquæ idonea, portare iussit. Præterea conquisivit ex agris (quàm plurimùm potuit) domiti pecoris, quibus imposuit vasa pleraquè lignea, collecta ex tuguriis Numidarum. Adhæc imperavit finitimis, quàm plurimùm aquæ quisquè portaret, diem locumquè (ubi præsto forent) designando.

Ascendi poterunt præruptæ rupes, si inter saxa, ferrei cunei, aut hami figantur, scalis funicularibus applicandis, quarum ope agiliores ascendant. Sic Aleander Magnus, præruptam rupem, in Indiis occupavit.

Intumescente fluvio, quâ peditatui transeundum, ab una fluminis ripa ad alteram, funes protendi curabis, quibus adjuti milites, transeant securi, nequè rapiditate fluminis, abripiantur. Aut Vegetii consilio utaris. *Explorato vado, duæ acies equitum, electis animalibus ordinantur, intervallis competentibus separatæ, ut per medium pedites transeant & impedimenta; Nam acies superior, aquarum impetum frangit, inferior, qui rapti subversique fuerint, colligit atquè reponit.*

Si tibi ex aliquo loco difficili, ab hoste impedito abscedendum, mitte qui cum hoste in speciem paciscant, quo fiduciam ingeras; Interim convasatis omnibus, insperatò iter maturabis; Cavebis tamen, nocturnas abitiones, evitando tumultui, nisi præmonitis de eo militibus, utvè in universum, omnia rectè provideas.

Per vias limosas, aut quoquo modo impeditas iturus, seu dùm longinquam expeditionem suscepisti, quo difficilè tormenta promptè vehere, præsertim illa ex majoribus, quæ muris quatiendiserviunt, frustulatim deferri curabis metallum; Seu minores machinas, campanasquè conquisitas, loco ad quem pervenisti, liquescieri curabis, majora tormenta fusurus. Quapropter, fusores Machinarum, cum instrumentis, & materia fundendis tormentis, exercitum sequantur, non poenitendâ impensâ, dùm pri-

mum

mum & maximum momentum, capiendis urbibus promptè aderi. Rectè quidam *Machinas majores, claves à cingulo pensiles, aperiendus urbibus, vocitavit*, sine quibus, non facilè pateat aditus.

Duobus oblatis itineribus, seu venturus, seu retrocellurus, rectum & solidum omittere nonnunquam, impeditius & intentatum, eòquè hostibus incautum, capeßere expeditius putabis, ut ex insperato, securus provenias, quò voluisti.

Provide, nè in itinere configas, tùm ex insperato. Ducendus igitur exercitus cautè, ut ingruente hoste *non pugnes si non velis*, immò configas, sed quando ipse volueris, nam improvisa pugna, paventes reddit, cum se in promptu quisquè recolligere non potest. Quæ perspicacia, veterani & consummati Ducis est inter primas. Temerarii bellare nesciunt, nisi ruant in prælia, cunctari, imbellè videtur; Duces secus prudentes, cunctando, suas vires & consilia firmant, hostium expiscantur; eluduntquè furorem; transversis hac illac itineribus, ad incommoda locorum, temporum, commeatus, hostem deducendo, ut tandem *rebus confectum*, levi labore, minorequè sui periculo, impellant in ruinam, si præsertim insolefcit numero, regitur temeritate, diutini belli impotens, vel impatiens, vel nescius, eòquè compendio vincere cupiens, morâ hebetandus.

*Quomodo transeas saltum ab hoste occupatum Vide Sextum Punctum, De Evocatione hostis cunctabundi.*



## PUNCTUM QUINTUM.

## De Castris &amp; exercitio, tùm de consiliis belli exequendis.



Astra optima, propè fluvios; propter nitorem & aquationem, immò propter securitatem, *nè tingaris ab hoste*. Eamquè ob causam, locis abruptis, paludosis, tùm alicui urbi potenti, tergum castrorum admovebis, quò unica parte, tutior sis, nec hostis, nisi magno sui incommodo, te cingere studeat, vel adoriatur, si præsertim pro numero & potentia, insolescit.

Nitor castrorum servandus.

Non paludoso loco, nec valdè sublimi, non infimè submisso; non arenoso, castra metari oportet, propter salubritatem aëris, ventum, lutum, & propter pulverem.

Non propè virgulta & valles, ad evitandas insidias (non procul tamen à Sylva, pro commoda lignatione) castra metabaris; Idèò Sylvam præfidiis, aut castello munies, nè illam insidiis præoccupet hostis.

Putei fodiendi in castris, multa & difficilia, multis manibus parantur.

Commeatus & molæ manuariæ, secùm portandæ.

Exercitatio pedestris equestrisque inducenda, præsertim inter novitèr lectos. Imperabis, ut se quisquè per contubernia privatim exerceat, dein per cohortes. Ad exercitium integrarum legionum, & totius demùm aciei, attendes ipse.

Ad reliquum, fortalitia extra castra exstruenda, quatenus primum impetum hostium excipiant, immò propè illa præfidia, tutius aciem instrues.

Severè puniantur milites, officio militari non satisfaciētes, si uni parcis, omnes exemplo veniæ corrumpis, multa in eam spem peccantur. Idèò prudens Dux, si rectè factum velit, omnem spem veniæ præcidat, nocet plerumquè affectata clementia. Ta-

nem

men quatenus exemplo non nocetur, ignosce, aliqua dissimulando, plura tamen, sed extra affectum dicti, intraquè auctoritatem castigando, ut poena ad necessitatem ordinis, & disciplinæ, tùm ad rigorem legis, non ad sævitiem rectoris, referatur. Lex per se tristis satis & severa, judicem saltem blandum esse oportet. Grande præfidium securitatis magistratuum & amoris, invidia legis, fontes damnari, non Judicis. Procul verò absint regendis ab rebus, vicissitudinaria ingenia, hodiè coacervando nimia, aut rursum intemperantèr demissa, quò utrumquè temeritatis, non recti judicii partus est; Idèòquè, nec satis auctoritatis, abrupta ex severitate, nec amoris habent ex indulgentia, ut veriùs inconstantia, quàm prudentia, sint propiora, mediorum nescia.

Muta & transfer castra, ob sanitatem, pabulum, nitorem, itinerandi exercitium, item ut hostem fatiges. Inutile igitur, eodem in loco, castra diu metari.

Jumentorum & lixarum; circumscriptus sit numerus.

Fœminæ, castra non sequantur, cauponarii procul absint; Germanorum quidem populis usitatum, uxorum comitatu, castra sequi; non gregariis modò, quibus uxores in partem ministerii abeunt, sed legionum ductoribus, dùm pertinaciùs pro castris, pugnuros se ajunt, cùm pro pignoribus pugnatur. Mihi tamen, Romanorum olim mos, & nunc Polonorum placeat, ubi Penates, fœminarum garritibus, & mollietati relinquuntur, virorum castra, sunt casta. Et sacra Pagina docet (*Josue Cap. I. Uxores vestre & filii, ac jumenta, manebunt in terra, quam tradidit vobis Moyses, trans Jordanem, vos autem transite armati, ante fratres vestros, omnes fortes manu, & pugnate pro eis &c. &c.*)

Vitet militiae Dux, coire milites in conventicula, nequè ipse convocet, aut det coeundi occasionem, dùm sub specie consulendi, oboriuntur, quæ causas tumultus afferre possunt. Propositurus igitur quidpiam, potiùs per partes convocabis, aut per aliquos Præfectorum. Non tutum si conveniant, simul plurimi.

Si tumultuetur aliqua legio, undè contagionem seditionis in exercitum timeas, nequè potens sis coercendo, quin adsint omnes pro impunitate. Uteris exemplo Alexandri Pharnesii, Ducis exercituum Belgii. Tumultuantem legionem, velut nescius & dissimulans,

Q3

mulans,



mulans, specie transmittendi præsidii, castra procul, in angustias locorum emisit. Quid secutum, aut quàm pulchro commento (fidelioribus legionibus submissis) eam compescuerit, immò signis adeptis, sublato legionis nomine, per arcium præsidia dissolverit, multà militaris rei doctrinà, & ad feram posteritatem pro magnis Ducibus exemplo, *Legas Famianum Stradam, lib. X. Histor. Decade secunda.* Diverfo ille alter modo, apud *Tacitum*, nec tamen irritò conatu, aut imprudenter: (*Histor. IV.*) *Conscendit Tribunal Vocula, mira constantia, prehensumque militem & vociferantem, duci ad supplicium jussit, & dum mali pavent, optimus quisque jussis parvè.* Tum ille alter, è *seditiosis unicum*, *vinciri jubet, magis usurpandi juris, quàm quod unius culpa foret.*

Si contingat tibi Duci, ad colloquium cum hoste venire, cavè ne facias, absquè præsidio armatorum, & quàm potes decore, ornatu, armis, virisque, ferro non argento fulgens, progredere, quò rerum tuarum opinionem, apud hostem parias: Deliges ex toto exercitu, dexteritate & *statura speciosissimos.*

Quidam cum timeret, nè subsidia venientia, ab hoste intercepterentur, simulavit postridie se prælio decertaturum, fugà quibusdam captivis, non ægrè concessa, quatenus fama instantis prælii, hosti constaret. Exindè hostes certi prælii, copias castra procul, non emittebant, immò quæ latitabant in insidiis, ad cogendam aciem convocarunt: Qua ratione, subsidia sine periculo convenère.

Ad fluvium hoste castra metante, tua superiori alveo pones, ut defluitantem commeatum, hosti adimas, tibi commoditatem illam habiturus, veluti Dominus subjugati fluvii; Immò, si superstruxerit hostis pontem, facilè illum tollas, demissis prono flumine incendiariis, tum aliis impedimentis.

Pabuli moderatio fovet castra: Immò, sit in omni victu parsi-  
monia, undè diuturnitatem castrorum polliceberis, quò moderatius, annonà utatur miles.

Convivia inter milites inhibenda, & computationes.

Frumentum in herba (aut non tritum) depascere, capitale sit.

Muniantur castra, fossa & carragine, etiam in tutissimis.

Ligo-

Ligohum, rutrorum, palarum, securum, & per omnia feramentorum, adsit copia, ad excitandas fossas, fabricandos pontes, extruendas machinas, quæ seu offendendo, seu defendendo, sunt usui.

Publica sit in castris militum devotio, preces matutinæ, vespertinæ, & pii cantus. Quòd legionum Capellanis, curæ futurum, per suas legiones; Aliquo universalitèr præposito, ad eam pietatem, & ordinem sacrorum, universim attenturo, castrensis Præpositi, seu Legati Episcopalis nomine, in casibus sacrorum.

Vitet miles otium, exercitio tempus terat, currat, fodiat.

Diligentem Præfectum annonæ habebis, maturè comparando, in stipendii pretium, militibus dividenda, in necessitate. Indè Præfecto victualium curæ futurum, proxima castris oppida & pagos, de victualibus apportandis præmonere. Immò, si quæ offerantur horrea; ære publico illa coëmat, in singulas cohortes, certà mensurà divisurus. Si verò in hostico, res geratur, quæquè oblata fuerint, capitale sit diripi, sed per victualium Præfectum occupentur, nam si licuerit cuiquè rapere, primi occupantes, abundabunt, reliqui, penuriam patientur. Quam in rem, ultra Generalem Præfectum, sit cuiusquè legionis, separatis annonæ Præfectus. Præsertim verò contra Turcas iturus, annonæ curam suscipies, ac ipsis militibus imperabis, quoniam Turcæ, pro multitudine virorum, primo impetu belli, valentissimi & feroces, in autumnum & intempesta coeli protracti, ipsa sui multitudine conficiuntur, dum sub molliori coelo nati, equi virique, injurias septemtrionalium temporum, ferre vix possunt, edquè animis franguntur, ut paucos tuorum posthac numero, impelli in ruinam possint, modò annonà instructus, integris tuis per omnia, cunctatione eos ludifices, posthac palantes totà belli furiam, ex insperato adorsurus, bellum tunc primum incipiens, cum hostes finitum putant, ac tergiversantur.

Rectè ille Ducum, necessitati pabuli, tum annonæ providit, è proximioribus horreis, *sex fasciculos frumenti, singulos in equos*, (diebus singulis) viritim verò duos, distribuendo, ut probè sciret, quot cohortes aleret, quotvè diebus, horreum sufficeret exercitui, providendo.

Sed



Sed maximè, viciniam fluvii, vel portuum, advertat maturè Dux belli, hæc enim compendiosissima, ope navium, subvehendæ annonæ, armorumquæ ratio, & certissimum, immò inexhaustum castrorum horreum est.

Fossore & cunicularii, exercitum sequantur.

Castra, procul ab urbe, & à deliciis habebis.

Non proximè hostem, castris accedes, sed paulò remotiùs subsistes, nè turberis.

Designa cuiquæ turmæ locum, tumultu adveniente, occupandum armis, & propugnandum.

Tessera bellica, secretè danda & retinenda, secretè ab excubitoribus inquirenda, nè hostis occultè succedens, aut latitans, subaudiat.

Excubitores, in valle, non in colle locandi, faciliùs enim notant, nequæ notantur.

Medium castrorum (aut arcis) paratis præfidiis tenendum, undè debilioribus partibus succurratur, nè dum partes partibus subveniunt, aliæ stationes nudentur.

Generatim sæpè exercitum exercebis, ut formam aciei, stationes, subsidia, accessum, recessum, per partes, simulvè discat miles. Item, quomodo inclinatur, densatur, extenditur, vertitur acies, dextrorsum, lævorsum, aut quæ fiunt prælio solita. Non obfuerit adferre verba Josephi (*lib. 3. de excid. Hierosolimit.*) Quodsi quis Romanorum ordinem, in militia inspexerit, videbit hoc grande imperium, eos habere virtutis meritum, non fortunæ beneficium, non enim initium illis armorum, ipsum bellum est, nec solùm, cum usus aut necessitas est, manus movent in pace feriat, sed tanquam congeniti armus, nunquam pausam exercitii faciunt, nec expectant occasionem. Meditationes autem illis, seu exercitia, nihil à vero usu fortitudinis & audaciæ abeunt, sed quotidie miles omnis, alacritate, tanquam à bello exercetur, quo fit, ut facillimè & sine laboris sensu, pugnas tolerant, nequæ enim, vel confusio eos, à consuetudo ordine amoret, & dissipat; vel metus reddit attonitos, vel labor fatigatos, sequitur verò victoria semper eos, cum in hos pugnent, qui non paritèr confirmati: Nec sanè erraverit, qui dixerit, exercitia eorum, pugnas sine sanguine, pugnas, exercitia cum sanguine esse.

Quæ-

Quæquæ cohors habeat pistorem, frumentatorem, chirurgum, fabrum.

Pro tutiori cura castrorum, commodiùs ut defendi possint (si præsertim de nocte invadantur) singulis Præfectis, partes singulas castrorum, dextram, sinistram, anteriorem & posteriorem curandam committes; Nè si tu Dux solus providere velis, dextram curando partem, sinistram sine cura mittas, intentis in imperium Ducis, militibus, aut quomodo acturi, nesciis, vel expectantibus iussa, dum pugnandum.

Perfugarum, separatæ sint cohortes, nequæ tuis intermisceantur. Sæpè multi perfugiunt in fraudem & periculum, tuis intermisti, ut fidem per colloquia subdolè corrumpant. Si verò pauci sunt perfugæ, aliquo munito loco, sub honesta custodia, remotiùs à castris, ad exitum belli tenebuntur.


Ad portas castrorum, ponantur peditum stationes.

Metationem castrorum, quod fieri potest, in ea forma ad fluvium pones (*F.* castellum, in altera parte excitaturus, in defensam ripæ & transitus) Per *A.* enim & *B.* portas, faciliore ex castris excursus, in defensam *C. D. H.* partium. Circumvallatio per fractas lineas se reciprocè defendentes, accommodabitur. Si verò medio in campo castra metabaris, habebis sequentem figuram.

R

Non






Non propè sylvas aut valles, tùm arbuſta, caſtra metari oportet, nam ea per latibula, commodiſſimè ab hoſte, inſidiæ ſtruntur.

Aquationem proximam eſſe oportet, & lignationem non remotam.

Caſtrorum circumvallationi, inferere neceſſe, minora munimenta occluſa, palis defoſſis cincta, ut ſunt in appoſita figura *R. S. N. M. T.* (aut ſi quæ commodè poni poſſint) ut paucis ſuperpoſitis militibus & tormentis, non ſolùm adveniente hoſte ab extra, ſecurè caſtra defendi poſſint, ſed hoſtis circumvallationem perrumpens, interiora caſtrorum ſi petat, ab illis munimentis (non turbato milite, dùm non in aperto eſt) arceatur, ad intra obverſis munimentorum præſidiariis: Cui rei, vel maximè, appoſitum munimentum *A.* in corde caſtrorum, velut figura docet. Spatia *E. E.* ſtationibus oppoſita, *centum & quinquaginta cubitorum* lata, in quibus turmatim coire poſſit equitatus, in campum edu-





cendus, peditatu versus vallum, tabernaculis subsistente, in promptiorem defensam; Interjectis tamen (stationes peditum, & vallum inter) *H. H. H.* spatiis, *CL.* itidem ulnis latis, quod armorum signo dato, sub signis instrui possit peditatus, & subsidia, item machinæ belli, huc illuc commodè traducantur, utvè operæ novæ (aut vallum) ad intra, si res suaferit, extruantur, in meliorem suorum receptum, si prima castrorum munimenta, hostis pro potentia perrumpere paret. Insuper scire opus, quinque cubitos, seu ulnas Polonas *in quadratum*, binis peditibus commodè locandis, assignari oportere, binos enim non singulos tendere præstabit, ægritudinis juvandæ, & convictus opportunioris ob rationem, dum unus alteri, ope tum consilio adest, confors operis; testisque virtutis ac diligentiae. Equites verò terni, decem & octo cubitos *in quadratum*, occupabunt, tentoria, præliares equos vel turmales, oneraria jumenta, tum currus, commodè includendo, nèvè coangustentur castra, vitandæ aëris infectioni, & incendio. Deindè, quæquè pedestris cohors, equestri vè turma, in quatuor ordines collocabitur, interjectis in modum platearum viis, vel sectionibus *XV.* cubitorum latis; Hinc adnumerata arearum *Z. E. E. E.*, dein *H. H. H.* magnitudine, pro numero militum, assequeris faciliè, quanta capacitate loci, ponendis castris, opus habeas.

Area *Z.* stationem ante Ducis, justæ capacitatis adjecta, instruendæ parti exercitus apta.

Pro retinenda perpetua denominatione (quod magno usui futurum experière) Anteriores duæ, portarum, *A.* vocetur Regia, *B.* Ducis belli porta, Jam posteriores. *G.* porta equestris, *F.* pedestris, ut cum ex improvviso ingruit hostis, aut educendus in aciem miles, nominatione portæ, pars castrorum, exitus in aciem, ingruens periculum, & undè succurrendum, repente denotetur.

Græci & Romani (teste Polybio) ponendis castris variabant. Græci accommodabant se loco, & prout locus occurrebat, variabat forma castrorum. Romani secus, non loci, sed usitatæ formæ castrorum, habebant rationem, eandem metationem & modum ubivis retenturi. Rationem innuit & laudat Lipsius (*de Militia Romana lib. V.*) *Portæ castrorum, & sectiones eadem, tabernacula*



Ducum & militum, eodem ubique situ, hinc utilissima illa notitia castrorum, & (oborte repente tumultu) praevisa & invenienda omnia, velut civibus in aliqua urbe.

Injuriis coeli durantibus, vel si tempore hyemis, castra metari contingat, curet aedificari Dux belli, medio castrorum, latè patentia tabernacula, pectotenus in terram immissa, stramine cooperta, centenorum peditum, aut equitum capacia, ut eo beneficio, ab injuriis coeli tecti, stationes expeditius observent, arma veraturi, nequè aëris sævitia, tum rigore, pugnae inepti redantur. Tumultu etenim oborto, ex illis tabernaculis, recentes & indefessi, viris, armis, equis, facile prodituri in pugnam. Quod feliciter practicum, à magno Ducum, Joanne Zamoyskio, circa obsidionem Plešcoviae in Moschovia. Quia verò vigilibus, maximus incumbit labor, & periculum à frigore, procurabuntur aliquot vestes, pellibus subductæ, quas vigiles (unus post alium) induant, prout mutantur, & post se succedunt.

Re ipsa probatum nobis, citius deficere victualia pediti (paucos enim secum trahunt currus) quàm equitatui, dum hi multitudine curruum, etiam commoditate rei frumentariæ abundant, idèquè si penuriâ annonæ prematur peditatus, singulis equitum turmis, deceni, viciquè pedites, alendi injungentur.

Generales equitum excubiæ, sint in castris, ultra singulares vigiles.

Nemò castra ingrediatur, exeatvè, die, noctu, nisi Imperatoris signo dato, aliàs quemquè retineri oportebit, ut doceat, quis & undè, quod portarum Præfectis curæ futurum.

Inferiori castrorum alveo, equi potandi, propter nitorem aquæ, nè lutulenta fiat, immò fæces, inferiori aqua deponentur.

Si fluvius sit exiguus, non immittentur equi ad potandum, sed vasis educenda erit aqua, nè calcatu equorum turbetur, quod vigiles observabunt, in eam rem destinati.

Dum educis exercitum in aciem, præter expeditas cohortes, præsidium sit castrorum, ex calonibus & lixis, quorum apud nos, ingens copia, si cujusquè turmae lixæ, suam partem valli defendant, milite cohortis relicto, cui sui lixæ sint obediendo.

Duces & Centuriones, certo tempore circumneant milites, vi-  
furi,

furi, quantum quisquè habeat ex commeatu, tum arma qualia, ut in melius aptentur.

Pabulationes à longè quæres, quæ propè sunt, pro necessitate servabis.

Prædatum aut pabulatum ituri, tuo scitu abeant, ordini servando, pars prædam ut quærat, pars cum armis stet pro præsidio. Capitale sit, lixas singulos, pabulatum dimittere, verum ad signum legionis convenient, ut Præfectus provideat illis de Ductore, cujus muneris attendere, ad ordinem, securitatemquè frumentandi, nè dum pro libitu per agros & prædia discurrunt, procul remoti ab aspectu, per insolentiam plura corrumpant prædando, quàm sibi acquirant, tum vagabundi intercipientur ab hoste. Nec aliâ viâ, insolentiam vagandi, vastandi, cohibeas.

Quoad tutè poteris, divides exercitum, diverso loco castra metaturus, nam facilior annona, & plus terroris ex diverso in hostes, item, profligata una parte, reliqua erit salva.

Hyeme, quando terra congelascit, difficilis fodiendo, decidatur ope securis, terra superior, vivam (ex puteo velut) extracturus, erigendis suggestibus. Sic noster Zamoyskius, fecit bello Livonico.

Castrametatores, signa turmarum, suo loco figant, ut sciat quæquè turma, stationem & locum, nè turbetur ordo & acies.

Vigiles, quater per noctem mutabis, immò binos simul locabis audaciæ majori & cautioni.

Potus delicati (nisi qui ad necessitatem vitæ) non inferentur in castra.

Falluntur valdè, qui interclusa loca paludibus, aut præruptis rupibus, castris ponendis quærunt, quod enim putant prodesse defensioni, etiam serviet in sui obsidionem, præsertim si potentior accedat hostis, facilius te (velut in cavea) intercepturus, paludibus interclusum, nequè copiam dabit conflicendi, verum una & altera legione, egressu intercluso, reliquis copiis, terram tuam depopulabitur, ut velut vinctus, hosti tradaris. Nisi aliàs tutum, talia in loca confugere, cum subsidia brevi adventura speras, si verò nulla spes auxiliorum, potiùs abscedes in longinquiora, aut hosti adventanti, insperata velocitate occures, nè intercludaris.



cludaris. Aut alteram paludis ripam (seu fluvii quo cingeris) castellis munies, parato transitu, ex virgultis & ratibus, ut liber sit in alteram partem transitus, dum velis.

Quidam Imperatorum, cum in castris reperisset, sparsas ab hoste literas, quibus ad defectionem, suorum tentabantur animi, proposito præmio, si quis Imperatorem occidisset. Prudentè malè coeptis occursurus, in concionem vocatis militibus, palam fidem laudavit, se illius commenti authorem ajens, experiendæ militaris fidei; Nunquam postea sinistram opinionem habiturus, semel probata fide.

Eodem ordine, quo procedunt legiones, etiam in castris ponuntur, quæ fuit prima, quæ secunda, quæ tertia, seu pedestris, seu equestris; Ut cum educendus in campum miles darent, non interruptis stationibus prodeat, & in acie locum occupet, tumultuaturus aliàs, si promiscuè egrediatur.

Post tesseram, fervetur omne silentium.

Aliquando ad tesseram addenda signa, ut motus manuum, vel corporis, gladii corruscatio. Nè si vox, aut verbum hostibus innotescat, signo tamen prodantur. Immo gestu, vel signo, à longè tesseram expiscaberis advenientium, explosione bina ternavè sclopeti, inclinatione hastæ, elevatione pilei, vel prout ex condito, commodiùs putabis, quod magnoperè juvabit alienigenas, diversæ linguæ socios, qui nostram linguam effari non possunt, signo saltem, hostes amicosquè distincturus.

Præfectus fabrorum & fossorum, necesse habendus, cui operarii subsint, cujus curæ futurum, nè materia & instrumenta desint operi, ferrum, funes, secures, terebra, ligones, rutra, palæ, instrumenta levandis machinis, & alia.

Ultra Præfectum generalem armamentarii, alii minores habendi, quorum singuli, tribus quatuorvè tormentis præsent, quisquè suis machinis equos, pulverem, globos, currus, explosores procuraturus, inde majori facilitate & cura, habebuntur omnia, in itinere, in castris, in pugna, dum quisquè sua curat. Describendum item, quot pondera nitrati pulveris, quot globi, quamquè machinam, immò quamquè cohortem pedestrem sequantur, nam quod in commune providetur, in acervo multum apparet, divi-

divisum in singula, vix sufficit, undè inevitabilis error. Pro quolibet igitur tormento, saltem *C L.* explosiones, in pulvere & globis computandæ, pro qualibet fistula pedestri, saltem explosiones sint mille, ex præparato.

Præfecti legionum, vigiliæ castrorum (immo ipsa castra, interdum noctuquè) ordine circuibunt, undè æmulatio in virtutem, & acuetur cujusquè ex diligentia, industria, ut tandem ipsi possint, esse belli Duces.


Interdum, habeas aliquem expertæ prudentiæ virum, qui te occupato, curet minora negotia castrorum, noctu verò, excubet insomnis Dux ipse, præsertim si propè adsit hostis.

Licet plures portas habeant castra, unica tamen assignabitur, per quam egressus pateat, atquè altera, per quam ingrediendum, Exploratoris verò causam dicat, quicumquè alià viâ ingrediatur, exeatvè. Sic facillimâ operâ, notabitur explorator, seu proditor vagabundus, unicâ viâ veniens, quam si per diversas portas, se intrudat, faciliùs item observabitur, unica porta, quam si ad plures simul attendatur. Idem circa præsidia urbium observandum.

Quò tibi labor castrorum, & consilia belli faciliùs succedant, statue ex fidelioribus clientibus militiæ gnaris, juratos, stato die, aliquo in secessu, ut consulant, quomodo habeantur castra, miles, & bellum in universum. Consultum ad te delaturi, ut habeas copiam seligendi pro arbitrio, quod velis. Secretim verò habebis, nè invidiam factiosorum provoces, si obmurmuraverint, suum Ducem, Pædagogorum imperiis, ut pupillum obnoxium.

Si fluvius aut rivus, lutulenta propter littora, aquationi inaccessibleis, ducantur transversæ fossæ, ut aqua in siccam terram,





derivetur, ut est in *A. B. C. D.* ex *E. F.* fluvio.

Tormenta (minoris generis) coriacea, vel papyracea, immò lignea, fabricantur nonnunquam, promptuario usui accommodata.

Miles non ædificabit tabernacula castrorum, ex stramine, aut arida materia, sed cespite teget, ob periculum incensionis. Aut saltem, inter legiones sint intervalla, nè obortum serpat incendium, utvè rescindi & restingui facilius possit; si verò hostis castra sic ædificaverit, procurabis accendi, velut Scipio Syphacis castra, in Africa delevit.

Impediendæ suorum defectionis, rationem Julius Cæsar de bello Gallico insinuat. Cùm Avaricum obsidentibus Romanis, perterriti præfidiarii, è civitate profugere vellent, infirmiores, quibus ob imbecillitatem, fugiendi ratio non erat, metu, nè desererentur, conclamavère, significaturos se de fuga Romanis, immò

immò re vera significarunt, undè transfugæ veriti, fugam hostibus proditam, potius defensionis, quàm defectionis, inivère curas.

Venditores necessariorum ciborum, tùm pulveris nitrati, & armorum, castra sequantur, alii negotiatores amoveantur.

Castra positurus, non locum accommoda castris, sed castra loco, aut potiùs *utrumquè simul*, prout commodum videbitur, ut valles in propatulo sint, proximiores pagorum, præfidiis, tùm castellis muniantur, item virgulta.

Func oblongo (per nodos, ad speciem distantiarum inter cohortes, legionesquè distincto) denotantur faciliè stationes cohortium, si ad quemquè nodum longitudinis, latitudinisvè, signum cuiusquè vexilli, metator castrorum figat.

Exploratores in castris deprehenduntur, si omnes tui, sub signis, seu milites, seu lixæ consistant, indè apparebit peregrinus, exploratorvè, nullius vexilli; vel facies aliter; Milites suis tabernaculis, stato tempore se contineant, ut notetur per castra explorator vagabundus, nullius tabernaculi.

Positurus castra, præsertim in confragoso, considera locum, quoàd expedit castra extendere, vel contrahere, tùm pro commoditate, dispones stationes. Expedit verò, ut singuli Præfecti legionum (ordine per vices) cum metatore præcedant exercitum, meliori curæ, ponendorum castrorum.

Castella, ultra castra exstruenda, sub quorum præsidio, equitutiùs in pascuis discurrant.

Cadavera equorum, & intestina boiùm, tumulabuntur in castris evitando foetori, si verò extra castra ejicientur, etiam sub dio non relinquenda. Undè substituendi, castra qui circumeant, curaturi, ut cuiquè legioni, suus nitor sit curæ. Rectam regulam Turcicorum castrorum, observat Paulus Jovius, lib. XL. Histor. Annotatum Turcicis in castris, omnium ordinum tabernaculis, tentorio-  
la, aut tuguriola esse conjuncta, quibus latrinæ (non in Præfectorum tantum puta, sed in publicum gregariorum usum) inerant, eo insuturæ ordine, ut novæ scrobes, alternatim fierent, repletæquè, statim injectâ arenâ regerentur. In macellis quoquè, profundæ fossæ viscebantur, in quibus lanii, totius exenterati pecoris exta; sedulè tumula-  
bant,



bant, ita fiebat, ut castra nullo odore retro afflata, ad salubritatem commodiora redderentur; Et alio loco innuit; Nec enim omittendum. Silentium totis castris (ante omnia) peræquale, atque perpetuum, in tanta frequentia stupendum fuit, neque enim alièr, quàm significatione manus & nutibus, parati intentique milites regebantur.

Literæ è castris mitti prohibebuntur, præsertim si consistis in infecuro, scribunt enim varii, varia per confidentiam, querulantur de defectu, indè interceptæ ab hoste, audaciorem reddunt.

Nunquam patiaris tua castra obsideri, aut occludi. Quod si potens hostis, te obsessum eat, non subsiste uno loco, non approximabis illius exercitui, ad fluvios moreris, quo altera parte tutus sis. Fortalitia dein, extra vallum in campum porriges, ut distendas hostem. Aut in unam partem obsidentis, toto robore ex desperato incumbes, vel quod maximum (licet vana specie) per conversionem terroris, famam sparges, iturum te contra hostem, ut ad se tuendum convertas, metum dissimulando, ab audacia petiturus consilium.

Prudens Dux belli, providere debet, nè milites sui cum hoste (ut fieri solet, data armistitii pactione) colloquantur. Capitale fit, colloqui, ante bellum totaliter confectum, censoribus in eam rem adhibitis, multa enim evulgari possunt per imprudentiam, quæ reticenda. Immo, nonnulli, colloquii sub specie, ad defectionem sollicitari possunt; Quod bello civili maximè cavendum, dum cognati, cum cognatis, ex adverso ad colloquium veniunt. Vide *Julium Cæsarem, de bello civili lib. I.*

Si aquatio remotior à castris, ac proindè periculosa, ductâ continuâ fossâ versus aquam, & superpositis castellis, tutius fossæ præsidio, aquationem assequeris.

Hiberna Romanorum, non in oppidis, sed, urbana mollitiæ & occasione prodigendi procul, aperto campo, castris & vallo includebantur, separatas legiones per Provincias disponendo, præsertim retinendis in fide suspectis populis, proculque ab eorundem prodicione, partim faciliiori annonæ inter paucos, & difficiliiori factioni. Singulis verò hibernis, singuli legati, cum omnimoda potestate præficiiebantur. Commeatus populis vicinis inperabatur, menstruatim castris subvehendus.

Miles,

Miles, luxum vitet in potu, victu, vestitu, in quo Dux ipse, poterit plus exemplo, quàm imperio.

Disciplina militaris retinenda.

Dux habeat & fervet auctoritatem, nec ad quosquè motus moveatur, sed minora negotia, per alios curet.

Non otiosum militem habebis in castris, nè à multitudine & otio, nova moliat. Nonnunquam, idèd, falsos rumores, & pericula finges, pro meditatione belli.

Non minitandum militi, sed cum fecerit, statim poena sequatur, nè à turba petat auxilia, in eo, quod solus timet. Si verò multi delinquant (quos nisi magna cum invidia, in poenam trahas) per singulas cohortes, nulla mentione de cæteris, iudicium exercebis, aut fortes supplicii pones, decimando fontes ad poenam. Eo fortiendi modo, non nemini pars erit poenarum, in dubium mortis, vitam misisse. Nec semper poenæ loco sit, ad mortem trahi, sed æquè delinquenti gravia, exercitui magis fructuosa, ut delinquens miles, bina spolia ex hoste adferre, duosvè captivos, manu ducere cogatur, ut non recipiatur in castra, verùm extra vallum, subsistat statione, primus, itineris laborem, primus, prælii periculum subeat. [*Quæ copiosius suggesti, in Notationibus togæ & belli.*]

Cum poena sit in exemplum & correctionem peccatorum, instituta magis, quàm in ultionem peccantium, exercenda erit in delinquentes, ut ejus terror, perveniat ad omnes, paucorum corpora, omnium oculos, ac mentem castigando. Si è prælio fugerit miles, prodicionem intenterit, nunquid contagiosa hæc? nisi prout in omnes peccatur exemplo, etiam iudicium & poena, exerceatur ab omnibus. Sit ergò, ut per cohortium deputatōs, spectante exercitu, damnetur & puniatur miles, ictibus sclopetorum necandus, gladiis concidendus, vel demùm castigandus scuticariâ, vel fustuario, ad enormitatem poenæ, & ignominiam delicti ad posteros, ut in familiaritatem sceleris, nemò venire deinceps audeat, amore gloriæ, & metu infamis poenæ; Sic penes ipsosmet milites, illæso Ducis amore, sævitia tùm invidia facti, & decreti memoria, in terrorem manebit. Quod facillè fiat, apud nos præsertim, dum è nobilibus, honoratior nobis constat miles,



edò magis ignominia coërcendus, quò major illi sensus inest honesti, quàm si aliàs, è fece populi legatur.

Non omittam apponere, egregium retinendæ disciplinæ, nec importunæ severitatis factum, Lucii Apronii, Romanorum Ducis, contra Tacfarinatem in Africa. Cùm quædam cohortium, nullo egregio præstito facinore, primo concursu terga è prælio vertisset, *decimum quemquè ignominiosæ cohortis, sorte ductos, fuisse necat. Tantumquè severitate profectum, ut vexillum veteranorum, non amplius quingenti numero, easdem Tacfarinatus copias, præsidium cui Thala nomen adgressas, fuderit* (Cornelius Tacit. Annal. III.)

Adempturus militare officium, priùs fidelem successorem cogita, sed non præfice ante officio, quàm illum priorem, manu teneas, aut iudicio damnes, & omnes nocendi vias præcludas.

Correpturus militem ad poenam, sine tumultu, circavè prandii tempora facies, ad evitandas turbas, dùm gregarii, è castrorum area, ad mensas discurrent.

Contra potentiorè & subdolum hostem, securè ponuntur castra, nequè sunt exposita insidiis nocturnis, si hostes inter, nostrosvè, paludes, aut fluvijs interjaceat. Providendum verò, utraqùè ripa, castella ut ponantur, seu ad hostem vadum transeas, seu retrogradiaris, sub præsidio munimentorum, tutò transire ut possis. Insuper, multum momenti habebis, nè quotidie te vexet hostis, transitu fluvii impeditus, aut si abeundum, nè tergo tuo hæreat. Si verò eodem consilio, hostis contra utatur, superiori & inferiori alveo, hostium castellis, tua fortiora opponas.

Vecturæ victualium, proximioribus civitatibus, aut pagis imperandæ; nè penuriâ annonæ, prematur miles, seu sit annona *ex granario publico* (maturè in locum castrorum, quavè transeundum, præmissis emptoribus) seu quisquè pagus, suam vendendam, vehere cogatur.

Pecus, ex hostico conquirendum, ut per centurias, militibus, victualium loco dividatur.

Quia propter congelatam hyeme terram, fossæ excitari non possunt, defensionis suorum, vel oppugnationi hostium, valebunt, eo casu, carpenta, doliis terra fartis onusta, quæ vice ambulatorii

rii valli, & castrorum, promoveri possunt. Facile devolvenda, obruendis fossis expugnandarum urbium; In defectu doliorum, commodè valebunt corbes.

Videat belli Dux, nè militares equi, castra procul abigantur, sed advectitio pabulo, eos retineri oportebit, nè si repentè hostis ingruat, equi primùm quærendi sint è pascuis, dùm pugnandum; Ergò tu aggredieris hostem, sic pabulantem.

Excubias stationares (seu promptuarias) acturi milites, sub signis, primò præsentent se videndos Duci, magis seridè ut agant, postea in tabernacula, digrediantur armati; Adsint verò censes, stationes obituri, pro diligentiori excubiarum cura.

Quoniam (ut supra dictum) Legionem equestrem, octo turmarum esse oportet, pedestrem, cohortium quatuor. Proderit, quamquè legionem quatuor in partes dividi, ut quarta die, ordo vigiliarum, ad eosdem redeat, nè si integra legio abeat, stationes legionum, totalitèr nudentur.

Hæc quaternaria legionum fragmenta, signo vigiliarum dato, tabernaculum Ducis ante, convenient. Pedites ad præsidia circumvallationis ducantur, equites in tres partes dividuntur, ut prima pars noctu excubet, altera usquè ad meridiem, tertia duratura ad vesperam, tædio minori equorum, virorumquè, ex divisione laboris, Tum superveniente vesperi, iterum tabernaculum ante Ducis, convenient, novis excubitoribus, vigiliis cessuri. Atquè sic per alternantes turmas consequentèr.

Sed vigiles (aut excubitores) bifariam sumendi, qui in excubiis, singuli, turmatimvè longiùs à castris, vel propè, præcavendis periculis excubant. Alii vocari possunt *Custodes*, qui publicis in viis, tum per agros propiores, & horrea propè, disponuntur, nè ab insolentiori milite, ædificiis, pecoribus, horreis, damnum inferatur, nè agricultura præpediatur, nè agri, tum sata depascantur, nè caupones, victualia venum ferentes, spolièntur; aut quidquid lixarum licentia, usurpatum per scelus habet; Ut insolentiores captiventur, corripiantur, pro servanda castrorum disciplina, & habenda opportunitate, promptè conquirendi com-  
meatus.

Consultum fuerit, in omnes quatuor castrorum partes, latas portas



portas facere, pro commoda excursionem suorum, nè longè circumueundum sit, si qua parte impetum faciat hostis, noctu præfertim.

Si remota sit aquatio, quæquæ cohors, ac quæquæ legio, suam stationem ante, fodiat puteum, communi usui legionis (saccis, tum corbibus, si vasa defuerint alia, terram extrahendo, profundius cum descendit fossio) Immo, etsi fluvium propè castra ponantur, proderit ea puteorum commoditas.

Nunquam citius levipendium edictorum inducit belli Dux, quam si levitèr properus ad vetandum, tum ad jubendum vana, quæ ipsa jussorum levitate evanescant, & irrita reddantur, sic enim non seridè imperatum, & factum, milites assuefacti, edicta Ducis, joci loco habebunt, ut postea seridè imperata, exsequi morentur, sæpius eludi & fallirati. Curandum igitur, quod imperatum fuerit, licet in speciem, fiat tamen, pro retinenda edictorum autoritate, aut non imperentur, nisi necessaria & gravia.

Quò citius, edicta imperatoria executionem fortiantur, vel dum opus aliquod, perfectum habere vis, quod imperasti, non tantum rem pete aut impera, sed tempus perficiendi præfige, ut qui se tempore circumscriptum videt, rem faciendam studiosius (extraque procrastinationes) aggrediatur, ad certum scopum, opus collimando. Nontantum verò in edictis bellicis, sed quavis publica & privata actione, ea perficiendi operis, via commodissima.

Alacritas in milite quæritur, sed hæc à duplici fonte provenit, à vera virtute fortitudinis militaris, & ab ingenuitate, adhibitâ rectâ disciplinâ; aut ab indulgentia Ducis, & insolentia militum, undè comparatur ferocia, quæ prout falsa virtus est, etiam in ignavis & timidis, in tempus quandoquæ succedit, arte cujusdam licentiæ, in audendum versa, illa, nisi à forti & ingenuo pectore habetur, durabilior est proindè, nec confunditur periculo, aut frangitur adversis, sed petit ab audacia consilium, recolligit vires, & in majus audet, sui ipsius conscia, honesti & Patriæ amore, dum movetur. Quæ verò per indulgentiam provocatur, incipere quidem, & res tentare suadet, insolentèr magis, quam audactèr,

ideò-

ideòquæ in arduis hebescit, terretur difficultate, & simul confunditur. Vera igitur virtus & ingenuitas, disciplinam & legem admittit, ex regula honesti; ignavis, servitutis loco est, ut horum suppressas audaciam, ex castigatione, illorum fortitudinem acuas, adhibito rigore disciplinæ, prout veteribus Romanis, erat moris, ex ordinatæ militiæ instituto. Scire igitur interest, cuiquæ militiæ Præfecto, ut habeat milites, prout in ingenuos, aut secus ignavos incidit, si enim ingenui sunt, id est ex honestis & nobilioribus lecti, adhibebit rigorem disciplinæ, nè corrumpantur; sin secus ignavi, ex fæce populi conglobati, indulgentius (saltem in tempus) eos habebit, errata quædam dissimulando, immò velut nesciendo, nè dum coercere cupit, quidquid vigoris in illis, totum per rigorem suppressat, metu servilis poenæ, aut reprehensionis, timidiore redditurus, quam modestos. Mihi si optio detur, paucos milites malim, & ingenuos, quam multos, sed per insolentiam audaces, ingenui verò esse non possunt, ex fæce vulgi qui leguntur: Non enim decus honesti, & gloriæ norunt, ideoquæ alta, multòquæ magis dum sunt ardua, per se tentare non amant, nisi jumenta velut ducantur, aut potius impellantur. Nè igitur mirèrè, à Romanis, orbem subactum, tum ad tantum fastigium, rem bellicam provectam, non enim, prout quisquæ sese obtrudebat obvius homuncio, popinarius, rabula, veluti nostri sæculi ea labes, sed convocatis tribubus urbis, magis compositi viribus, ætate, moribus, ingenui juvenes, nec fictè alacres, in legionum tabulas, studiosè selecti scribebantur, quorum unicus, trium ignavorum, valorem superabat, ad imperata Ducis alacer, & propria ingenuitate, in amorem gloriæ excitatus. Velut multis bellis expertum, cum per inopinata \* periculorum, rebusquæ \* Vide confusis, inexpectato Præfectorum ductu, vel impulsu, non attoniti, nec post tergum respectantes, verum scientiâ præliorum, de bello & ingenuæ disciplinæ usu, ipsi milites, non minus commodè sibi insinuavere quod oporteret, ordinem, insultum, aggressum, regressum, subsidia, quam ab aliis doceri ut possent.

Inter Imperatorias virtutes Annibalis, præcipuè celebratur, cum è confluxu gentium, lingua & moribus diversarum, exercitum in Romanos duxisset, sæpius verò, pecunia, stipendiis cum

T

deef-



deesset, undè propera querelarum & seditionis materies, tanta dexteritate militem regeret, ut nulli tumultus, aut discordiæ, orirentur, obedientia super hæc, ad excipienda Ducis imperia, prompta semper adesset. Quod ab autoritate Ducis, rigorequè disciplinæ (admista prudenti severitate) profectum esse, minimè dubium; Nam alterum, pro virtute Imperatoria, admirantur & æstimant milites, alterum reverentur, & nisi utrumquè, rectè habendo militi valet. Nec adest præterea seditionum occasio, cum laboribus miles distentus, mollitè non habetur otiosus, undè quæstionum & seditionis causa, ut certo aliàs sit, non magis pecuniis, & prompta stipendiorum collatione, quàm virtute Ducis, & prudentia, (penes disciplinæ rigorem) militem, bellaquè sustineri. Nec frustra miratur Franciscus Guicciardinus, (lib. XIII. Histor.) in exercitu Papali, Leonis X, cum stipendia promptè numerarentur, minorem concordiam militum, & in labores promptitudinem fuisse, propter varietatem delegatorum, nec idè stabilem autoritatem in milites. Secus Dux Urbini, cum pecuniâ destitueretur, autoritate tamen & prudentia, militum animos sustentando, promptos in excipienda imperia haberet. *Non quia modestior miles, sed Duci plus autoritatis.*

Si eveniat, ut in exercitu (quem è diversis gentibus collectum habes) discordias & tumultus metuas, providebis, ut offensæ, rixæquè militares, personarum sint injuriæ, non nationum offensæ, intraquè privatos compositæ, ut sistantur. Cavebitur, nè dicteria carpentia (quæ animos altiùs ferire amant, quàm ictus) unius nationis in alteram, volitent, tum quæquè delicta, nulla personarum ac gentium discretione, severiùs ut puniantur, ex ipsis nationibus, lectos iudices, in collegium substituendo, quibus curæ futurum, ut in delinquentes promptè advertant, iudicio militari; sic aberit offensa partium, dum quisquè suos iudices, velut causæ & nationis Patronos, promptè affuturos, in collegio videbit.

Edicta Imperatorum observari, ni servantur, severiùs puniri, dictum alibi. Sic Manlius Romanus Dux, filium, capitis poenâ damnavit, quod in iussus (licet victor) pugnaret. Et recentius Comes Fuentius, militiæ Hispanæ Archipræfectus, centurionem ad-

addixit poenæ colli, quod in oppugnatione urbis, receptui signo dato, non reversus, ultra processisset, opportunissimum capiendæ urbi locum occupaturus. Quod non superfluæ severitatis, sed necessariæ disciplinæ documentum, si non *factum* in præsens, saltem maturè in post castigando, periculosam *imitationem*: Non enim tam profit fortitudo, & successus ex errore, quàm obsit inobedientiæ, multos in annos exemplum, si iussa Imperatorum, ad interpretationem & arbitrium, unius audaculi & licentiosi, ex ostentatione vanae fortitudinis, in abusum, contemptumquè vertantur, undè levibus momentis, errores belli irrepant, summæ rei obstantes, dum inordinatè res vadunt. Non minùs in milite modestiam & continentiam, quàm virtutem, atquè animi magnitudinem desiderari. Ut hoc loco, sacræ paginæ verbis, verè dictum sit. *Meliorem esse obedientiam, quàm victimam.* Sic olim unius Manlianæ severitatis exemplo, profecit res Romana, ut disciplina militaris, quâ solâ, in orbis dominam urbs illa crevit, Manlianis iussis, in seram posteritatem definiretur, nec priùs declinaret imperium, quàm ejus disciplinæ rigor, & exemplum, solutionibus in licentiam sæculis, oblitteraretur. Non igitur, quare hoc aut illud iussum? sed quia iussum, miles pensum habeat.

In regimine belli aut togæ positus (immò domestica dum probè disponere vis) cavebis, nè rerum perficiendarum singula, ad te unicum voces, & te statuas, unicam agendorum animam, frangeris enim, nec perficies, sine adjutoria, immò dicam, sine commissoria manu. Rebus idè singulis, curatores singulos (qui præsertim agendi vigore, fide, tum industriâ valent) præficies, credere utiquè aliquibus præstat, quàm nulli: Secus per te facturus totum, duo incurres, ut te quoquo modo labante, aut per alia distracto, cursus necessariorum sistatur, dum à nemine, sed à te tantum, motum, vitam, & sanguinem res habent, deinde ut curatores meticulosos reddas, immò negligentes, nec expeditos, dum nimis adstrictæ sunt potestatis, ad te per omnia respicientes, non liberi, sed velut manibus ligati, metu, nè actionis modus, & ratio, tibi displiceat; Sic optimè rem habere dum voluisti, nullam aut rariùs bonam habebis. Jam parte ex altera, acuitur industria, intenditur diligentia, dum sibi quisquè, plenus



incipiendo, & exsequendo, commissa videt, rei benè gestæ gloriam, non ad alium, sed ad se tracturus, vel secus erroris, passurus indubiam censuram. Aliàs dùm te habent assiduum spectatorem, vel adnotatorem, verbis & mandatis, impertinentè ad singulos motus obstreptentem, excusabilius tunc errant Præfecti, immò, commissis erroribus (damno suo, vel periculo) lætantur, modò imperantis detegant inertiam, & arguant importunitatem, qui omnibus diffidis, aut importunè succenses, assiduo rigore, amissurus in post, jubendi auctoritatem, & apud tuos amorem, quàm ut proficias in melius. Absit tamen, te otiosum, & titulum regiminis penes te, rem penes alios ut velim, velut pupillum, ab aliorum manibus & cura, totum expectantem; Verùm attendas ad singula oportet, sed ea ratione, ut Superarbiter sis agendorum, sciant Præfecti & vereantur, te affuturum, cum prudentia & auctoritate, pro merito transacti operis censorem, vel laudatorem.

Jube videlicet, hoc vel illud factu, modum ex voluntate, & scopum tractandorum innue, viam, velut intento digito monstraturus, sed exsequenda, arbitrio tùm fidei curatorum relinques, præsertim quos exactæ virtutis & prudentiæ, *dudum ante probatos* officio delegisti, ut agant, pro opportunitate liberiùs, incipiant, finiantvè; Dùm enim parvis momentis res constant, & variantur (quæ non satis prævideas ordinando) non difficile modò, sed periculosum, ad præscriptum jussorum, alligari velle, & per omnia componi, nisi aliquid arbitrio exsequentis, tùm prudentiæ relinquatur. Unicuiquè deindè, pro suo ingenio, diversus modus agendi inest, lentè aut properè, suaviter vel per rigorem, instando vel dissimulando, immò velut aliud agendo, negotium aggressuris, modò ut intentum exsequantur; Quæ turbes & præpedias, si ordinatio jubentis, cum natura exsequentis non conveniat. Scias verò, per omnia, suavitate jussorum, lentè plura perfici, *cum auctoritate* quàm impetu verborum, tùm actionis, rebus dùm obstrepitur.

Vix improbaverim barbarum olim, Gallorum morem, humaniore utiquè poena, hodie temperandum, contra impromptos belli, ad edictam castrorum diem, sero venientes. *Armatum Gallis concilium* (Julius Cæsar de bello Gall, lib. V.) *indicitur, quod est initium*

*initium belli, quo, lege communi, omnes puberes armati, convenire coguntur, & qui ex eis novissimus venit, in conspectu multitudinis, omnibus cruciatibus affectus, necatur.* Eo fortè instituto, dùm quisque vitandæ poenæ prospicit, nemo ultimus, sed simul omnes, præsto ut adessent.

Tandem coronidis loco, sparsim per singula puncta, quæ dixi, summatim Polonis meis notanda, in pauca conferam. Vincibilem vix sperarim, militis Poloni virtutem, priscae modò militiæ, quatuor si reducantur. 1. Eques sine hasta longiori, & thorace ferreo, scutovè nè militet. 2. Ad quamquè turmam à tergo, à lateribus, utrinquè bini, ut adsint hortatores prælii, & correctores ordinis, adversus præliorum subita, advertendo prompti. Nè spartim, sed globati in hostem sui procurrant, nè victos effusè, laxativè ordinibus sequantur; Pepulisse campo, animum hosti dempsisse, satis putantes; Contra Turcas præsertim, Scythasvè & alios, quibus cedere prælio, ad solvendos ordines hostem provocare, terga dare, non metus aut vitium bellandi, sed pro equorum pernecitate, ars est, fugiunt, sparguntur, recurrunt, globantur; Victores per insolentiam prælii, incuriamvè ordinis, longiùs provolantes, sæpè iterum vinct. 3. Frumentatio, pabulatioquè, nè per singulos milites sparsim, proquè libitu, sed per deputatos turmarum, in commune legionis alimentum, procuretur dividenda, nè dùm singuli sibi, in partem inordinatò trahunt, universis deficiat. 4. Homines gente, *vestituquè peregrini*, Polonam in militiam (necesse tamen retento pedestris phalangis ordine) nè conducantur, sed immò procul absint. Sic potentia & virtus prisca, rectè constaret, confusio præliorum abesset, promptiùs reparanda, vanus impetus, temeritasquè cohiberetur, nè dùm victis instando laxantur ordines, dùm effusis frænis, longiùs à suorum auxiliis procurritur, obverso iterum ex arte hosti, victoria concedatur, sæpiùs ad nostros, concursu primo inclinata. Non vastaretur Provincia subministrandæ annonæ, gerendo per cunctationem bello diu sufficiens. Deniquè minor oppressio, à suis patriotis, in suos Polonos foret. Exteri, non tam modesti, nec belli, *Togaquè præsertim in momenta*, tam fideles, sed immò adversi, periculosi.



## PUNCTUM SEXTUM.

## Quomodo evocandus hostis Cunctabundus?



Simulabis noctu fugam, hostem ut evoces, aut vigilando fatiges. Dein ex insperato aggredieris, pro fiducia negligentius agentem.

Finges epistolam intercipiendam, quā redire jubetur tuus exercitus, quo fiduciam ingeras. Vel famam sparges, novis rebus in Patria exortis, te revocari, securus ut reddatur hostis, invasioni expositus.

Mitte ad hostem, specie paciscendi, ut abire tibi incolumi liceat, sic vano metu, securum reddes.

Profectionem (in speciem fugæ) noctu simulabis, interim in saltu occulteris, insidias structurus, quibus hostem involvas. Ait Vegetius, *Adversus fugientes, sequentibus major audacia, sed minor cura inest, dum contemptim sequuntur.*

Ab hostili velitatore literas finges, ut sibi circumvento, auxilia mittantur, sic elicies partem hostium, ex castris.

Pauci mittantur, hostium pecoribus aut equis, è pascuis intercipiendis, pabulatoresvè redeunt, hostium sub aspectu, ut invadant, reliqui latitent in insidiis.

Facto hostili vestitu, aliqui cum tuis velut dimicent, eliciendo hosti in subsidia.

Simulabis noctu, castra tua accendi, interim à tergo hostilium castrorum, insidias structurus.

Abitu simulato, negligentiam vigiliarum in obsessis facies.

Suburbia incendenda, sic effusi ad extinguendum, circumvenientur.

Similitudine vestium, aut vexillorum, hostis elicitur, ut si propè castra hostium accedas, in speciem redeuntium ex velitatione; Lentè verò & intrepidè faciendum, quò magis imponatur facto veritas.

Sæpè

Sæpè versus hostica procurres castra, de industria retrocessurus, ut contemnaris, interim si hostis profiliat, à tergo invades.

Hostium terram, per te, vel tuos socios, populaberis, ut evoces cunctantes, in defensam suorum.

Loco com meatu adventantis, milites curribus abdantur, in elusionem hostis, & insidias.

Retrocedes in speciem lentè cum exercitu, quasi desperabundus, interim tumultuariè revertaris, insperatum ut obruas hostem. Quod quatuor diebus abeundo confecisti, una die cursim revertendo, confice ex insperato.

Tuos vestibus hostium indues, alios item tuorum amictu, velut vinctos, hostium castra propè, agere imperabis, dein utriquè, in inopinatos hostes, impetum faciant.

Sparges famam inter hostes, de te Duce mortuo, vel ægroto, quo contemnaris, velut invalidus.

Mulier vestis, tecti milites, imberbes, olera (vel quidvis vendentes) fallunt hostem. Dein captivæ velut foeminæ, aut ruricolæ, si ducantur, hostium propè castra, pecoribus interceptis intermisti.

Quidam Dux, spe objectæ per incuriam prædæ, elicit hostem, latitantem intra fossas castrorum.

Cunctantem hostem, præsertim si non audaculus erumpendo, nequè agilitate equorum pugnat (ut sunt Germani & Moschovitæ) poteris obsidere in castris, prælium volentibus negando. Eò superior futurus, cum equite tuo, claudes omnem victualiorum commoditatem. Germani præsertim, in castris si obsideantur, diutino tempore, cibariis non sufficiunt, qui nisi molliù vescantur, epidemiâ faciliè laborant, nec tam sunt providi, tum ad injurias coeli obdurati, ac noster miles. Circumvallationi verò, si non sufficias, coges vicinos rurículas, ad fossilia. Sed vide, ut hostem obsideas, eo loco, qui tibi planitie commodus, hosti verò incommodus, aliàs, curabis eum evocari, in apertiora; Eo consilio cunctationis, certum est, sine vulnere conficiendum fuisse, inter paucos dies, Suecum apud Varsaviam, dum omni com meatu, vacuus venerat, desperatione magis, quàm consilio pugnaturus, si prælium volenti, negatum fuisset, com meatu modo



modò impediendus, pro multitudine equitum nostrorum, se undiquè circumfundentium.

Media parte tuorum educta in aciem, provocabis hostem, quo impotentiam tuam arguat, ex contemptu aliquid tentaturus, tum proflientem in pugnam, tota vi aggredieris.

Cæsar, nulla ratione ad pugnam elici posse Pompejum existimans, commodissimam belli rationem adinvenit, ut castra, ex eo loco moveret, semperquè esset in itineribus, sperans, ut movendis castris, pluribusquè adeundis locis, commodiore frumentaria re, uteretur, simulquè ut in itinere, occasionem dimicandi nancisceretur. Insolitum ad laborem Pompeii exercitum, quotidianis itineribus fatigaturus. Quod edò commodius fieri poterit, si hostis, multa impedimenta, post se trahit.

Metellus, contra subdolum Jugurtham bellum gerens, cum vidisset, minore detrimento eum vinci, quàm suos vincere, statuit, non præliis, nequè acie, sed alio more bellum gerere. In loca Numidiæ opulentissima pergit, agros vastat, oppida capit, incenditquè, puberes interfici jubet, quæ omnia, multò magis, quàm prælium Jugurtham terrebant, ut qui pugnare antea noluerat, jam sequi cogeretur.

Subsistes castris in speciem, velut pernoctaturus, quo securum reddas hostem, præsertim in proximo degentem; ignes fuscitabis, tabernacula pones (faciendæ fidei) dein horas intra duas, ex insperato convasatis omnibus, mutabis locum ad dextram, sinistramvè, aut post tergum hostium, repente abiturus, quò securus ex inopinatò perficias, quod voluisti.

Quidam, seu impar committendæ pugnae, seu elicere hostem in opportuniore & in pugnam, cum non posset, velut fugiturus, convasatis omnibus, eduxit exercitum, & in insidiis opportunè confedit, subornato transfuga, qui hostem de fuga præmoneret. Quod ille pro vero accipiens, in contemptum hostium, plenus bonæ spei (edquè minore ordinis cura) tumultuariò ad insequendum castris effusus, in insidias præcipitatus, planèquè deletus est.

Urbem, aut Provinciam, cujus amore vel respectu hostis tenetur, adoriaris è proximo, quò impatiens jacturæ, tum dedecoris,

ex latibus protrahatur, prælium nolens volensquè initurus, cunctationis affectatæ oblitus.

Rectum illud Furii Camilli Proconsulis Africæ, contra Numidas & Mauras, factum legitur (*apud Tacitum Annal. 2.*) Cum fortè bellum tracturi, prælium vitarent, *legionem unicam, & quidquid sub signis sociorum, in unum conduxit, modicam manum (similitudinem hostium spectantes) sed nihil æquè cavebatur, quàm nè bellum metu eluderent, spe victoriæ inducti sunt, ut vincerentur.* Paucos igitur tuorum, sed delectu fortissimos, studiosè objicies cunctanti hosti, paucitatis contemptor, edquè incautus, minore ut provisu, ruat in prælium.





## PUNCTUM SEPTIMUM.

## Quid ante prælium agendum.



**S**I tumultuarium militem collegisti, nec diu stipendiis, com meatu aut imperio, eum retinere potes, propera pugnam. Si verò talem militem apud hostem credis, super hæc delicatum, sumptuosum, trahe in hyemem, moras nocte, in terram non fructiferam elice, aut depopulatam, præsertim si peditatu abundas, hostis verò equitatu.

Consilia veteranorum, coeptis adhibe, meliora verò exsequere, non velut *Pæius* apud Tacitum (lib. XV. Annalium) *Eludi Parthus, tractu belli poterat, si Pato, aut in suis, aut in alienis consiliis, constantia fuisset, verum ubi à viris militaribus, adversus urgentes casus, firmatus erat, rursus, nè alienæ sententiæ indigens videretur, in diversa, ac deteriora transibat.* Tùm illi Duces Ottonis, contra Vitellianos, quibus ante prælium, tutiora suaserant, *Celsus & Paulinus*, sed quia ab eorum opinione diversa (*verba sunt Taciti*) *Titianus & Proculus, cum consiliis vincerentur, ad jus imperii transibant.* Sunt enim quidam temerarii, aut superbi, qui discursus causâ, aut expiscandarum mentium gratiâ, consilium bonorum (*immò approbationem, vel assensum, non consilium*) in speciem petunt, nihil tamen eorum exsequuntur, sed faciunt, ut consuluisset videantur, curiositati consulunt, non rei; Non satis verò consilium petere, verum in eo res est, ut bonum seligas, nec tibi superbia obstet, quod minùs aliena, dùm bona, sequaris. Non verò sic proditur imprudentia, sed potiùs æquanimitatis & modestiæ signum, aliorum prudentiâ, in suum consilium scire non abuti. In reliquo, circa consilium belli habendum, attendes ad monitum *Vegetii*; *Nè confidas, si tyro prælium cupit, inexpertis, dulcis est pugna, & noveris te oportere differre, si exerciti bellatores, metuunt dimicare.* Ignavissimus quisquè, & in periculo non ausurus, sæpè nimii verbis, linguæ feroces, in ostentationem. Potiùs eorum consilium sequeris, *quorum rationes, politiam & praxim, non*

scho-

*scholam & entia sapiunt.* Quantum verò ad consilium, de summa belli habendum, penitiùs noscenda erunt Duci, consultorum ingenia, prout ad pacem, vel bellum, naturâ inclinant, ex usu publico, non privato respectu loquuturi, nè pomposis suasionibus, in devia abripiatur. Aliqui enim, dùm togatis nisi artibus valent, curiæ alumni, & habent exindè fructum, tùm authoritatem, fugiunt quoad possunt, dissuaderequè conantur, arma & bellum (licet aliàs ex publica necessitate opportuna) velut materiam suis artibus, & parandæ famæ sterilem, quod magis verò sunt persuadendo subtiliores, eò belli artibus periculosissimi, nè, dùm primi inter togatos fuere, quantum authoritatis pæperere sibi, totum in castris amittant, dùm detegitur hoc in genere actionis, inertia, nè posthabeantur. Viris militaribus (præsertim sibi æmulis, aut quos in pace offendere) in gratia Principis, cujus demerendis favoribus, amplissimum campum, bellorum necessitas, & pericula, fortibus aperiunt, qui bello, velut congenito sibi elemento, nisi commodè vivunt, dùmquè pax illis sterilis & ingloria, quid mirum? si in consilio movendi aut finiendi belli, bellum statim, pro genio suo, & asperiora loquantur animosè, suadeantquè, nec finem planè armorum optent, cupidine gloriæ, & parandorum Principi triumphorum, curiam, ut sibi sterilem, odio habentes, togæ verò consultores (aliàs in movenda temerè bella, non præcipientes) ignavos, timidos, otiososquè vocantes, & intempestivos oratores, quibus obtegendo metui, & colorandæ cautioni, pro subtilitate, nunquam desint rationes. Ut verò Medici, per morborum casus, artis medicæ præstantiâ inclarescunt, à benè valentibus contemptim prætereuntur, sic viri fortes, parandæ famæ, nisi bella optant, nam *militares artes, per otium ignora, industrios ac ignavos, pax in æquo tenet.* Quæcunque igitur, æqua, iniqua causa, turbulentorum, pacatorumquè inciderit, arma statim hi, velut castrorum filii, pro animi valore aut ferocia, illi priores, curialis ingenii viri, per quietam nisi valentes, pacem suadebunt, nec dissuaderi unquam patientur, cum passionatis, aut contentiosis, ratio nulla satis, non quia mala, aut non ad rem, sed quia non ad inclinationem. Velut nostra ætas, eam diversitatem ingeniorum, artiumquè aspexit, in *Georgio Ossolinskio Can-*



cellario Regni, & Jeremia Duce *Visnovieckio*, Palatino Russiæ, hic uti Martis pullus, & delictum castrorum, nisi arma sopiendæ *Cosacianæ* seditioni (verè pro natura publicæ pacis) suadebat; ille prior, filius togæ, curiæ nisi artibus valens, primamquæ inter quieta tenens auctoritatem, quidquid prius in speciem pacatorum arripiebat, obtendendo pericula, ut à bellicis modò declinaret, præsertim dùm æmuli *Visnovieckii*, rectissimi aliàs, nec sine honore nominandi viri, per bellica crescentem famam & potentiam, suspectam, nec satis amicam haberet; Sed utrorumquæ, uti per sua munia magnorum, ad famam nominis, mentio facta sit. Notum etiam, inter Galliæ bellatores, Marschalci *Bironii* dictum; Cùm ejus filius, promptius agendo pro victoria, velut ad finem belli inclinaret (quod ille trahi fortè, ut iners togæ, osor pacis cupiverat) per indignationem conversus ad eum, inquit. *Si bellum fortè finiatur, desertâ togatâ aulâ, suis artibus adversa, iurum se domum, plantatum caules.* Princeps igitur, seu belli Dux, pomposis consultorum rationibus, nè decipiatur, utrorumquæ ingenia, dein rei naturam consideret, principia, media, finem pensaturus, nè difficultate incipiendi terreatur, aut in mediis hæreat lassus, dein eventu confundatur, potiùs eorum consilia probet, qui pacis bellicquæ, vacui sunt privato à respectu, sed è publica utilitate, possibilia suadent. Velut in eo valent, universalia utrarumquæ artium, togæ & belli \* ingenia; Sed tales viros, uti rariùs aspexit orbis, eò magis, Princeps eos æstimabit, & sequetur, velut divinitus, in gratiam universalis boni, & populorum commodo, datos. Verùm adhuc in particulari, pensandis consultorum ingeniis, necesse advertere, ad subtilitatem nè magis (consultendo) vel minus? vel ad modestiam, inclinant. Aliqui enim, tantâ perspicaciâ, & rectæ mentis, tùm animi vigore, tamquæ forti imaginatione valent, ut quidquid consulendum venerit, velut arithmetices periti, ad singulas numerorum objectiones, ex verò, nec addubitantèr promptè respondentes (admirantibus artem, qui rudi, per digitos numeratione, rem transmittunt ipsi, & tandem assequuntur) superficialibus non immorentur, nec supernantent, verùm ipsa rerum fundamenta videant, velut ex dudum ante præmeditato, vel præviso (nam etiam ex causis secundis, multa

\* Vide  
Moralia  
mea. Par-  
te tertid.

præ-

prævident) promptè decernentes, facilia, difficilia, inopina, intricata, æquè præsentì recollectione, & sine labore habituri, immò familiaritèr, & jocantium adinstar, totum expedientes, ut nihil novi illis videatur accidere. Non patiuntur adversis confundi, in obstantia spontè vadunt, respondendo graves, persuadendo facundi; tractando amæni, ideòquæ, si declinaverint in contrarium, multò magis in publicum sunt periculosi, nam facile illis creditur, opinione prudentiæ, dùm infascinauerint vulgi animos, præsertim quibus, sæcundioris ingenii beneficio, *genus orationis inest, ad implendas populi aures, latum & sonans*, nihil eos in cursu operis sistit, sed potiùs inter adversa, spe & animo eriguntur, velut si periculosa & intricata, parandæ gloriæ, materiam ferant copiosiorè, probandæquæ prudentiæ, tùm virtutis. Nè dixerim, spontè rerum difficilia & turbida optant, cujusvis ausus capaces, fortunæ suæ parere cuncta rati, præsertim si aliquoties rebus adfuit, & successit actio, undè pro animi impotentia, insolescant. Novorum & impossibilium cupitores, aliisquæ pro subtilitate persuadere conantur, asperitatem rei, lenitate vocabuli temperantes, velut soli per adversa vadendo, Magistri. Quia verò talia ingenia, plerumquæ sibi nimis fidunt, velut infallibiles agendi maximas, exinde statuunt, inquæ superbiam facile vertuntur. Nisi indulgentia rectoris naturæ, adsit, congenita moderatrix modestia, socios actionis non ferunt, impedimentum velut habituri, & ligari putantes; si non soli præponantur rebus agendis, cujusvis consilii, quod non à se venerit, negligentes, vel quod pejus, contentiosè improbantes, jocivè eludentes, cùm detrahi sibi putant, quod rectè dictum, aut factum per alios. Idèquæ pro superbia, quàm pro rectè agendis, sæpiùs laborant, vel ni succedat, rebus, sibi quæ ipsis indignantur, & abeunt in contrarium, loco constantiæ putantes, perseverare in malo, nè fateantur errorem: Quæ potiùs, pertinacia, vel occulta superbia, vocanda est; Volunt sibi totum credi & concedi, pro ardore animi, moræ & eventus impatientes, superiorem vix ferunt audaculi, ut data occasione, facile contra insurgant, facile offendantur, molles nimium & delicati contactu, undè facile insolescunt. Talia ingenia, non possunt, nisi gravitèr errare, quod

V 3

fit



fit propter nimiam vivacitatem elatioris spiritus, animique ardorem, seu propter exsuperantem conceptuum fecunditatem, ut nesciant, nisi in extremo boni aut mali silti, *prout animum intenderint, pravi aut industrii*; velut de fertilitate Ægyptii soli, cuidam observatum, *quod perfectissima medicamenta ferat, aut perfectissima venena*. Nisi verò, ab aliis moderatioribus ingeniis temperentur, ferè sunt in publicum, pace, bello, periculosa, præsertim si in supremo Magistratu posita, & sint in sui plena potestate, idèquè cautè, officiis adhibenda. Quodsi (quod rarissimum) adsit illis ex virtute modestia, ut aliorum consilia, tùm rectè facta, non dedignentur, sua exindè moderaturi, universalia, tùm inæstimabilia ingenia, vocaveris, proximèquè Divina, nam miros pariunt effectus. Alii deindè paulò sunt hebetiores, per se rem planè inveniendò, & mediocris ingenii, plùs tamen modestiæ sæpè habent, loco prudentiæ putantes, si aliorum rectè consulta dignoscant, scientèr cum virtute exequenturi. Non enim illis obstat, contraveniendi superbia, consciis, quod per se, non probè totum possint, idèquè focios actionis, lubentiùs ferunt. Et evenit, velut hebetiori utentibus visu, qui nisi per benè explorata, lentè, ideoquè securè vadunt, illos priores, excæcat sæpè ardens ingenium & temeritas, ut nisi currere in res cupiant; Undè si parùm titubent, pro impetu, graviore casu ruunt; hi secùs, tardiores sunt agendo, verùm securiores, & rariùs falluntur; non præsumptuosi, facillè alios in consilium vocant, & patiuntur. Conducibile tamen, horum frigiditatem (seu teporem) cùm illorum priorum ardentioribus ingeniis, in temperamentum adhibere, velut acutas voces, cum gravibus, meliori tono & resonantiæ, aptiùs miscueris; Tales quidem rariùs, magnarum actionum, sunt per se capaces, sed etiam rariùs, magna vitia ferunt, & regendo, vix prioribus non sunt præponendi, & commodiùs Præfecturis admoveantur, dùmmodò adsit rectum iudicium, nec absit (lenta licet) rerum moderatrix prudentia, praxis verò perficiet totum; Cautiores item sunt, ex non insolenti diffidentia sui, adversi successus patientiores, perseverando (dùm lentius agunt & appetunt) constantes, obedientiæ tolerantes, superioris jussorum executores accurati, non interpretantur, nec quæstiunculis super

man-

mandatis ludunt, sed quò rectè duxeris, sequuntur, nec franguntur animo. Illi secùs ingenii prioris, pro ardore promptè habendi successus, ni cupita obtineant repentè, dedignant, coëptis desistant. Vel si nimium instent, & se totos in actionem effundant, lassati, citò frangantur, nam intenso actui, diù sufficere non possunt, nisi totos pro ardore se conficiant. De *ingeniis Stoicis*, nihil dictum feram, de his abundè alibi (*in meo Politico-Moralibus*) tamen esse nimis periculosa, vel obiter intimandum, nam ex occulta (quam sibi elato, subtristiquè supercilio, tùm facie meditata, adstruunt) gravitate, *quæ specie modestiæ, palliata superbia verius est*, admirationem sui, apud ignorantes, & venerationem, facillè conciliant, auctoritatem sententiæ imposituri, ad persuadendum; Agere sedulò aliquid videntur, dùm nihil agunt, immò otiantur sedulò, pompatica in rem dicere amant, quasi refervantes aliquid magnum acturi in posterum, undè nihil, præterquam (velut de montium partu, lepidè quidam) *nascitur ridiculus mus*. Deniquè dantur alii; In quorum ingeniis rectè formandis, dùm contendisset natura, velut opere lassa, complendo totali, apposuit plùs vel minùs de stultitia, ut etiam sint magis, vel minùs, manca, confusa; Undè talium opera, opinione sui, primoquè aspectu, plerosquè fallunt incautos, dùm speciem prudentiæ habent, incipiendò, sed finis, ad stultitiam inclinat. Non expensis exequendi rationibus, magna temerè moliantur, mox lassati, deficiunt; Ideoque vitandi, præsertim si quibus admista temeritas, & præsumptio sui, grandem enim molestiam, rebus, & personis faceffant, nec suaderi, nec corrigi patiuntur, sed immò, dùm sibi complacent, aliis succensere amant, & recta (pro importunitate) impediunt, irritant, confundunt. Tales, quò magis artium studiis, parandæ prudentiæ imbuuntur, eò graviùs & subtiliùs errant, dùm pro fecunditate ingenii, multa illis obversantur, dùm in varia feruntur. Circa discernendum verò, speciosa captantes, potiora omittentes, recto carent iudicio.

Placitum aliquibus, mistim senes, junioresequè consilijs adhiberi, ut juniorum præcipitantia, tarditate senum temperetur. Nam si juniores soli consulant, speciosa magis, tùm magnifica, (velut nunquam à fortuna decepti, & calum ignari) pro impetu & te-

nie-



meritate, quàm tuta decernunt; si autem soli senes, in consilium vocentur, rebusquè præsent, frigiditas eorum, tùm phlegma, periculum, nè sæpiùs timida tardaquè, in speciem *cunctationis*, & *cautorum*, in consilium ferat.

Secretum tene consilium, & quod non procul abest, sis taciturnus, verùm secretorum tenacem aliquem vides? falleris; quomodo alter tibi fidelior? quàm fueris ipse tibi. De Epaminonda olim dictum. *Non fuit qui plùs sciret, & loqueretur minùs.* Et nostri laureati Poëtæ *Kochanouskii*, ed valet apophtegma, dùm inducit dictum, *scurræ* cujusdam aulici, qui totà aulà Polonà, non magis mendaces haberi aiebat, *Gamrato* Archiepiscopo Gnesnense, & *Macieiouskio*, Episcopo Cracoviense, hic cùm omnia sciret, nihil se scire aiebat; Ille cùm scire se totum affirmaret, nihil penitus sciebat.

Provide priùs, nè vincaris, tùm prospicies de medijs, quibus vincas.

Exploratores, sint tibi fidelissimi, nulli sumptui parcendum, ut non tantùm in castris, sed in curia hostis Principis, habeas fidos coryceos; præstabis verò, si aliquos ignotos, pretio corrupas; servitia hostis Principis ut ambiant, tibi omnia relaturi. Præsertim verò, si in externam Provinciam movendum tibi bellum est biennio ante præmittes, aliquos fideliorum, architecturæ militaris gnatos, mercatorum, vel peregrinatum, servitiivè sub specie, qui provinciæ interiora, saltus, viarum compendia, commeatum opportunitates, Urbes, Munimenta, eorumque defectus, insuper animorum inclinationes, consilia, amicitias, vel secùs Civium offensas, pedite, equite, terra, mari potentiam, pernoscant. Immo delineationem Geometricam, particularium locorum, munimentorumque facturi, undè consilium bellandi, non ex incognito capiatur. Quod si negligas, involvi periculo, & Vinci, quàm Vincere, sit tibi promptius. Illud quoque, in considerationem venire debet, ut omnia fortunæ blandimenta, suspectissima Victor habeat, in externo. Multis in occasionem fuit occidi, citò vicisse, occupavisse totum, & distraxisse suas vires, per longinquas. Præstat in paucis assecurari, quàm per multa diffundi: Prudentius agunt, qui ponentes fortunæ

suæ sponte modum, rependo velut, in occupatis pedem prius bene figunt, nec quæ offeruntur, sed quæ retineri certò possunt, occupantes, reliqua in sequentes annos, ultro reposituri. Cùm nec stomacho conducatur, violenta ciborum repletio, prioribus non bene digestis. Si igitur rectè consultum cupis, non unius æstatis, bellum externum putabis, sed annorum.

Speculatores aliquid dùm nuntiant, non statue statim, sed rem examina, & cogita, homines esse qui nuntiant, posse ideo falli. Non tamen ut Vitellius (apud Tacitum) *Fractus*, apud *Cremonam* rebus, nuntios cladis occultans, stulta dissimulatione, remedia potiùs malorum, quàm mala differebat.

Augendus potiùs coram suis, quàm minuendus hostium numerus, ut assuescant terrori, & contemnere magnum hostem discant, postea verum numerum, indicabis ante pugnam, minorem famà, quo magis redeat mens, ad certam victoriam se recollectura, si fortè primo rumore confundebatur. Longa laboris ac periculi meditatione, periculum laborquè familiaris sæpè redditur, & redit tandem quæ abiit virtus, tùm audacia.

Consultum fuerit, militiæ Præfecto, in hostem ituro, ut omnia difficilia, periculosa, immò majora verò (quàm fortè ab hoste apparantur) imaginetur, arma, numerum, artes bellandi, strategemata, prudentiam hostilis Ducis, itinerum aspera & insidias, ut provideat maturè, quomodo? sit de re sua vicissim occursurus, sic tria obtinebit. Non terrebitur novo periculo, quod prævidit animo, facile difficillimis occurret, cùm de remedijs ante profepxit; vel demùm si minùs periculosa inveniat, quàm sperabat, majore fiducia rem aggredietur, facile elufurus, vel superaturus, qui contra majora, erat non imparatus. Qui verò secùs facit, leviusculè extenuando, quæ sunt pro hoste, & contra se, aut iis temerè confidendo, quæ à sua parte, contraquè hostem apparantur, impinger imparatus, quibus ex improvviso terreatur, nec possit, nisi cum magna sanguinis impensa, eluctari, tandemquè dicat imprudens *NON PUTARAM*. Sæpè inconsulta temeritas est, cùm audaciam putamus, aut secùs, bonis prudentia & consilium dicitur, quæ audaculi, metus superflui nomine, temerè nobis exprobraut. Velut aptissimè respondit ille, causam quæ-



renti curiosè, & adubitanti, utrumne adversarium tantopere timeret? qui sic ante tempus armaretur. *Non cenè, (inquit) sed facienda facio, nè timeam.* Cavendum igitur maturè, sibi què per omnia providendum.

Adige sacramento milites, in tui fident, & hostium necem, immò in ipsam hostilitatem.

Ante generalem pugnam, experimentum cape novorum militum, per minora praelia & velitationes, item simulatione adventus hostilis, quod necessarium putabis, excitandæ suorum alacritati. Eas tamen velitationes permittes, ubi certa spes victoriæ, omnis suspicio periculi absit, nam secus confident animo tyrones, reliquæ pugnae, inepti reddendi.

Occasiones observa, oblata casu, verte in consilium.

Si hostis ducit secum aliquas belluas, assuesces equos, falsis formis belluarum videndis. Elephantes aut camelos, ex coriis confutos circumduces, intro homine abdito, ad æmulationem motus. Huic cum non esset maturè provisum, ab Vladislao P. A. nostro Rege, supervenientibus ad *Karnam* Turcis, cum ingenti numero camelorum, quorum odore & aspectu, equi Polonorum territi, ordines suorum turbaverunt, undè subsecuta strages. Si tamen camelorum aspectum, equi nullatenus ferre possint, nec alia ratio vitandi habeatur, facturus impetum, oculos equorum obligabis, satius utiquè, cæcum impetum, eques quoquomodo freno rector, quàm ut planè abhorrentes, in hostem impelli minimè possint, sed in partem periculosè ferantur.

Novello aut turbato exercitu, debiles primò aggrediendi, ut facilitate vincendi, trepidi militum animi, in posterum firmentur.

In defectu hastarum, quibus Polonus equas agit potentissimè, possunt aptari, teneræ abietes longiusculæ, quæ ad temperatum calorem ignis, tum æstus solis, siccabuntur decorticatæ, aptata levi cuspide, & cavato commodè manubrio, hoc enim genus arboris, leve gestatu, & longiusculè per directum crescit.

Vehementem & avidum pugnae hostem, morâ & cunctatione trahe, sic Fabius Annibalem confecit intra montes, (dum impari se vidit) abscedendo. Proximè tamen hostem versabatur, osten-

ostentando praelium, in occasiones intentus. Quid si te provocat hostis? quid si ignaviam exprobat, non idè officium boni Ducis exues, verum contemptor inanium verborum, in res modò intentus eris. Nihil stultius, aut leviùs, quàm autore hoste, manus conferere, ad ejusquè arbitrium atquè libidinem, summat rei fortunam periclitari. Tenebis potiùs te, opportuno loco, & ferocem hostem cunctatione ludificabis.

Etiam vana auguria futuræ victoriæ, ad erigendos animos militum, evulganda, quæ plurimùm prosunt. Sic Alexander Magnus, obsidendo Tyrios, speciem Herculis, manum & lauream per insomnium sibi porrigentis, militibus denuntiavit.

Auxiliares ab hoste avellendi, simulatione tuæ in eos amici tiæ, ad amicabile colloquium, in speciem provocando, literis familiaribus compellando, vel promissam fidem exprobrando, præsertim si intercipiendas literas mittas, neglectum in speciem.

De fœdere agendum maturè, antequam vires cognoscat hostis, & superbus reddatur, idè simulanda omnia tibi fortiora, ante paciscendum.

Nunquam in aciem descende, quin prius offeras pactionem.

Ad vada, saltus, littora, montes, observa hostes adventantes.

Dum castra propè hostem posueris, non statim dimicationi studebis, donec experiare, quæ vires illius, quæ alacritas, quæ intentio, interim occasionem quæres.

Sub prætextu legationis, positio hostilium castrorum, & vires noscuntur.

Si periculosè rumores feruntur, non fide aut diffide, sed in locum rumoris fidissimos mittes, qui resciant.

Consilium bellicum petendo, non aperi quid ipse in re sentias, ut censendi, non assentiendi des necessitatem.

Nè terrearis, terrè licet in speciem, obsidionem & praelium minitanti hosti, potiùs tu miniteris, per transfugas debiliora castrorum, quasi rimando, ut per conversionem terroris, distingas hostem. *Nisi terreri vis, terre. Terrent nonnulli, ut p. veat.*

Levioris armaturæ miles, agilitate promptior, assultando, sequendo, idè nonnunquam hastatos equites, consultum fuerit, hastas deponere.



Cultus armis & vestitu miles, est aestimatio apud hostem, magnanimitatis enim, non ignaviae, aut abjecti animi signum, cultum esse.

Rem difficilem d m vis aggredi, denuntiabis militibus, difficultia te velle tentare, in spem eorum virtutis, si te non sequantur, vel te solum Ducem iturum.

Vide, an tutius sit, per velitationes distingere hostem, quam cortare pr lio universali, & in aleam belli rem mittere, praesertim si inferior es.

Potius suaserim difficultia d m tentas, non per cohortes mittatur miles, sed designandus pro alacritate, fidelius operam praestabit, qu m pro imperio.

Prudentissime tunc ab hoste socii avelluntur, c m primum adventant, neque conjungere castra, & animos. Mitte obviam fideles, qui suasu, t m concessio donativo in primores, in tuas partes quemque trahant. Difficilior alias opera, d m jungentur, & sociarint artes, t m affectus. Quam in rem, oportuerit, ut Generalis Dux, superfluam pecuniam, prompt  sec m habeat, corumpendae adversariorum (ac vel maxime ejus sociorum) fidei; cujus defectus, poenituit nostros Duces, c m non prompt  haberent illicia, quibus abstraherent Tartaros, a societate Cosacorum, bello contra *Chimielnickium*, c m se faciles ad defectionem ostentarent.

Quidquid in speculatores aut proditores expenderis, non expensi, sed in accepti tabulas, referendum puta, plus tibi fide vendita reddunt, qu m accipiunt.

Curabis prius, exercitum hostilem ut dissipet, qu m ut fortalitium occupet, fuso exercitu, sine impedimento, reliqua sequentur.

Infirmior d m es, hostem terrebis, jam si fortior, simulat  rerum incuria aut inscitia, securum reddere, eoque incautum, in rem tuam proderit.

Specie tractatum & pacificationis, distine hostem, antequam tui conveniant, t m reliqua sint parata. Mittes legatos (velut per fiduciam potentiae) imperiosas & minaces conditiones propositurus, aliquando, (prout occasio poscit) submissas ad protrahendum.

Celeri-

Celeritas, valet pro potentia, diximus alibi, Sic *Gaston Foiseus*, pro Rege Galliae, multa gessit in Italia, & alii passim alibi. Sic intra Poloniam, *Stephanus Chimieleckius*, & *Stephanus Czarniekius*, ille *Kijoviae*, hic *Russiae Palatini*, contra diversos hostes, celeritate valuerunt, ut c m hostis eos long  abesse crederet, videret in suis castris, per abrupta, per invia, per intempesta, per noctis conticinia convolantes. Tamen, non cuique bellatori, celeritas ad victoriam prodest, nisi quibus naturalis, nec defatigatus, incipiendo, urgendoque, ad furtiva praelia, t m ex praecipiti impetuosa, inest vigor. Alias, magnis Ducibus, consultius, *Festinare lent *. Praeceptio actio, aut multum lucratur, aut multa perdit, cit  parat, cit  res amittit. Lenta vincendo & retinendo, rari  fallunt.

In paucitate militum, ante praelii diem,   calonibus lixiv  strenuioribus, quorum nostris in castris, stupenda copia, scribendi milites, per signa dividendi, post pugnam exauthorandi. Immo, per hos, laborem & pericula supplebis, in parsimoniam veteranorum, elicies ver , spe opulentioris praedae, t m praemio.

Non semper invadendus, sed etiam, expectandus hostis.

Centuriones, pignus pecuniarum virum ponant, a desertioribus perdendum.

Non descendes in praelium, etsi prop  fueris, antequam per internuntios, arguas hostem injustorum armorum, & causae, exprobra violatam fidem, f dera: Multum ex animo dempturus, si injustitiam armorum persuaseris. Mitte posth c literas & minas, penes justitiam causae, in aciem te descensurum, & ulturum ope divina hostilitatem, ni spont  deponant arma, cedantve loco.

Provoca hostem, misso tibicine, etsi non pugnaturus, ut animum explores, alacritatem, formam aciei videas, vexando.

Potius suaserim, a minimis consilium perquirendum prius, antequam veteranorum, sententiae petantur, & majori libertate, sentiant tyrones, quod velint. Alias, periculo offensae in majores, aestimatosque (praesertim si sint factiosi, & qui non ferunt libenter contradictionem) sequuntur alienam sententiam potius, qu m suam ferunt, imm , in quoquo consilio, tutum sit, eum

X 3

morem



morem sentiendi servare. Caveat verò belli Dux, nè contemp-  
tim habeat, malè suadentis dicta. *Desuturi qui suadeant, si malè  
suassisse periculum sit.*

Rebus in desperatis, nihil periculosius, quàm improperum  
consilium, ut ferè plùs valeat eo casu cruentum, quàm respecti-  
vum, quàm factò magis, quàm consulto, est opus. Non igi-  
tur cunctatio adhibenda, ubi perniciosior quies, quàm temeritas,  
nec potest laudari opus, nisi peractum.

Ad ostentationem majoris exercitus, equites hastati sine hastis  
persistant in acie, hastæ verò, aliquo sublimiori colle (à retro)  
inter arbuta figantur in terram, specie hastatorum subsidio stan-  
tium, præsertim si aliqua cohors intermisceatur, pro vera osten-  
tatione virorum. Aut potiùs lixæ post tergum, ordinatim in-  
structi, hastas ipsas prehendant, velut in subsidium futuri.

Pridiè, ante prælium, imperabit Dux armorum, ut *miles gla-  
dium acuat, sclopetum explodat, novitèr oneraturus*, ad promptè fe-  
riendum hostem. Quod studiosius ut agatur, signum reviden-  
dorum armorum, dari oportebit. Nunquam eam curam inter-  
missurus, antè prælium.

Quia sub specie literarum, tibicines personati, veniunt ab ho-  
ste, aut majoris momenti personæ, cum speciosis tractatibus mit-  
tuntur, non ut verè tractent, verùm ea occasione, castra ut spe-  
culentur, ex rerum facie lecturi, nùm per fiduciam, aut pro-  
piùs pavorem, res tuæ gerantur. Ideo quicumquè mittentur,  
remotius sub tentorio, vel aliquo ruri, detineri eos curabis, per  
ablegatos potiùs tractaturus, & daturus responsa, quàm ut ca-  
stris recipiantur. Si talibus missionibus itum fuisset obviam, bel-  
lo contra Carolum Gustavum Suecum, quas per tibicines fucatè  
adornabat, præsertim cum Galliæ Regis ablegatum, suis parti-  
bus propensorem, nomine mediatoris, hinc, illinc, commea-  
re redirequè studeret, non patuissent illi consilia, & belligerandi  
ordo. Sed cum agnita Polonorum facilitate, quosquè admitti-  
mus, & credulè percunctamur, cum subornata narrentur, illius  
machinationes non intelleximus, nostras prodidimus.

Qui potentes velitationes ex castris emittunt, ad ostentationem  
verius, quàm pro necessitate facere videntur, nemò velitando  
fini-

finivit, aut vicit bellum, verùm sæpiùs suas distraxit vires, mili-  
tem lassavit, confecit equos, ut postea nullius essent usui. Potiùs  
miles, summo prælio asservandus, ut diutiùs sufficiat labori in-  
defessus, tùm equi. Ad percunctandam igitur de hoste famam,  
tùm ad intercipiendos vagos hostium, non multo numero opus,  
verùm sufficiant triginta, aut paulò plùs velites ex veteranis, aliàs  
*nequè ad fallendum, nequè ad penetrandum*, aptus erit numerus,  
dùm in velitatione, non aperta vis, sed virtus, celeritas, &  
astus ex occulto valent. Faciliùs verò pauci occultari, tùm per  
arbuta & valles accurrere, per silentium hosti adrepere, vigiles  
inopinatos, intercipere possunt, nequè paucitate produntur, aut  
secus pauciore suorum damno, & dedecore (si periculo involvan-  
tur) per diversas vias eluctari possunt. Quæ est sola velitandi na-  
tura, ut de hoste exploratum habeas. Utcunquè tamen, con-  
tra Germanorum populos, pro ratione temporis & loci, poten-  
tes velitationes patiar, nam graves sunt accurrendo, sed nunquam,  
nisi furtivas, & in paucitate suadeam contra Scythas, Turcas,  
Moschovitas, Valachos, tùm alios, qui agilitate pugnant equo-  
rum, & facile latera cingunt, sed tibi damno tuo, aliter experi-  
ri liceat.

Ingenium & prudentia, potior est viribus; Ursi, Leonesquè,  
cum sint valentiores homine, concedunt tamen rationi, & capti-  
vam ducunt, in ejus obsequium suam feritatem. Defectum igi-  
tur virium & potentia, ingenio, tùm agendi prudentia, gene-  
requè armorum, *Hastæ* id est, *dolabræ*, & *Machinis*, compen-  
sare studebis. Sed maximè defensivis armis usus, ferrea thorace,  
casside, ac demùm scuto; quæ inertia verius belli, per osten-  
tam temeritatem, quàm in argumentum audaciæ, sæpè negli-  
guntur. Magisque providebis contra hostem, qui mediocri cum  
potentia, sed prudenter acturus venit, quàm si aliàs imprudens  
agendi, numero & potentia (sed sine arte) armatus, contra ve-  
niat.

Nunquam adeò opportuna, videatur occasio victoriæ, quàm damno  
amissi, pensare debeas militis, semperquè videatur gloriosissimum, quod  
est tutissimum, & antè securitati, quàm opinioni consulendum. In  
omnibus bellis, quæ probanda essent, non quæ utiquè probarentur se-  
quendo



quando, initium plerumque magna calamitatis est, magna securitas (Vellejus Paterculus sparsim in Histor). Et Julius Cæsar rectè providebat, ut potius in nocendo, aliquid omitteretur, quam cum aliquo suorum detrimento, hosti noceretur.

Modici fortunæ successus, vanos quibusdam ingerunt spiritus, ut in incuriam facile illabantur, ex contemptu adversorum, sed valde falluntur. Rarè tam secundâ fortunâ nati, velut ille apud Tacitum; Cerialis, parùm temporis, ad exequenda imperia dabat; subitus consiliis, sed eventu clarus, aderat fortuna, etiam ubi artes defuissent, hinc ipsi, exercituique, minor disciplinæ cura. Rectius perspicaciores Ducum, quibus prosperos rerum post eventus, suspectior est fortuna, idèquè nihil inopinati, accidere illis potest, qui sperant semper, prospiciunt, agunt, simul & cavent, tuta consilia cum ratione, quam felicia ex casu pensantes.

Punctum & librum claudò, dictorio Antigoni. Cum enim Pyrrhus, Caduceatorem conferendæ pugnæ, provocatum ad eum misisset, respondit. *Suam militiam, non magis armorum, quàm temporum esse; si vitæ tædium Pyrrhum caperet, satis multas ad interitum occasiones, brevi superfore.* Vel ille alter, simili casu, fatisque rectè; *Non ex voluntate hostis, sed pro sua opportunitate, se bellaturum, respondit.* Utique non confabulationis, aut chorearum, sed virorum armorumque certamen se meditari, & experturum venisse. *Quod verò parceret loco, aut cederet tempori, artem sic suadere suam, non metum cuius rationem requiri ab hoste, aut reddi, nimis temerarium.* Demùm tertius, licet nonnihil adversam fortunam expertus, satis tamen animosè. *In bello, velut latrunculorum in lusu, non qui aggreditur, aut vexat Regem, sed qui tandem ad incitas redigit, lucro & lusu triumphat.*

## AD LECTOREM.



*Aditamentum quod sequitur, post alterum librum Militarium ponere parabam, verum, quia eundem, typo jam jam porrecturus, studiosè retraxi, en quæ ultima ferebantur, priore loco Lector cape. Librum alterum Militarium, qui consummatissimi operis exstat paratus, paulò post (si DEO placet) gratiores animo expectabis, velut regulatissimi convivii dapes, aut fercula, quæ toties oculos & palatum conviviarum movent, recentiora quoties apponuntur. Mea qualiacunque sunt, aut erunt, utique non ingratus capies.*



## Additamentum ad tractatum Militarium.



Um supremam operi manum apponerem, en ab occasione cujusdam privati sermonis, non inuenistam dictu quæstionem adjicere placuit. Utrùm studia & libri, emolliant animos, & bellicam virtutem fortium suffocent; prout nonnulli, sed rudes ipsi, falsò opinantur, quibus furere animo, temerè aggredi, & aliquid per fortunam assequi, fortitudo vocatur, modestius verò pro virtute, cautèquè ex prudentia agere, aut (hostem emolliendo) cunctari, metus nomen habet. Satis ad solvendam quæstionem, quivis horum lector, adferat, quantum supra nihil legentes, habeat ipse, dum hæc mea legit, nam aliàs, sola praxi assequi, quæ tot historicorum & temporum observatio congestit, Duces armorum experière, aut nimis ferum sit, aut planè impossibile; Sed universim loquendo; si vitæ simplicitas, tum rudis genius prosit, & naturalis furia, impetusquè in bella sufficiat, procul dubio, leones, tauri, tigrides, ursi, lupi, & similes ferarum, quibus per effusum sanguinem, per contemptum vulnorum, in ultionem exagitatis, vincere est, multum sint supra fortitudinis virtutem, quæ nisi homini convenit, cum aliàs in bestiis, non sit virtus *fortitudo*, sed potius rabies, aut simplex vis, & *naturale robur*; Velut proximè bestiarum rabiem accedunt, ii quoquè hominum, Turcæ videlicet, Persæ, Scythæ, Afri, & quicunque barbarorum, qui vincere nesciunt, nisi iteratas millium decades, unico conflictu, aut occidant de hoste, aut de suis amittant, sanguine, non virtute, nec arte, vel prudentiâ, victorias mercaturi, strages & excidia populorum spectare, animositatem vocitantes, *cum solitudinem fecerunt, pacem appellant*, Quo solo, Catholica bella à barbaris differunt, nec Catholica sint, si ea rabie gerantur. Prudentibus verò Ducibus, parsimonia etiam vilissimi sanguinis, esse debet, tempus potius, impensas æris, bellandi artem,

artem, quàm suorum sanguinem, parandæ victoriæ impendere malentibus; Brutorum est, unguibus, calce, cornibus, dentèquè, mutuo se ferire, & prævalere viribus, dum pro feritate, non ex arte luctantur, hominum verò (quis verò illos feros, fanie nutritos, hominum in ordine ponat) est ingenio cum arte certare, & vincere. Cum verò barbari, totum in belli furia, parum in arte reponant, unico aut altero commisso prælio, nihil reliquum habent, nisi ut amittant sua tota, aut parent aliena regna, velut Orientales Historiæ, & Africanæ, passim exempla nobis suggerunt. Contra Christianos verò, quibus artes, studia, libri, & ex eo, prudentia rerum gerendarum valet, non est par illis successus, nec aliquid contra valerent, nisi mutuis inter nosmet ipsos agitaremur, & conficeremur dissensibus. Veluti Hungaria sufficiat in testimonium, de qua obtinenda, tanto tempore Turcarum furia conflictatur, hominum & æris stupendâ impensâ, rem Christianam aggrediendo, nec tamen possedère totam, cum quod deest viribus, supplet ars, in fortalitiis, in fæderibus, in cunctatione, seu elusione, in prudentia ponendorum castrorum, in fossis, in ordinatione pedestris phalangis, pilis circumseptæ (quæ sola; mobilis velut murus est, & equitem spernit) in tormentis deniquè, & miris inventis ignium; Videre interdum est, quàm levia ex arte belli ordinata, maximos exercitus barbarorum sustinere, aut avertere possint. Polona exempla in rem serviant, contra Moschovitas, Turcas, Scythas, bellando practicata; *Cecortiana* expeditio, dein *Cameneensis* contra Turcas, illa *Zolkienskio*, hæc *Konieczpolskio* Ducibus gesta, satis loquantur; (*velut in Notationibus meis Polit. Puncto VII. intimatum*) sed in barbaris quoquè, eos bellicosiores videas, qui plus rerum prudentiæ ex libris hausere, Machometes, Selimus, Solimanus, Cæsares Turcarum, Curtium de rebus Alexandri, Julium Cæsarem, & alios Historicorum, Turcicâ linguâ versos, inter bellandum, peramantèr lectitarunt, nec Mathematicarum artium rudes, tantòquè plus supra suos majores gessere, quantò artium studiis, essent superiores, quæ honestatem animo ingerunt, ingenium acunt, solidant rationem, & in rectè faciendâ, consilium firmant. Vel si pro naturali judicio, longoquè armorum usu, altiorum literarum



imperitis, magna fecisse contigit, quis dubitet, corundemet facta; plus nitoris & soliditatis, perfectiori habendæ gloriæ, fuisset obtentura, si nobilem animum, studiis (maximè verò lectione Historiæ) perpolivissent in melius. In summa, quidquid est bellicæ scientiæ perfectioris; non à barbaris, qui sunt artium rudes; sed à Christianis repertum habetur, ars videlicet fusilis tormentorum, ignium belli inventa, arietes sulfurei, cuniculorum & fossarum ex arte ducendarum usus, & peritia, tum alia plura, quæ nisi medias inter politiores Christianorum artes, & studia nasci amant. Quid pluribus? cum sub oculis, res sit domi, nos quoque Polonos, tantò supra collimitaneos nostros, Moschovitas, Moldavos, Turcas, Tartaros, & alios populos, bellando valere, quantò sumus ingenio, & honestioribus studiis superiores. Dùm verò cum Occidentalibus, nobis ingenio paribus, res agenda venit, non tam promptè videmus, fortunam nobis in bella & victorias famulantem, nisi multo labore, & virtute paretur. Quia verò, status olim Urbis Romanæ, tunc præcipuè declinavit, cum studia & bona ingenia viguere, factum, non ab occasione literarum, quæ ingenium perpoliunt, & frenant animi passionem, vel moderantur, sed quia in ea tempora inciderunt, dùm ob magnitudinem imperii, civium ambitio (per administrationem longinquarum ab urbe, & ab æqualitate Provinciarum) legis, paritatisque nescia, ab obedientia dissuata, civiliem modum supergressa, dando jura populis, quàm ut sibi, inter concives darentur. Deindè opes aliquorum immensæ, in Urbem importatæ, in partes & clientelas distraxerunt civitatem, luxus, avaritia, superbia, irrepere; Exindè inter potiores orta æmulatio, dein collisio animorum, & legum (per insolentiam, *artemque evadendi*) contemptus, publicorum super hæc proventuum, in privatos usus distractio; Utque privatum statuunt, dum evertunt publicum, armorum sequebatur conflictus; Præsertim post debellatum Orbem, non ampliùs externis curis occupati, neque metu distracti, per otium domi sibi hostem, cum pepererunt, quem non habuerunt foris, ut post corruptos mores & homines, necessaria publici status corruptio sequeretur; bonæ leges interim, intra volumina manserunt, sibi innocuæ (velut regula aut simulachrum liber-

libertatis, non ipsa libertas.) Civium verò protervia, prævaricatio, insolentia, prisca moris contemptus, *novitas*, privatas domos, forum, curiam, castra, occupavit & subvertit libertatem; In rem aptè Cornelius Tacitus (Lib. 2. Histor.) *Rebus modicis, æqualitas facile habebatur, sed ubi jubacto orbe, & æmulis urbibus, Regibusque excisis, securas opes concupiscere vacuum fuit, prima inter Patres plebemque certamina exarsere, modò turbulenti tribuni, modò consules prævalidi, & in urbe ac foro, tentamenta civilium bellorum. Mox è plebe infima, Caius Marius, & Nobilium sævissimus Lucius Sulla, victam armis libertatem, in dominationem verterunt. Post quos Cneius Pompejus, occultior non melior. Non obsint certè honesta studia, & librorum usus, libertati, tum virtuti bellicæ, sed eam juvent, ars videlicet concinnè loquendi, suadendo, dissuadendo, animando, fœdera parando. (Eloquentiam communiter vocamus, Dominam id est, hominum & rerum, dùm animos hominum, pro arbitrio, velut freno ducit, aut coërcet, rebus formam qualem vult imponit) deindè *Ethica*, quæ virtutum vim, decusque insinuat, vitiorum turpia demonstrat, & vitare docet. *Geographia* præterea, positiones terrarum, flexus marium & fluviorum, opportunitates locorum, enucleat. Dein *Geometria*, quæ mater est Architecturæ militaris, cur non juvent bellantem? ac super omnia, *Lectio Historiarum*, quomodo non prodest legenti? cum hinc eventus rerum, consilia belli, pacisque eruuntur, præsertim dùm non antiquorum modò lectioni (velut ad summam prudentiam, satis habituri) immorantur & persistunt, verùm discere impensius cupiunt, quid recentior ætas, nostræque idèd praxi, per familiaritatem proximioris ætatis, & rerum, accommodatior, togâ & bello possint, perficiendo; Quosvis meliorum Scriptorum, necesse *lecturi*, non semel, sed *tertiò*; Qui semel legit, nescire vult. Prout enim, tres sunt potentie animæ rationalis; *Memoria* videlicet, *Intellectus* & *Voluntas*, sic nisi terna lectione impleantur, illisque satis fiat; *Primalectio*, simplicem mentis intuitum, velut incognitæ rei admirationem, & *memoriam* movet; Altera penitus *intelligere* facit. Demùm *lectio tertia* voluntatem, ad imitandum intellecta, si bona sint, seu ad vitandum, si mala, permovet; Repetita igitur esse debet lectio; ut rectissime*




facræ paginæ verbis dictum sit. *Accipe librum, & devora illum.* Undè pro Methodo nostri sæculi, consilia matura, recentium præsertim lectione, hauriuntur, nam vetera, eoque à nobis remotiora, admirationem pariunt, recentiora magis serviunt ad praxim; tùmquè primùm mens humana & iudicium, supra res humanas, & casus ascendens, probè decernendo seipsum noscat, & miretur; Verùm scire, ad rem applicare, is demùm lectionis, & per universum cujusquæ scientiæ fructus est, animum præsertim promptum & facilem in exequenda, firmumquè si habeas; memoriâ nudâ tenere, quod legisti, quid juvat? aut cui bono est? præterquam curiositati, vel confabulationi mensarum servit, præstat pauca scire, in rem applicare, quàm multa meminisse tantùm, hoc est beneficium simplicis memoriæ, illud recti iudicii; velut alibi copiosius egimus. Non improbem Polonam militiam, cùm passim hic Nobilitas, bonorum studiorum cultrix, equo meret, rari sunt in equitatu, qui non Latinè, & utrâquæ linguâ concinnè loqui sciant, nec tamen illis ad fortia, quidquam obest, immò felicem Patriam milite, cui ex bonis artibus, major notitia honesti inest, ut generosius agant pro gloria, quàm si aliàs fex populi, *servilis, non filialis obedientia*, rudis, popinaria, brutalis, recti & honesti nescia, in militiam legeretur. Vidimus hac ætate, cùm per diutina bella exhausto ærario, sine stipendio promptè militarent, periclitarentur, vincerent, & cùm multas emeritas æstates deberi docerent, vix trientem, à Republica solvi peterent. Immò, quod in gloriam gentis dictum sit. Cùm anno Dei nati *M D C L V I I*, translato Suetico bello in Prussiam, positis propè Dantiscum castris, penuriâ rerum, ac præsertim equorum defectu, miles laboraret, ex eoquè stipendium, à Rege, solvi peteret ardentius, ille verò, prævio *residentis Senatus* consilio, pecuniam apud Dantiscanos, creditò habendam quæreret, milites confestim ad Regem, Senatumquè misere. *Malle se inopiam bellando ferre, quàm eò rem deducere* (nam Dantiscani, supra privilegia Poloniæ Regum, novum aliquod cum adiectione terræ, in vim creditæ pecuniæ, petebant) *ut sui causâ, palmus terræ alienaretur, pro cuius commodis; virtute militari tantoquè periculo contenderent.* Tandem, ut concludam; Verùm quidem esse, si passim studia

(præ-

(præsertim quæ seculativæ scientiæ, & disputationi Scholarum, non politicæ praxi serviunt) in vulgus inferantur, emollitura vulgi animos, verùm Ducibus, altius studium quid obsit? aut quare non juvet? in quorum capite, summa rerum vertitur; necesse summa sciant, qui omnia regunt. Idquè *cum modo*, nè fiat, prout succensitum, *Alphonso sapienti Hispaniæ Regi. Correxisset Alphonso motum trepidationis in cælo, at Regnum suum, emendare non potuit, orbem cælestes ingenio penetravit, at oblatum sibi (à fama sapientiæ) Romanum imperium, dein coronam hæreditate partam, domi tueri non noverat. Sultanus Aegyptius, famâ illius permotus, legatos ad illum misit, cum amplissimis muneribus, interim in proprio ipsius Regno, omnes propè Castellæ civitates, ab obedientiæ officio descivere. Sic fieri affolet, ut Principes, studiis, plus æquè dediti, existimationem apud exteros (qui superficialia nisi vident, & mirantur) sibi concilient, perdant apud subditos, dùm facta hæc aut illa, penitus introspiciunt è proximo, nec concordari cum sapientia vident.* Tales enim libris immerfi, *praxim intermittunt*, quæ regendo magis præstat, quàm speculatio; Axiomata & maximas regendi, ex libris sibi statuunt, præsumptione doctrinæ pertinaces, alieni consilii contemptores, dumquè illis à fecunditate ingenii, multæ rationes pugnantes inter se occurrunt, timidos reddunt, & libertatem exsequendi confundunt.

### Proximùm addere, Quod sequitur.

 Es cadit in quæstionem. Quid sit majoris prudentiæ bellicæ? Potentesvè urbes expugnare, an aperto prælio, scire hostem vincere. Qui rem altius pensat, posteriori parti, plus esse strepitus & nominis, anteriori fateatur, plus inesse rei, nam altiore requirit belli Ducis prudentiam; ut necesse, per omnes belli artes, sit prudentiâ & ingenio, Dux, universalis. Qui expugnat, supra & intus terram, luctari contra hostem debet, contra fossas, vallum, munimenta, aquam, ignem, quasi contra elementa pugnaturus, simul contra homines, & contra ingenia, constantiâ deindè bellandi opus, nec horarium ingenium,



nium, aut accommodata in tempus furia, obsidendo valet; contra injurias coeli pugnatur, & contra tempora; Frigus, calor, autumnus, hyems, non obstant expugnant, sed perpetuus adest labor, contra aperta, multoquē magis agitur, contra hostium occulta; nec labore vinci, nec perseverantiā fatigari necesse. Diu, noctuquē simul in hostem agendo, simul ejus molitiones & prudentiam eludendo, ut per omnia, obsidendo plūs possit virtus, quā fortuna. In praeliis campestribus, non item, aperta omnia sunt, idēquē simplex audacia prodest, adhibita modō instruendae aciei, & ordinandorum subsidiorum arte: Plūs agit fortuna, velocitas, & belli furia, quā prudentia, plūs occasio & impetus, quā consilium. Aequalia sunt omnia, non obstat murus, aqua, fossa. Non longā deinde opus perseverantiā, sed aliquot horarum labor sufficit, & decedit de successu. Manuum plūs, quā ingenii res est, terror adhuc pannicus, casus inopinatus, error, & levia in speciem instructa, multū ad praelia conferunt. Qui habent scientiam campestrium praeliorum, velut multos nobis videre licuit, non perindē sequitur, ut expugnare munimenta sciant, nam is inferior militaris prudentiae gradus. Scythae ad campestria praelia nati, per levia munimenta, facillimē contemnuntur, quae verō gentes, aut qui viri, expugnare munimenta sciunt, his in campestria praelia, scientia par est, & terrorem majorem secūm ferunt. Nihil illis resistere potest, cū tota virtus bellandi, eō concurrat, ut sit Dux belli, obsidendo perspicax, cautus, cunctator, perseverans, audax, prudens, inventiosus, se defendere, & alium offendere, post casum assurgere sciens, nec vanis terculamentis eludendus, vigilans, disciplinam servare gnarus, contra occulta & aperta, agendo promptus, annonae comparandae providus, armorum & apparatus belli curam habens, architecturae militaris, ducendo ex arte vallo, tūm promovendis accessibus peritus, acquirendo & retinendo instructus, igne, machinis, manu, cominus, eminens, militem agere, & exercere valens, hic tormenta muralia, hic cuniculi valent, hic praeliari simul per excursiones, & expugnare, cavere simul, & agere oportet. Julio Caesari, tantū nominis peperit, expugnatio *Alexiae*, quantum reliqua omnia. licet ingentia, tota vitā gesta,

ait

ait Vellejus. *Ad Alexiam à Caesare sunt gesta, quae incipere vix hominis, perficere nisi Deorum foret.* Solimani secundi Turcarum Principis, plūs inclaruit nomen, & disciplinata militia, per expugnationem Rhodi, Budae, Belgradi, Albæ Regalis, Zigeti, munitissimorum locorum, quā ejus antecessorum, per subjecta (praeliis campestribus) pro insolenti fortunae eventu, regna. Alexander Pharnesius, per omnes belli artes aemulus illius magni, sola tamen expugnatione Antverpiae, seipso extitit major, ut quasi unicum ejus gestorum, orbis in admirationem circumferat; Ambrosii Spinolae nomini, totum adstruxit ad hominum memoriam *Ostendae* expugnatio, & *Bredana*. Ludovicus XIII. Rex Galliae, circa obsidionem Rupellae, in exstruendis operibus, & subjugando mari, nomina victoriarum suarum supergressus. Noster Joannes Zamoyskius, expugnatione *Polociae*, *Velulukorum*, *Zarrolociae*, *Velhae*, & (nē multa commemorem) obsidione *Plescoviae* in Moschovia, ac deinceps in Livonia, tot arcium ex arte militari captarum nominibus, plūs ad famam rerum suarum contulit, quā aliās vigesies (aut plūs) apertis praeliis victor.

Huic cognatum addere. Quid praestat magis? *Virtusne togata, an militaris? Conservativa, an Acquisitiva.* Artes pacis, an artes belli. Velut caput praestat manibus, & reliquis membris, velut ad clavum sedens Navarchus, valet supra operarios, & remiges, & Architectus, supra fabros, sic togata prudentia, est supra militarem. Uti cerebri aut intellectus, sic *toga*, quasi insensibiles sunt operationes, manuum motus evidens, sed tamen inferior est, nam ab illo dependet. Hic valet fabula Menenii Agrippae, ad tumultuantem populum Romanum, de jurgio artuum, contra desidem, & velut nihil agentem stomachum, cū postea languente stomacho, artus languere, ut per consequens, sedentariam ejus operationem, praerferrent suae.

Ut deinde *Acquiramus* Prudentia in eo proficit quærentis, sed pleraquē affert occasio, casus, hostium ignavia, disordo, dissensus; *in retinendo*, totum sibi vendicat virtus; Casus, occasio, nihil in eam partem juris habent, non enim contra vitia, sed magis contra virtutes hostium providendo, nē subvertamur, immō pugnandum, simul contra vitia suorum, rem in ordinem redigendo,

Z

do,



do, ut idèd, contra utraqùe causas, simul agendum sit, exter-  
nas, & contra internas. Res conservantur sola virtute & pruden-  
tia, *acquirendo*, in audaciam, etiam licentiosis, & scelestis (pro  
impetu) jus esse potest, ac plerumquè succedit. *Inturbas & dis-*  
*cordias, pessimo cuiquè plurima vis, pax & quies, bonis artibus indi-*  
*gent.* Acquirimus deindè per partes, conservamus simul per totum,  
quod majoris operis & prudentiæ. Alexander magnus, intra pau-  
cas ætates, subegit Orientis orbem, quem retinere non potuit,  
quærebat, unam ex alia Provincias, à quibus profectus est, in  
surgebant contra, undè meritò illus, quasi nesciret, *majoris es-*  
*se, quàm quærere, paratueri.* Cùm fortè novum sibi orbem, non  
offerri doleret. Fabio cunctatori, totum quod postea magnum  
fuit, debuit Roma, huic soli *Maximi* adstruxit nomen, posthabi-  
to *Marcello*, *Scipione*, & aliis magnis Ducibus, qui Annibalem  
vicerunt, Carthaginem, hostium sedem subjugarunt, cùm Fa-  
bius non vicerit, sed vinci ad extremum Romanos præpediverit,  
idedquè *Conservatoris*, & *Maximi*, solus nomen meruit, invales-  
cente dicto: *Unus homo nobis, cunctando restituit rem.* Utiquè præ-  
stantius; leges & libertatem conservare, quàm parare, multi po-  
puli eam peperere sibi, pauci qui diu servare potuere. Conduci-  
bilius verò, si leges sint in observatione, quàm ut mutæ, in le-  
gum volumina, & velut nihil valentes inferantur, in speciem ve-  
rius partæ immunitatis, quàm ut verè habeatur. Quia verò plùs  
nominis habent in vulgus, qui bello acquirunt, quàm qui conser-  
vant, sit, quia tacita consilia, sunt conservantium, acquirentium  
actus manifesti, & cum strepitu fiunt, idèdquè in oculos vulgi,  
magis incurrit. Conservationis natura consistit, in secreto agen-  
di, consule, tùm obviandi, quæ uti vulgus non advertit, nec  
etiam pensat, nisi posterior ætas, successum detegit, in gloriam  
conservatoris, idquè in prudentiorum animis. Adde, quia ex no-  
vitate victoriæ, & acquirentium, magis moventur animi, quàm  
ex diutina conservatione, cui dudùm inhabitat vulgi animus, na-  
turale verò, ut præsentia bona, non sentiamus homines, nisi  
amissa. Sic delectamur parvorum torrentium aspectu, ex novita-  
te ludentium per saxa aquarum, quàm aliàs magnorum fluviorum  
tacito cursu, cùm ditem aquam ferunt, fructu hominum majore,  
in

in commercia & navigationes, portandis navibus. Deniquè, in  
acquirenda facilè quisquè fertur, dùm plausus populi sequitur,  
invitat præda, multi jòvant, & ipse sibi animus agentis, in acqui-  
rendo, contentamentum parit. *Conservatio* secùs, sine vulgi  
favore est, ut tristis, invisibilis, & incognita, immò sæpiùs in-  
gratitudinem meretur, aut quasi necessario post se trahit, civium  
odia, dùm in vitia populi, severitate legum pugnatur, pleraquè  
habet impedimenta, & molestias, ex collisione partium; Idèd-  
què perfectioris hominis est, ea in parte desudare, amore solo &  
intuitu virtutis, boniquè publici, quàm ut pro captanda vulgi au-  
ra, laboretur. Nec omitam addere, dùm in acquirenda avidius  
ferimur, vertente se fortuna, (quæ inconstans est) hostem potiùs  
irritamus, bellis implicamur, immò quandoquè, nostra prodi-  
mus. Veneti, dùm in artes *Pacis* sunt intenti, & *conservando*  
quàm *acquirendo*, plùs laborant, florent diu, ut eorum rationes,  
confundi sit necessum, qui conversionem statuum, intra certa  
tempora ponunt, cùm illi, artibus pacis intenti, tot sæcula super-  
gressi sunt, florentes, & incorrupto statu. *Acquisitio* quidem, ma-  
gis audax, sed *Conservatio*, magis cauta, idèdquè securior & cer-  
tior sibi, minùs impetus, sed plùs considerationis habet. Plùs  
utiquè, apud prudentiores valet, non ægrotare (conservare id  
est sanitatem) quàm sanari. Quia verò, per ora hominum æsti-  
matius incedunt, qui ægrotis, acquirendæ sanitatis prompta præ-  
cepta ferant, quàm si fortè, ed profectionis venirent, ut nun-  
quam ægrotare, sed inconcussam sanitatem ducere, certissima mu-  
nirent nos per antidota; sit, non quod sanari, quàm non ægrotare,  
sit præstantius, sed vitio non sat perspicacis in solidiora ingenii,  
verùm per superficialia rerum diffusi, dùm enim ægroti sanamur,  
convalescere alieno beneficio nos putamus, benè valere, nec  
ægrotare, tantùm credimus nostro, & non potuisse sanari, nisi  
cum aliena ope, cumquè medico, potuisse verò non ægrotare,  
nec cadere, etiam sine illo, facilè creditur, nihilquè illis debere,  
nos idèd putamus. Deindè, dùm benè valemus, non æquè pen-  
samus præsens bonum sanitatis, absentia mali & contrarii, quàm  
secùs appetimus ægroti sanitatem, tædio præsentis morbi, & ab-  
sentia boni, non ægrotare verò, sed retinere sanitatem, est pri-



mæ felicitatis, posterioris verò, amissam nec habitam, aut acquirere, aut reparare. Prius & securius est, non cadere in puteum, posterius extrahi, prius nostræquæ virtuti, vel prudentiæ magis debitum, *non delinquere, nec errare*. Ultimarium verò (& in aliena jam potestate) *Absolvi*; Quis idè cecidit, ut extraheretur? quis ut sanaretur, ægrotavit? quis deliquit periculosè, ut absolveretur? Prius item & nobilius est, in statu politico, conservare, nec amittere sua, quàm acquirere, vel petere, aut rapere aliena. Demùm vis Conservativa, utrasquæ complectitur artes, Togæ & Belli; Acquirendo, sola belli ars, in rem confert. Plùs idè nominis, in orbe sibi peperit, & de re Polona mereatur *Sigismundus primus Rex*, qui (bellando felicissimus, nec nisi vincere sciens, nam universi Principum Christianorum belli, contra Turcas, Dux & caput, à Pontifice Leone X. destinabatur, sed tamen artibus conservandi, & consilio pacis, plùs potens) florentem administravit rem Polonam, quàm *Boleslaus Kriwoufius*, solo acquirendo potens, licet ad stuporem orbis, quadragesies septies, in diversas gentes, Germanos, Bohemos, Russos, Pomeranos, Moravos, magnis præliis victor. Sed tandem rem claudam, testimonio Livii. *Excellentibus ingeniis, citius defuerit ars, quàm Civem regant, quàm qua hostem superent*. Dixerim adhuc. Conservationem creaturarum, non minoris esse omnipotentia, tùm Majestatis Divinæ, quàm creationem. Immo pluris stetisse *Conservare*, vel *salvare* hominem, quàm creare.

## S U P E R H Æ C.

**R**Em exteris ignotam, & nostris hucusquæ non discussam, omittamne? Minimè; videlicet. *Militiam Polonam Equestrem, non Monarchicâ, Verùm Aristocraticâ formâ regi*. Miraris dictum & modum? loquor clariùs. Ordo militiæ pedestris, ab exterorum more & norma, nuper mutuatus Polonis, exterorum quoquæ ad modum, absoluta lege habetur, dùm scilicet gregarius miles, Præfectorum jussis, monitis, poenæ, gladio, sine ulla exceptione subjectionis, corpore & vita subest, vel (ut rem verbo expe-

expediam) planè Monarchicâ, seu Despoticâ potestate habetur. Equestris militiæ, nobis altior fors est, dùm Aristocraticum ad modum regendi, per ingenuitatem, componitur illa. Nobilitas hic, equo meret, non gregariorum, aut *Turmalium*, sed *Commilitonum* sub nomine, sic à Præfectis turmarum, sic à belli Ducibus vocitantur. Primi ordinis igitur (seu *Commilitoneus* ut hoc nomine commodiùs utamur) Eques, binos, ternosquæ famulos, prout cum Præfecto turmæ, pacto stipendii, conventum habet, post se ducit, armis, equo, pro usu belli, æquæ pares, dignitate & ordine certè subalternos, quasi dicas *subequites*, ut hi, gregariorum, seu posterioris ordinis, vel *Turmalium* nomine, commodè indigentur. In *Commilitoneum* equitem, monita Præfectorum generosa, nec extra honestatem dicti valent, aut si quid gravius, in ordinem militiæ, tùm immodestiam frumentandi peccatum, convocatur turmæ commilitum, assidetur Præfecto, per sententias discutitur delictum, rectoris disciplinæ ordo, ex assensu mutuo, statuitur. Reprehenditur commilito, deprecatur ille palam collegium, dein pecuniariâ multâ, vel abjudicatione stipendii, injunctioe alicujus gravioris operæ militaris, aut deniquè notâ aliquâ ignominia, punitur, sanguinis tamen poena, solis Ducibus belli reservatur. Ut in formam militaris senatuli, convenire dicas, si personas, ingenia, belli consilium, si honestiorem equitum (præsertim hastatorum) cultum, per omnia videas. Leven tunc poenam, & judicium aie? falleris; Altior nostri equitis nascendi fors est, quàm ut ignominiam, ipsumvè judicium, levis poenæ loco, habere possit; Non Urbium quisquiliæ, aut popinaria turba, vel rucolarum vulgus, in equestrem militiam legitur, (quibus pro servili ingenio, ferè jumentorum in morem, nisi pugno aut verberare, gravitas correctionis, necessitas jussorum, tùm honestas facti innotescat, aut secus turpitudine distinguatur) verùm honoratam militiam, ditis patrimonii pubes, & senatorum filii sequuntur, post literariam arenam, debita primæ ætati martis exercitia, pro genio gentis practituri, togæ posthac, altioribus consiliis, & officiis, per gradus adhibendi. Quid mirère igitur, in equite nostro, vestem holosericam, argentea passim frena, equos pretiosè phaleratos, arma per omne decus, & belli



opportunitatem expedita, dum hæc ditis patrimonii, & ingenuitatis, non luxuriantis castrorum disciplinæ, signa. Immo adituri prælia, in altitudinem quandam animi compoliti, compti militaribus armis & ornatu, hostium in oculis, haberi malunt, si captiventur, æstimandi, si moriantur, pompam, sibi non inglorii funeris, præmiumquæ periculi, dum cadunt non inulti, percussori laturi, aliàs deserturi ingloriam militiam, si serviliter, aut neglectiore cultu haberentur: Sic non ab Umbraticis gladiatorum, pugilorumquæ Scholis, & urbana mollitie, in ostentationem affectatam, verum practico periculo castrorum, usum armorum contrahunt, sibi exercitio, communi Patriæ, servitio profuturi, ut milites, & exercitii in hostem, prodeant pugiles. Dicam alius. Commilitoneus eques, non Præfectis turmæ, sed belli Ducibus, est honori, non removetur à mensa, & Ducum liberaliore in tempus à convictu, idquæ incorrupto potestatis honore; Alloqui cum honore nominis, non est infra Ducis Majestatem, ut suprema Ducum potestas, non in vitam & corpora modo, à puniendi potestate, verum ab altiore cultu, extendatur in intimos animos. Amat eques gratiosam Ducis urbanitatem, pro ingenuitate, simulquæ pro sorte militaris subjectionis, irati poenam reveretur, idquæ filiali cultu & obedientia, non autem servili pavore. Nec subindè mirère, si passim nostrorum in annalibus videas, paucos Polonorum numero, magnos confectos hostes, & finita bella, cum sua cuiquæ ingenuitas, ab intra, monitoris loco, dein ab extra, timetur ignominia, dumquæ respicit miles, Ducis punitori potestatem, duplici incitatus stimulo, fortia meditatatur & exercet, dum inquam nobiliores & honoratæ animæ suæ libertatis gratiâ toto periculo vincendum contendunt, signa & bellum, pro gloria, spontè sequentes, præmium victoriæ paterna ex fortuna, & ex quiete abundè habituræ; Plebejæ aliàs & collectivæ per fora manus, ingenuitate minimè attolluntur, dum sibi post victoriam, eandem servitutem, vel ignotam sortem, & inopiam, restare sciunt, quibus nulla post bellum domus, nisi fornices, anguli, vel popinæ; pacem idè sine præda, intraquæ legis normam, otiosam & *Novercam*, turbas ac bellum, lucrosam & *Matrem*, per usurpatam licentiam vocantes; idèquæ trahi, quam

geri,

geri, unicè præcupiunt, aliud ex alio quærunt. Intuere hodie nostras (externæ militiæ sub nomine) legiones, & fateare. Itaque pro curiositate aliquorum, aut potius pro intuitu pedestris militiæ, increbuit ratiocinatio, conducibilius forè expeditiori militiæ, sublatâ Aristocraticâ regendi formâ, reddi Præfectis turmarum, Monarchicam potestatem; sed maximè falluntur, cum seu bella spectas, non obstante hoc, tot olim, & nunc feliciter gesta reperias, labores militares, inedia, frigora, & per universum, incommoda belli (cunctando, seu celeritate promovendis armis, intra penuriam sæpius detenti stipendii) patientissimè obedientiam intra, tolerata: Nam Præfecti, in tantum ductandis equitibus absoluti, in quantum intra prudentiam, & cum autoritate amorem, regendo dextri. Si ad ingenium nationis, militem nostrum habeas, sunt velut generosi & domiti equi, spontè levi freno reguntur, nec molestiam sessori faceffunt, aut si contigit, armis succubuisse, belli capitum errori, non militum adscriptum ignavia. Adde, Monarchicâ Præfectorum in milites potestate, non modò supprimi generositatem militis, dum serviliter habetur, sed castrorum vires distrahi, numerum ordinum minui. Sæpè, avaritiâ Præfectorum, intervertuntur militum stipendia, dein commeatus, & hybernorum commoditas, sibi tantum arrogatur, legionarius verò, querulari veretur, aut si liberiùs proloquatur, seditiosi nomen, & tumultuantis imponitur, non quia verè sit, sed quo sub prætextu, ab iratis (ulciscendæ querimoniæ) in corpora liberiùs sæviatur. Exindè, peditum Præfectos, communiter, sagis militaribus, apparatu, epulis, luxuriari videas, cum peditatus, centone sæpè tegitur, aut subitarius panis, pellendæ fami, tum ægris debita cura deest, hinc pro alimentorum penuria, velut concessa è proximioribus stativis, in commeantes, itinerum latrocinia, furta, rapinæ, rari deindè ordines, signa numero mutilata, disjecta, dum quotidie deferuntur, novi interim substituuntur tyrones; Raro veteranum legionarium videas, tum hi, eodemmet, conficiuntur defectu; non Martis, sed Præfectorum avaritiæ, victima casuri. Atquæ hic est fructus, Despoticæ in legionarios potestatis, placet tamen aliquibus illa, certè non ex publico usu & bono, sed à superba potestate in milites, ab odio

parita-



paritatis, & à peculatu privato. Equitum Aristocraticus ordo, aliter fert stipendia, commeatus, hyberna, mutuo cum Præfectis scitu, ordinantur, dividuntur; instructior exinde est, armis, equo, veste, commeatu, ut cunctatione gerendo bello, facile sufficiat indefessus, adest illi pro ingenuitate virtutis amor, & spontanea militaris modestia; Cum legionariorum ægris, & cadaveribus, passim castra, viæ, sternuntur, Equites integri redeunt; Immo, status Politici ratio, in eo (quod mirère) versatur, non enim nobilis eques, instrumentum potest esse, invertendæ per vim, aut occultas machinationes, publicæ libertatis, secus legionarii, in quos Monarchicum Præfectorum jus est, quo trahuntur, & transeunt Præfecti, æquam, iniquam partem, & factiones, necesse isti sequuntur, nec (durius etiam, & iniquè tractati) hiscere audent contra; Obedientiam legionariorum promptam, nonnulli tunc vocant affectatè, cum potius, vis servitutis, & necessitas silendi adest. Immo, placet illa, quod eo prætextu, prisci vigoris Poloni, exercitusquè virtutem infringere, aut (pro numero advenarum) præponderare, inter artes sit. En pestem novam libertatis, ab ingeniis *pseudostatistarum*. Mira credo exteris loquor, ænigmati velut sub nomine, verum non nostris, hodierna qui sciunt. Dicerem exempla. Præstat obductas recentèr, non scalpere ampliùs, nec exulcerare cicatrices.



Iterum

Iterum LECTOR salve, & vale.

**E**Xtra Materiam belli; Verum non erit extra fructum, apponere Epistolam: Complementum, Politico-Moralium (typo nuper vulgatorum) Lectori ferentem. Quanto fructu legentium feratur, vel (absit) damno reticeatur? Vide, lege, nec inficiare.

ANDREAS MAXIMILIANUS FREDRO,  
CASTELLANUS LEOPOLIENSIS

Illustrissimo

CASIMIRO FLORIANO

Duci in Czartoryisko & Cleuan, Episcopo Cuiaviæ,  
Senatus collegæ, & confratri, salutem.

**P**Lacuisse tibi Illustrissime Præsul, opera mea Politico-Moralia, non amoris modò mihi, sed etiam est honori, illud amici pectoris signum, accepto, hoc iudicium tui & prudentiæ, documentum; vel iterum, non pigeat (si quæ paro) proferre in palam, si mea in Lectorem talem incurrant, si Lector talis, in mea visenda, lubens feratur. Vel tuo solùm iudicio, contentus sum, qui senatui nostro, facem consilii præfers & doctrinæ, pro Ecclesia Dei verè præsul, & pro libertate, incorruptus senator; Expers odii, expers studii privati; Regis gratia,

A a



gratiae, quā licet cupitor, quā non licet, etiam offensa infraetus lator; Deus, Lex, Libertas, dūm tibi agendi, dicendi est scopus; Tales consulant, & Respublica diu felix esto. En igitur, gratitudinis meae, erga Virtutem, nomenquē tuum, quā civis, quā senator, quā pars sum Reipublicae, documentum; Complementum videlicet Politico Moralium, breve ut otium capere potuit, indoctum vel quoquo modo probandum, prout mens in se retracta, incaluit, prout rectior genius suggestit, prout scribendi occasio suasit, prout cura Reipublicae, quam vivimus, agimus, & privatorum casus, materiam subministravit. Lege igitur sospes, vive diu, & me Ama.

ANDREAE MAXIMILIANI FREDRO,  
CASTELLANI LEOPOLIENSIS,

Politico-Moralium, Complementum.

I. **D**iffimulatio & Taciturnitas, authoritatis parandae, servandae, Mater est, & compendium, prout secus garrulitas, causat levitatem, damna, nimiam familiaritatem parit, & contemptum; Qui tacet, non proditur, utrum excipiendis rebus adversis, dictisque, sit mollis, vel ignavus, aut per magnanimitatem erectus, fortis & audens, non tristis, impotens, confusus, obliquus, metuens. Nescitur remne intelligat, sciens respondendo, aut faciendo potens, vel secus haesitet stupens, sic per omnia tegitur ignorantia; Neminem offendit dicto, rerumque inani censurā (improbans audita, visaque, & facile succensens per levitatem, aut ex malignitate) nec vicissim seipsum prodit, cui offendatur, unde alienentur amici, loquendi contra, tūm agendi, habituri causam, vel necessitatem, irritati. Sæpe loquendo, & nostros prodimus, & alienos irritamus affectus, unde

unde causa hinc, illinc, respondendi, immo contra insurgendi acerbius, in læsionem authoritatis, vel periculum comparisonis. Dūm verò subticemus offensi, infra magnitudinem nostram intervenientium levia ducentes, sat grande habituri, si non vindictae, saltem dissimulationis præmium, namque specie inoffensae amicitiae, prout alienas facile retinemus, aut provocamus amicitias, etiam authoritate tacita, cohibemus dictorum, factorumque offensas, non enim in eum facile insurgit quis, sed verecunde quoquo modo respectat, quoāduſque putat sibi amicum. Nemō gratuitō, cuiquam malus est, vel secus, nemō non alienatur, aut offenditur, quem offensum putat. Iterum dico. Taciturno, non tam properē parantur inimici, dūm non irritat materias & personas, nec proinde accelerat sibi mala, tūm offensas, dein facta & facienda, non prodit, verū secretō habet totum; Non facile scitur (dūm occultari praestat) quibus affectibus regitur, quibus expugnatur, amore ne? odio, ambitione, levitate, metu, cupidine habendi, aut vaniloquio. Impetu nē præterea in facta ruit, an tardius per desidiā vadit. Verbo dicam. Juvat per omnia ignorari, quae imperfectē intelligendo penetramus, dicto scimus, aut facto possumus, unde facilius aestimamur, dūm tacentes, non intelligimur, quam in partem perfectionis, aut secus, inclinamus, ut interpretetur potius & divinet vulgus, de nostris actibus, interiorisque mentis divitiis, & venustate, prout semper in personis honoratioribus, capit omnia in melius (nam quae non visa latent, quoquo modo bona, pro Magnifico habentur) quam ut plenē intelligat, aut penitus sciat. Si igitur monstrare non possumus perfectas virtutes, saltem taciturni, tegamus imperfectiōnem; aliquando, loqui prudentia, nobis videmur, cū dictorum facile arguimur, in prudentiores viros ex inopinato fortē incurrentes. Multa effata, rariū opinionem prudentiae pararunt, sæpius detexerunt imprudentiam. Tandem, ut omnia percurram; Taciturnitas intra prudentiam adhibita, compendium est habendae, servandaeque authoritatis, aestimationis Mater, velamen defectuum, prudentiae tūm virtutis alumna, consilii & executionis anima, quietis cognata faultrix, levitatis & odiorum fuga, contemptuum evitatio, altioris amicitiae ingressus, & cultos fidelis, facit



admirari homines, ut plus rerum expectemus, quiddam altius, illis inesse opinaturi, quos nondum plenè intelligimus. Dicam verbo. Tacere, pauca requirit, prudenter loqui, multum. Ergone tacendum inquires? tacendum dico, non semper, verum sæpius, intraque gravitatem magis, quam tristitiam, ut audiendo & respondendo (dum opus) simus prompti, eloquio venusti, idque in materiis familiaribus, aut si occurrant seriæ, bene prius, animo concoctis, nè dixisse magis, quam tacuisse poeniteat; Immo, pro paranda amicitia & urbanitatis fama, aliquos etiam ultrò laceßes verbo, facilem tui copiam facturum, qui alias, verecundiâ magnitudinis, arcentur ab accessu. Novi hominem, non certè postremis, cum in sermones & familiares discursus effunderetur, taceret verò seria, quæ præsertim effata, magnas sequelas post se traherent, non rectè intellecta, in alios discursus, aut ænigmaticam ambiguitatem non intelligendorum, sermonem deflecebat, & involvebat studiosè, *validus sensibus, & consultò ambiguus*, pendulis sæpius, quam limitatis sermonibus usus, rerum auctoritatem, sustentaturus taciturnitate; Habebat amicos, promptos clientes, cum nemo sciret, cui ex falso, aut verè magis, minusve, esset amicus, aut quem verè odisset, peræqualem se omnibus, amæna fronte & verbo præstaturus. Tegebat defectus animi, fortunæ, virium, mentis impotentiam, nec satis frenatarum passionum, dum maluit haberi tacendo & dissimulando velut nesciens, quam experiri iudicia & censuras, si loqueretur. Si quid præterea difficile, aut adversi narraretur, tacebat, velut ex professu, nova non visa, magna, repentina, non mirabatur, immò læta, & sibi commoda, non multò exsultantis animi signo, sed excipiebat tacendo, quasi transitorie totum audisse, aut meminisse mallet, quam rem scire penitus vellet; immò non animadvertebatur, utrum obliwise rem caperet, seu altiori recondere memoria, pensaturus; Velut de *Themistocle*, sed in rectiore sensu Thucydides (lib. I. Histor.) *Nè quidquam aut antè, aut postea didicerat, quod eum auget.* Sic cum nullum proderetur

\* Vide  
Symbo-  
lum VI.  
Peristro-  
matum  
meorum.

\* vitium, omnia in meliore sensu, pro intuitu magnitudinis, & æstimatione prudentiæ, capiebantur; Cum alias, qui penitus hominem noverant, interiora mentis (sed recludendæ taciturni-

tati,

tati, exagitato prius studiosè affectu) introspicientes, haberent, unde magnitudinis opinionem arguerent, dum inerat animo superbia, dolus, ambitio, tacita invidia, mens offensioni quàm gratiæ pronior, & per occulta, nocendi studium; Deindè, sub prætextu maturioris deliberationis, agendi tarditas, turpis adversus inania formidò, animi impotentia, studium habendi, & per omnia hypocrisis inerat politica. Quæ tamen, pro taciturnitate, & animi secreto, apud non intelligentes, in speciem modestiæ, pacatæ mentis, tum in ornamentum virtutis, & in auctoritatem, valebant; Nam etiam publicis populi in consiliis, rarus sermonis, & propior erat taciturnitati, per substitutos nisi amicorum, rem impugnans, aut inferens, quam noluit, aut habendam præcupivit, nè fortè auctoritatem loquendi, licentiâ popularitatis altercantium cum minimis, consociaret, tandem ex rariori sermone, ipse valentior, subsidio sui affuturus; Vel metu comparationis subdicebat, si plerique in populo facundi, eloquii venustate præferrentur. Ideoque nisi præmeditata, & longè antè quæstionum prævisa, cultiore paratoque sermone, certus probandorum efferebat. Quod auctoritati parandæ fuit, quasi per totum, simili facundia & arte suadendi potens, si sæpius loqueretur; simulque altercandi offensas, dextrè in alios declinabat, velut nullius studiis obstans, aut quidquam in partem suam appetens ipse, sed omnibus amicus. Præsertim, cum parandæ popularitati, adesset velut ex præparato, hospitalis domus, lautior mensa, ad eruditum luxum composita, aderat jocus liberior, dissimulata in tempus auctoritas, & velut negligentia honoris, tum variæ bibendi formæ, & hamatorum tituli commeabant poculorum, vinolentiæ illicia; Velut facile indulgent etiam prudentiores, aut ignoscunt pro tempore, *vinis blandientibus*, nè dicam vulgus, quod ejusmodi fallaciis, promptè capitur, immò se offert illaqueandum studiosè. Deindè, excipiendis amicis & clientibus, obviis non deerat sermo, parati amplexus, & capitis oscula, familiaris accessus, dicta in simplicitatem & candorem declinantia, ingeniusque personarum & temporis accommodata, frons amæna, offensarum aperta dissimulatio, & velut supina incuria, deindè gestus submissus, quod verò à majore veniebat, eò venustate omnibus se ingerens



gratiore, non levia vitæ civilis condimenta. Cum per omnia in-  
esset, sui obtegens animus, contrarium quàm quisquam speraret,  
effectum pariturus. Velut de quodam dictum alibi. *Bonus erat,*  
*si tam amicus ad regulam, quàm cui erat insensus, ad omnes inimici-*  
*tiæ modos, dicto, facto, se componens; Ingeniosissimè simul & subdole,*  
*amici sub specie, & ex tacito hostis, cujus subridentem frontem, secre-*  
*tum, ac silentium, magis timeres: & quod amænitàtem vocares,*  
malè factorum larva erat. Hæc dico, non quod in fallaciam taci-  
turnitatis aliquem vocem, & obliqua doceam, verùm ut digno-  
scere sit promptum, quantum astutia, distat à vera virtute, &  
prudencia, obliqua mens, tum actio, à rectis, nè nimium fidas,  
eoque volens decipiaris.

II. Is optimè de rebus iudicium ferre potest, & agendo valet,  
qui simul utraqùè, boni aut mali extrema, sub intuitum mentis  
vocat, mollitiem animi, aut secus rigorem, in potestate recti ju-  
dicii habiturus, nè partem in alteram præponderet affectu. In-  
quam; cui rectioris naturæ, aut perspicacioris iudicii beneficio,  
non universalia modò, sed rerum particularia, eventuum possibi-  
lia, remota, proxima, obstantia, contraria, speciosa, dein pro-  
babilia, vera simul, consulenti veniunt in mentem, ut quid facto  
opus? ex vero promptè statuatur, compendio probè \* conclusurus.  
Verùm cui unicum, aut alterum tantum considerandorum (velut  
particularibus & imperfectis ingeniis suctum) occurrit, & per  
partes, non per totum, *materiam* rectorum consiliorum habenti,  
necdum *formam*, is hæsitat, disquirat, contendit, circa verum  
vagabundus, deceptus ipse, alioquè decipiens, res & personas  
inquietat, garriendo potius, quàm ut tangat rectè agendorum  
scopum, prout sunt contentioni, non conclusioni aptiora ingenia.  
Æquitatem recti iudicis, imitari oportet, qui actorem simul &  
reum, sisti coram, testes utrorumquè vocari, rationes & docu-  
menta proferri, nec reticere quidquam jubet, nè si promptior in  
illum sit, qui aurem & animum iudicis præoccupare, tum accu-  
sare (prensando & imponendo artifex) prior studet, partem al-  
teram inauditam, innocentèr plectat. Sic ferè in occursum materia-  
rum, non eam statim vir prudens probabit, quæ prima fronte se  
ingerit, plausum vulgi, tum rationum post se ducens, sed in op-  
posi-

\* Velut  
chimici,  
quintam  
essentiam  
medicabi-  
lium, ex-  
trahi posse  
ajunt, ar-  
tis com-  
pendio.

positam partem, mentem convertet, momenta temporis, rerum  
(vel maxime consequentium) expensurus; Plerumquè verò acci-  
dit, ut pejora eventu sint, quæ intuitu priora, animo grata, sua-  
vitèr se ingerunt, aut meliora videntur, tum quæ opinio vulgi,  
statim probat. Sed exemplo res pateat. Cupido gloriæ, aggredi  
quidpiam te jubet, pensabis identidem, an possibile sit, *nec du-*  
*bium* effectum, an rem periculosius irritare, & debilitatis prodi, pe-  
riclitari item frustra, nec adipisci, quàm nunquam tentasse. Ali-  
qua obtenta plus in occasionem sunt mali, quàm nusquam habita.  
Hæc aut illa difficilia, tum periculosa videntur factu? age nihilo-  
minus pro tempore animosè, & tenta, quæ mox dum inceperis,  
seipsa ingerunt facilius, non despondenti animum, sed in rem  
constantèr incumbenti, multa (secus) respicientem, nihil agere,  
& timida, sæpè falsò pro cautis haberi. Inquirere vis, in res ali-  
quas curiosè? & in ordinem legis, aut debiti, tum honesti nor-  
mam, vocare, immò nonnunquam vindicare. Præstat tamen non  
rarò, tutiusquè, ut aliqua studiosè nesciantur, quàm in palam,  
levitèr (aut ardentèr) vocata, non coërceantur, nec ad regulam  
redigantur. Remedii sæpè vicem tenet, nullum rebus adhibere  
remedium, sæpè optata spontè veniunt, aut secus quæ mala,  
spontè senescunt, & cessant cum tempore, immò sanantur ne-  
glecta, contemptivè habita, dein fragilitati hominum, aut tem-  
pori condonata, quæ secus, in pejus irritentur, revelata, expro-  
brata, deprehensa, dum obviando, satis non sumus, aut fortè  
dextrè nescimus, eoque remoto velut obice, incitamentum con-  
tinuandorum, in pejus damus. Falluntur idèò, quibus dissimu-  
latio, despectui, exsequi statim, heroicum videtur, tædet *emi-*  
*nus* per lenta & cautè meditata; Verùm, *cominus* rem aggredi, per  
abrupta placet, dum pro ardore mentis, cujuscunque moræ im-  
patientes. Cunctationem vel moram, inter servilia & damna,  
non inter cauta, & præmeditata ponunt, eoque casui, & lu-  
bricis, quàm firmis propiores; quibus agendi, quàm sibi provi-  
dendi, majus inest studium. Prout è contra, dissimulatio nimia,  
quandoquè sub incuriæ nomine contemnitur, causam damni fert,  
& ignaviæ notam habet. Aut quæ mille talia; Quæ nisi tempus,  
occafio, res, personæ, locus, eventus, necessitas, magis aut  
minus,



minùs, citiùs aut feritiùs in rem servire, vel obesse docent, ad lancem iudicii, omni-procul affectu librata.

III. Stoica sapientia, verè Ethnica, prudentiæ Catholicæ contrariatur; Immo rectiùs si perpenderis, ipsissima occultæ mentis; superbia est. Hinc illa orta, Stoicorum paradoxa. *Sapientem omnia scire, Non errare, Nihil illi præter opinionem accidere posse, Non admirari, Non dolere, Non tristari, Non egere, Diis deniquè parem esse.* Quorum mens, occultam ad superbiam inclinât, mirum, quàm cupidè, Stoicam prudentiam & mores, in speciem gravitatis æmulentur, subtristes, austeri, illatorum ex præsumptione pertinaces, immò quoquo modo coëptorum, sub nomine constantiæ, perseverando morosi, nec moneri, nec corrigi ferunt, dùm sibi complacent, & super alios haberi præsumunt, populari præsertim Reipublicæ, minimè apta ingenia. Vel secùs, scire se omnia ut videantur, pleraquè levi intuitu transeunt, opportuna non sciscitantur, ad pleraquè non respondent, immò agenda subterfugiant, affectata taciturnitate utuntur; honesto quietæ mentis nomine, segnè otium velantes, metu nè parùm aptè agendo, respondendoquè, opinionem prudentiæ amittant, vel quia res & personas, cum quibus negotium intercedit, infra animum habent. Taciturnitas quidem, potissimam partem prudentiæ occupat; sed affectata illa, ad superbiam vertit, velut de Tiberio Tacitus (*Annal. VI.*) *Silentium ipsius, non civile ut crediderat, sed in superbiam accipiebatur.* Cur taceam? cur non agam? cùm rebus in magnis, bonus zelus, cùm urgendi, obviandiquè necessitas, os loqui pro abundantia cordis; (ut ajunt) & aptare manus operæ, jubet. Verùm offendetur ille, modò nè virtus, modò lex, resvè Principalis nè offendatur; adipiscendi dùm adest opportunità, vanum tibi (nisi re habita) modestiæ nomen. Optatissimum malis, ut rectiores, modestiæ vel probitatis nomine, teneantur quieti, cedant sibi, interim ipsi, pro ambitu, impetum faciant in vacuum Rempublicam, licentiosè facturi, quæ legi, quæ virtuti, haud consona sunt. Tamen intra moderationis terminos, bono zelo prudentioribus utendum, tempus, personas, rerum occasiones, inspectando, nè contra ipsa fata, ex irritò pugnes, & illudaris. Quo casu, in partem se maturè subtrahere (ut saltem non assentiaris)

unicum

unicum rectis consilium adest. Nè fortè pro importuno zelo, eveniat, velut Thraseæ (*apud Tacitum Annal. XIV.*) cui absentia profuisset magis, quàm contra prædominantem in placita Principum, corrupti jam senatus, recti honestiquè incuriam, nimis apertè, irritoque agere conatu. *Thrasea Pætus, silentio vel brevi assensu, priores adulationes transmittere solitus, exiit tùm Senatu, rem ut improbens, ac sibi causam periculi fecit, cæteris, libertatis initium non præbuit.* Quàm præterea præsumptuosa Stoico-sapientum opinio. *Nihil præter opinionem, sapienti posse accidere.* Immo verò accidit, ut seipsos stultâ opinione involvant; Famam Stoicæ prudentiæ, affectatè retinere dùm cupiunt, quæcunque evenierint; velut dudum prævisa, sæpè neglectim, contemptimquè habent, non fatagentes, quærendo, videndo, curando, obviando, quare in præsens? quomodo fiat in posterum, quasi omnia pro debito, immò ad nutum eventura. Sæpè deindè *tristis* Stoicorum *gravitas*, civili vitæ & societati obest, dùm pro levi habent, bona & bonos laudare, tùm applaudere rectis, nè *res ut novas, admirari videantur*, aut secùs, quidquid mali privatim, aut in publicum, sibi vel alteri acciderit, contristari, vel dolere, intra gravitatem Stoicam ducunt, undè exacerbant necesse multos, velut levi intuitu, læta, tristia, adversa, resquè amicorum contemptim transmittentes. Cur ego bona, bonosquè studiosius non laudem? cur? excitandæ in melius virtuti, pro bono affectu, amæniorè tùm copiosiore verbo, gestu & fronte (intra tamen gravitatem, nec extra rectam ingenuitatem) non adblandiar. Cur? meum alteriusquè dolorem (sed infractus animi, nec penitus dejectus, aut mollis) pro confessione infirmitatis humanæ, non exaggerem, nec agnoscam, nec soler. Nemini utiquè, super casus humanos, ascendere licet. Cur? (deindè) si erraverim, errorem non faterar ingenuè; cur non trister de aberrato, quod ut propius poenitentem, etiam proximè corrigentem est, humanum est labi, *qui autem nescit se errare, corrigi non vult.* Qui non tristatur, non apprehendit, dùm non apprehendit, differt, contemnit, nec corrigit, nec obviat, in pejus malum recurratur. Scio quidem, Stoica ingenia, ad tristem severitatem & rigorem, naturalitèr inclinare, sæpiùs arguunt, quàm laudant, puniendo quàm præmiando promptiores, dam-

Bb

nando,



nando, quàm sublevando, sæpius affectatè, quàm opportunè, in speciem constantis animi, & pro fama justitiæ, etiam dissimulanda, & quoquo modo excusabilia, non indulgentes, implacabiles & immoderati; contractæ sæpius frontis, quàm amæni, undè, rariùs amicos habent, quasi se contenti, dùmquè efferrì videntur super alios (plerisquè succensentes) ipsi contemnuntur. Dicas hinc. *Stoico-sapientes non errare*, immò errant, sed præ superbia non fatentur, in alios malè actorum causam, aut in necessitatem fati transferentes, malunt quidvis mali, in opinionem fortis animi & constantiæ, patiendò ferre, quàm aliena ope eluctari, nè infirmitatem fateantur. Verbo rem claudio. Dolere & tristari; contra sapientiam Stoicam, sed non contra Catholicam est. CHRISTUS ad obitum Lazari, dolentium lachrymis suas consociavit, Flevit super Hierusalem; & condoluit venturis malis, salvari cunctos cupiens, immò impensius studens. Sæpè dolor & lachrymæ, non mollitiei vel fractæ mentis, sed ingenui pectoris, recti animi, & propitiæ voluntatis, signum sunt, aut secus, velata superbia, & animi obstinata malitia, tùm rerum supina incuria, aut levitas vocanda, quam infractam generositatem, falsò intitulamus. *Tristari* igitur, pro suis, & pro amicorum malis oportet, sed intra modum, *Ut enim non sentire mala, non est hominis, sic non ferre, non est viri*, dolor & tristitia, sæpè cos est activitatis, dùm eo stimulo, promptius obviando, pellendiquè malo admoneamur. Quod deniquè Stoico-sapientes, *nunquam egere se dicant*, immò egent non fortunâ modò, sed ipsa rectori virtute, tùm remediis occultioris superbiæ, dùm inter ærumnas, cor ipsum exedentes, fronte ad amænitàtem coactâ, necesse sibi imponunt, agere felices. Crediderim exindè nec fortunam, nec homines rectos, talibus posse fieri amicos, ut pauci necesse subveniant cadentibus, sed tantùm opinio quorundam Pseudo-politicorum, aut vanitas sæculi, titulum fortitudinis animi, tàm infractæ generositatis, talibus abstruit. Non igitur jactent, *se diis pares*, sed verius, præsumptam sapientiam, superbiamquè nisi temperarint, rectis quibusquè hominibus, sciant se multò inferiores.

IV. Impertinentia qui petit, fallere aut jubere præsumit, aut habet levipendio, cum quibus res intercedit, vel demùm rixæ, causam venatur.

V. Qui-

V. Quibusdam pro virtute, intraquè prudentiam modestè agere, titulum pusillanimitatis, & ignaviæ parit, atquè idèd, vitio sæculi contemptui sunt. Secus feroces, linguæ nimii, versuti, superbi, & ex occulto, vindictæ cupidi, nomen prudentiæ vel magnanimitatis ferunt, idèdquè honori, & respectui habentur, verùm apud eos, qui ipsi tales, *pudorem atquè modestiam pro socordia astimantes*. Sed valdè falluntur, cùm virtus & modestia, nec prudentiam, nec fortitudinem excludit, immò illam penitiùs habet, verùm cautam, intraquè honesti & licitorum legem, lentiùs agentem, ut non statim prodatur, sed tandem meliore eventu. Illi priores, pro impetu dùm agunt, tandem impingunt in errores, quorum mox poeniteat. Horum amicitiam, & vitæ commercium, prudens caveris, apud eos enim, *beneficia (ut ille ait) pro maleficiis, maleficia pro beneficiis habentur*, quem metuunt, reverentur, quos non metuunt, contemnunt. Quærant, quos nondùm habent, negligunt amicos quos habent.

VI. Depravati sæculi, parùm capit corruptam fidem, decipi volens cupiens, aut pro teneritudine propriæ, alienam conscientiam metitur incautus, qui juramento, vel scriptis ligaminibus, teneri satis hominum fidem; properus credit; nàm secus hodiè fit, dùm scripta, vel juramenta, pro stratagematis fallendi habentur. Da homines astutos, laxioris conscientiæ licentiâ, tùm joco, rem & scripta eludentes, da sciolos, sub velamine liciti & honesti, interpretatione æquivoca, sensuumquè distinctione varia, (prout conducit) huc illuc, verba intorquentes, ut nisi certiùs *pignus fidei* manu teneatur, vel cogere in promptu sit, servari tibi fidem, à discretionem servantis, non merito causæ, vel pro debito rei & commodo, habeas, si tamen habiturus es. Corrupta passim civili fide, *norma contractus nundinalis*, hodiè probatur; Merces hic in forum, pecuniam ille, bona fide donandam ferunt; dat hic, aut non? retrahit ille, aut *statim* elargitur; Cætera fori, pessimè ad fidem aguntur; Ut planè (negotiis præsertim in gravibus, si apertè rem & commercium vitare non possis, saltem prudenter, in molliora deflectere, conducibiliùs putès, aut secus, volens, decipiaris ipse, non illi te decipiant, quibus fallere in potestate

B b 2

est,



est, dùm velint, facile qui credis, & cum illis commercium habes. Antea juramentum & scripta, habebantur roborandæ fidei, apud bonos, nunc fallendis rebus, ut concessum elabendi beneficium, apud malos usurpatur. Immo antea pro natura priscae ingenuitatis, non peccabatur *virtutis amore*, nunc abstinence, apud malos, formidine poenæ.

VII. Magnis in erroribus, tùm casibus periculosis, & conatibus Principum, vel populi, privatis & in publicum, quos declinare omnino non possis; minorem (velut spontè, in speciem excusabilis liciti) admittere, modò ut majorem quoquo modo præoccupes vitaturus, loco grandis prudentiæ habebis. Patieris potiùs verucam, quàm ut admittas, irritando gangrenam. Si tamen errorem majorem, æquè ac minorem, vitare in potestate sit, mollis aut iners nimium videre, si admittas. Non improbaverim Othonis factum & solertiam, apud *Cornelium Tacitum*, dein *Senecæ & Burrhi*; Otho ad occupandum imperium, favoribus militum subnixus, nec vetando adhuc potens, minacem insolentium animum, quædam indulgendo, dextrè temperabat, nè in pejus erumperent. Ait Tacitus. *Marium Celsum consulem designatum; ad supplicium miles exposculabat, industriæ ejus innocentiaequè (quasi malis artibus) insensus, sed Othoni, non dùm autoritas inerat, ad prohibendum scelus, jubere jam poterat, ita simulatione iræ, vinciri jussum, & majores pœnas daturum affirmans, præsentis exitio subtraxit.* Dein Nero, in omne genus licentiæ, tùm flagitii effusus, cum fisci non posset, *Senecæ & Burrho visum, nè utrumquè pervinceret, alterum concedere.* Sed *Burrhus* Principis malè actorum magis diffimulatur, mærens, ac laudans. Et Julius Agricola malo sub Principe, satis prudenter, non enim factorum, dictorumquè contumaciâ, tùm inani jactatione libertatis, famam sibi fatumquè provocabat. Verùm moderatione ac prudentia res leniendo, maluit superstes esse temporibus, saltem in molliora quoquo modo declinans, quàm ed insolentis jactationis venire, velut pleriquè minùs prudenter, *cundo per abrupta, in nullum Reipublicæ usum, ambitiosa morte inclaruerunt, quorum vita, plùs profuisset occasionibus aliis, sibimet & civibus.* Depravatis passim in Republica rebus, minore vexa tùm periculo, tolerantiam in tempus, quàm remedium

dium cogites, aut causam erroris, cum offensa personarum ediferas, tempori Deoque magis, sananda commissurus: Incertum levamen mali, vel remedium, certum aliàs (dum obstas) periculum adest, in occasiones tamen intentus eris: Depravati homines ac tempora, assensum non consilium, nec remedium quærunt. Sic ferè prudentioribus fuetum, dùm totum declinare non possunt, ut aliqua, per incuriam velut transmittentes, nec in omnia, advertendo curiosi, indulgeant, nè contraveniendo, in pejus irritent, potentem vel obstinatam malitiam. Absit hinc Stoica prudentia, singula ad regulam legis, scrupulosè vocans, sed politicum & amœnius ingenium præstat, velut pictores, adumbratione colorum, & scita rerum dispositione, ejusdem tabulæ in plano, propiùs aut remotiùs, majores vel minores, repræsentant nobis figuras, non quod hæ aut illæ, verè sint, sed nisi dextra ac rudi opera; dùm fallunt intuentium visum; sic tenaces propositi hominum animos, & affectus, arte fallere, aut eludere in rem conducit. Non tamen (absit) te merum Politicum sic volo, quasi eo documento, Catholicum te obliviscaris, laxioris conscientiaë licentiâ, in illicita vadere fas ut sit, sed eâ normâ, ut pejoribus flagitiis, dùm occurris, minoribus saltem non assentiaris, negativè te (Logico utar verbo) habiturus, immò velut factum non intelligas, somnum ac inertiam simulaturus. *Unicum malorum remedium, si non intelligantur. Evulgatus pudor, non satietatem ut multi rentur, sed incitamentum adfert.* Imiteris prudentes coactores aquarum, qui obstacula & claustra, tumescenti aquæ, impetum eludendo, vel minuendo demunt, nè si nisu toto resistent, obstando augeant vim, rumpendis obicibus, & inundandis agris periculosam.

VIII. Eludere legem, nunc pro nota libertatis, & prudentiæ habetur, quod è contra bonis, servitus & impudentia vocatur.

IX. Cum norma ædificatio, lentè; sine regula destructio citò peragitur. Destructio pauca requirit, rectè facere, multum.

X. Proprium est ingenii humani, odisse, quem læseris, & promptiùs amare, cui benè feceris. Quia fortè, obstricti beneficio nostro, pro amicis dùm habentur, proximùm, ut fidentiore propendeamus (velut non frustra facturi) in eos affectu; secùs



ab illis prioribus, facile alienamur, congressum vitaturi, dum non amare nos, pro accepta injuria creduntur, etsi nondum plane amare definant, sed quia pro nostri conscientia demeriti, sic imaginamur. Spontè idèd sæpè amittimus amicos, aut paramus in-fensos, nostrâ veriùs causâ & occasione, dum non abrumpimus stylum offensæ, pertinaces, (irritamenta potiùs amicitia, per incuriam velut, sed revera studiosè ostentaturi) quàm ex alterius voluntate.

X I. Stultum rectiùs vocaveris, non qui errat rectæ mentis ex defectu, sed magis, qui stulta facit, ex abusu. Excusabiliùs uti-què illi errant, hi peccant scientèr, & affectatè, idèdquè culpam ferant graviolem.

X I I. Prout hominum dona, gratiora sunt nulla, quàm levitèr data, vel contemptim projecta, sic acceptior nulla amicitia nobis, id est non præsentata, immò penitus ignota, quàm haud sincerè, sed levitèr, joculariè oblatà. Illa, utiquè non parat amicos, sed nec inimicos quoquè, hæc magis irritat, & offendit, fallax, umbratilis, vexatoria, quàm si haberetur planè remota. Ignotos, nec odio, nec amore prosequimur, velut ad nos injuriâ vel beneficio, agendo vel patièdo vicissim, minimè pertinentes, secùs notos, nobisquè proximius adhærentes, nisi enixius amemus, certè odio prosequimur curatiore, nec tertium datur.

X I I I. Aliud est debitum vel ordo honoris, aliud insolentia, & titulus superbiæ; sicut Parentes à filiis, sic majores à minoribus, justè honorari præcupiunt, ac debent, non ex superbia, Verùm ex ordine honoris, modò ipsi vicissim honorent; Authoritatem perdit, qui negligit levitèr honorem. Qui non habet authoritatem, nihil, aut precariò potest.

X I V. Dicti aut factorum injurias, non fortiùs excipies, quàm oppositu lentæ Gravitatis, seu Dissimulationis, immò contemptus nonnunquam scuto; Cautus tamen, valens, & ingenuus (arguendo). intra virtutem, undè sequi amat, rubor delinquentis, & poenitentia. Falluntur, qui minas, aversionem, jurgia, odia, iras suadent, quàm ut in pejus irritent odia; non finiant, dictis dicta, factis facta, & vindictam provocaturi. Intra dissimulationem  
tacendo,

tacendo, utiquè nullum inconveniens incurratur, loquendo secùs, aut agendo, possunt fieri multa. Velut mollia non faciunt sonum, mollitèr dum recipiunt ictum, dura cum resistunt, latè sonant. Satis utiquè ingenuæ superest vindictæ, sufficientes modò ut videamur, vindicare potuisse, dum velimus.

XV. Exsequenda rectè jubere, vel obtinere qui vult, induat personam ac penetret statum, naturamquè patientis potiùs, quàm agentis; Id est, non magis, quomodo jubeamus, sed quàm grave sit, aut qualiter institutum laturus exsequendo (cui imperatum) consideraturi. Facilia sæpè alieno periculo, tum labore, & levia videntur, ferentibus legem, jussa, ordinem, impensas in alios, quæ secùs, accipientibus, per omnia temporum, rerum, personarum, casuum, difficultatum, ac eventuum momenta, transmissuris, difficultia & acceptu gravia sunt, ut nec successum, nec amorem; sed excusantium gravia in post odia, & diffidentiam experiamur. Jubeo, verbo & momento definitur unico; Exsequi, ratione, tempore, impensa, labore, auxiliis opus habet, & fortuna. Patientis igitur naturam, non melius assequitur & noscit, quàm cui ferendum est, proprio enim malo hic angitur, Agens alieno. Libertatis etiam dona, non penetrat, vel casuræ momenta veretur acriùs, nisi ad quem, ex amissa, servitus proximius pertinet, aut periculum restat. Hinc plerumquè, aulæ clientes, tum incauti juvenes, casuum inexperti, favoribus modò in præfens imbuti, quò propius fortunam & gratiam Principis, eò remotius sunt à metu ruituræ libertatis, privatam sibi, dum quoquo modo habent, negligunt publicam. Abundè rati, modò ut præsentibus fruantur, nec in longius consultantes, posterorum incurii. Præsertim verò eloquentuli, quorum unicum omnium certamen, qui blandissimè legem fallat, aut per artem subvertat. In tantum sacrosanctæ leges, ubi serviunt ad arbitrium, dum hæc obstitère, mox adsunt novi juris repertoires, vel interpretes, eòquè per omnia, non lex, sed voluntas est pro regula. Quibus inquam, per ignaviam, periudè est, turpe nè per obsequium, alienaque discretionem, an beneficio avitæ Libertatis, tum propria virtute, esse securos, vel emercari deformi submissione, an habere per ingenuitatem, quæ sibi debentur, parùm differt. Tyrannis verò,  
igna-



ignaviam non petit, inertia vel parvitas, securissima est, adulatio placet & obsequium, sola *virtus* & *Magnitudo*, nomenque *Libertatis*, periculum habet, denique ibi crimen, ubi ingenuitas, vel opes. Rectè Tacitus Annal VI. *Haterius, somno aut luxuriosis vigiliis marcidus, & ob segnitiam, quamvis crudelem Principem non metuens.* Sic ferè mali Principes, segnem cujusque innocentiam præcupiunt, activam oderunt. Dicam clariùs, serpens, serpentis necem, vipera viperae casum, non appetit, aliis cum periculum ferunt, sibi non obsunt, dum sibi similes, & ejusdem sunt naturæ; Sic aulae clientes, ferunt plerumque, laudant, excusant, immò juvant, Principum æqua perindè ac iniqua, velut sibi minimè nocitura, pro familiaritate Principis, dum velut ejusdem cum ipso sunt naturæ, & intenti, nec idè verentur; Fortunam potius stabilientes, & procurantes messim suam, dum Principis, calamitate publicà crescunt, calamitatem provehunt. Secus ab aula remotis, adversa omnia eveniunt, quæ gravi Domino profunt, sibi nocent, ejus lucra, sua damna sunt, ipsius errores, sua pericula, quod illi accedit, sibi prius demptum sit oportet, eoque meritò, rerum momenta excutiant, suspecta timent.

XVI. Partium adversarum res discordes, non meliùs componas, quàm si *ex ratione* & *justitia*, non ex inclinatione ad partes, aggredieris componendas, commodum unius, sine alterius injuria pensaturus, & vera utrique propositurus, ex æquitate. Secus ubi partem in alteram inclinaveris, alteri jam nocet, eoque, amittes componendi confidentiam, & artem, ut si velit pars una, rejiciat altera. Nemò vulnus promptiùs offert curandum, quàm cui confidit. Cura igitur, ut æquus videaris, utriusque amicus componendo, non *partis affectu*: Undè compones, haud difficultè, resque probè dignoscet, judicaturus.

XVII. Novis moliminibus, aut coeptis, actione prima, auctoritatem parare necesse, in majus sequentium robur, dum aggredimur rem, cum *virtute*, *prudencia*, *audencia*, & *valore*. Mox aperiet se ipsam occasio & fortuna, tùm fautores validorum amici, animum ex eventu sumpturi, Recens fervor, validissimus est, eoque utendum, antequam senescat, rarissimè invalescit, sæpiùs est in decrescendi; Cum dubitas ipse, aut differs, eò magis hæsitabunt

tabunt amici, æmuli erigentur in majus, dum rem irritas, nec agis, velut impotens, iners, aut confusus, agendi prima tempora, parti adversæ proditurus, *nec audens satis, nec providus*. Magis verò malè tentata nocent, quàm nihil gesta. Secus, multa videntur ardua, impossibiliaque factu, quæ intra virtutem & prudentiam tentantibus, expedita fient, pervia, & volenti aperta. *Multa ausis, aliqua parte fortunam affore.* Qui magna petit, saltem assequitur media. Cavendum igitur, magna (sed in speciem) molituris, nè eveniat, velut avium terriculamentis, qualia frugum vel hortorum curatores, abigendis avibus, paucorum dierum commodo exponunt, ubi enim, vana statuarum hominumque stantium sine motu, deprehenderint simulachra, proximiùs advolant aves, impuè phantasmatum inania contempunt, oculos ipsos statuarum fossuræ.

XVIII. Misera conditio magnorum, quorum injuriæ, nec periculum creditur, nisi cum perpetratum fuerit, vel apertum occidium sequatur. Inviolabiles creduntur, qui potentes, cum secus sit, sæpè musca, sæpè culex, dorsum impuè vexat, jubamque invadit leonis, cum parvitas ipsa offendentis obstat, abigendo. *Exigua gleba, ingentes sæpè arietat currus.*

XIX. Mira naturæ, virtutumque hominis œconomia, defectum unius, cum recompensat, transcendens in admirationem usque hominum altera, quod subtravit parte una, reparans per alteram. Nemò per omnia bonus, nemò per omnia malus est. *Severitatem* in hos, attemperat *comitas*, & munificencia in illos, nec sibi ipsi parcens, aut se mollitè habens rigor, deindè juvat, per reliqua rerum agendi prudentia. *Melancholiam seu tristem & insociabilem vitam*, compensat rectæ mentis probitas, actio non obliqua, morum & vitæ decentia, tùm sedatus & gravis animus. *Superbiam & exacerbationes* supplet, aut excusat quoquo modo, animi fortitudo, audencia & valor, item magna per reliqua morum & officiorum auctoritas. *Turpem tenacitatem*, velat utique in cæteras vitæ partes, actionum honestas, & si quæ insunt animi, ingeniique dotes. *Iram properam*, rependit prompta (intra tamen gravitatem) recollectio, comis sermo, dissimulationis virtus, & recompensans bonitas, cui rei, secessus beneficium & ars, non



levitèr prodest, sciens præsertim cùm sis, non satis frenatarum tibi passionum, ut primos affectuum motus, iræ dico, tristitiæ, dein lætitiæ; vel amoris, secretioris cubiculi in recessu, deferrescere primum sinas. Immo secedas, aliquantulum studiosè, per alios, securè dùm licet, tractaturus, quæ affectum movent, ut composita nisi fronte, gestuquè, visendum te præbeas, egressurus, nè impotentiae animi arguaris. *Animi molliem*, velat suavitas agendi, rectitudo, tùm cætera virtus. Omnia verò, compensat *prudencia*, aut obtegit dissimulatio, taciturnitas, vel subterfugium, immò maximè, alloqui suavitas, & liberalior (*sed attemperatus morum gravitate, citraquè levitatem*) convictus, quo velut melle, temperari potest, quidquid in actione hominis amarum est. Idè abditæ mentis, introspicere necessum, quod vitii genus, ad civilem vitam, & amicitiae parandæ obeat, ut si fragilem naturam flectere, corrigendo vitio, vix possis, saltem contendas, ut altera parte virtute rependas, non secus perseverans, in ulteriora dehonestamentorum, morosè & per contumaciam. Si pars abstraxit una, attrahat saltem altera. Sed verbo rem claudò, & in pauca conferam. Alii agendo, alii consulendo, vel saltem aliena probè dignoscendo, aut exsequendo, præstant; Immo, eloquio tantum hic, scripto illè, ingenio, vel recto iudicio alter, facto nisi & opere, tacitè potens alius; Dico adhuc, uno alteroque præstat aliquis, sed rari admodum, aut nemo simul, per omnia valet. Tardus hic inceptu, vel hebes apprehendo, sed cùm aggressus fuerit, agendo perseverans, animo infractus, nec vanis terculamentis, eludendus, nec cessans, nisi perficiens, tarditatem incepti, vel negligentiam, præponderans & pensans agendi perseverantiâ. Temerarius hic aggrediendo, sed fortis & valens, faciens ipse sibi occasionem, & fortunam, levitatem consilii, fortis cùm supplet actio, aut saltem recollectio, velut instructissimi in gyros formandos equi, accurrunt, recurrunt, huc illuc vertuntur, cursu inoffenso. Projectus hic in intricata & periculosa, sed mirus evadendo, immò adipiscendo, sciens occasionum, sciens animorum, in adversis recollectus, audens, fortis, nec desperans, nec confusus, constantia, instandoquè superans totum. Deindè stupet in repentinis, & confunditur alter in adversis, sed in prosperis,

ris, tùm per pacata, lentè agendo, & ex tacito potens. Hic per privata, minutiorum velut incurius, non valet, sed in publica, tùm gravia, erectus, toga & bello commendatur, defectibus per omnia obtegendis, condimentum ex aliqua trahens studiosè, attemperansquè, aut sustentans virtute, vel *adjunctis*, velut veteris aulae Neronis, tùm novæ sub Galba, inducit mala, Cornelius Tacitus, *æquè gravia, non æquè excusata*, cùm ipsa ætas Galbæ, ac novitas, *irrisui & fastidio erat, assuetis juventutis Neronis, imperatores forma ac decore corporis, insitaquè dudum Caesarum domus Majestate, (ut mos vulgi) comparantibus.* Sæpè minora vitia, in plerisque damnamus, cùm secus *majora*, facile condonamus, iis, qui amænæ & subridens faciei, tùm responsi, convictusvè, procul sunt omni tristitia, vel morum severitate, malè dictorum actorumquè, condimentum, ac recompensativum ex eo habentes, quoquo modo excusati, seu, dùm mollius, sub ea larva tolerantur. Manlium Torquatum, severitas nimia, non in odium exercitus, sed in admirationem dedit; secus lenitas & indulgentia, Valerii Corvini, non in contemptum, sed in amorem versa (velut non improbè observat Machiavellus) ut nec ille amorem apud suos, nequè hic perderet, propter alias quæ inerant partes eximiæ virtutis, authoritatem, æquilibrium, vel *Contrapondium* (ut sic loquar) adhibendo rebus, ex alterius actionis venustate, Falluntur secus, qui falsarum virtutum nomina, aut imagines, parandæ amicitiae, tùm velandis vitæ probis assumunt, ipsi planè falsi, obliqui, edquè vitandi; specie non natura boni, vitia blandientia, rebus obtendentes, umbram virtutis, non ipsam virtutem habent, immò plùs formæ, quàm virtutis. Inest obvia commessatio, & solutior in hilaritatem affectatam convictus; congressus & alloqui, responsorumquè hamata facilitas. Officii, (sed non ultra verba) promptitudo, putares, non alium meliorem, non magis rectiorem, reperisse te amicum. Parata promissa, sed quod effusiora, ed minùs certiora. Horaria confidentia, & in aurem (velut tibi soli crediti) susurri, amicitiae venandæ illicia; obvius, comis, sed fucatus sermo, prout *lusciniæ*, *nunquam sua deest cantio*; Facies aut amæna, aut ad modestiam coacta, malitiosè vel subdolè, mentis larva: Non prompta ex levibus offen-

*Vitii  
grande  
compensa-  
tivum ex  
aliqua  
virtute.*



sa, sed ex pari, jocus joco eludens argutia; liberior, ultroquè lacerans jocus, lepidi mendacii tum æquivocationis sale, in aulicam venustatem, novorum stylo politicorum, respersus; Omnia in familiaritatem composita, dum inest animo fallacia, malignitas, specie modestiæ occulta aut subtristis superbia, ambitio, amor, quæstus, & avaritia, levitas, tum actionis inconstantia, ut si turpes idè in errores, ac personarum offensas, (velut sæpè fit) talibus incurrere contingat, adest sui erroris, velut ex parato, in alios dextra retorsio, tum evadendi mira praxis, & qui ultimus malè agendi gradus, ubi pudere ferio deberent, jocantur. Negant, fatentur, amant in speciem, simulquè oderunt, pollicentur, subtrahunt, laudant, vituperant, incipiunt, negligunt; idquè totum; sui, non mutui boni causa, pari licentia, prout conducit, ac levitate, immò & superbia, velut impunè malè agere liceat, edquè liberius, ut in post peccetur; Quæ bonis flagitia dicuntur, isti venustatis vel prudentiæ, aut cautionis loco, sibi habent. Quod magis amicitia talium stare te credis, quidni? poenitendum dejectus jaces. Tamen iners vulgus, fallaciis talium, velut spontè capiendum se offert, ut corrupto præsertim sæculo, & populo, studia vulgi, bonis rectisque artibus, quæsitæ, rarè perindè aliquibus meliorum adfuit, quàm talibus, actionum per obliqua.

XX. Velut in nobis facilem compensat, aut sustentat virtus, quæ fortè, ad reliqua perfectionum defuere, sic è contrario, annexa vitia, detrahunt non levitè famæ honestati, & parandis vulgi favoribus obstant, nisi corrigas. *Bonum* justiquè amantem *animum*, arguit subtristis & incivilis vita, dein morum actio invenusta, tum parcitas, ac præsertim properus in iram, ulcerosusquè in levia offensionum animus. *Authoritati* multum detrahit levitas, aut specie comitatis, multiloquentia, parva deindè cura, aut taciturnitatis, aut dissimulationis. *Divitiis ingenii*, dehonestat pauca in exequendum activitas, mollities animi, tum intra linguam subsistens vis, & vigor. Omnia verò deturpat superbia, exultans actio, malignitas, inconstantia, subdolum ingenium, aut si qui sunt dehonestamentorum, vel obliquæ mentis nævi, prout magis vel minus, hominis animo insunt, aut prædominantur. Vel dicam clarius, prout hæc, tum illa virtus, aut vitia,

vitia, superiore, vel inferiore in nobis intenduntur gradu.

XXI. In ambiguis materiarum, vel suspectis; quibus deprehendi damnum, vel periculum adest, prudentius agunt, qui tacent, quàm in partem meliorem (bona ipsa licet) qui loquuntur, dum præsertim, in imperitos, aut obliquæ mentis auditores incurritur. Dicta hic, sensum ille, intentumquè sermonis, non intelligit; alius pro malignitate, æquivocationibus laborat, dicti affectum intorquet, secusquè interpretatur, aut imponit. Immò, licet intelligat alter, bonus ipse, mihiquè benè velit, eo ipso tamen nocet, quia per inertiam narrandi, aut per incuriam, aufert verbum, addit, mutat, vel transponit, undè inmutatur natura dicti, in perdendam rei venustatem, præsertim si occasionum nesciens, aut incurius personarum. Parùm verò interest, utrumnè ignem comburentibus ædibus, infert aliquis studiosè, an per inanimadvertentiam, facem malè extinctam angulo ingerit, vel tollendam negligit, in alimentum ignis; Vel si medicus, mutata per errorem pixide, loco pharmaci melioris, medicatæ, imponat cicutam, vel aconitum potioni, sic parùm refert, studio nè an per ignorantiam aliquis mihi noceat, si tamen nocet, nullo ad corrigendum regressu. Tace igitur, quisquis es, tace; minùs sic in Deum peccabis, minùs offendes personas, minùs ipse tibi nocebis. Taciturnitatis vix quidam, loquentiæ arguuntur multi, illa nemini, dicacitas plerisque periculum fecit. Sermones nostri, alphabeti literis similes, undè quot verba, quot linguæ, libri, scripta, dicta, què formantur, laudes & vituperia, recta vel obliqua, fidei dogmata, hæresesquè, blasphemias, aut preces, vitæ vel mortis sensus; amores vel odia, prout verba combinantur, componuntur, sonant; Sic eodem nostro ex sermone, non prout loquimur, sed prout bonus, malusvè adest, qui audit, aut interpretatur, tales sensus experturi, & dicta nostra habentur. Verè ille ait: *Liberè dicta, frequentius aliena veniunt, quàm nostra prudentia tuta.* Qui tacendi igitur, non novit artem, nec loquendi scit, opportunitatem. Adjicere hoc loci non obfit, ultimum illud esse in servitute, atquè què idè in tyrannide, dum in secreta populi, inquiritur à Principe. Ipsa rectitudo & virtus, non extra periculum tunc sunt, dum non ex merito suo, verùm pro arbitrio delatorum, prout in hunc,



aut illum affecti, vita & fortuna populi pendet, vel prout in obliquum res trahuntur. Optimi Principis titulo, donatus Trajanus, qui submotis delatoribus, secretorum libertatem, populo donavit, non habuit causam irarum, & sæviendi, quia non quæsit. Secretè dicta, factaque nostra, interioris mentis imaginem habent, prout non omne datur (à Deo) crimini, quod mentem primam incurrit, verum nisi consensu decernitur, sic pro libertate secreti, levia sæpè, hæc aut illa cadunt, sermonem intra, & in actionem, quæ risum vel indulgentiam judicis potius, quam reprehensionem mereantur, eoquæ recollecta mente, ipsi in bonum promptè flectimur; Ut igitur non aliquis hominum, verum Deus, mentes in nostras, sic in secreta, rectum judicium, idem ferat, quæ in meritum, aut quæ cadunt in reprehensionem, homines secùs judiciis falluntur. Certè in secreta populi, non inquirunt Domini, nisi qui mali, & odium se meruisse putant. Rectè similia temporum incusat Tacitus (*in Agricola*) *Dedimus profectò, grande patientiæ documentum, & sicut vetus atas, vidit, quid ultimum in libertate esset, ita nos, quid in servitute, adempto per inquisitiones, loquendi audiendique commercio. Memoriam quoque ipsam, cum voce perdidissemus, si tam in nostra potestate esset oblivisci, quàm tacere: &c.* Et Annalium I V. *Non alias magis anxia, & pavens civitas, congressus, colloquia, notæ, ignotæque aures vitari, etiam muta & inania, tectum & parietes circumspectabantur, &c.* *Corrupti in Dominos servi, in Patronos liberti, & quibus deerat inimicus, per amicos oppressi &c. &c.* *Seu loquereris, seu taceres, crimen ex silentio, crimen ex voce &c.* *Ut quis districtior accusator, pro sacrosancto habebatur.*

XXII. Qui non fatetur, sed excusat protervè, aut negat fatenda, non excusat satis, sed irritat in majus ad comprobandum objicienda. Negando, prodimus pertinaciam, augemus contentionem; fatendo modèstè facimus utiquè quæstioni finem; Rectæ hoc enim, tùm ingenuæ mentis, signum est; illud secùs, temeritatis contentiosæ, vel superbæ, tùm obliquæ aut inquietæ mentis (immo malignitatis) certum documentum.

XXIII. Temerariis ingeniis (vel objectis) quæ præsertim pertinaciâ substruuntur, aut superbiâ, opportuniùs tacendo, vel Ironicè, quàm pro ratione respondeas, permittendo velut absurdum,

dum, & majus venturum inferendo, ut in sua temeritate, deprehendantur. Secùs facturum, contentionis materiam, non finem quæstioni quæris. Fuste, non ratione trahendi, aut impellendi tales, non suadendi. Apage, qui multum contentionis, parum rationis, in consilium ferunt. Demonstrandæ veritati, prius ferè ac magis, animo non pertinaci proboquè, suscipientis opus est, quàm ut requiratur, summâ prudentia inferentis. Et si non obtineas, si tamen proba intulisti, officio rectè dictorum, satis datum putabis. Etiam in Divinis, ut non consentiamus bono, non inspirantis DEI, sed non suscipientis hominis, defectus est, & pertinaciæ vitium.

XXIV. Non illud laudatum plerisque, benè quod factum est à nobis, & ex virtute, sed reprehenditur, quod fortè supra fieri non potest. Atquè sic benè facere, & non facere *ingratis*, perinde est, dùm benè facti gratia corrumpitur. Defectum potentiæ, & mediorum in reliqua per malignitatem adscribunt, defectui nostræ voluntatis. Ideòquè, justo velut ex prætextu, sine fine requirunt, nec unquam satis habent; privatim, publicè, amici, Princeps, populus.

XXV. Tria T. publica, privataquè probè conficiunt. Tunc, Taliter, dein Talia faciendo, quæ in rem serviunt. Tempus id est, Modum, & Rem prospectando. Aliàs manca sit actio.

XXVI. Mali Domini, habent æquè suos laudatores, ac boni, multos dùm requirunt, flagitii ministros, sæpiùs verò minores, quàm nobiliores in exequendum adhibent, facile multos inveniunt. Quoniam magni per ingenuitatem, recusant, immò pro conscientia adversantur, nec facile quærunt ejus amicitiam aulæ, cujus favor, non nisi scelere habetur. Minores, prout accipiendorum egentiores, facile flectuntur, operam offerunt & aulum, flagitia dominorum, obligatius excusantes, quorum fortunâ crescunt & subsistunt, præsertim civium multos dùm metant, quos causâ Principis offendere. Deindè sueta opprimentium ars est, nè omnibus simul, sint terrori. Aliquos modò sibi obstantes, velut nocentissimos, sub pallio justitiæ, seligunt opprimendos, primis oppressis, non quod in alios boni, aut pepercere, sed quia distulerunt, dùm hos subverterint, reliquos aggressuri. Sic Tiberius, Cali-



Caligula, Nero, pessimi dum sunt aliis, tamen plerisque (sed flagitiorum affectis) laudati. Alias boni Domini, per conscientiam generosae virtutis, dum universim omnibus sunt boni, nec introspiciunt astute, corruptelarum per artem, interiores singulorum in affectus, immo intuitu communis commodi, dum castigant multos, saepe ideo multis sunt illaudati. Commune vero bonum, velut in plures spargitur, remotius est, nec tamen notabile in singulos. Secus privatum bonum, vel donum, quod propius est quemque, facilius agnoscitur a privatis, edque sui causa malum in alios Dominum, prompte quisque laudat, cum sibi bonus. Dicam amplius. Uti publicum bonum, sic bonum Dominum, pauci ingenuorum noscunt, & amant, immo rari bonum procurant, aut volunt, cum turbæ & disordo quaestui, pax & ordo, damno sunt.

XXVII. Injuriam pati, nec cohibere statim; in parvis impotentia prohibendi, vel metus; in magnis verè clementia, dissimulationis virtus, tum magnitudo animi vocatur. Impotentem enim, aut metuentem frustra voces, qui ulcisci & prohibere malum, potens est, dum velit. Rectè Plinius in Panegirico Trajani. *Cui nihil ad augendum fastigium superest, hic uno modo, crescere potest, si se submittat, securus tamen magnitudinis suae, neque enim ab ullo periculo fortuna Principum longius abest, quam ab humilitatis.* Parcere igitur inimicis, infraque animum quaedam habere, viri magni, & sibi fidentis Principis, certum documentum. Aut secus, si ulciscatur, impotentiam animi, viriumque prodit, immo metum, nisi contemnat. Promptior igitur semper est, esseque debet, viros apud magnos, aut clementia, aut offensarum dissimulatio, & ex alto animi contemptus; Minimi siquidem è vulgo, exprobrando, & ulciscendo, projectiores, nè dum prima leviter transmittunt, ipsi velut impotentes agendi, contemnantur. Tamen Politicum aequè ac Catholicum ad morem, dissimulatio injuriarum prodest, minimis & maximis.

XXVIII. Prodesse Reipublicae, dicto, facto, ac praesertim impediendo, nè quid in legibus, vel populo fiat, quod non expedit. Prima ratio est, nullius sceleris aut probri, ut conscius sit, qui factum aggreditur, prudens occasionum, sciens rerum; Instat enim audacter, vetando, reprehendendo, corrigendo,

aut


aut secus sibi metum timet, hebescit & confunditur, prout integer ipse ante, vel notatus. Sequitur alterum; perfecti in Rempublicam ut sit amoris, tam proximi, quam Dei, res enim Dei, verè curat, qui Reipublicae, qua in, Religio & Ecclesia, proximorum res & amor, poena in malos, praemia in bonos, denique per omnia, iustitia, pax, & universorum bonum. Jam secus pro se, aut suis, qui timet, vel connivet, aut blanditur, parum is proderit; ut scripturae verbis, cuique civium, Reipublicae nomine, rectè dictum sit. *Si quis non odit Patrem suum, & Matrem, & uxorem, & filios, & fratres, & sorores, adhuc autem, & animam suam, non potest meus esse discipulus.* Inquam, si quispiam in gratiam publici, non futuri tantum spem commodi, negligere promptus, sed dudum habitorum, iacturam, immo periculum ipse pati, est paratus, amans Dei & proximi, is demum publico bono proderit; Aut secus facturus, non proderit, sed oberit.

*Hoc igitur fraterni pectoris, amicorum pignus, epistolae sub nomine, lubens cape, utique inter publicas turbas, solatium esto privatis, bono affectu, secum recipiari. Quid dico privatis? ambo publici senatus è numero sumus. Altius credo te, uti Praesulem, & me quàm Castellanum, haec mala Patriae feriant, quò altiora quietis publicae pignora, cuique insunt, aut condimenta, fama, nomen senatus, consanguinei, patrimonium; Sed tibi uti bono Praesuli, quid majus, ovilis CHRISTI, id est, sancta inter quietata, cura. Mibi autem profani, sed tamen casti amores, uxor, & colludentes in oculis liberi. Salva haec sint omnia. Utinam tu quoque Praesul Illustrissime, salvus.*

Kormaniciis Die X. Aprilis, Anno  
Dei Nati, M DC LXVI.



*Prærogativa Popularis status representatur.  
Monarchiam sapius, nisi Regnanti  
bonam.*



Non absurdum hoc loci dicto excurrere, & utilibus scitu, nonnihil immorari. Primas inter, contra veteres, politicorum novis, ratio placet, tantò magis præstare Monarchiam, Reipublicæ statui, quantò certius, unius mente, ad formam Divinæ Monarchiæ (ut putant) benè id est, perfectissimèquè, regitur illa. Verùm iimet, obliti imperfectionis humanæ, tot affectibus & vitiis in obliquum abeuntis, falluntur, si ab Rege unico, eandem prudentiam expectent. Potius, quantum humana distant à Divinis, tantum (utar communi verbo) proportionem claudicare necesse. Ecclesia quidem Catholica, Monarchicâ potestate regitur, sed DEI vicaria, cui CHRISTUS, assistentiam spiritus sancti, infallibilem perpetuamquè promissit, ut Pontifex (*idquè ex Cathedra docens*) errare non possit, ut homo, possit; res verò humanæ, seu Reges, laxius arbitrio politico relictis, errant sæpius, non tantum ut homines, sed gravius multò, ut Reges, dum insolescunt, nisi adsit vicissim, uti Politicis, Politica (ex libertate) non insolescendi custodia, utpotius documento Ecclesiasticæ Monarchiæ, firmitus statuatur, nisi Divina, dum sunt absolutissimæ prudentiæ, Monarchica potestate benè regi, cum necessaria tamen, dum ad homines referuntur, infallibilitatis asssecuratione. Jussa Divinorum, æqua, suavia, edquè onus obedientium leve, politicas potestates, perfectamin emergentes casus perspicaciam, ex collatione virtutis multarum personarum & prudentiæ, nisi posse habere, velut fit in Rebuspublicis Monarchico popularibus, ubi nec populus sine Rege, nec Rex sine Senatu, Comitiorumvè consensu, quidquam potest, Comiticia suadent, ac tuentur populi salutaria, Rex præit, ac unit per auctoritatem, disgregata; Quasi necessaria hominis cum homine, & status superioris cum inferiore, requiratur avimorum societas, immò unius in alterum amor, eoquè nexu, *velut concordia partium, jussè imitentur,*

tur, immò ut coalescant in unitatem. Minor deindè adsit præsumptio sui, & in alios contemptus, dum unus alterius opis indigus, superior sine inferioris auxilio, prudentia & consilio, subsistere non potest, immò nè erret, conferre tenetur. Rectè Aristoteles in Politicis. *In Republica, quod singuli præstare nequeunt, solent universi, hic suam, alius suam virtutem adfert, omnes utiles sunt. Plures enim, quorum singuli boni non sunt, si convenient, paucis illis, virtute poterunt esse potiores, non ut singuli, sed ut omnes, sapiunt enim amplius multi, quàm unus.* Aliàs absoluta Principum potestas aliorum ut plurimum consilia contemnit, nè opis alienæ indiga videatur, & agit non rarò per insolentiam, remoto libertatis custode; Undè, in grandes incurritur errores, in populum certa promanat pressura, & calamitas, dum absolutam potestatem, in Principe moderari, aut coercere per legem difficile, potius (velut Gramondus Gallicæ Historiæ lib. V.) *Si perstat Rex, propositi tenax, superesse cæcam obedientiam.* Exindè obstupui, Reipublicæ, fortiquè meæ gratulatus sum, dum apud eundem Gramondum legi. *Sub finem Martii parandæ Rex pecuniæ, edicta ad Parlamentum Lutetianum mittit, actis inferenda, quia populus exitiosa erant, procrastinare Parlamentum, Rex iterare jussa* (quid pluribus) *Per Verræum Procancellarium, jubet edicta, non intellecta, sed nè lecta quidem, in acta redigi. Deprecatur per Verdunum (Parlamenti præsidem) Senatus. Tandem excaudit Rex, nec alia causæ cognitione, summo jure in acta referri, edicta mandat.* Aie, nunc, semel fortè factum, & excusa, non omnino, cum similis edicti gravitatem, apud eundem Historicum, posteriori cursu ætatis legis (*Lib. XV.*) Verùm nè in longum abripiar, apponam pauca, videlicet; si habendos consiliarios, Monarchico Principi, quisquè prudens suadet, quasi per se in omnes partes, (vitio non per omnia perfectæ humanæ prudentiæ) parum valituro, cur negent quoquè, nec procedant ultra? si idem Princeps, rectis consiliis abutatur, si suaderi nolit, quis eum (sublata libertatis auctoritate & custodè) in melius cogat, quis collapsa corrigat? quòd in Republica libera, tum in Regno misto populari, facilius, intraquè publicum amorem præstatur, ut necesse fatendum sit, bona, malaquè Regnorum, opes, & potentiam, magis à fortunæ discretionem (prout bonum, malumvè Principem,



sors nascendi populis obtrudit) dependere, quàm ex substantia causæ. Falluntur quoquè, & contra seipsos ratione luctantur, qui à Dictatura Romana, argumentum trahunt, expeditioris Monarchiæ, cum ex eo, non sequatur ratio in contrarium, sed immò ex vi libertatis factum sit, potuisse pro temporum necessitate, novam absolutamquè potestatem (tamen à vi libertatis dependentem) creare, circumscripto tempore coercere, iterumquè pristinam ad formam, pro arbitrio redire, dum intra breve tempus, abdicare se, periculoso libertati officio tenebantur, dum inquam erat Dictatura, sub libertatis potestate. Postquam verò, in Julio Cæsare, Augusto, Tiberio, & consequentèr aliis, perpetua dictatura (nec potestate, nec tempore circumscripta, sed diuturnitate in superbiam versa) adolevit, Reipublicæ libertas, nusquam reditura abiit, dum eò insolentiores fierent Cæsares regendo, quo magis essent unici & soli, potestatem superbam exercendo: *Non unitatem idèd Numericam, in unico solo, sed unitatem animorum, licet in pluribus, magis spectari, essequè fundamentum recti regiminis, & libertatis populi, quod in Veneta Republica, nostraquè Polona, & (si quæ dantur) aliis, facile videas, ubi non interrupta regendi sorte, tot sæculis, continua populi felicitas est, ex libertate, cum in Monarchicis statibus, pro genio nisi regnantium, per alternantes vices, sæpius verò mala, quàm bona (immò precaria) populis eveniat? Historias Regnorum revolve, & fateare. Vel si tamen obstinatiùs, Monarchiam præferant aliqui, supra Reipublicæ statum, utiquè Politicorum consensu, cadentis Reipublicæ, non alter descensus est quàm sub regimen unius, quasi ex altiori statu in inferiorem. Immò, si tædeat popularis status, & corrigere, vel insanire lubet, adest remedium in proximo, dum momento (pro populi voluntate) facilis transgressus, ad Monarchiam datur, non autem secùs, in statum popularem, si displiceat iterum gravis Monarchia; Ut enim in præceps semel datis corporibus, nullum amplius sui arbitrium est, etiam illud, extra potestatem populi, sed erit in regentis superba, & nusquam de jure suo remittente voluntate. Veritatem hodie, experiri placet, fortè Principem gravem nactus, pro asserenda libertate, & populari statu palam loquere, & contendere, nisi cras, periculo capitis, consilium luas, falsa me*

tunc

tunc dicere aie. Nemò igitur tam infanus, qui non liberum statum malit, aut volens amittat; Immò dixerim, nemo sanæ mentis, sub Reipublicæ & libertatis nomine vivens, puram Monarchiam optavit, aut volens, in eam transgressus est, sed astu, aut per potentiam circumventus, plures verò sub Monarcha libertatis ad nomen, & Reipublicæ, altiùs suspirarunt, modò illam parare, partamvè conservare scirent. Verùm dixeris, absoluto sub Dominatu, benè plerisque agi, præsertim cum in bonum Principem incurritur; Tamen illam etiam, precariam magis, quàm veram libertatem vocem, dum in confinio servitutis ac periculi, vita & sanguis populi quotidie manet, sub domino, cui dum iratus, momento sævire pro arbitrio, & impunè licet. Tutiùs utiquè, plena Reipublicæ in libertate, tum autoritate legis, perire non posse, quàm pro discretionem modò regentis & juxta periculum non periisse. Appositè in rem Divus scriptor. *Nemò mortalium, juxta viperam, securus caput somnos, quæ etsi non percutit, certè sollicitat.* Dicam clarius. In Republica dum vivitur, libertas velut in manu mihi, & est sub mea potestate, jam Monarchico sub statu, securitas est manu in aliena. Hic opportunè servit, fabulosa, sed non extra rem, philomelarum-quæstio, alterius, liberè per aera volantis, alterius in deaurata cavea, ad Palatium Principis, præ foribus expositæ, cum hæc Principem locum, domunculam pictam, vivendi commoditates, non suo labore, sed alterius operâ & industriâ quæstas, tetumquè tegendis coeli injuriis ostentaret, interim tamen, ad placitum Domini, cantum vocemquè intendendam, ajebat, nè parcio-rem, vel absit iratum, experiretur; Respondit, vicitquè illa prior: *Ego verò nemini obnoxia vivo, curâ propriâ, nec apparenti domo, sed non dependenti libertate.* Utiquè dixerim adhuc. Ab omni ævo, quisquis populus, meliori sorte fatorum (extricatus absoluta Regum de sub potestate) Reipublicæ nomen, sibi asseruit, omnium scriptorum calamo, & interpretum ore, felicitatem nactus ille dicitur, cum vero secùs, post nomen Reipublicæ, lapsus sub unius dominatum, cur? nemo hominum, libertatem vocet, sed amisisse potiùs eam dicat, & animitùs condoleat? velut (nè Græcas, aut alias Rerumpublicarum commemorem) Roma, post exactos Reges, servitutem pepulisse, libertatem sibi asseruisse dicitur, dein

D d 3

sub



sub Cæsarum Dominatum; & Monarchiam redacta, amissæ libertatis & Reipublicæ deploratur. Ore denique DEI, in poenam hominum, Monarchiam dari, testatum satis. Populus olim Israeliticus, sub iudicibus, in formam Aristocraticæ Politicæ, liberè vivens, experiri tandem Regium dominatum præcupiit, sed indignatus Deus, populo libertatis ingrato, insolentiam petitionis reprehendit, promittens se daturum, absoluti formam Regni, malaquæ Monarchicis statibus agnata, recensuit (1. Regum, Cap. VIII) *Hoc erit ius Regis, qui imperaturus est vobis. Filios vestros tollet &c. Filias quoque vestras, faciet sibi unguentarias, & focarias, & panificas, Agros quoque vestros & vineas, & oliveta optima tollet, & dabit servis suis, & segetes vestras, & vinearum redditus, addecimabit &c. Et non exaudiet vos Dominus in die illa, quia petiistis vobis Regem; aut si quæ sunt alia sacri textus, plena indignationis verba. Licet ille populus, non aliquid mali, verum speciem optimæ Monarchiæ obtendebat. Noluit populus audire vocem Samuelis, sed dixerunt: Nequaquam: Rex enim erit super nos, & erimus nos quoque, sicut omnes gentes, & iudicabit nos Rex noster, & egredietur ante nos, & pugnabit bella nostra pro nobis. Unde non tantum in poenam populis dari absolutam Monarchiam, sed illud quoque animadvertatur, ab ignavia populorum fieri, dum vigor ingenuæ mentis consenuerit, ut sui negligentes, alienâ curâ molliter haberi, jam præcupiant, ut videlicet, *Rex pugnet bella*, reliquam curam status, pro illis quoque suscepturus; Licet cardo constet populis, dum amissam lugent libertatem, immò deformem, dum serviunt servitutem; Non prius inquam liberum statum, in Monarchiam inclinari, quam dum insolentiâ, mollitiæ, ignaviâ, studio privati, & incuriâ publici, populus corrumpitur, ut verò ex corruptione sanguinis, morbus aut ulcera in corpore, sic absoluta *Monarchia*, certè in populis, non ex sanitate, nam & illa, ingenui populi, tum Libertatis, *morbus est*. Et crediderim facile, occulta ordinatione Numinis, pro ingenio populorum, absolutam Monarchiam, in has aut illas Occidentalis Europæ gentes, necesse immitti, quæ nisi terrore, absoluti dominatus teneantur, plenam insolentè vivant libertatem, ut sic ægrotare, magis sanum & conducibile illis sit, quàm planè sanari; Velut plurâ duella, occulta paricidia, venena, raptus, adulteria, & reliquos inquietæ mentis, priva-*

privatim & in publicum (nè dicam adversus Divina) ausus, alibi vidi, & notavi, quàm in nostra Polonia, cui per malignitatem scriptorum, solutior (imperitè certè) exprobratur Libertas, aut disordo imputatur. Fatear quidem, Polonorum etiam in statu, fato rerum, nunquam in humana stabilium, aliquid disordinis, non rarò commissum, non id tamen populi & status, verum regnantium vitio fieri, in quorum unica persona, *primi ordinis*, tota inclusa Majestas, & velut concentrata exequenti activitas (verum foeda quorundam scriptorum, in Reges fecit adulatio, aut in nostra malignitas, vel certè status imperitia, ut errores aulæ, infantis Populi, adscribe-rent vitio, tam rectè sibi scribere putantes, quantò atrocius, Libertatem populi, Remquæ publicam proscinderent iudicio, & calamo.) Secus ordo Senatorius ex multis, dein Equitum ordo tertius, adhuc ex pluribus componitur, unde disgregata inest, nec tam expedita actio, sed occasione Comitiorum, intimare, quid in obliquum deviatum, quid in melius fieri oporteat à Principe, immò contravenire, nè quid fiat in pejus, unicum officii habeat; Actio verò boni, tum vis *uniendi*, tota penes Regem *exequentem* est, qui supra invidiam positus, inchoare bonum, urgere, disgregata unire, valorem rebus dare, & instare potens, illum officii admonendo, hunc & alterum, ex vi legis, & populi placito (sequè necesse) corrigendo. Fecere id plurimi, ac præsertim optimus Regum, noster Stephanus Bathoræus, (& post alii) qui dum ipse bonus, ad ordinemquæ legis, & genium populi se componens, quàm in Polonia, pace bello totum ordinatum, quàm Populis benè. Quod si, nè sic quoque, autoritate Populi, Rex coërceatur, dein pro insita genti bonitate, lex *obedientiæ* protervo Regi non præstandæ, condonetur, *comparatione* tamen *pejoris*, felicem adhuc statum dixerim, dum plùs noceretur, si nulla populi autoritate, ille coërcitus, in placita modò sua ruens, voluntatem pro lege, impetum iussorum pro edictis haberet. In eligendo dein, in post optatiore, fortunam temporum præsentium, exspectatione futuri melioris, ac proxima spe, facile pensari, & eo condimento, reddi molliorem. Quia vero super hæc, parvum consilii secretum (ut singula eodem impetu percurram) Populæ statui exprobratur, nescio quare sit? præsertim rebus in magnis, quæ concernunt universorum bonum, vel dum meliorum civium paucio-

Prædictio mali aut intimatio melioris, est penes Senatum & Populum. Actio boni & executio, tum vis uniendi, est penes Regem. Autoritas ergo Regis, velut cæmentum rerum est.



paucioribus, res promptius agenda creditur. Nisi fatear, secretius haberi Monarchiæ consulta, dum pressuram universim omnibus, aut civium præcipuis, casum ex occulto coquunt, cadunt, machinantur, quæ non ante produntur, quam dum manum injecerint, & elicuerint innocuum sanguinem. Dum verò terrore, aut extrema vi pressis, tacere necesse, mæstam ac silentem servitutem, falsò pacem aut quietem appellant, immò dum cessatio temporaria servitutis est, falsò libertatem vocant. Secus depulsio, per legem injuriæ, clarumquæ nomen *Libertatis*, seditionis, & turbarum nomen habet, non quod verè sit, sed causâ oppressioni, civium contra promptiores. Pavidis secus, segnes, otiosi, sordidi innocentes habentur, & pacati; Gloria modestiæ tunc, vel gratia vocatur, turpis per ignaviam servitutis, dum pretium est. Quidquid adferant, pro sua Monarchico-politia, ingeniosi scriptores, non ex animo videntur facere, verum æmulari vulpis argutiam, (apud Æsopum) quæ fortè, amissâ caudâ, cæteris consorioribus, idem mutilationis genus, in decus & ornamentum, suadere dum venustè contendit, fecit frustra, nam aut irridebatur deformitatis, aut arguebatur, frivolæ rationis.



EJUS.

## DE IMPUDENTIA, EJUSQUE CAUSIS UNDE FONS MALI.

### TUM, QUI SUNT IMPUDENTES?

I. **I** Arvi Judicii homines, qui rectè dijudicare non possunt, quid decorum, quid honestum, sunt in aliquibus impudentes. Verum hi quoquo modo excusantur. Nisi aliàs, affectata sit rerum inscitia.

II. Viri temerarii, qui non ratione, verum impetu ac stultitiâ ducuntur. Huc spectant Morosi, Importuni, Intrusores non vocati. Dein viri leves, multiloqui, assentatores, etiam Joviales & faceti, qui sibi nimium indulgent, usque ad impudentiam, præsertim in familiaritatem se ultrò intrudentes, prout enim (dicto vulgari) *in multiloquio*, etiam in familiari facto, non deerit peccatum.

III. Audaculi, etiam Eloquentuli, ac evadendo periti, qui putant quidvis sibi impunè (vel ad excusationem) licere, præsertim si quid ante tentatum, ex optato successit.

IV. Viri passionari. *N. G.* Qui promptè laborant, Ira, Odio, Amore, Invidia, nam affectu in quemvis ausum obcæcantur.

V. Viri arrogantes, feroces & superbi, qui (sibi nimium fidentes) ex alto despiciunt, contemnuntquæ res & personas, labuntur facilè in insolentiam, vel impudentiam, quidquid enim malè egerint, falsæ titulo generositatis, (nè confundi videantur) ignominiam erroris non agnoscunt, verum sibi complacent, recti & liciti sub nomine, totum venditantes. Immò pergere in majores ausus, dum pertinacia est, constantiam, infractumquæ robur animi, falsò putant, aut imponunt, aut certè pervincunt, præsertim si quædam morum blandimenta, reliquis inescandis adhibent, cum in alios mali; Hinc sibi quisquæ metuit, nè in se quoquæ peccetur, nisi malint esse blandientes amici, quam redarguendo veraces, edque malitiam irritantes: Miram corrupti sæculi pravitatem vel errorem, cum promptè totum deferat, eorum fortunæ, tum amicitia, qui ulcisci nocerequæ possunt, dum volunt; Nolle, seu non posse nocere, despectui habetur; Nec aded amatur beneficium, quam timetur ultio, vel injuria: Verum hæc mollis, obliqui, & impotentis animi signa; Rectus, altior, fortis, sibi quæ fidens animus, irritatur, vel erigitur adversus, non frangitur.

VI. Præpotentes & summæ autoritatis viri; nam putant se excusari, & quidvis sibi licere, dum redargui vix possint, ac sperent impunitatem.

VII. Notatæ personæ, proclamatæ & infames, sunt in ulteriora impudentes, non ampliùs enim habent famam, quam perdant, juxta illud *Taciti*. *Apud prodigos fame, novissima voluptas est.* Et Suetonius de Nerone. *Nihil*



*hil eum patientius, quam maledicta populi tulisse, vel contemptu omnis famæ, vel nē fatendo dolorem, irritaret in pectus ingenia.*

Huc pertinent viri Umbratici, latebroſi, etiam ſolitarii, qui nec ſciri, nec aſpici ſua probra putant; Magna verò peccatorum pars tollitur, ſi peccantibus teſtis aſſiſtat.

VIII. Avari & quæſtuoſi, ſunt impudentes, quia lucri cauſa, totum agunt, & facile diſpenſant honeſtatem.

IX. Fatui & rationis expertes, ſunt plerumquē impudentes, non enim ſciunt, quod agunt. Etiam *Ebrii*, hoc loco commodē ponuntur, nam *ebrietas voluntaria inſania eſt*. Sed differt malefactum ebriorum, à fatuis, quoniam fatui, defectu rationis, errant perpetuò, (compaſſione aut excuſatione, non accuſatione digni) Ebrii ſecus, peccant voluntariò. Licet verò abeant à ratione, & inſaniant dū ſunt ebrii, tamen ſunt rationales, antequam inebriati, ſic ebrium non peccare, eſt in noſtra plena, libera, & ſobria poteſtate, nam ſi quæ ineſt inſania, non eſt ex antecedenti cauſa, ſed ex conſequenti vitio ebrietatis, nec ideo peccantes excuſantur. Eques non aſcendit duri oris cervicilquē equum, qui ſemel duxit in præcipitia, nec ſobrius, & rationalis homo, capiat Scyphum, mentem, rationemquē ſibi auferentem, & cauſantem mala. Niſi fortē ebrietas, ex aliquo cauſali, nec ſatis deliberato actu, (ipſequē malē ſanæ ebrietatis affectus) ſequatur.

X. Etiam conſanguinei, & qui pro diutina familiaritate, ſecum fidenter agunt, plerumquē in impudentes actus devolvuntur, vel ex eo, quod ſibi putent, totum, amicitia lege convenire, vel parcendum ſibi facile ſperant, etſi offenderint. Ex eo ſequitur. *Nimia familiaritas (vulgari dicto) facit contemptum.*

XI. Illi quoquē impudentes ſunt, quibus ſi caſu aliquid facere malē contigit, impunē ceſſit, nec poenam tulere, nequē (ſaltem) redargutionem, vel caſu, vel ob potentiam & impedimentum, reſpectu errantis, vel ex gratia, aut incuria, cohibere potentis.

XII. Neceſſitate preſſi, aut deſperati, quidvis putant ſibi licere, ſequē facile (quidquid egerint) excuſari. Huc pertinet extrema paupertas, & defectus.

XIII. Etiam ignorantia, vel errore, ſit ſæpē aliquid contra debitum honeſtatis.

XIV. Qui in alios, (aut ſaltem in *neceſſitatem*, vel *occaſionem*) cauſam malē facti transferre facile poſſunt, aut ſciunt, tūc habent praxim evadendi, ſunt plerumquē impudentes. Hi verò, publicē privatimquē, ſunt periculoſiſſimi.

XV. Qui gratiam multorum, lauto tūc familiari convivio, (ſucata amicitia, dictis factisquē in ſpeciem apertæ ſimplicitatis, ſolutionibus, aliſquē parandæ amicitia aptis rebus) paraviſſe ſe putant, ad inſolita & actionum illi-

illicita, ſæpē decurrunt, quod ſe excuſandos ab amicis ſperant, vel defendendos; vel quia, civilitatis & beneficentiæ fuco, multa vitiorum, facile aut obteguntur, aut condonantur. Huc referuntur homines, amænæ & ſubridentiſ faciei, tūc reſponſi, quibus pleraquē ab eo condimento vel recompenſativo, licet aſpera, excuſata, undē facile in dictorum actionumquē illicita, indebita, minore verecundia delabuntur, ſpecie molliorum duri, & graves, ſpecie amicitia fallaces, tantū abſunt à malefacto, quantum à prætextu, rebus adſtruere vel imponere ſcientes, publicē privatimquē honeſtatem extra, vel actionis debitum, facile committunt.

XVI. Viri vindicativi, implacabiles, & nocere per occulta ſcientes, etiam factioſi, (aut qui per litigia potentes) dū ſe metuendos reddunt, non facile ſibi putant, à quopiam rem malē actam exprobrari, cūc metuuntur, & quos offendere periculoſum, undē multa indebitē audent, & committunt.

XVII. Qui judicia in poteſtate habent, non ſe promptē lege petendos ſperant, quam in alios exercent, ſuamquē gratiam & favorem, ab aliis quærendam putant, non ut ipſi aliorum quærant. Huc pertinent Regum gratiā pollentes, quorum arbitrio res ſtant, & beneficia diſpenſantur, cuiſcunquē prodeſſe aut obeſſe, dūc velint, ſatis potentes.

XVIII. Ignorantia Dei, & Divinorum, tūc laxior conſcientia, Impudentia maxima cauſa, prout enim colentes Deum, ſunt virtuoſi, etiam virtutis incurii, ſunt agendo impudentes. *Impius cūc in profundum venerit, contemnit.*

XIX. Qui ex aliquo adjuncto virtutis, vel ex juſtitia morali, tūc politica, ſpecioſum agendi prætextum habent, ſæpē privatim publicēquē, actus impudentes & illicitos committunt, in favorem vel odium alterius, ſæpē ſub prætextu juſtitia exercent ſeveritatem, Aut ſecus, ſub nomine clementia, nocivam inducunt impunitatem; Deindē ex occaſione honeſti tributi, vel debiti, ſpoliant ſubditos vel amicum. Aut ſub prætextu licita defenſionis, inducunt bella, hoſtilitatem, oppreſſionem, actus injurioſos, rapinas, & in alios occidium. Quod vitium, in aulis Principum, & in miniſtris ſtatuum, præcipuē dominatur, quibus ſub ſpecie curationis, velut *medicis*, impunē occidere licet. Sic prætextu liberalitatis, ſæpē ſunt multi prodigales, prætextu authoritatis ſuperbi, prætextu Juſtitia litigioſi, in vaſores, uſurpatores, oppreſſores; ſpecie virtutis detractores, tūc cenſores rerum ac perſonarum injuſti. Sub velo pietatis, aut virtutis, hypocrita; amicitia tūc negotiorum fallaces. Demūc ſpecie ſervandi aut faciendi in publicum ordinis, populo, aut ſingulis graves, novitatum inveſtores, pleriſquē injurioſi, vel prout eſt potens, ac ingenioſiſſima nequitia eorum, qui *ſpecie remedii nocent*, rebus larvam quam volunt, inducere ſcientes.

Huc proximē referuntur, honorum & comamodorum ardentes æmuli, nam obcæcantur animo. rectē Tacitus. *Peſſimum veri affectus venenum, ſua cuiſquē utilitas.*



Inter con-  
scios, cen-  
sentur  
etiam,  
Consan-  
guinei,  
familia-  
res, &  
Domestici.

XX. Fimus etiam facile, dicto, facto, impudentes, coram iis, qui ejusdem sunt, prout nos erroris aut flagitii. Eoque magis, si fiant adhuc nobis peiores, nostrorum verò defectuum, sunt antè conscii. Prioris causa, quia similia, prout sibi cognata, non facile accusantur, aut exprobrantur, in eandem de semet culpam, vel experiendam censuram; Causa posterioris, quia nostra utcunque minora flagitia, vel errores, minus probrosi videntur, peiorum comparatione; dumque nostra priora flagitia, dudum sciuntur, nihil novæ ignominiae, ex præsentis facto, accessurum nobis metuimus, eoque perseveramus impudentes.

XXI. Etiam simplices, innocentes, nec in rebus versati, tùm ignorantes, aliquid indebitum committere possunt, sed hi facile excusabiles. Etiam homines non ingenuè educati, & parvæ politici, rurani, tùm à cultiore vivendi cætu segregati. Deinde peregrini & advenæ, gentis morem, legemque prorsus nescientes, neque assuefacti, pleraque committere facile (contra debita morum, rerumque) possunt; sed facile excusantur.

## F I N I S.

## A D D E N D A.

Pag. 28. *lm. 21. post verb. linteæ, adde,* aliaque. Tùm ob eam causam, quia in operatis opus simul & materia, duplici lucro incolarum venduntur, in occasionem ditandæ Provinciæ, & artificum in varias operas, nec otiosam vitam, provocando ingenio.

Pag. 83. *post lm. 22. causâ sunt, adde,* vel fortè, dùm populus, bonos dominos nactus, totam suam curam, in eos reponendo, sibi negligens redditur, non ad suam culpam, si quid ex se mali, verum ad incuriam dominorum, parandæ invidiæ totum refert.

Pag. 91. *circa finem post vulgus pensat, adde,* ut malit sæpè lucrosam servitutem, quàm sine lucro, ac pauperem libertatem.)

Pag. 163. *lm. 16. & seq. lege,* vires tuas, suasque cognoscat hostis, & superbus reddatur, ideo non prodes impotentiam, temerè provocando, verum prudenter declinabis, simulando interea, omnia tibi esse fortiora, ante paciscendum.

Pag. 166. *lm. 10. & seq. lege,* persistant in acie, hastis aliquo sublimiori colle (à retrò) inter arbuta defixis in terram, &c.



BIBLIOTHECA  
UNIV. IAGELL.  
CRACOVENSIS







